

Xtiidx Dios

Santo Domingo Albarradas Zapotec New Testament

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

San Matew	4
San Marcw	34
San Lujc	53
San Juan	85
Ni been ree apóstoles	108
Gui'ch par ree bén Rom	137
Gui'ch yaloj par ree bén Corinto	150
Gui'ch barojp par ree bén Corinto	163
Gui'ch par ree bén Galacia	171
Gui'ch par ree bén Éfeso	176
Gui'ch par ree bén Filipos	180
Gui'ch par ree bén Colosas	183
Gui'ch yaloj par ree bén Tesalónica	186
Gui'ch barojp par ree bén Tesalónica	189
Gui'ch yaloj par Timoteo	191
Gui'ch barojp par Timoteo	195
Gui'ch par Tito	198
Gui'ch par Filemón	200
Gui'ch par ree bén Hebreos	201
Gui'ch bacaa Santiaaw	211
Gui'ch yaloj bacaa San Pedr	214
Gui'ch barojp bacaa San Pedr	218
Gui'ch yaloj bacaa San Juan	221
Gui'ch barojp bacaa San Juan	225
Gui'ch bayon bacaa San Juan	226
Gui'ch bacaa San Judas	227
Ni balüü Jesucrist loj San Juan	229

San Matew

Xdiaagulal Jesucrist (Lc. 3:23-38)

¹ Guie zëed laj ree bén naj xdiaagulal Jesucrist, bén zëed ree loj xdiaa rey Davi në loj xdiaa Abraham.
² Abraham brier laj xdad Isaac, abi' Isaac gojc xdad Jacob, guíaad Jacob gojc xdad Judá con ree bijchaman.
³ Dxel Judá cwa'man Tamar, abi' guyu xi'n reeman brier laj reeman Fares con Zara. Fares gojc xdad Esrom, Esrom gojc xdad Aram.
⁴ Aram gojc xdad Aminadab, Aminadab gojc xdad Naasón, Naasón gojc xdad Salmón.
⁵ Salmón gojc xdad Booz, guíaad xniaa Booz brier laj Rahab. Booz cwa'man Rut, abi' xi'n reeman brier laj Obed. Obed gojc xdad Isaí, ⁶ Isaí gojc xdad rey Davi. Dxel rey Davi con bén goc lacheel Urías guyu xi'n reeman brier lajman Salomón.

⁷ Dxel Salomón gojc xdad Roboam, Roboam gojc xdad Abías, Abías gojc xdad Asa.
⁸ Asa gojc xdad Josafat, Josafat gojc xdad Joram, Joram gojc xdad Uzías.
⁹ Uzías gojc xdad Jotam, Jotam gojc xdad Acáz, Acáz gojc xdad Ezequías.
¹⁰ Ezequías gojc xdad Mainán, Mainán gojc xdad Amón, Amón gojc xdad Josías.
¹¹ Dxel Josías gojc xdad Jeconías con ree bijchaman, tiamp ni guzu ree bén Israel Babilonia zi'c Bén yu' ladxguiib.

¹² Chi ma barrii reeman Babilonia lod guzu reeman zi'c Bén yu' ladxguiib, gojl Salatiel, xdadaman gojc Jeconías. Dxel Salatiel gojc xdad Zorobabel.
¹³ Zorobabel gojc xdad Abiud, Abiud gojc xdad Eliaquim. Eliaquim gojc xdad Azor,
¹⁴ Azor gojc xdad Sadoc, Sadoc gojc xdad Aquim. Aquim gojc xdad Eliud,
¹⁵ Eliud gojc xdad Eleazar. Eleazar gojc xdad Matán, Matán gojc xdad Jacob.
¹⁶ Jacob gojc xdad Xiëb lacheel Li. Dxel Li gojc xniaa Jesús, Bén la gajc Cristo.

¹⁷ Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree Bén Israel Babilonia zi'c Bén yu' ladxguiib, abi' zachidaj generacion guyu diizd tiamp ni barrii ree Bén Israel Babilonia xt chi bidxin dxej gojl Jesucrist loj guidxliuj.

Gojl Jesucrist (Lc. 2:1-7)

¹⁸ Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios.
¹⁹ Abi' Xiëb guial najman benza'c, ad guyëntaman nusa'nxtuman Li. Beenman xgab niro'n-ladxaman laaman ralanzi.
²⁰ Per la'tgaj cayünman

xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxe bil tia' Li, din xindo nüüm por xSprijt Dios zëedix.
²¹ Tijb xindoniguaaw gac xi'n Li, yagu'l lajx "Jesús", din por laax gra ree xbejnx gac perdon xtol.

²² Gra ree ni guie gojc persi guzobj xtiidx Dios zi'c gunee Bén badëë xtiidxaman loj ree bejn, chi rëbaman:

²³ Tijb biinxdüb chu' xi'n, abi' chi galix grii lajx Emanuel, rën guiëban: Dios za'në dunuj ree.

²⁴ Chi baban Xiëb, dxel beenman zi'c gunabee xianjl Dios laaman, cwa'man Li, ²⁵ per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

Bignaj ree Bén rajc Jesús

² Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree Bén rajc, Jerusalén, laa reeman naj magos, za reeman niz oriente.
² Abi' gunabdiidx reeman, rëb reeman:

—¿Con xrey ree Bén Israel, Bén ma gojl? Din dunuj diizd duladxan baguiaa xbaalaman xanyabaa, zeel zio'pan din yazuxiban lojman.

³ Chi biguien rey Herodes zian, dád guyunawëëgaman, nëgajc gra ree Bén Jerusalén guyunawëëg.
⁴ Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo.
⁵ Dxel rëb reeman:

—Belén naj galaman, tijb guiedx naaz Judea, din ze bacaa Bén badëë xtiidx Dios loj ree bejn:

⁶ Läj Belén, tijb guiedx naaz Judea, majsi guiedx dobëz najl loj gra ree guiedxro' naaz Judea.

Per lasajquil din luguiedx Belén guin grii tijb Bén nabee

guiniaj tëëman da Bén Israel reen.

⁷ Dxel ralanzi gurejdx rey Herodes Bén rajc guin ree, persi gunabdiidxaman goc balüüloj bajl xanyabaa guin loj reeman.
⁸ Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxejlidi laax, laa gol bagojn gajc naj, din në naj chigzuxib lojx.

⁹ Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin

guzudxen. ¹⁰ Chi baguiaa reeman bajl guin, dád babaa reeman. ¹¹ Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nètëë mirra par xindo guin. ¹² Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

Zë reeman Egipto

¹³ Chi ma zia ree bën rajc guin ladx reeman, dxel balüüloj tijb xianjl Dios loj Xiëb loj bacaal, rëbaman: —Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguiil Herodes laax din gugüjtaman laax.

¹⁴ Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto. ¹⁵ Ni guzu reeman xt güjt rey Herodes. Zian guzobj xtiidx Dios ni gunee bën badëë xtiidxaman loj ree bejn, chi rëbaman: “Babedx da xi'nan Egipto.”

Gunabee Herodes guiët ree xindobëz

¹⁶ Chi gogbee Herodes guial basquiee ree bën rajc guin laaman, dád bidxe'chaman. Dxel gunabeeman guiët gra ree xindoniguiaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bën rajc guin guial ma gojc tio'p ijz ni baguiaa reeman bajl guin. ¹⁷ Zian gojc cumplid ni bacaa Jeremías, bën badëë xtiidx Dios loj ree bejn, chi rëbaman:

¹⁸ Biguien cha' tijb bejn guiedx Ramá, yu' guialroon në guialrbixdiaj, Raquelan cayoon por ree xi'nman, abi' ad rile't chu gusquiejn laaman guial güjt ree xi'nman.

¹⁹ Per chi güt Herodes, dxel balüüloj tijb xianjl Dios loj Xiëb loj bacaal lod zobj reeman, Egipto, abi' rëbaman lojman:

²⁰ —Bixche, cwa' xindobëz guin con xniaax. Gol baguij niz Israel, din ma güjt ree bën guyën nugüjt laax.

²¹ Dxel bixche Xiëb cwa'man xindobëz guin con xniaax, bayejc reeman niz Israel. ²² Per chi gogbee Xiëb guial Arquelao, xi'n Herodes, naj bën canabee niz Judea, bidxebaman naguij reeman niz ni. Dxel bagojn Dios laaman loj bacaal din che reeman niz Galilea, dxel zë reeman. ²³ Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bën badëë xtiidx Dios loj ree bejn, guial grii laj Jesús bën Nazaret.

Diidx gunee Waj bën baroobnijs bejn ree

(Mr. 1:1-8; Lc. 3:1-9, 15-17; Jn. 1:19-28)

³ Lën ree dxej ni bidxin Waj, bën baroobnijs bejn ree, loj yujbidx niz Judea catie'chaman xtiidx Dios.

² Rëbaman:

—Gol bayüjn xgab por xtolidi din ma zidyob xguialrniabee Dios.

³ Xcwent Waj guinan bacaa Isaías, bën badëë xtiidx Dios loj ree bejn, chi rëbaman:

Rguien cha' tijb bën rbidxa' niz loj yujbidx, rëbaman: “Gol beenchaaw xnejz dux Dad ree Dios, gol guxhal tijb nejz nali.”

⁴ Con guidxlad camell gojcnë xab Waj, abi' lënman bixii tijb guid. Gudaw tēëman bi'tsu con dxijn yu' dajn.

⁵ Dxel bën Jerusalén ree në los demazri ree bën Judea nètëë gra ree bën zobj gadëd ro' guiw Jordán, brii reeman bicaagdiajg reeman ni rniee Waj. ⁶ Dxel guxhoobdol reeman, abi' baroobnijs Waj laa reeman loj guiw Jordán guin.

⁷ Per chi baguiaa Waj zien ree bënfarisew në ree bën saducew bidxin din tiobnijs reeman, rëbaman loj reeman:

—Xi'n xindxab! ¿Chu bagojn lëjt din laadi loj castiro' ni zëed? ⁸ Gol gubajn zagdxë din guiguien guial waliq-uidi ma bayüjndi xgab por xtolidi, ⁹ abi' ad bal rlies xvalorgajquidi, rëbidi: “Dunuyn zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham. ¹⁰ Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn yag chi ad rtiatan, rutüügaman laan din che'can. ¹¹ Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bën zidnal naj, laaman guroobnijs lëjt con xSprijt Dios con në bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. ¹² Abi' zi'c raya trigo zian güünnëman bejn. Din bën zinal ree xnejz Dios chinëman laa reeman lod rniabeeman, guiaad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

Gurobnijs Jesús

(Mr. 1:9-11; Lc. 3:21-22)

¹³ Lën ree dxej zii guza Jesús niz Galilea wejman ro' guiw Jordán lod za' Waj, din guroobnijs Waj guin laaman. ¹⁴ Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

¹⁵ Dxel rëb Jesús lojman:

—Yo guna gac zian, din mazri zagdxë yaguieen gra zi'c rniabee Dios.

Dxel cwëjb Waj baroobnijsaman laaman. ¹⁶ Chi gulox guroobnijsaman, naabzi bariiman loj nijs guin, dxejcz bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. ¹⁷ Dxel biguien cha' tijb bejn xanyabaa, rëbaman:

—Bën guie naj da Xi'nan, bën rën da'tan bën rabaanë tēën.

Gojc Jesús prueb

(Mr. 1:12-13; Lc. 4:1-13)

4 Dxel binë xSprijt Dios Jesús niz loj yujbidx, din güün xindxab laaman prueb.

² Ni guzuman tiuu dxej tiuu guiaal sin guialraw, dxel gulaanman. ³ Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

⁴ Per badxi' Jesúsán rëbaman:

—Loj xtiidx Dios rëb: "Ad ganaxtizi guiadxtil guiban bejn, nëgajc gra diidx rniee Dios."

⁵ Dxel binë xindxab guin laaman Jerusalén, abi' gulë'pix laaman guijc yadooro' zobj luguiedxzii, ⁶ abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlaman din guinia reeman lüj. Guiniaaz reeman lüj con yaa reeman chitëë ladx ni'czi tijb guiaj guia'l.

⁷ Badxi' Jesúsán, rëbaman:

—Rëb gajc loj xtiidx Dios: "Ad güünl prueb xDadil Dios."

⁸ Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxli-uj në ree guialnaza'c yu' loj reen. ⁹ Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

¹⁰ Badxi' Jesúsán, rëbaman:

—Biquied, xindxab, din loj gajc xtiidx Dios rëb: "Guna-jchi' xDadil Dios, tijbzi lojman been sirv."

¹¹ Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

Rzuloj Jesús rtie'chaman xtiidx Dios niz Galilea

(Mr. 1:14-15; Lc. 4:14-15)

¹² Chi gogbee Jesús guial yu' Waj ladxguiib, bayejca-man Galilea. ¹³ Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabulón në Neftalí. ¹⁴ Zian gojc persi gojc cumplid ni bacaa Isaías, bën badëë xtiidx Dios loj ree bejn, chi rëbaman:

¹⁵ Bén Zabulón con ree bën Neftalí, në ree bën zobj gajxh ro' nijsdoo, nëtëë ree bën zobj xijch guiiw Jordán

con gra ree bën zobj niz Galilea, lod zobj ree bën ad najt bën Israel,

¹⁶ gra reeman gubajn loj xay.

Yan ma brii tijb biani par laa reeman, abi' biani guin guxhal xquiarguejn ree bën ad nabant xnejz loj Dios.

¹⁷ Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëed gajxh xguialrniabee Dios.

Rbejdx Jesús tajp ree bën gac xbejnman

(Mr. 1:16-20; Lc. 5:1-11)

¹⁸ La'tgaj caza Jesús gajxh ro' nijsdoo Galilea, baguiaaman Simón bën la gajc Bëd con bijchaman Andrejs. Cuzaal reeman guijxh loj nijs din guiniaaz ree-man bëjl. Guial laan naj xchiin reeman. ¹⁹ Dxel rëb Jesús loj reeman:

—Gol tanal naj, din gulün lëjt xhienaag güündi din guto'pidi bejn par Dios luar guiniaazidi bëjl.

²⁰ Loj hor guin gajc basa'n xguijxh reeman abi' zinal reeman laaman.

²¹ Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjn-chaaw xguijxh reeman. Dxel gurejdx Jesús laa reeman, ²² abi' basa'n reeman barcw guin con xdad reeman, dxel laa zinal gajc reeman laaman.

Rulüü Jesús zien ree bejn

(Lc. 6:17-19)

²³ Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xguialrniabee Dios, abi' bayüjn-man bën rdoob ree në gra ree bën rajc xhietëëz guial-guijdxan. ²⁴ Guidibczi niz Siria bire'ch xtiidx Jesús, abi' bidnë reeman bën cusagdiaj ree gadxagayaa ni mal në graloj ree guialguijdx, bën yu' ree xindxab luxdoo, në ree bën rëjtya', nëtëë ree bën ad rile't sulí, abi' bayüjn Jesús laa reeman. ²⁵ Dád zien ree bejn binal laaman, bën Galilea ree, bën zëed ree Decápolis, bën Jerusalén ree, bën zëed ree niz Judea në ree bën zëed stiblad ro' guiiw Jordán.

Ni balüü Jesús tijb guijc guia'

5 Chi baguiaa Jesús bën guixiuj ree, wë'paman tijb guijc guia' abi' gurejman, dxel gubig ree xbejn-man lojman. ² Abi' guzuloj culüüman laa reeman, rëbaman:

Xiquilbaa ree bejn

(Lc. 6:20-23)

³ —Xiquilbaa ree bën ragbee guial ryaadx gagnë Dios laa reeman, din por zian yayal reeman lod rni-abeeman.

⁴ Xiquilbaa ree bën yu'naya, din Dios yagu' luxdoo reeman zagdx.

⁵ Xiquilbaa ree bën naj bën chaawladx, din laa ree-man tia' guidxliuj ni rëb Dios gudëëdaman loj reeman.

⁶ Xiquilbaa ree bën rzajc zi'c chi rliaan bejn o chi re'-caman nijs zian rën da't reeman güün reeman zi'c rni-abee Dios, din Dios gagnë laa reeman din güün ree-man zi'c ruladxaman.

⁷ Xiquilbaa ree bën raya lasa', din zian yaya Dios laa reeman.

⁸ 'Xiquilbaa ree bèn naya loj Dios, din laa reeman guguaa laaman.

⁹ 'Xiquilbaa ree bèn rüjn naguiejn cwedxenë lasa', din laa reeman grii laj xi'n Dios.

¹⁰ 'Xiquilbaa ree bèn cadëd loj guialzi por graloj ni rüjnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

¹¹ 'Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëë chi rudxiib reeman guijquidi graczi, guial najdi da bejnan. ¹² Gol badxe' luxdoodi nix, gol babaa tëë din naroob naj ni gunee Dios lojdi xanyabaa. Abi' lëjt ragbee guial ziangajc basagzi reeman bèn badëë ree xtiidx Dios loj ree bejn gocli chi gadidi gui't loj guidxliuj.

Lëjt naj zi'c zëd në zi'c bajl

(Mr. 9:50; Lc. 14:34-35)

¹³ 'Lëjt naj zi'c zëd loj guidxliuj guie. Per bal id naxi-jran, xhieza naag yayaican naxij zatijb? Achetri dxiin güünan, gaz guire'chan abi' chë'p ree bejn guijcan.

¹⁴ 'Lëjt naj zi'c tijb biani loj guidxliuj guie, naj tëëdi zi'c tijb guiedx ni riga' tijb guijc guia' abi' ad zajct guiguie'chan. ¹⁵ Ad ritiaguij tëët tijb guij par guida'cwan lën tijb yagalm, rtiaguijn persi rzojban ya din gusnin loj gra ree bèn yu' lënü. ¹⁶ Ziangajc lëjt, gol gojc zi'c biani loj ree bejn, din chi guguaa reeman ni zagdxë cayüjn-di guza't reeman xDadidi Dios zagdxë bèn yu' xanyabaa.

Rulüü Jesús xcwent ley

¹⁷ 'Ad naladxidi zialan par günan ley tibladi, ley ni badëë Dios loj Moisejs o ni balüü ree bèn badëë xtiidx Dios loj ree bejn, zialan par günanan cumplid. ¹⁸ Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac. ¹⁹ Zianan zeel bèn ad ruzoobt tijb mandamient ni zëëd loj ley guin majsi nidobëz naj mandamient guin, bal rulüü tëëman bejn ree güün reeman zian, laaman lasajc ta'nzi lod rniabee Dios. Per bèn ruzoob gra ree mandamient ni zëëd loj ley guin, rulüü tëëman bejn ree guzoob reeman laan, laaman naj mazri bèn lasajc lod rniabee Dios. ²⁰ Zeel naj rni lojdi, bal id zabajndi mazri zagdxë guial loj ree mextr rajc ley në ree bën-farisew, ad zayaltidi lod rniabee Dios.

Rulüü Jesús xcwent guialrdxe'ch lasa'

(Lc. 12:57-59)

²¹ 'Lëjt ragbee guial rëb Dios loj ree xbéngulalidi: "Ad gugüjtil bejn, din bèn gugüjt bejn yayalaman casti."

²² Per naj rni lojdi, chutëëz bèn rdxe'chnë lasa', yayalaman casti, në bèn rniee diidxguijdx lasa' xt loj guxtis zajc cheman, guiáad bèn rëb loj lasa' achet sirv lüj, laaman yayal loj bajl yu' gabijl.

²³ 'Zeel bal zinël gon lën yadoo abi' yagaj rusaaladxil guial yu' bèn rdxe'chil, ²⁴ basa'nsii xgonl yagaj, yalojx-gaj babenë bèn rdxe'chil zagdxë, dxel ma zile' yayejqul din gusa'n xgonl.

²⁵ 'Bal chu bèn rudëed lüj loj guxtis, baya'nnëman di-idx zagdxë la'tgaj yu' tiamp, chitëë yayüman lüj loj guxtis, abi' guxtis guin nabee chu'l ladxguuib. ²⁶ Naj rni lüj, ad zariitil ladxguuib guin xtczi quixil gra ni na guxtis guin.

Rulüü Jesús xcwent guialrznë lacheel ben ren

²⁷ 'Lëjt ragbee guial loj ley rëb: "Ad sunël lacheel ben ren." ²⁸ Per naj rni lëjt, chutëëz bèn rüjn xgabmal chi ruguaaman tijb búngunaa, con laan ma beenman dol lën luxdoodan por búngunaa guin.

²⁹ 'Bal laagajc guiaalaj ladbeel rüjn din güünl dol, mazri zagdxë naj gulëen bazaalan zijt. Din mazri zagdxë naj nit tibladi guiaalajl luar che guidibil gabijl. ³⁰ Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxë naj nit tibladi yaal luar che guidibil gabijl.

Rulüü Jesús xcwent guial rala' lasa' bejn

(Mt. 19:9; Mr. 10:11-12; Lc. 16:18)

³¹ 'Ma bacaagdiajg tëëdi: "Chutëëz bèn rala' lacheel, ryal gudëëdaman gui'ch lojman guial ma bala' lasa' reeman." ³² Per naj rni lëjt: Xinguaaw rala' xbúngunaa, abi' ad za'nët búngunaa guin xin ren, laagajc laax cayüjn din sunë xbúngunaax xin ren. Abi' xin tia' búngunaa guin dolan cayüjnx.

Ad rayalt guza't xlia' bejn Dios

³³ 'Rëb tëë Dios loj ree xbéngulalidi: "Ad guza't xlia'di Dios, ryal güündi cumplid ni rëbidi gudëëdidi lojman." ³⁴ Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zojb Dios, ³⁵ ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. ³⁶ Ad guza't tëë guijquidi par chililadx reeman lëjt, din ni'qui tijb guidxguijquidi ad zajct güündi ni ya's o ni naquich ya. ³⁷ Zagdxeli con gol güjdx "an" o "a'n", din los demazri ree ni guinieedi loj xindxab zan.

Ad yadxi'di ni mal por ni mal

(Lc. 6:29-30)

³⁸ 'Lëjt ragbee guial loj ley rëb: "Bën cwëë guiaalajl, gulëë gajc guiaalajman. Guiáad bën cwëë layil, gulëë gajc layaman." ³⁹ Per naj rni lëjt: Ad yadxi'di ni mal por ni mal, bal chu chëëz xhajg ladbeedi, gol badëë stibladan chëëzaman. ⁴⁰ Bal chu bèn tilë lüj din cwëëx-uuman xmanguil, badëë në xchamarril tia'man. ⁴¹ Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro. ⁴² Chutëëz bèn rniab xhienin lojl, badëëdan, bal chu tëë rgui'n xhienin lojl ad bal cwexuul gudëëdilan.

Guyën bèn rdxe'ch lüj

(Lc. 6:27-28, 32-36)

⁴³ 'Ragbee tëëdi rëb ree bejn: "Guyën bèn rën lüj, bidxe'ch tëë bèn rdxe'ch lüj." ⁴⁴ Per naj rni lojdi: Gol guyën bèn rdxe'ch lëjt, gol gurejdx tëë Dios por ree

bén rzunal lëjt, din güün reeman lëjt ni mal. ⁴⁵ Din zian gaquidi xi'n xDadidi Dios bén yu' xanyabaa, din laaman ruslejn xgubijdxaman par ree benza'c në par ree benmal, ruscal tēēman guía par ree bén naban zi'c rayal në par ree bén ad nabant zi'c rayal. ⁴⁶ Din bal rēndi ganaxzi bén rēn lëjt, ¿xhieza tia'di loj Dios zian? Din xt bēndol ree rŭjn zian. ⁴⁷ Abi' bal ganaxzi bén rēndi rugajpdiozidi, ¿xhieza ni zagdxe cayŭjndi? Din xt bén ad nŭnbeet ree Dios rŭjn zian. ⁴⁸ Zeel gol gojc benza'c, zi'c naj xDadidi Dios bén yu' xanyabaa.

Xhienaag gagnē lasa' bejn

6 'Ad güündi ni zagdxe niz loj ree bejn naabzi par yadxaloj reeman lëjt. Din bal güündi zian, xDadidi Dios bén yu' xanyabaa achet gunee man lojdi. ² Zeel chi güünl yudar bén ryaadx xhienin, ad gutie'chil diidx par gagbee bejn xhie cayŭjnl zi'c rŭjn ree bén rusquiee, lēn ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman. ³ Zeel chi güünl yudar bén ryaadx xhienin, ni'czi loj xmiwda'til ad gül diidx ni cayŭjnl. ⁴ Mazri zagdxe lŭjzi gagbee ni cayŭjnl, abi' xDadil Dios laaman cuguiaa ni cayŭjn lŭjzi, laaman gunee ni rayalil.

Xcwent xhienaag cwedx guiniab bejn Dios

(Lc. 11:2-4)

⁵ 'Chi cwedx guiniabidi Dios, ad güündi zi'c rŭjn ree bén rusquiee, bén ruladx ree rzuli par cwedx guiniab reeman Dios lēn ree yadoo në ree xquin nejz, din yadxaloj bejn laa reeman. Din naj rni lojdi, laazan naj ni rayal reeman. ⁶ Per lŭj chi cwedx guiniabil Dios, bayu lēnŭ lidxil, basiaaw ro' port, dxe gurejdx gunab Dios bén za'nē lŭj. Abi' laaman cuguiaa ni cayŭjn lŭjzi, laaman gunee ni rayalil.

⁷ 'Chi rbejdx rniabidi Dios, ad radxi'di diidx guin guiē'tzi guiē't naabzi par gacxhie xtiidxidi, zi'c rŭjn ree bén ad nŭnbeet Dios. Din laa reeman naladx guial zien ni rniee reeman mazri guidxga' Dios laa reeman. ⁸ Ad güündi zi'c rŭjn reeman, din xDadidi Dios ma ragbeeman xhie ryaadxidi chi gadidi guiniab laan. ⁹ Zeel chi cwedx guiniabidi Dios, gol gŭjdx:

Dad, lŭj yu' xanyabaa,
rayal yaya'p da'tan lajl respejt.

¹⁰ Gac zi'c rniabeel.

Gac zi'c rēnl loj guidxliuj zi'c rajc xanyabaa.

¹¹ Banee ni yadaawan guixie guixie.

¹² Been dunujn perdon gra ree ni mal ma baguieenan zi'c raguieenan perdon bén rŭjn ree dunujn ni mal.

¹³ Ad guslaal dunujn yaguieenan dol, babēē dunujn loj gra ni mal.

¹⁴ 'Din bal güündi perdon bén rŭjn lëjt ni mal, ziangajc xDadidi Dios bén yu' xanyabaa zŭjn gajcaman perdon xtolidi. ¹⁵ Per bal id zŭjndi perdon bén rŭjn ree lëjt ni mal, ziangajc xDadidi Dios ad zŭjntaman lëjt perdon.

Xcwent guialrba'n

¹⁶ 'Chi rba'ndi ad güün lojdi naya, zi'c rŭjn ree bén rusquiee din guguiaa bejn guial naba'n reeman. Naj rni lojdi, guial laazan naj ni rayal reeman. ¹⁷ Per lŭj, chi rba'nl, gudiib lojl gudŭjn tēē guijquil ¹⁸ chitēē gagbee ree bejn guial naba'nl. Tijbzi xDadil Dios bén za'nē lŭj naj bén gagbee laan, abi' laaman gunee lŭj ni rayal tia'l.

Guialnaza'c yu' xanyabaa

(Lc. 12:33-34)

¹⁹ 'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaaan cwan laa reen. ²⁰ Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tēēt xingubaaan cwan laa reen. ²¹ Lod gapil guialnaza'c guin yagaj su luxdool.

Guiaaloj bejn naj zi'c biani

(Lc. 11:34-36)

²² 'Guiaaloj bejn naj zi'c tijb biani par xcuerpaman. Zeel bal cayŭjnl ni zagdxe, guidib xcuerpil rajp biani. ²³ Per bal cayŭjnl ni mal, guidib xcuerpil naj zi'c lod nacay, zi'c naj lod nacaybuu.

Dios ya o milia

(Lc. 16:13)

²⁴ 'Ad zile't chu güün sirv loj tio'p patron, din zadxe'chaman tijbaman abi' guiēnman stijbaman, o gacaman benza'c con tijbaman abi' ad zēntaman stijbaman. Zeel ad zile't güündi sirv loj Dios në loj milia.

Achetczi rayal chu' bejn xgab

(Lc. 12:22-31)

²⁵ 'Naj rni lëjt: Ad chu'di xgab por ni gawidi në por ni guiē'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. ²⁶ Gol baguiaa ree be rzuj xanyabaa, ad rxŭbint reeb, ad rato'p tēēt reeb guialnaza'c, ad naj tēēt lod cu'chaaw reeb guialnaza'c guin. Per xDadidi Dios bén yu' xanyabaa rudēēd ni raw reeb. Abi' mazri lasajquidi guial loj reeb. ²⁷ Abi' tēē, ¿wen guial ru da'tidi xgab ma güün lëjt mazri ziool ya?

²⁸ '¿Chexquiza zeel dād rudi xgab por xabidi? Gol baguiaa xhienaag rni's ree guiaa dajn. Achet dxiin rŭjn reen ad rguib tēēt reen, ²⁹ per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. ³⁰ Abi' bal gui'xh dajn ruzujchaaw Dios yan, majsi guixiezi che'can. Diidxgui lëjt bén ad rliladxza'ct ree laaman, nid zuneeman ni gacwidi ya.

³¹ Zeel ad rudi xgab xhie gawidi, o xhie guiē'di, o xhie gacwidi. ³² Din bén ad nŭnbeet ree Dios rŭjn zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbee chaaw xhienin ryaadxidi. ³³ Per yalojxgaj gol baguiil güündi zi'c rniabeē Dios, gol been tēē zi'c rēnman, dxe laaman

gunee gra ree ni ryaadxidi. ³⁴ Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

Xcwent guialrula'ch

(Lc. 6:37-38, 41-42)

7 'Ad gula'chidi bejn chitëë saquidi zian. ² Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt. ³ Ad gula'chidi bën ren por falt dobëz ni rajpaman, zagdxeli gol guyu xgab por falt narooob ni rajpidi. ⁴ Abi' bal mazri falt narooob rajpidi, ¿xoxa guiëbidi loj stijb bejn: "Ad laat naj ni rüjnl?" ⁵ ¡Bën rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: "Ad laat naj ni rüjnl."

⁶ Ad güündi naguiejn güüncwent ree bën ad rënt güüncwent xtiidx Dios, chitëë xhie güünnë reeman lëjt. Din bal güündi zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

Ni guiniabidi zaca'dan

(Lc. 11:9-13; 6:31)

⁷ Naj rni lëjt: Gol gunab loj Dios, abi' laaman gunee ni rniabidi. Gol baguillaman, zadxejlidi laaman. Gol gurejdx gunabaman, züjncwentaman lëjt. ⁸ Din bën rniab, zaca'man. Abi' bën rguil, zadxejlaman, guiáad bën rbejdx rniab laaman, züjncwentaman laaman.

⁹ Lëjt najdi dad, ¿wen zudëëdi tijb guiaj loj xi'ndi ya chi guiniabix guidxtil?, ¹⁰ ¿o zudëëdi tijb bëël ya chi guiniabix bëjl? ¹¹ Nacli lëjt najdi bëndol rajc rudëëdi ni rën xi'ndi. ¡Diidxgui xDadidi bën yu' xanyabaa, nid zudëëdaman ni zagdxel loj ree bën rniab laan ya!

¹² Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xtiidxaman loj ree bejn.

Port nadëë

(Lc. 13:24)

¹³ Gol been naguiejn din chu'di niz ro' port nadëë. Din port gulajg në nejz gulajg, laa reen naj ni zinë bejn loj nejz mal, abi' zien bejn zë loj nejz guin. ¹⁴ Per port nadëë guin në nejz nadëë guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejz guin.

Por ni rüjndi zayünbee ree bejn lëjt

(Lc. 6:43-44)

¹⁵ Gol gojp cudad con ree bën rusquiee rëb rudëëdi reeman xtiidx Dios. Din rulüü dád bën chaawladx reen, per rüjnzi reeman par gusquiee reeman bejn. ¹⁶ Per zayünbeedi laa reeman por ni rüjn reeman, din ad rtiat uv loj yaquiech ad rtia tëët higo loj gui'xh guiëch. ¹⁷ Zeel gra yag zagdxel rtia ni zagdxel lojn. Guiáad gra yag guijdx rtia ni guijdx lojn. ¹⁸ Ad rtiat ni guijdx loj yag zagdxel, ad rtia tëët ni zagdxel loj yag guijdx. ¹⁹ Gra yag ad rtiat ni zagdxel, rirugan dxel re'can.

²⁰ Ziangajc lëjt zayünbeedi laa reeman por ni rüjn reeman.

Ad grat bejn chu' lod rniabee Dios

(Lc. 13:25-27)

²¹ Ad grat ree bën na lon: "Dad, Dad," chu' lod rniabee Dios, ganaxzi ree bën rüjn zi'c rën da Dadan, bën yu' xanyabaa. ²² Dxejzii, zien ree bën na lon: "Dad, Dad, por lüj batie'chan xtiidxil, abi' guial baza'tan lajl balëen xinxab ree luxdoo ree bejn, baguieen tëen zien ree milagr guial baza'tan lajl." ²³ Dxel guiën loj reeman: "Ad benbeetczan lëjt, gol gubi'ca lon bëndol."

Tio'p loj cimiant

(Lc. 6:47-49; Mr. 1:22)

²⁴ Chutëëz bën rucaagdiajg da diidxan abi' rüjnman ni rën, laaman naj zi'c tijb bën nasin gules xcimiant lidx loj guiaj. ²⁵ Abi' gol guia, dxel biguiajt nijs ro' gubi' tëë bidoxh, gulaj reen lad yu guin, per ad gulenxantan guial naj xcimiantan loj guiaj. ²⁶ Per bën riguejn da diidxan abi' ad rüjntaman ni rën, laaman naj zi'c tijb bën ad nasint bazoob lidx loj üx. ²⁷ Abi' chi gol guia biguiajt nijs narooob, gubi' tëë bidoxh. Abi' gulaj reen lad yu guin zianz gulenxanan, ni'qui tibda'nan ad baya'nt.

²⁸ Chi gulox guneenë Jesús bën guin ree, graczi ree reeman badxa da't loj zi'c balüüman laa reeman, ²⁹ guial rulüüman laa reeman zi'c bën rajp guialrniabee, ad zi'c rulüüt ree mextr rajc ley.

Rayün Jesús tijb bën rajc guialguijdx la lepra

(Mr. 1:40-45; Lc. 5:12-16)

8 Chi baza Jesús ruguia' guin, dád zien bejn nal laaman. ² Dxel gubig tijb bejn lojman rajcaman guialguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

³ Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guialguijdx guin abi' bayaman. ⁴ Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

Bayajc xmojs tijb bën suldad rniabee ree suldad

(Lc. 7:1-10)

⁵ Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx, ⁶ rëbaman:

—Dad, laa da mojsan naga' lidxan ragxuux. Ad rile't chixchex, dád cusagzi guialguijdx guin laax.

⁷ Dxel rëb Jesús lojman:

—Gan din yayünan laax.

⁸ Badxi' bën rniabee ree suldad guinan, rëbaman:

—Dad, ad rayaltan chu' lidxan, per gunee diizd guie din yayajc da mojsan. ⁹ Din zi'c naj yu' ree bën rniabee naj, ziangajc naj yu' ree da suldadan xin rniabeen. Chi rën loj tijb reex: "Wej", rejx, chi rën loj stijbix: "Guda,"

ri'tix. Abi' chi rē loj da mojsan: "Been ni guin", rūjnxan.

¹⁰ Chi biguiejn Jesús zian, dád badxalojman abi' rēbaman loj ree bēn zinal laaman:

—Naj rni lojdi, ni'qui Israel ad wadxaaglojtan tijb bēn rliadx Dios zi'c rliadx bēn guin Dios. ¹¹ Naj rni lējt, dád zien ree bēn gralad yayal gawnē Abraham, nē Isaac, nē Jacob lod rniabee Dios. ¹² Guiáad ree bēn rayal niu lod rniabee Dios, laa reeman yayal lod nacay da't lod goon reeman lod gaw tēē lay reeman.

¹³ Dxel rēb Jesús loj suldad rniabee guin:

—Baguij lidxil, gac tēē zi'c ma bililadxil.

Abi' loj hor guin gajc bayajc xmojs bēn guin.

Rayūjn Jesús xnasuegr Bēd

(Mr. 1:29-31; Lc. 4:38-39)

¹⁴ Chi we Jesús lidx Bēd, baguiaaman xnasuegr Bēd naga'man yu'man xliaa. ¹⁵ Dxel gunaazaman yaaman, abi' bariiman xliaa guin, dxel bixchewan guzuloj cuyanman laa reeman.

Rayūjn Jesús zien ree bēnragxuu

(Mr. 1:32-34; Lc. 4:40-41)

¹⁶ Chi ma caxhin, binē ree bejn zien ree bēn yu' xindxab luxdoo loj Jesús. Abi' con tijb diidx ni gunee-man babēēman xindxab guin luxdoo reeman, bayūjn tēēman gra ree bēnragxuu. ¹⁷ Zian gojc persi gojc cumplid ni rēb Isaías, bēn badēē xtiidx Dios loj ree bejn, chi rēbaman: "Laaman zignē dux guialguijdx ree, laa tēēman zignē dux guialzi ree."

Bēn rēn chinal Jesús

(Lc. 9:57-62)

¹⁸ Chi baguiaa Jesús bēnguixiuj nayaw laaman, gunabeeman tēdaman stiblad ro' nijs naj yagaj. ¹⁹ Dxel gu-big tijb mextr rajc ley loj Jesús, rēbaman:

—Mextr, rēnan guidnaalan lūj bantēēz guin chel.

²⁰ Abi' rēb Jesús lojman:

—Bēz ree yu' xbilaa reeb, abi' ree biguijn yu' xguixbitia's reeb. Per Bēn guxhaal Dios ni'qui lod quixh guijcaman ad yu't.

²¹ Dxel rēb stijb ree bēn zinal laaman:

—Dad, baslaa naj gabenē' da dadan xt chi guiētanman.

²² Per rēb Jesús lojman:

—Tanal naj, basa'nman con ree bēn ad rēnt guidnal naj, laa reeman guquie'ch laaman chi guiētaman.

Racwēēz Jesús bidoxh

(Mr. 4:35-41; Lc. 8:22-25)

²³ Guyu Jesús loj barcw con ree xbejnman, ²⁴ abi' la't-gaj zē reeman loj nijs guin dxejlczi gubi' tijb bidoxh, ma cazēēbczi barcw guin xan nijs. Per Jesús naga'yēsaman. ²⁵ Dxel bicwēēn ree xbejnman laaman, rēb reeman:

—iDad, gunaj dunujn! iMa cayzēēban xan nijs!

²⁶ Badxi'man laan rēbaman:

—iChexc zeel dád rdxebidi? iChexc zeel ad rliadxza-ctidi naj?

Dxel bixchewan abi' gunabeeman bacwēēz bi guin nē nijs guin. Loj hor ziigajc babedxe reen. ²⁷ Abi' ree xbejnman badxa da't loj reeman, zianz gunabdiidx loj lasa' reeman, rēb reeman:

—iChu bēn guin, zeel xt bi nē nijs ruzoob xtiidxaman?

Tio'p ree bēn yu' xindxab luxdoo

(Mr. 5:1-20; Lc. 8:26-39)

²⁸ Chi bidxin Jesús stiblad ro' nijs guin, loj xguidxliuj ree bēn Gadara, dxel tio'p ree xinguaaw yu' xindxab luxdoo brii reex lad ree baa abi' wej reex loj Jesús. Dád nadoxh reex, zeel ad rile't chu tēd lunejz guin. ²⁹ Chi baguiaa reex Jesús, gurixdiaj reex rēb reex:

—iXhie rēnl con dunujn, Jesús, Xi'n Dios? iZēēdil guie ya din gusagzil dunujn chi gadli dxej guidxin?

³⁰ Per gajxh yagaj za' zien ree cūch, cayaw reeb,

³¹ abi' guzajc ree xindxab guin liaadx loj Jesús, rēb reex:

—Bal yabēēl dunujn, banee mod yadxu'n lēn ree cūch guin.

³² Dxel rēb Jesús:

—Gol wej.

Dxel barii ree xindxab guin luxdoo ree bēn guin bayu reex lēn ree cūch guin. Abi' gra reeb guzuloj cuxūn zianz bitidia' reeb ro' tijb bala' xt loj nijs, lod gu' reeb nijs abi' gūjt reeb.

³³ Abi' ree bēn cayajp cūch guin ree, baxūn reeman. Dxel chi bidxin reeman luguiedx guin, be reeman diidx gra ni goc nē gra ni guzac ree bēn yu' ree xindxab guin luxdoo. ³⁴ Dxel gra ree bēn guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

Bayūjn Jesús bēn nējt xcuerp

(Mr. 2:1-12; Lc. 5:17-26)

9 Dxel bayu Jesús loj tijb barcw, badēdaman stiblad ro' nijs guin abi' bidxin ladxaman. ² Yagaj binē ree bejn tijb xin nējt xcuerp, naga'x loj da. Chi baguiaa Jesús guial rliadx reeman laaman, rēbaman loj xin ragxuu guin:

—Bagu' luxdool zagdx, xi'n. Ma benan perdon xtolil.

³ Dxel tio'p choon ree mextr rajc ley been reeman xgab: "Diosan rūjnx tiblax guial rnieex zian." ⁴ Per guial gogbee gajc Jesús xhie xgaben cayūjn reeman, dxel rēbaman loj reeman:

—iChexc zeel rūjndi xgabmal? ⁵ iConin mazri nawēēg gac? iGuial guiēn ya: "Ma benan perdon xtolil" o guiēn: "Bixche, guza"? ⁶ Per yan, gulūn lējt guial naj, Bēn guxhaal Dios ra'pan guialrniabee loj guidxliuj guie par gūnan perdon dol ree.

Dxel rēb Jesús loj xin ragxuu guin:

—Bixche. Baca' ni go'til loj. Baguij lidxil.

⁷ Laa bixchegajquix zia lidxi. ⁸ Chi baguiaa ree bēn guin zian, bidxeb reeman, abi' baza't reeman Dios zagdx por guialrniabee ni badēēman loj ree bejn.

Rbejdx Jesús Matew

(Mr. 2:13-17; Lc. 5:27-32)

⁹ Chi baza Jesús yagaj ziaman, baguiaaman tijb xin la Matew. Zojbix lod ruquijix impuest, abi' rëbaman lojx: —Tanal naj.

Dxel bisu Matew zinalix laaman.

¹⁰ Tijb dxej chi cayaw Jesús lidx Matew con zien ree bén ruquijx impuest në ree bén zëëb xtiidx ad nabant xnejz, gra reeman zojbnë Jesús xan mex con ree xbejnman. ¹¹ Chi baguiaa ree bënfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi Bén ruquijx ree impuest në ree bëndol?

¹² Chi biguiejn Jesús ni rëb reeman, dxel rëbaman:

—Bénnadaan ree ad ryaadxt reeman doctor, bënragxuu ree laa reeman ryaadx doctor. ¹³ Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree bëndol, din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mr. 2:18-22; Lc. 5:33-39)

¹⁴ Dxel ree xbejn Waj, Bén baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bënfarisew dád zien-volt raba'nan, guiáad ree xbejnl ad rba'nt reeman?

¹⁵ Badxi' Jesúsán rëbaman:

—Lod yu' guialruxhliaa, ¿wen runaya ree biooz ya chi za'në xin cuxhliaa guin laa reeman? Per guidxin dxej chiquiedix, dxel guiba'n reeman.

¹⁶ Achut rata' lajd cüb loj lajd yojx din zaxü'n lajd cüb guin, abi' mazri quixya'n lajd yojx guin. ¹⁷ Ad rgu' tëët reeman vin cüb lën anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

Bayajc xi'n Jairo në búngunaa bagaal xab Jesús

(Mr. 5:21-43; Lc. 8:40-56)

¹⁸ La'tgaj canee Jesús zian, bidxin tijb Bén rniabee lën xyadoo ree Bén Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

¹⁹ Dxel zinë Jesús laaman con ree xbejn Jesús. ²⁰ Abi' tijb búngunaa ragxuu ma gojc chiptio'p ijz ad rbëzt ryajbaman rejn, gubigaman niz xijch Jesús abi' bagaalamán guia' xabaman, ²¹ guial gunaladxaman: “Bal gugaalaman majsi xabzaman, zayajcaman.” ²² Per badxi' loj Jesús, abi' baguiaadxijchaman búngunaa guin, dxel rëbaman lojman:

—Zagdex bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc Bén guin.

²³ Chi bidxin Jesús lidx Bén rniabee guin, baguiaaman ma riga' ree xinrucwejdix din chiquie'ch reex xi'n-

man, abi' ree bejn roon rbixdiaj reeman guijquim.

²⁴ Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxnë reeman laaman. ²⁵ Chi ma barii reeman, zianz guyuman. Gunaazaman yaa bindo guin dxel bixchem. ²⁶ Abi' guidib niz yagaj bire'ch diidx ni goc.

Rayüjn Jesús tio'p bénlutia'p

²⁷ Chi baza Jesús yagaj, binal tio'p bénlutia'p laaman, rbixdiaj reeman, rëb reeman:

—¡Jesús, xdiaa Davi, baya dunujn!

²⁸ Chi badxin Jesús lod zojbaman, dxel bibig ree Bén guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

²⁹ Dxel bagaal Jesús guiaaloj reeman, rëbaman:

—Gac zi'c Rliladxidi.

³⁰ Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

³¹ Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

Rayüjn Jesús tijb bengop

³² Chi baza ree Bén bayüjn Jesús guiaaloj, dxel bidxin-në ree bejn tijb bengop, yu' xindxab luxdooan. ³³ Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

³⁴ Per ree bënfarisew rëb reeman:

—Bén guin rabëë xindxab luxdoo ree bejn por xguialrniabee gajc xindxab rniabee ree xindxab.

Raya Jesús bejn ree

³⁵ Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graloj guialrdoob në graloj guialguijdx ni rajc ree bejn. ³⁶ Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt. ³⁷ Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient Bén gulüü laa reeman yu'. ³⁸ Zeel gol gunab loj Dios din guixhiaalaman mazri ree Bén gulüü laa reeman.

Gulej Jesús chiptio'p ree apóstoles

(Mr. 3:13-19; Lc. 6:12-16)

10 Gurejdx Jesús chiptio'p ree xbejnman, abi' badëëman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguijdx.

² Bén guie ree naj guidxiptio'p ree xi apóstoles Jesús: Simón bén gulëëljajman Bëd, con bijchaman Andrejs, në Jacob con Waj, bén naj ree xi'n Zebedeo. ³ Në Felip, Tol, Tumajs con Matew bén baquijx impuest, nëtëë Jacob xi'n Alfeo con Lebeo bén la gajc Tadeo ⁴ në Simón bén bi'ch loj ree bén Cananistas con Judas Iscariote bén yayü Jesús.

Rxhiaal Jesús gra ree xbejnman chiglüü reeman xtiidx Dios

(Mr. 6:7-13; Lc. 9:1-6)

⁵ Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zobj ree bén ad najt bén Israel, ni'qui ree guiedx riga' niz Samaria, ⁶ gol chejli niz lod zobj ree bén Israel bén ad zinalt ree xnejz Dios. ⁷ Gol güjdx loj reeman guial ma zëëd gajxh xguialrniabee Dios. ⁸ Gol bayüjn bénragxuu ree, gol basban bén ma güjt ree, gol bayüjn bén rajc ree guialgujdx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

⁹ Ad chinëdi or, ni'qui plajt, ni'qui cobr, ¹⁰ ni'qui guijxh. Ad bal chinë stib nejz xabidi, ni'qui stib nejz xgurëchidi, ni'qui yagriiadxidi, din bén rüjn dxiin rayal gudëëd ree bejn ni gawaman.

¹¹ Chi guidxindi tijb guiedx o tijb ciuda, gol gule'c ruson chu bén naj benza'c yaya'ndi lidx, yagaj gol baya'n xt chi yazadi luguiedx guin. ¹² Abi' chi chu'di lënü guin, gol güjdx loj ree bén zobj yagaj: "Yabe'cdxe Dios luxdoodi." ¹³ Bal rayal reeman guialnaza'c guin, yaya'nan con laa reeman guiáad bal id rayal reeman laan zayejcan con lëjt. ¹⁴ Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxiijp guxyuj guia'di zi'c tijb sen guial ad bazoobt reeman xtiidxidi.

¹⁵ Naj rni lëjt guial dxej ni yadëëd ree bejn cwent loj Dios, mazri casti naroob yayal reeman guial loj ree bén Sodoma në Gomorra.

Guialzi ni zëëd

¹⁶ Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëë, gol gojc tëë nadoo zi'c palom. ¹⁷ Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo.

¹⁸ Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bén ad zinalt xnejz Dios. ¹⁹ Per chi chinë reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx ni guinieedi. ²⁰ Din ad lëjtman guiniee, xSprijt xDadidi Diosan guiniee por lëjt.

²¹ Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman.

²² Gra bénguidxliuj guidxe'ch lëjt guial najdi da bejnan, per bén sudxi'ch loj guial rliladxaman naj xt dxej chi-

gra guibanman, laaman yayal xanyabaa. ²³ Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

²⁴ Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. ²⁵ Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëëljaj ree bejn naj Beelzebú, diidxgui lëjt najdi da bejnan.

Chu rayal guidxeb bejn

(Lc. 12:2-9)

²⁶ Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn. ²⁷ Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. ²⁸ Ad rdxebidi bén rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

²⁹ Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. ³⁰ Guiáad lëjt xt guidxguijquidi graczan nayab loj Dios. ³¹ Zeel ad rdxebidi din mazri lasajquidi guial loj zien da't ree biguijndoo.

Bén rëb loj ree bejn guial najman xbejn Jesucrist

(Lc. 12:8-9)

³² Bén guiëb niz loj ree bejn guial da bejnanan, ziangajc naj guië loj da Dadan Dios bén yu' xanyabaa guial da bejnanan. ³³ Per bén guiëb niz loj ree bejn guial ad da bejntanan, ziangajc guië loj da Dadan Dios bén yu' xanyabaa guial ad da bejntanan.

Por Jesús rlia' lasa' ree bejn

(Lc. 12:51-53; 14:26-27)

³⁴ Rëb tëë Jesús:

—Ad zialtan par yabecdxen luxdoo bejn, zialan din guial chililadx reeman naj chu' wadijl. ³⁵ Din guial chililadx bejn naj, zadxe'ch xinguaaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim. ³⁶ Abi' laagajc bén zobj ree lënüliidxidi guidxe'ch lëjt.

³⁷ Bén rën xdad o xniaa mazczi guial lon, ad zajct gacaman da bejnan. Ziangajc bén rën xi'ngaan o xi'ndxa'p mazczi guial lon, ad zajct gacaman da bejnan. ³⁸ Bén rën guidnal naj, abi' ad rëntaman sagdiajman por naj, ad zile't gacaman da bejnan. ³⁹ Bén rnaijchi' guialnaban rajpaman loj guidxliuj guie, zadxin dx-ej gunijtaman laan, per bén guiët por naj, zajpaman guialnaban tiblayaa con Dios.

Ni tia' ree bejn

(Mr. 9:41)

⁴⁰ Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man. ⁴¹ Bén ridxga' ti-jb bén rudëë xtiidx Dios loj ree bejn, guial zëëdaman

por Dios, zaca'man lasa' ni rayal tia' bén guin loj Dios. Ziangajc bén ridxga' tijb Bén naban zi'c rën Dios, zaca'man lasa' ni rayal tia' Bén guin loj Dios. ⁴² Abi' chutëez Bén gudëed majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëed Dios tia' reeman.

Bigneenë ree xbejn Waj Jesús (Lc. 7:18-35)

11 Chi gulox rëb Jesús loj guidxiptio'p ree xbejnman con ree nin chiguieen reeman, dxel baza-man yagaj ziglūuman bejn ree xtiidx Dios loj ree guiedx riga' niz yagaj.

² Abi' Waj, la'tgaj yu'man ladxguib, cwa'man ruson gra ree ni cayūjn Jesús. Dxel guxhaal tio'p choon ree xbejnman, ³ bignabdiidx reeman lojman, rëb reeman: —¿Lūj nāj Cristo ya Bén nāj gui't, o yalëjzan ben ren ya?

⁴ Dxel rëb Jesús loj reeman:

—Gol chej gol gūjdx loj Waj ni cuguiaadi në ni cu-caagdiajguidi. ⁵ Gol gūjdx lojman guial ma ruguaa ree bénlutia'p, ma rajc rza ree bencoj, ma bayajc tēē ree Bén rajc guialgujdx la lepra, ma riguiejn ree Bén nacwa't guíaad ree bengūt ma baban reeman, abi' ree Bénprob ma caguiejn reeman xtiidx Dios. ⁶ Xiquilbaa ree Bén ad zucwëēzt chililadx naj.

⁷ Chi baza ree Bén guxhaal Waj, dxel guzuloj Jesús ca-neeman loj ree bejn xcwent Waj, rëbaman:

—¿Chu naladxidi nāj Bén biquiaadi loj yujbidx? ¿Nal-adxidi ya najman zi'c tijb biqui ni runiib bi? ⁸ ¿O xhien-aag nāj Bén biquiaadi? ¿Najman tijb Bén najcw lajd zagdx ya? Lëjt ragbee guial Bén rajcw ree lajd zagdx lën palas zojb reeman. ⁹ ¿Chuza biquiaadi? ¿Tijb Bén rudëē xtiidx Dios loj ree bejn ya? Per naj rni lojdi guial biquiaadi tijb Bén mazri zojbloj guial loj Bén rudëē xtiidx Dios loj ree bejn. ¹⁰ Wajn din laaman naj ben ruza't loj xtiidx Dios lod rëb:

Naj rxhial tijb Bén ned lojl,
ben gūünchaaw xnejzil.

¹¹ Naj rni lëjt, loj graczi ree bénguidxliuj, ad wayut Bén mazri zojbloj guial loj Waj. Per majsi zian, Bén ad zo-jblojt loj xguialrniabee Dios, laaman mazri zojbloj guial loj Waj.

¹² Diizd chi bi't Waj xt yan, zien bejn rñjn da't naguiejn chu' lod rniabee Dios. Abi' ree Bén rñjn da't naguiejn laa reeman chu' lod rniabeeman. ¹³ Diizd ley badëē Dios loj Moisejs con loj ree Bén badëē xtiidx Dios loj ree bejn, xt Waj, laa reeman gunee xcwent xguialrniabee Dios. ¹⁴ Abi' bal chililadxidi ni ganin lëjt, naj rni guial Wajn nāj Elías Bén badëē xtiidx Dios loj ree bejn. ¹⁵ Bén rën ree gucaagdiajg, gol bacaagdiajg.

¹⁶ ¿Xhienaag ganin lëjt nāj ree Bén riga' loj guidxliuj guie yan? Laa reeman nāj zi'c ree xindoo rguijt niz galay luguiedx, abi' rbixdiaj reex rëb loj lasa' reex:

¹⁷ “Bacwejdxdan bidxa, per ad baya'tidi, badoolan ni naya ree per ad biintidi.” ¹⁸ Din bi't Waj Bén baroobnijs bejn ree, ad rawtaman ad rë' tēētaman vin, abi' rëbidi xindxab yu' luxdoodan. ¹⁹ Yan, bi't Bén guxhaal Dios,

rawaman rë' tēēman vin abi' rëbidi nalaman ruladx tēēman guië'man, ruchajg tēēman bëndol ree con ree Bén ruquijx impuest. Per ree Bén ma ca' xguialrniabee Dios, por laa reeman rguien guial gra ni rñjn Dios nāj zagdx.

Bén ad bazoobt ree xtiidx Dios (Lc. 10:13-15)

²⁰ Dxel guzuloj Jesús cadilëman Bén zojb ree guiedx lod beenman mazri zien ree milagr. Din Bén guin ree ad bayūjnt reeman xgab por xtol reeman, abi' rëbaman loj reeman:

²¹ —¿Probza lëjt Bén Corazín! ¿Probza lëjt Bén Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayūjn reeman xgab por xtol reeman, niajcw reeman lajd ya's nuroob tēē cobdëj guijc reeman zi'c tijb sen guial ma bayūjn reeman xgab por xtol reeman. ²² Per rnin lëjt guial dxej yadëēd ree bejn cwent loj Dios, mazri casti naroob yayalidi guial loj ree Bén Tiro në ree Bén Sidón.

²³ Guíaad lëjt Bén Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. ²⁴ Per rnin lojdi guial dxej yadëēd ree bejn cwent loj Dios, mazri casti naroob yayalidi guial loj ree Bén Sodoma.

Gol guda lon din yaziiladxidi (Lc. 10:21-22)

²⁵ Lën ree dxejzii rëb Jesús:

—Dad, ruzatan lūj zagdx, din ni baquie'chil loj ree Bén rajc në loj ree Bén rignia', laan ma balūül loj ree Bén ad rajct. ²⁶ Zian gojc Dad, din zian guyën!

²⁷ 'Da Dadan banee gra lon. Abi' achut nünbee Jesucrist xi'n Dios, tijbzi Dios, achu tēēt nünbee Dios, tijbzi Jesucrist xi'nman, con ree Bén rënman gūünbee Dios. ²⁸ Gradi, Bén ma badxag rñjn xhienin din yaya'ndi zagdx loj Dios, ma badxag tēēdi nūü xtolidi. Gol guda lon, naj gune guialraziiladx lojdi. ²⁹ Gol bazoob da diidxan, gol basiid tēē gaquidi benza'c në Bén chaawlaxd zi'c naj, din yabedxe luxdoodi loj Dios.

³⁰ Din ad nawëēgt guial guzoobidi da diidxan, ad nawëēgt tēēt guial gūündi zi'c rënan.

Rgui'ch ree xbejn Jesús trigo dxej raziiladx ree Bén Is-rael

(Mr. 2:23-28; Lc. 6:1-5)

12 Tijb dxej raziiladx ree bejn, chi cadëd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj caguí'ch reeman trigo persi cayaw reeman laan. ² Abi' chi baguiaa ree Bénfarisew ni cayūjn reeman, rëb reeman loj Jesús:

—Baguiaa ree xbejnl nial cayūjn reeman ni ad rayalt gūün reeman dxej raziiladx ree bejn.

³ Dxel rëb Jesús loj reeman:

—¿Gadidi gool loj xtiidx Dios ya ni been Davi chi gu-laanman con ree xcompniaraman? ⁴ Guyu Davi lën xyadoo Dios abi' cwa'man guidxtil ma nagle' ree gu-

dawaman con ree xcompniaraman, ni ad rayalt niajw reeman, bixhiosi ree rayal gaw laa reen. ⁵ ¿O gadidi gool loj xley Moisejs ya guial achet dol rüjn ree bixhioz chi rüjn reeman dxiin lèn yadoo majsi ad raziiladxt reeman dxej raziiladx ree bejn? ⁶ Abi' naj rni lèjt guial naj, bèn za'nè lèjt mazri lasajcan guial loj yadoo. ⁷ Bal rigni-a'di xhie rèn guièb loj xtiidx Dios lod rëb: "Ni rënan naj guial yaya lasa'di, ad guial guneeetidi gon lon." Bal rignia'di diidx guin ree ad zudxiibtidi guijc ree bèn ad rajpt dol. ⁸ Abi' Bèn guxhaal Dios rajpaman guialrniabee dxej raziiladx ree bejn.

Rayajc tijb bèn nêjt tibladi yaa

(Mr. 3:1-6; Lc. 6:6-11)

⁹ Chi gudëd gojc zian, dxei baza Jesús abi' guyuman lèn tijb yadoo naj niz yagaj. ¹⁰ Lèn yadoo guin za' tijb bèn nêjt tibladi yaa. Abi' guial ree bënfarisew raguil reeman mod xhie gudxiib reeman guijc Jesús, dxei gunabdiidx reeman lojman, rëb reeman:

—¿Zile' yayüjn bejn tijb bënragxuu dxei raziiladx bejn ya?

¹¹ Badxi' Jesúsani rëbaman:

—Bal tijb lèjt rajp tijb xiil, abi' yabib lèn bala' dxei raziiladx bejn. ¿Nid zabëëdi laab dxei guin ya? ¹² ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdx dxei raziiladx bejn.

¹³ Dxei rëb Jesús loj bënragxuu yaa guin:

—Basli yaal.

Abi' basli yaa bèn guin, loj hor ziigajc bayajc yaaman zi'c naj stibladan. ¹⁴ Per chi barii ree bënfarisew guin lèn yadoo guin, guzuloj cayü reeman diidx xhienaag güün reeman din gugüjt reeman Jesús.

Bèn gule Dios

¹⁵ Chi gogbee Jesús zian, laa zia gajcaman, abi' zien ree bejn binal laaman. Dxei bayüjnman gra ree bënragxuu, ¹⁶ abi' gunabeeman laa reeman chitëë guitie'ch reeman diidx chu bayüjn laa reeman. ¹⁷ Zian guzobj xtiidx Isaías, bèn badëë xtiidx Dios loj ree bejn, chi rëbaman:

¹⁸ Gol baguiaa, bèn guie naj bèn gulen din güünman naj sirv, laaman naj bèn rën da'tan, rabaanë' tëen laaman. Gudë da Sprijtan lojman abi' guiëbaman loj ree bënguidxliuj xhienaag naj da guialrniabeen.

¹⁹ Achut tilnëman, ad zabixdiaj tëetaman achut tëet guien cha'man niz lunejz.

²⁰ Ad zudëëdtaman casti bèn ad za'dxi'cht ree loj da nejzan, nê ree bèn ad ridxga'za'ct naj, xt chi ma beenman gan gac guialguxtis.

²¹ Abi' xt ree bèn ad najt bèn Israel cwëz reeman yabëëman laa reeman loj dol.

Rëb ree bejn ca' Jesús xguialrniabee Beelzebú

(Mr. 3:19-30; Lc. 11:14-23; 12:10)

²² Binë ree bejn tijb xinguaaw lod za' Jesús, yu' xinxab luxdoox, natia'p lojx naj tëëx gop. Dxei bayüjn Jesús laax abi' guzuloj rnieex ruguiaa tëëx. ²³ Graczi ree bejn dád badxaloj reeman, abi' rëb reeman:

—¿Id bèn guinan zëëd loj xdiaa Davi ya?

²⁴ Chi biguiejn ree bënfarisew zian, dxei rëb reeman: —Bèn guin rabëë xinxab luxdoo ree bejn por xguialrniabee Beelzebú xin rniabee ree xinxab.

²⁵ Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. ²⁶ Ziangajc bal xinxab su contr laagajquix, nayob nitix. ²⁷ Lèjt na guial naj rabë xinxab luxdoo ree bejn por xguialrniabee Beelzebú, per bal zianan, ¿chuza rudëë guialrniabee loj xbejndi din yabëë reeman xinxab? Zeel laagajc reeman rulüü guial ad laat rnieedi. ²⁸ Per naj, bal por xSprijt Dios rabën xinxab luxdoo ree bejn, rën guiëban guial ma za'nè xguialrniabee Dios lèjt.

²⁹ 'Din ¿xhieza naag chu' tijb bejn lidx tijb bèn gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

³⁰ 'Bèn ad za't con naj, za'man contr naj. Guiáad bèn ad ruto'pt bejn par naj, rtie'chaman laa reeman.

³¹ 'Zeel rnin lèjt: Züjn Dios perdon xhietëëz dolan, nê ree diidxguijdx ni rnieetzi ree bejn, per ad züjntaman perdon bèn rnieeguijdx ree xSprijt Dios. ³² Chutëëz bèn guinieeguijdx Bèn guxhaal Dios, zajcaman perdon, per bèn guinieeguijdx xSprijt Dios ad zajctaman perdon yan, ni'qui chi yaguialan.

Nünbee bejn tijb yag por ni rtia lojn

(Lc. 6:43-45)

³³ 'Lèjt ragbee, bal tijb bejn ruzuj tijb yag zagdx, rtia ni zagdx lojn, per bal guzujman tijb yag guijdx, rtia ni guijdx lojn. Din tijb gaj yag nünbee bejnan por ni rtia lojn. ³⁴ ¿Xi'n xinxab! ¿Xoza guinieedi diidx zagdx ree awa benmal lèjt? Din ni yu' luxdoo bejn laan rnieeman. ³⁵ Benza'c rnieeman diidxza'c, din laan yu' luxdooan. Guiáad benmal rnieeman diidxmal din laan yu' luxdooan. ³⁶ Per naj rni lèjt guial dxei ni güün xguialguxtis Dios, gra ree bejn yadëëd cwent lojman por gra ree diidxguijdx ni rniee reeman. ³⁷ Din por xtiidx gajc bejn guiguien bal rayalaman xcasti Dios o ad rayaltaman laan ya.

Rniab ree bënfarisew tijb milagr

(Mr. 8:12; Lc. 11:29-32)

³⁸ Yu' ree bënfarisew con ree mextr ni rajc ley, rëb loj Jesús:

—Mextr, rayënan yaguiaan güünl tijb milagr.

³⁹ Badxi' Jesúsani rëbaman:

—Lèjt benmal, bèn ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac

Jonás bén badëë xtiidx Dios loj ree bejn. ⁴⁰ Din zi'c guyu Jonás lèn bëjl narooob choon dxej choon guiaal, ziangajc Bén guxhaal Dios, choon dxej choon guiaal chu'man lèn baa. ⁴¹ Abi' chi yadëed ree bejn cwent loj Dios, bén guban ree Nínive zaban reeman abi' guiëb reeman guiaal ree bén riga' yan, yayal reeman xcasti Dios. Din bén Nínive ree bayejc reeman loj Dios chi ba-caagdiajg reeman xtiidx Dios ni gunee Jonás. Abi' yan, bén za'në lëjt mazri lasajcaman guiaal loj Jonás. ⁴² Ziangajc bén goc reina niz sur, zabanman chi yadëed ree bejn cwent loj Dios, dxej guiëbaman guiaal ree bén riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, bén za'në lëjt mazri lasajcan guiaal loj Salomón.

Xindxab ni rayejc (Lc. 11:24-26)

⁴³ 'Chi rarii tijb xindxab luxdoo tijb bejn, abi' rzax niz loj yujbidx rguilix lod yaziiladxix. Abi' chi ad rdxejlt lod yaziiladxix, dxej rüjnx xgab naladxix: ⁴⁴ "Zagdxeli yaye'-can lod guzaan." Abi' chi rayejquix ruguiaax luxdoo bén guin najn zi'c tijb lènü lod achut zobj, lod bilioob lod najcchaaw tëë. ⁴⁵ Dxej rica'x za gajdx xindxab naj ree mazri xinmal guiaal lojx. Abi' ru gra reex luxdoo bén guin. Dxej mazri benmal gacaman guiaal loj ni goca-man yaloj. Ziangajc sac ree benmal riga' loj guidxliuj yan.

Xniaa Jesús con ree bijchaman (Mr. 3:31-35; Lc. 8:19-21)

⁴⁶ Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. ⁴⁷ Abi' yu' tijb bén rëb lojman:

—Laa xniaal con ree bijchil za' lule' guin, rën reeman guinieenë reeman lüj.

⁴⁸ Per Jesús badxi'man xtiidx bén guin rëbaman:

—¿Chu naj da nan chu tëë ree nin naj da bichan?

⁴⁹ Dxej con yaaman balüü ree xbejnman rëbaman:

—Bén guie ree naj da nan në ree da bichan. ⁵⁰ Din chutëëz bén rüjn zi'c rën da Dadan bén yu' xanyabaa, laaman naj da bichan, da zanan, në da nan.

Xcwent bén rtie'ch bin (Mr. 4:1-9; Lc. 8:4-8)

13 Dxejzii brii Jesús yu lod zobjaman, bisobaman ro' nijs Galilea. ² Abi' guiaal dád zien ree bejn bido'p yagaj, beenan nagueijn wë'p Jesús loj tijb barcw dxej gurejman lojn, guiáad ree bén guin za' reeman ro' nijs guin. ³ Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. ⁴ Chi catie'chaman bin guin, ta'n nan biajb loj nejz, abi' bi't ree biguijn gudaw reeb laan. ⁵ Sta'n nan biajb loj ree guiaj lod ad riga't zien yuj, cari gulejnan guiaal ad zient yuj riga'. ⁶ Per chi brii gubijdx, baze'can laan, abi' guiaal ad yu't liujn gubidxan. ⁷ Dxej sta'n nan biajb loj ree

yaquiëjch, chi guni's ree yaquiëjch guin banidloj reen laan. ⁸ Per sta'n nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tëën cwa gajlbichii. ⁹ Bén rën gucaagdiajg, gol bacaagdiajg.

Chexc zeel rulüü Jesús con ni naj ree zi'c cwent (Mr. 4:10-12; Lc. 8:9-10)

¹⁰ Dxej gubig ree xbejn Jesús lojman rëb reeman: —¿Chexquiza zeel rulüü bejn ree con ganax zi'c cwent ree?

¹¹ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman, per bén guin ree ad basa'nt Dios laa reeman chignia' reeman laan. ¹² Din Bén ma rignia', gusnuu chignia'man mazri, abi' zignia' da'taman. Per bén ad rignia'za'ct ad rüjn tëëtaman nagueijn chignia'man mazri, xt ta'n ni rignia'man za-yanladxaman. ¹³ Zeel rnienë'n laa reeman con ganaxzi zi'c cwent ree. Din majs rani loj reeman per rüjn reeman zi'c bén ad ruguiaat, abi' majs riguiejn reeman per rüjn reeman zi'c bén ad riguiejnt, bén ad rignia' tëët. ¹⁴ Zian rzojb xtiidx Isaías, bén badëë xtiidx Dios loj ree bejn, chi rëbaman:

Majs riguiejn reeman, per achetczi chignia' reeman. Abi' majs rani loj reeman, per ad ruguiaat reeman.

¹⁵ Din ma been luxdoo reeman gojl,

nayaaw guidiajg reeman,
nayaaw tëë guiaaloj reeman.

Chitëë guguaa reeman,
guiguiejn reeman,
chignia' tëë reeman.

Din ad rënt reeman gui't reeman lon din günan laa reeman perdon.

¹⁶ 'Per xiquilbaadi cuguiaadi cagueijn tëëdi. ¹⁷ Din naj rni lojdi guiaal dád zien ree bén badëë xtiidx Dios loj ree bejn, në ree bén guban zi'c rayal, guyën reeman nuguiaa reeman ni cuguiaadi per ad baguiaat reeman laan. Guyën reeman niguiejn reeman ni cagueijndi per ad bigueijnt reeman laan.

Rusignia' Jesús xcwent bén rtie'ch bin (Mr. 4:13-20; Lc. 8:11-15)

¹⁸ 'Yan gol bacaagdiajg xhie rën guiëb ni rnin lojdi xcwent bén bigtie'ch bin. ¹⁹ Bén riguiejn xtiidx Dios abi' ad rignia'taman laan, laaman naj zi'c bin biajb loj nejz, guiaal laa ri't gajc xindxab rquiedix ni bacaagdiajgaman. ²⁰ Guiáad bin biajb loj ree guiaj naj zi'c bén riguiejn xtiidx Dios, abi' dád nix ru luxdooman riguiejnman laan, ²¹ per guiaal najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni rliladxaman. ²² Abi' bin biajb loj ree yaquiëjch naj zi'c bén riguiejn xtiidx Dios, per guiaal mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëëz rucaagdiajgaman xtiidx Dios achet sirv been ni bacaagdiajgaman. ²³ Per bin biajb loj yuj za'c naj zi'c bén riguiejn xtiidx Dios abi' rignia'man laan rüjn tëëman zi'c rën Dios, zi'c ni cwa

tibgayuu bin loj o zi'c ni cwa gayojn o ni cwa gajlbichii.

Trigo con gui'xhguijdx

²⁴ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c tijb bén badxe' ganax bin zagdxe loj xguiniaa. ²⁵ Per la'tgaj naga'yëjs gra reeman, bidxin bén rdxe'ch laaman guxübinman gui'xhguijdx ree loj trigo guin dxel ziaman. ²⁶ Abi' chi gulen trigo guin brii tõe dojn lojn në ree gui'xh guin ma yu' lojn. ²⁷ Dxel bicojn ree xmojs bén naj xguiniaa laan laaman, rëb reeman: "Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?"

²⁸ Badxi'man laan rëbaman: "Wed tijb bén rdxe'ch naj bidgadxe' laan." Dxel gunabdiix ree mojs guin lojman rëb reeman: "¿Xhie nal zudojxhan gui'xh guin ree ya?"

²⁹ Dxel rëbaman loj reeman: "Yajqui, chitõe guial gaxhidi gui'xh guin gaxhidi në trigo guin. ³⁰ Zagdxeli gol basa'nan din ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree bén guto'p laan din yalojxgaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen."

Xcwent xhaj moxtajs

(Mr. 4:30-32; Lc. 13:18-19)

³¹ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman. ³² Abi' bin guin naj mazri ni wit loj gra ree bin, per chi rni'san laan rajc mazri ni naroo loj gra ree cwaan. Abi' guial naroo da't rajcan, xt rüjn xguixbitia's ree biguijn xidxan.

Xcwent levadur

(Lc. 13:20-21)

³³ Be tõe Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb béngunaa choon midid harin, abi' laan rusaaguij gra cob guin.

Chexc zeel rulüü Jesús con ni naj ree zi'c cwent

(Mr. 4:33-34)

³⁴ Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent. ³⁵ Zian gojc persi guzobj xtiidx bén badëë xtiidx Dios loj ree bejn, chi rëbaman:

Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

Rusignia' Jesús xcwent gui'xhguijdx

³⁶ Chi ma bazaadiidxnë Jesús benzien guin ree, dxel bayuman lënü con ree xbejnman, abi' gunabdiidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

³⁷ Badxi' Jesúsán rëbaman:

—Bén rudxe' bin zagdxe guin naj Bén guxhaal Dios, ³⁸ abi' guiniaa guin naj guidxliuj. Guiáad bin zagdxe guin naj ree bén naj par loj xguialrniabee Dios. Abi' ree gui'xh guin naj bén naj ree par xindxab. ³⁹ Guiáad bén rdxe'ch, bén guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiáad ree bén yato'p guialnaza'c guin naj ree xianjl Dios. ⁴⁰ Zian zi'c rado'p ree gui'xhguijdx guin par che'c reen, zian gac chi nit guidxliuj. ⁴¹ Bén guxhaal Dios guixhiaal ree xianjlaman din yabëë reeman bén rayal ree yarii loj xguialrniabeeman, bén ruzaalguiw bejn ree din güün reeman dol në gra ree bén cayün dol.

⁴² Abi' guzaal reeman laa reeman loj bajl lod goon reeman xt gaw lay reeman. ⁴³ Dxel bén naban ree zi'c rën Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

Xcwent ni lasajc

⁴⁴ Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' dád rabaaman ruto' gra ni rajpaman persi rsiiman guidxliuj guin.

Xcwent perl

⁴⁵ 'Rni tëen lëjt: Xguialrniabee Dios naj zi'c tijb bén rguuil perl zagdxe din siiman laan. ⁴⁶ Chi rdxejlaman ti-jb perl lasajc, ruto' gra ni rajpaman abi' rsiiman laan.

Xcwent guijxh rniaaz bëjl

⁴⁷ 'Abi' tõe xguialrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. ⁴⁸ Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman. ⁴⁹ Zian gac dxej nit guidxliuj, gui't ree xianjl Dios yabe reeman benmal loj ree benza'c. ⁵⁰ Abi' guzaal reeman benmal guin ree loj bajl lod goon reeman abi' xt gaw lay reeman.

Bén rbe nicüb në ni yojx

⁵¹ Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nan, Dad.

⁵² Dxel rëb Jesús loj reeman:

—Gra ree mextr ni rajc ley, abi' cusiid reeman xhien-aag naj xguialrniabee Dios, laa reeman naj zi'c tijb bën rbe nicüb në ni yojx loj gra ni rajpaman.

Badxin Jesús Nazaret

(Mr. 6:1-6; Lc. 4:16-30)

⁵³ Chi gulox gunee Jesús loj reeman zian, zianz bazaman. ⁵⁴ Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloj ree bën guin, rëb reeman:

—¿Ban guin basiidaman gra ree ni rajcaman? ¿Chex-quiza zeel rajc rünman milagr ree? ⁵⁵ ¿Nid laaman naj xi'n carpinter ya, abi' xniaaman naj Li, guiáad ree bi-jchaman naj Jacob, Xiëb, Simón, në Judas? ⁵⁶ ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

⁵⁷ Abi' ad bidxga't reeman Jesús. Per rëbaman loj reeman:

—Bantëëz guin rajp ree bejn respekt tijb bën rudëë xtiidx Dios loj ree bejn, per ladxaman achut rajp laaman respekt ni'qui lidxaman.

⁵⁸ Abi' ad zient milagr beenman yagaj guial ad bililadxt reeman laaman.

Güjt Waj Bén baroobnijs bejn ree

(Mr. 6:14-29; Lc. 9:7-9)

14 Tiampzii Herodes bën canabee niz Galilea, bigujejnman ni cayün Jesús. ² Abi' rëbaman loj ree xbejnman:

—Waj bën baroobnijs bejn ree, laaman baban zatijb, zeel rajpaman guialrniabee rünman milagr ree.

³ Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bën la Filip, ⁴ guial rëb Waj guin loj Herodes:

—Ad laat guial zojbnël laagajc lacheel bijchil.

⁵ Guyën Herodes nugüjtaman Waj, per bidxebaman xhie nün ree bejn laaman guial graczi reeman rëb Waj naj tijb bën rudëëd xtiidx Dios loj ree bejn. ⁶ Per chi baza' Herodes ijz, brii xi'n Herodías baya'm loj ree xbioozaman. Abi' dád bayuladx Herodes zi'c baya'm, ⁷ dxel rëb Herodes gudëëdaman xhietëëz ni guini-abim. ⁸ Abi' xniaam rëb lojm xhie guiniabim, dxel rëbim loj Herodes:

—Banee guijc Waj bën ruoobnijs bejn ree, baneen loj tijb pliajt.

⁹ Dád guyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuladaman gudëëd reeman ni gunabim. ¹⁰ Dxel gunabeeman guitü' reeman guijc Waj lën ladxguiib guin, ¹¹ abi' bidxinnë reeman laan loj tijb pliajt badëëd reeman laan lojm, dxel bayümin loj xniaam.

¹² Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

Ruyaán Jesús gaay mil bejn

(Mr. 6:30-44; Lc. 9:10-17; Jn. 6 :1-14)

¹³ Chi gogbee Jesús zian, guyuman loj tijb barcw zëman niz lod achutczí zojb din su laazaman. Chi gogbee ree bejn, dxel brii ladx reeman zë guia'zi reeman lod guidxinman. ¹⁴ Chi barii Jesús loj barcw guin baguiaaman bën guixiuj ree riga' yagaj, bayaman laa reeman abi' bayünman bënragxuu zinë reeman. ¹⁵ Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bën guin ma gojl yaguij reeman, din che reeman guiedx lod sii ni gaw reeman.

¹⁶ Per badxi' Jesús rëbaman:

—Ad rüjnt naguiejn yaguij reeman, lëjt gol badëë ni gaw reeman.

¹⁷ Badxi' reeman laan rëb reeman:

—Per gaayzi guiadxtil naca'n con zatio'p bëjl.

¹⁸ Dxel rëb Jesús loj reeman:

—Gol tanë reen guie.

¹⁹ Dxel gunabeeman gurej gra ree bën guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëëman quix-tëë loj Dios, abi' gula'man guiadxtil guin badëëman laan loj ree xbejnman persi gudi's reeman laan loj gra ree bën guin. ²⁰ Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. ²¹ Bén gudaw guin ree naj reeman cost gaay mil xinguaaw garenqui ree béngunaa con ree xindoo.

Riza Jesús loj nijs

(Mr. 6:45-52; Jn. 6 :16-21)

²² Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nëman benzien guin ree. ²³ Chi ma gulox bazaadiidx nëman laa reeman, dxel zë xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin. ²⁴ Guiáad barcw guin zijt ma zën loj nijs, dád rliaro' xtüjp nijs guin laan guial rliaj bi niz loj barcw guin. ²⁵ Chi ma cayreguiaa, zibig Jesús loj ree xbejnman rzaman loj nijs guin. ²⁶ Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

²⁷ Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

²⁸ Badxi' Bëdan rëbaman:

—Dad, bal lün, gunabee gazan loj nijs guin guialan lojl.

²⁹ Abi' rëb Jesús lojman:

—Guda.

Dxel baguiajt Béd loj barcw guin, rzaman loj nijs guin zëman loj Jesús. ³⁰ Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—¡Gognë naj, Dad!

³¹ Loj hor ziigajc basli yaa Jesús gunaazaman yaa Béd, rëbaman lojman:

—¿Chexc zeel ad rliadxza'ctil, chexc zeel yu' nawëëguil?

³² Abi' chi bayë'p reeman loj barcw guin, laa bacwëëz gajc bi guin. ³³ Guiáad ree bën yu' loj barcw guin bazuxib reeman loj Jesús, rëb reeman:

—Diidxiczi lüjn naj xi'n Dios.

Rayün Jesús bënragxuu ree Genesaret

(Mr. 6:53-56)

³⁴ Chi gudëd reeman loj nijs guin dxel bidxin reeman xyuj ree bën Genesaret. ³⁵ Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman, ³⁶ guzajc reeman liaadx lojman din tiëba-man gugaal reeman majsi guia'zi xabaman. Abi' gra ree bën багаal xabaman bayajc.

Ni rüjn persi rajc bejn bëndol

(Mr. 7:1-23)

15 Bénfarisew ree con ree mextr rajc ley, bën za ree Jerusalén, gubig reeman loj Jesús abi' gun-abdiidx reeman lojman, rëb reeman

² —¿Chexc zeel ad zinalt ree xbejnl costumbr ni basa'n dux bégulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

³ Dxel rëb Jesús loj reeman:

—Laadx lëjt, ¿chexc zeel rüjndi xtiidx Dios tibladi persi zinal xcostumbridi? ⁴ Din Dios rëb: “Gojp respekt xDadil con xniaal”, abi’ “Bën rníee diidxguijdx loj xdadaman o xniaaman ya, rayal guiëtaman.” ⁵ Per lëjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.” ⁶ Rëbidi guial bën guinee zian, ad zile't güün yudar xdadaman con xniaaman, abi' zian rbëëladxidi xtiidx Dios persi zinal xcostumbridi. ⁷ Bën rusquieel! Rünzidi guial nabandi xnejz! Waliqui ni gunee Isaías, bën badëë xtiidx Dios loj ree bejn, chi rëbaman:

⁸ Bën guie ree rëbzi reeman rníajchi' reeman naj, per ad rënt reeman naj con guidib luxdoo reeman.

⁹ Xliaczi rníajchi' reeman naj, abi' rulüü reeman bejn ree ganaxzi ni rbëëguijc ree bënguidxliuj.

¹⁰ Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tëë ni ganin lojdi. ¹¹ Ad ni rawt bejn rüjn laaman bëndol, ni ririi ro'man laan rüjn laaman bëndol.

¹² Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bénfarisew chi biguiejn reeman ni guneel?

¹³ Badxi' Jesús laan rëbaman:

—Gra ni ad zëëdt por da Dadan Dios bën yu' xanyabaa, yu' dxej nitan. ¹⁴ Zeel gol basa'n reeman din laa reeman naj zi'c tijb bënlutia'p rulüü stijb bënlutia'p

ban niz cheman. Abi' bal tijb bënlutia'p gulüü stijb bënlutia'p guin, zayajb grop reeman ro' bala'.

¹⁵ Dxel rëb Béd loj Jesús:

—¿Bassignia' dunujn xhie rën guiëb ni guneel?

¹⁶ Badxi' Jesús an rëbaman:

—¿Wen, ni'qui lëjt ad rignia'tan ya? ¹⁷ ¿Id rignia'di ya guial gra ni raw bejn rej lënman abi' rariin? ¹⁸ Per diidx ririi ro' bejn, luxdoozan, abi' laan rüjn laaman bëndol. ¹⁹ Din luxdoo bejn za graloj ree xgabmal, guial-rugüjt bejn, guial rüjn nidxuudx, guialrzunë lacheel ben ren, guialrban, guialrusquiee në guialrníee diidxguijdx loj lasa'. ²⁰ Gra ree ni guie naj ni rüjn bejn bëndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman bëndol.

Tijb bëgunaa Canaán bililadx Jesús

(Mr. 7:24-30)

²¹ Chi baza Jesús yagaj zëman niz Tiro në niz Sidón.

²² Abi' yagaj zojb tijb bëgunaa za niz Canaán, briiman, rbixdiajman rëbaman loj Jesús:

—¿Dad, xdiaa Davi, baya naj! Da xi'ndxa'pan yu' bendxab luxdoo, dád rusagziman laam.

²³ Abi' Jesús ad badxi'taman xtiidx bëgunaa guin. Dxel gubig ree xbejnman lojman, rëb reeman:

—Bidxga' bëgunaa guin, din yaguiajman, din rbixdiajman nalaman dunuj ree.

²⁴ Dxel rëb Jesús:

—Dios guxhaal naj din günan yudar ganaxzi ree bën Israel zë loj nejz mal.

²⁵ Per bëgunaa guin bigzuxibaman loj Jesús, rëbaman:

—¿Dad, gognë naj!

²⁶ Badxi' Jesús an, rëbaman:

—Ad zagdxet naj chiquied bejn guiadxtil loj xi'nman din gudëëdaman laan loj ree bë'cw.

²⁷ Badxi' bëgunaa guinan, rëbaman:

—Waliquil, Dad, per në ree bë'cw ruto'p guiadxtil laay ni ryajb xan xmex bën naj xbë'cw laa reeb.

²⁸ Dxel rëb Jesús lojman:

—¿Na, waliquil rliadxil con guidib luxdool! Gac zi'c rën!

Loj hor guin gajc bayajc xi'n bën guin.

Rayün Jesús zien ree bënragxuu

²⁹ Baza Jesús yagaj, bidxinman ro' nijs Galilea, dxel wë'paman guijc tijb guia' abi' gurejman yagaj. ³⁰ Dád zien bejn bido'p lod za'man. Binë reeman bencoj ree, në ree bënlutia'p, në ree bën ad rüjnt xu'c dxiin, con ree bengop në zien ree bënragxuu ren ree, badxig ree-man laa reeman loj Jesús, abi' bayünman laa reeman.

³¹ Dád badxa loj ree bejn chi baguiaa reeman ma rníee ree bengop, ma bayajc xu'c ree bën ad rüjnt dxiin xu'c, guiáad ree bencoj ma rza reeman abi' ree bënlutia'p ruguiaa reeman. Zianz guzuloj cuza't reeman zagdxexDios ree bën Israel.

Ruya'an Jesús tajp mil bejn

(Mr. 8:1-10)

³² Abi' gurejdx Jesús bén naj ree xbejnman, rëbaman loj reeman:

—Rayan bén guin ree, din ma gojc choon dxej za' reeman con naj, abi' achet ni gaw reeman. Ad rëntan yagu'nejzan laa reeman sin guialraw ad nial yadaj reeman niz lunejz.

³³ Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutczí bejn zojb?

³⁴ Gunabdiidx Jesús loj reeman, rëbaman:

—¿Bël guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

³⁵ Dxel gunabee Jesús gurej gra ree bén guin luyuj.

³⁶ Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin. ³⁷ Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. ³⁸ Bén gudaw ree naj reeman tajp mil xinguaaw, garenqui ree béngunaa con ree xindoo. ³⁹ Dxel bazaadiidxnë Jesús laa reeman, abi' guyuman loj barcw ziaman niz Magadán.

Rniab reeman güün Jesús tijb milagr

(Mr. 8:11-13; Lc. 12:54-56)

16 Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguen guial Dios guxhaal laaman. ² Per badxi' Jesús laan rëbaman:

—Wadxe ree chi ruguaadi naxnia xanyabaa, rëbidi: “Zagdx gac guixie din naxnia xanyabaa.” ³ Guiáad rsil chi naxnia xanyabaa yu' tëë zāj, rëbidi: “Ad laat gac yandxej.” ¡Bén rusquiee!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguaadi yan? ⁴ Bén mal, ad rliladxtidi abi' rniabidi günan tijb milagr, per achet guguaadi, tijbzi zi'c guzac Jonás.

Dxel basa'n Jesús laa reeman, ziataman.

Xlevadur ree bénfarisew

(Mr. 8:14-21)

⁵ Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil.

⁶ Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

⁷ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

⁸ Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nniit rliladxidi naj. ⁹ ¿Staczi ad rignia'tidi ya? ¿Nid rusaaladxi-di ya chi gudi'san gaay guiadxtil loj gaay mil bejn, abi'

zabël dxüm ni baya'n bato'pidi? ¹⁰ ¿Nid zaladx tëëdi ya chi gudi'san gajdx guiadxtil loj tajp mil bejn, abi' zabël dxüman bato'pidi? ¹¹ ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree bénfarisew në ree bénsadusew?

¹² Dxel bignia' ree xbejnman guial ad xlevadurt guiadxtilan cuza'taman loj reeman, rëbaman zian din gap reeman cudad con ni rulüü ree bénfarisew në ree bénsaducew.

Rëb Bëd guial Jesús naj Cristo

(Mr. 8:27-30; Lc. 9:18-21)

¹³ Chi bidxin Jesús niz Cesarea de Filipino, gunabdiidxa-man loj ree xbejnman, rëbaman:

—¿Chu rëb ree bejn, naj Bén guxhaal Dios?

¹⁴ Badxi' reeman laan, rëb reeman:

—Yu' reeman rëb guial Wajn, bén baroobnijs bejn ree. Yu'za reeman rëb guial Elíasan, bén badëë xtiidx Dios loj ree bejn, yu' tëë reeman rëb guial Jeremíasan, bén badëëd xtiidx Dios loj ree bejn o stijb ben ren ya, bén badëëd xtiidx Dios loj ree bejn.

¹⁵ Dxel rëbaman loj reeman:

—Laadx lëjt, ¿xhie nadi, chu naj?

¹⁶ Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

¹⁷ Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bén yu' xanyabaa laaman naj bén guna lojl. ¹⁸ Abi' naj rni lojl, Bëd, (rën guiëban “guiaj”) lüj naj zi'c tijb guiaj ni gacnë lidxan, din por lüj grii ree bén gac da bejnan abi' ni'qui guial-güjt ad zunijtt laa reeman. ¹⁹ Naj gune lüj guialrniabee ni za xanyabaa, abi' gra ni tiëbil gac loj guidxliuj guie ma naj gacan xanyabaa, guiáad ni ad zatiëjbtal gac loj guidxliuj guie ad najt gacan xanyabaa.

²⁰ Dxel gunabee Jesús loj gra ree xbejnman guial achu loj guiëb reeman guial laaman naj Cristo.

Rugojn Jesús guiëtaman

(Mr. 8:31-9:1; Lc. 9:22-27)

²¹ Diizd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bén gusagzi laaman, gugüjt reeman laaman, per ni yayon dxej yabanman. ²² Dxel gulëë-caan Bëd laaman, rëbaman lojman:

—¡Dios ad zabëëladxt lüj, Dad! ¡Laaman ad zatiëjbt saquil zian!

²³ Per badxi' loj Jesús, rëbaman:

—¡Basa'n naj, xindxab!, ad rüjn nawëëguil lon. Din ad por Diost zëëd ree xgab ni rüjnl, xixgab bénguidxli-ujn rüjnl.

²⁴ Dxel rëb Jesús loj ree xbejnman:

—Bal yu' bén rën gac da bejnan ad zajct güünman zi'c naj xixgabaman, siibnejzaman guialzi ni tëdzaman abi' guidnalaman naj. ²⁵ Din bén mazri rën xguialnaban ni rajpaman loj guidxliuj guie zadxin dxej gunijta-man laan. Per bén guiët por naj, zajpaman guialnaban

tiblayaa con Dios. ²⁶ Xhieczi gan gap bejn gra ni yu' loj guidxliuj, abi' nitaman loj Dios. Din ad zile't sii bejn xguialnabanman xanyabaa. ²⁷ Abi' Bén guxhaal Dios, gui'taman con xguialrniabee xDadaman Dios në ree xianjl Dios din gudëeman ni rayal tijbgaj bejn, bal gonin been bejn. ²⁸ Diidxliczi rnin lojdi guial yu' ree bén riga' guie ad zëjtt reeman chi gad reeman guguaa Bén guxhaal Dios, gui'taman con xguialrniabeeman din nabeeman.

Bidxaa Jesús loj choon ree xbejnman

(Mr. 9:2-13; Lc. 9:28-36)

17 Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guijc tijb guia' ya. ² Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiáad xabaman bayajcan naquich, balaa tëen bacha' zi'c guij. ³ Abi' loj hor guin baguiaa reeman Moisejs con Elías cayünë reeman Jesús diidx. ⁴ Dxel rëb Bëd loj Jesús: —Dad, ɿzagdxe naj nadxu' ree guie! Bal rën! gūnan choon ranch, tijban par lūj, tijban par Moisejs, stijban par Elías.

⁵ La'tgaj canee Bëd zian, biguiajt tijb zāj xt guijc reeman ridiinan bacha', loj zāj guin brii cha' bejn rëbaman:

—Bén guie naj da Xi'nan, bén rën da'tan, bén rabaanë' tëen, gol bacaagdiajg xtiidxaman.

⁶ Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. ⁷ Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

⁸ Abi' chi gules loj reeman achutri baguiaa reeman, tijbzi Jesús za' yagaj.

⁹ La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

¹⁰ Dxel gunabdiidx ree xbejnman lojman, rëb reeman:

—ɿChexquiza zeel rëb ree mextr rajc ley guial yaloj Elías gui't?

¹¹ Badxi' Jesúsán, rëbaman:

—Walican guial yaloj Elías gui't, laaman guzuxnejz gra. ¹² Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

¹³ Dxel gogbee ree xbejnman guial Wajn bén baroobnijs bejn ree cuza'taman.

Rayūjn Jesús tijb xin rëjtya'

(Mr. 9:14-29; Lc. 9:37-43)

¹⁴ Chi badxin Jesús con guiyon ree xbejnman, lod cabëz ree ben zien laaman bibig tijb xinguaaw lojman, bazuxibix lojman rëbix:

¹⁵ —Dad, baya da xi'nan, din dád rzagdiajx rëjtya'x. Bëlczi volt riyajbix lojguj o lojnijs ya. ¹⁶ Bidnë'n laax loj ree xbejn, per ad rajct rayūjn reeman laax.

¹⁷ Badxi' Jesúsán, rëbaman:

—ɿBenguijdx, bén ad rliladxt! ɿXt goc gazunë'n lëjt? ɿXt goc gadaanan lëjt? Gol tanë xinzii guie.

¹⁸ Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

¹⁹ Abi' gunabdiidx ree xbejn Jesús lojman lood ren, rëb reeman:

—ɿChexc zeel ad gojct nalëen xindxab guin luxdoo xin guin?

²⁰ Dxel rëb Jesús loj reeman:

—Guial ta'nzi rliladxidi. Naj rni lojdi bal naj xguialrliladxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetczi gac nawëëg par lëjt. ²¹ Per par yarii lasa' ree xindxab guie ryaadx chu cwedx guiniab Dios guiba'n tëë.

Rugojn Jesús zatijb guial guiëtaman

(Mr. 9:30-32; Lc. 9:43-45)

²² La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, ²³ abi' gugūjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

Ni rajx par yadoo

²⁴ Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Bëd bignabdiidx reeman, rëb reeman:

—ɿRguijx xmextril impuest par yadoo ya?

²⁵ Badxi' Bëdan, rëbaman:

—Riguijxcaman laan.

Dxel chi bayu Bëd lënü lod za' Jesús, yalojli Jesús gunabdiidx lojman, rëbaman:

—ɿXhie naladxil, Simón? ɿChu rguijx impuest loj ree rey yu' loj guidxliuj guie? ɿXi'n reeman ya o benzit ree?

²⁶ Badxi' Bëd laan rëbaman:

—Benzit ree.

Dxel rëb Jesús:

—Abi' ree bén ladx reeman ad rguijxt reeman laan.

²⁷ Per chitëë guidxe'ch reeman, wej ro' nijs, bazaal xi-ansuelil, dxel bëjl yaloj ni guiniaazil babëëb. Ro' bëjl guin guidxelil tijb cintabl, con laan bitijx dux impuest.

ɿChu mazri zobjloj?

(Mr. 9:33-37; Lc. 9:46-48)

18 Lën ree dxejzii bidxin ree xbejn Jesús lod za'-man, abi' gunabdiidx reeman lojman, rëb reeman:

—ɿChu mazri zobjloj lod rniabee Dios?

² Dxel gurejdx Jesús tijb xindoo, bazujman laax galay reeman, ³ abi' rëbaman:

—Diidxliczi rnin lojdi bal id zayūjndi xgab por xtolidi, bal id zajc tëëdi zi'c tijb xindoo, ad zutidi lod rniabee

Dios. ⁴ Bén güün naya loj Dios, gac tēēman zi'c xindo guie, laaman gac bén mazri zojbloj lod rniabee Dios. ⁵ Abi' bén yaca' tijb xindoo, por naj, najn raca'man.

Bén rüjn persi ryajb ree bejn loj dol
(Mr. 9:42-48; Lc. 17:1-2)

⁶ Bal chu gusajb tijb bén qui rliladxri naj loj dol, zagdxeli guixhii reeman tijb guiajro' yējnman guzaal reeman laaman xt xan nijs. ⁷ Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per probza bén gusajb bejn ree loj dol!

⁸ Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tibladi yaal o con tibladi guia'l, luar chu'l con groplad yaal o groplad guia'l loj bajl ni ad yu't dxej yayü'. ⁹ Abi' bal laagajc guiaalojl rusajb lüj loj dol, gulēen bazaalan zijt, zagdxeli chu'l con tibladi guiaalojl xanyabaa, luar chu'l con gropladan loj bajl yu' gabijl.

Xcwent xiil gunit
(Lc. 15:3-7)

¹⁰ Ad guiniajgaadi loj ree bén qui rliladxri naj. Din didxliczi rnin lējt guial xanyabaa yu' ree anjl rniaj laa reeman zianczi za' reeman loj da Dadan Dios bén yu' xanyabaa. ¹¹ Guiaad Bén guxhaal Dios zēēdaman par ree bén ad zinalt xnejz Dios din laa reeman loj dol.

¹² Xhie naladxidi? Bal tijb bejn rajp tibgayuu xiil, abi' rizēēb tijbib, znid zusa'nman zatajpagljchiinbitapib daj ya din chigdiilaman be bizēēb guin? ¹³ Abi' bal yadx-ejlaman laab, diidxliczi rnin mazri yabaanēman laab guial loj tajpagljchiinbitap be ad bizēēb guint. ¹⁴ Zian-gajc dux Dad ree Dios bén yu' xanyabaa ad rēntaman nit ni'czi tijb ree bén qui rliladxri laaman.

Xhienaag yaguieen perdon du lasa' ree
(Lc. 17:3)

¹⁵ Bal xhie tijb ni mal güün lasa'l lüj, guneenēman lüjzi din gagbeeman xhie falt badxe'man. Bal guidx-ga'man xtiidxil, ma beenl gan yaneenēl laaman zagdx. ¹⁶ Bal id ridxga'man lüj, binē zatijb o zatio'p bejn, din chigdeenēdi laaman din con xtiidx tio'p o choon bejn guiguien guial ma bigneenēl laaman. ¹⁷ Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bén ad rliladxt Dios o zi'c tijb bén ruquijx impuest par Rom.

¹⁸ Diidxliczi rnin, gra ni ad zatiējbtidi gac loj guidxliuj guie ad rajtan xanyabaa, guiaad ni tiēbidi gac loj guidxliuj guie mal rajcan xanyabaa.

¹⁹ Rni tēēn lējt: Bal yaya'n tio'pidi diidx loj guidxliuj guie, par guiniabidi xhienin loj da Dadan bén yu' xanyabaa, laaman gunee laan. ²⁰ Din lod rado'p tio'p o choon bejn por naj, laa naj za' galay reeman.

²¹ Dxel gubig Bēd gunabdiidxaman loj Jesús, rēba-man:

—Dad, zbel volt rayal gūnan perdon lasa'n, bal gūn-man naj xhienin? Xt gajdx volt ya?

²² Badxi' Jesúsán rēbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

Xcwent bén ad rüjn perdon lasa'

²³ Xguialrniabee Dios naj zi'c tijb rey ni been xgab guial ma gojl yaguijx ree xmojsaman lojman. ²⁴ Chi guzulojman caybēēman cwent guin, bidxin tijb xmojsaman lojman bén ral zro' da't. ²⁵ Abi' guial achet rajp bén guin din yaguijxaman ni ralaman, gunabee rey guin to'man loj ree bejn nē lacheelaman con ree xi'n-man nētēē gra ni rajpaman din chile' yaguijxaman di'n guin. ²⁶ Dxel bazuxibaman loj rey guin, beenman naya rēbaman: “Dad, gojp naj pacens zaguixcan graczi ni ralan lojl.” ²⁷ Zianz baya rey guin laaman, beenman laaman perdon gra ni ralaman, abi' baslaaman laaman ziaman. ²⁸ Per chi barii mojs guin yagaj, badxajgaman tijb bén rüjnnēman dxiin, ralaman ta'nzi milia lojman. Dxel gunaazaman laaman guzuloj caguiajman yējn-man, rēbaman: “iBaguijx ni ralil lon!” ²⁹ Dxel bazuxib bén guin lojman beenman naya rēbaman: “Gojp naj pacens zaguixcan graczi ni ralan lojl.” ³⁰ Per ad guyēnt bén guin, badxe'man laaman ladxguib xt lodzi yaguijxaman di'n guin. ³¹ Chi baguiaa ree los demazri ree xmojs rey guin, dād gognaa luxdoo reeman, abi' wej reeman biguiedx reeman lojman gra ni goc. ³² Dxel gurejdx rey guin mojs guin, zianz rēbaman lojman: “iMojs guijdx! Benan perdon gra ni ralil lon guial beenl naya. ³³ Nid nēgajc lüj rayal naya xcompniaril ya, zi'c-gajc bayan lüj?” ³⁴ Abi' guial tant balen rey guin, gunabeeman badxe' reeman laaman ladxguib xt lodzi baguijx gra ni ralaman.

³⁵ Basnuu Jesús rēbaman:

—Ziangajc güünnē da Dadan lējt, bén yu' xanyabaa, bal id züjn perdon lasa'di con guidib luxdoodi ni rüjn-nē reeman lējt.

Rulüü Jesús xcwent guial rala' lasa'
(Mr. 10:1-12; Lc. 16:18)

19 Chi gulox gunee Jesús zian, bazaman niz Galilea, zēman niz Judea, niz stiblad ro' guiiw Jordán. ² Zien ree bejn binal laaman, yagaj bayünman bēnragxuu ree.

³ Abi' tio'p choon ree bēnfarišew bibig loj Jesús, dxel par güün reeman laaman prueb, gunabdiidx reeman lojman rēb reeman:

—Zile' yala' bejn lacheelaman por xhiedxitzinin ya?

⁴ Badxi' Jesúsán rēbaman:

—Znid wayoolidi loj xtiidx Dios ya, guial diizd guia'x-chej Dios “been xinguaaw nē bēngunaa”? ⁵ Rēb tēēman: “Zeel xinguaaw gusa'n xdad xniaax din guiban-nē lacheelix, dxel grop reex ma gac zi'c tijbzi bejn.”

⁶ Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajg Dios.

⁷ Dxel rēb ree bēnfarišew guin loj Jesús:

—ĈChexquiza zeel rēb Moisejs guial zile' yala' lacheel bejn, con gudēēdaman gui'ch guial ma bala' lasa' ree-man?

⁸ Badxi' Jesúsan, rēbaman:

—Cwējb Moisejs gojc zian guial ad rēntidi guzoobidi diidx, per ad ziant gojc diizd guia'xchej. ⁹ Naj rni lojdi. Xin yala' lacheel, bal id za'nē lacheelix xin ren, abi' tia'x ben ren dolan cayūjnx. Ziangajc xin tia' bēn qui bala'ri lasa' guin dolan cayūjnx.

¹⁰ Dxel rēb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

¹¹ Badxi' Jesúsan rēbaman:

—Ad grat bejn zile' chignia' ni canin, bēn ca'zi ree quiarguejn par chignia' reeman laan. ¹² Yu' bejn diizd rajlaman ad zēēdtaman loj guidxliuj par guxhlaaman, yu'za reeman, bejn rūjn laa reeman zian. Abi' yu' reeman rūjn xgab guial zagdxeli guitie'ch reeman xtiidx Dios luar guxhlaa reeman. Bēn rēn chignia', gol bignia'.

Rūjnle' Jesús xindoo ree

(Mr. 10:13-16; Lc. 18:15-17)

¹³ Binē ree bejn xindoo ree lod za' Jesús, din guix-hioob yaaman guijc reex cwedx guiniab tēēman Dios por laa reex, per ree xbejnman guzuloj cadilē reeman bēn zinē ree laa reex. ¹⁴ Dxel rēb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bēn naj zi'c laa reex.

¹⁵ Abi' guxhoob yaa Jesús guijc ree xindo guin, dxel ziaman.

Tijb xinrijcw

(Mr. 10:17-31; Lc. 18:18-30)

¹⁶ Bidxin tijb xin guin loj Jesús, abi' gunabdiidx lojman, rēbix:

—Mextr, ĉxhie ni zagdxē gūnan din ga'pan guialnaban tiblayaa con Dios?

¹⁷ Dxel rēb Jesús lojx:

—ĈChexc zeel rniabdiidxil lon conin naj ni zagdxē? Achut naj benza'c, tijbzi Dios. Per bal rēnl gapil guialnaban tiblayaa con Dios, been zi'c rēb ree mandamient.

¹⁸ Dxel gunabdiidx loj Jesús rēbix:

—ĈCon ree mandamiantan?

Badxi' Jesúsan, rēbaman:

—Ad gugūjtil bejn, ad sunēl lacheel ben ren, ad cwanl, ad cwēēl xtiidx bejn, ¹⁹ gojp respekt xdad xnial, gūyēn tēē ree lasa' zi'c rēn lūj gajc.

²⁰ Dxel rēbix:

—Gra ree ni guin cayūnan diizd najn xindoo, ĉxhieri ryaadx gūnan yan?

²¹ Badxi' Jesúsan, rēbaman:

—Bal rēnl gaquil benza'c loj Dios, bigto' gra ni rajpil dxel gudēēl milia guin loj ree bēnprob. Zian gapil guialnaza'c xanyabaa. Zianz guidnalil naj.

²² Chi biguejn xin guin zian, dād guyu nayax ziax, guial dād xinrijcwan.

²³ Dxel rēb Jesús loj ree xbejnman:

—Diidxliczi rnin lojdi: Dād nawēēg chu' benrijcw lod rniabee Dios. ²⁴ Naj rni lējt. Adli nawēēgt tēd tijb camell xan gagux, guial chu' tijb benrijcw lod rniabee Dios.

²⁵ Chi biguejn ree xbejn Jesús zian, dād badxaloj reeman, abi' rēb reeman:

—ĈChuza zajc gac perdon loj Dios?

²⁶ Dxel baguiaa Jesús loj reeman, rēbaman:

—Nawēēg gac zian par bēnguidxliuj, per par Dios achet ni nawēēg yu'.

²⁷ Abi' rēb Bēd lojman:

—Ma basa'nan graczi ni raya'pan, persi zudnaalan lūj. Abi' ĉxhieza yayalan?

²⁸ Badxi' Jesúsan, rēbaman:

—Diidxliczi rnin lojdi chi guidxin dxej yacūb gra, guidxin tēē dxej cwe Bēn guxhaal Dios luar lod nabeeman, nē lējt, guial zidnalidi naj, cwedi loj chiptio'p ree luar lod nabeedi, dīn gūn xguialguxtisidi loj guidxip-tio'p ree xdiaa Israel. ²⁹ Abi' gra ree bēn basa'n lidx, bi-jch, bizan, xdad, xnial, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tēē reeman guialnaban tiblayaa con Dios.

³⁰ Per zien ree bēn naj bēn yaloj, gac reeman bēn bigra, abi' zienza ree bēn naj bēn bigra, gac reeman bēn yaloj.

Xcwent ree bēn rūjn dxiin

20 Rēb tēē Jesús:

—Xguialrniabee Dios naj zi'c tijb bēn rajp tijb guiniaaro', rsildoo briiman zitiilaman mojs gūn dxiin loj xguiniaaman. ² Baya'nnēman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. ³ Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. ⁴ Zianz rēbaman loj reeman: "Gol bigueen dxiin loj da guiniaan, naj gaguix lējt zi'c rayal." Dxel zē reeman. ⁵ Cost garol dxej briiman stijb, abi' brii gajman cost raca choon wadxē ziangajc rēbaman loj ree bēn riga' yagaj, bēn achet xchiin. ⁶ Cost raca gaay wadxē wejman galay luguiedx guin stijb, abi' bidxaaglojman ben ren ree, bēn achet ree xchiin, gunabdiidxaman loj reeman, rēbaman: "ĈChexc zeel za'di guin gudēdchej ad cayūjntidi dxiin?"

⁷ Badxi' reeman laan rēb reeman: "Achut waneē dxiin yagueenan." Dxel rēbaman loj reeman: "Nē lējt gol bigueen dxiin loj da guiniaan naj gaguix lējt zi'c rayal."

⁸ Chi ma gurej guial, rēb bēn naj xguiniaan loj bēn naaz dxiin guin: "Gurejdx ree mojs guin din quixil laa reeman, per yalojxgaj gudijx ree bēn bigra guyu, zianz quixil bēn guyu ree yaloj." ⁹ Chi bidxin ree bēn guyu loj dxiin guin raca gaay wadxē, gojx tijbgaj reeman xieen tibdxej. ¹⁰ Dxel chi bidxin ree bēn guyu loj dxiin diizd rsil, gunaladx reeman niajx reeman mazri, per nēgajc reeman gojx xieen tibdxej. ¹¹ Abi' chi cayajx reeman, guzuloj cadxe'ch reeman bēn naj xguiniaa laan, ¹² rēb reeman lojman: "Bēn bigra guyu ree, been reeman dxiin tib horzi abi' zi'cgajc caguixil dunujn gudijxil laa

reeman, abi' dunujn badaanan baguieenan dxiin dëchej loj guialnalaa." ¹³ Per rëb bën guin loj tijb reeman: "Achet ni mal cayünan lüj. ¿Nid baya'n diidx ya plac gunen tia'l tibtdeje? ¹⁴ Cwa' ni bayalil baguiaj. Din naj rënan gaguixan bën bigratë guyu zi'c gudixan lüj, ¹⁵ zajc günnë' da milian ni rëntzan. ¿O nadëdlojl ya guial najn benza'c?" ¹⁶ Zianan zeel bën naj ree bën bigra gac reeman bën yaloj, guiáad ree bën yaloj gac reeman bën bigra.

Bayon volt bagojn Jesús guial guiëtaman

(Mr. 10:32-34; Lc. 18:31-34)

¹⁷ Chi zë Jesús Jerusalén, gurejdx guidxiptio'p ree xbejnman tiblad, rëbaman loj reeman:

¹⁸ —Ganin lëjt, ziyo' ree Jerusalén, lod yayü reeman Bën guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtaman, ¹⁹ yayü reeman laaman loj ree benzit, din guze' reeman laaman quin tää reeman laaman, abi' gucaa reeman laaman loj crüzj, per yayon dxex yabanman.

Ni gunab xniaa Jacob con Waj

(Mr. 10:35-45)

²⁰ Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman. ²¹ Gunabdiidx Jesús lojman, rëbaman:

—¿Xhie rën!

Badxi' bën guinan, rëbaman:

—Rënan nabeel cwe tijb da xi'nan xladbeel, stijbim xladruvejsil, chi ma canabeel.

²² Dxel rëb Jesús:

—Ad ragbeetidi ni rniabidi. ¿Wen zajc tädidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

²³ Abi' rëbaman:

—Diidxliczi rnin zajc tädidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bën ba-caabee da Dadan.

²⁴ Chi biguiejn zachii ree xbejn Jesús zian dád balen reeman grop bijch reeman. ²⁵ Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiáad ree bën zobjloj rüjnnë reeman bejn ree zi'ctzi rën reeman por guialrniabee ni rajp reeman. ²⁶ Per con lëjt ad rayalt gac zian. Bal chu rën gac bën rniabee lojdi, rayal günnman sirv lojdi. ²⁷ Ziangajc bën rën gac bën zobjloj lojdi, rayal günnman sirv lojdi zi'c bën nado'. ²⁸ Zi'c Bën guxhaal Dios ad bi'ttaman par günn reeman sirv lojman, bi'ttaman par günnman sirv gudëë tää xguialnabanman din laa zien bejn loj dol.

Rayüjn Jesús tio'p ree bën lutia'p

(Mr. 10:46-52; Lc. 18:35-43)

²⁹ Chi bazaman luguiedx Jericó con ree xbejnman, dád zien ree bejn binal laaman. ³⁰ Dxel tio'p ree bënlu-

tia'p zobj cwë' nejz chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

³¹ Abi' rdilë ree ben guin laa reeman din yacwëëz ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

³² Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi günan por lëjt?

³³ Badxi' reeman laan, rëb reeman:

—Dad, rayënan yaxal du lojn.

³⁴ Dxel baya Jesús laa reeman, abi' baquiman loj reeman. Loj hor zii baxal loj reeman, dxel binal reeman Jesús.

Ru Jesús Jerusalén

(Mr 11:1-11; Lc. 19:28-40; Jn.12 :12-19)

21 Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, ² rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiee reeb gol tanë reeb guie. ³ Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

⁴ Zian gojc persi gojc cumplid ni gunee bën badëë xtiidx Dios loj ree bejn, chi rëbaman:

⁵ Gol güjdx loj ree bën Sión:

“Gol baguiaa laa xreydi zëëd lojdi, ad zëëdtaman nabë, dxiibaman tijb bur, tijb burdoo xi'n tijb be rüü.”

⁶ Dxel wej ree xbejn Jesús abi' been reeman zi'c rëbaman loj reeman, ⁷ binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin. ⁸ Abi' guial zien ree bejn, yu' reeman rguijxh xab lunejz, zien tää reeman ritü' xidx ree yag persi rguijxh reeman laa reen lod cadëdaman. ⁹ Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bën guxhaalaman! ¡Benza'c bendxoon naj Dios bën yu' xanyabaa!

¹⁰ Chi guyu Jesús luguiedx Jerusalén, gra ree bën luguiedx guin badxaloj, abi' riniabdiidx loj lasa' reeman, rëb reeman:

—¿Chu bën guin?

¹¹ Dxel rëb ree benzien guin:

—Laaman naj Jesús, bën rudëë xtiidx Dios loj ree bejn, bën Nazaret guiedx riga' niz Galilea.

Rabëë Jesús bën ruto' ree lën yadoo Jerusalén

(Mr. 11:15-19; Lc. 19:45-48; Jn.2 :13-22)

¹² Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii. Barexguiataman xmex ree bën cuchaa milia në xmex ree bën cuto' palom. ¹³ Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nünndan zi'c lidx ree xin-gubaan.

¹⁴ Dxel bénlutia'p ree con ree bencoj bibig reeman loj Jesús lën yadoo guin abi' bayünman laa reeman.

¹⁵ Per chi baguiaa ree bixhioz rniabee ree bixhioz con ree mextr rajc ley milagr cayün Jesús, biguejn tēē ree-man rēb ree xindoo lën yadoo guin: “Benza'c bendx-oon naj xdiaa rey Davi”, dxel dād bidxe'ch reeman.

¹⁶ Abi' rēb reeman loj Jesús:

—¿Rgueijnl ni canee ree xindo guin ya?

Badxi' Jesúsán, rēbaman:

—Rgueijnan. Per ¿gadidi gool loj xtiidx Dios ya? Lod rēb:

Lūj badēēd ni gool ree xindoo nē ree xindobēz sta rē'dud,

din guilies reex xvaloril.

¹⁷ Dxel basa'n Jesús laa reeman, zēman Betania ni baya'nman guxin guin.

Tijb yag higo ni gubidx

(Mr. 11:12-14, 20-26)

¹⁸ Chi bareguiaa rsil la'tgaj zē Jesús Jerusalén stijb, guzuloj gulaanman. ¹⁹ Abi' baguiaaman zojb tijb yag higo cwē' nejz, dxel gubigaman cwē'n, per ganaxzi balag ca lojn. Zianz rēbaman loj yag higo guin:

—¡Ad yu'tri dxej tial higo!

Loj hor guin gajc gubidx yag guin. ²⁰ Chi baguiaa ree xbejnman zian, dād badxaloj reeman abi' gunabdiidx reeman loj Jesús, rēb reeman:

—¿Xhienaag gojc zeel laa gubidx gajc yag higo guin?

²¹ Badxi' Jesúsán, rēbaman:

—Naj rni lojdi, bal rliladxidi Dios abi' ad zunawēēgti-di, ad ni bentzan con yag higo guin zajc gūūndi, zajc guiēbidi loj guia' guie: “Biquied guie, bisob loj nijsdoo”, abi' zajc gajc zian. ²² Gra ni guiniabidi loj Dios, bal rliladxidi laaman, zuneeman laan.

Xguialrniabee Jesús

(Mr. 11:27-33; Lc. 20:1-8)

²³ Chi guyu Jesús lën yadooro' Jerusalén, la'tgaj culūūman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rēb reeman:

—¿Chu na gūūnl ni guin ree? ¿Chu banee guialrniabee lojl?

²⁴ Badxi' Jesúsán, rēbaman:

—Ziangajc naj yu' tijb ni ganabdiidxan lojdi, bal yadx-i'dan dxel ganin lëjt chu banee guialrniabee gūnan ni guin ree. ²⁵ ¿Chu guxhaal Waj chigroobnijsaman bejn ree, Dios ya o bēnguidxliuj?

Dxel guzuloj cayū reeman diidx, rēb reeman:

—Bal yaguie'ch ree, “Dios guxhaal laaman”, zana-man: “¿Chexza zeel ad bililadxtidi laaman?” ²⁶ Abi'za bal yaguie'ch ree: “bēnguidxliuj guxhaal laaman”, radxeb ree yalen ree bejn din gra reeman rliladx guial Waj naj bēn badēēd xtiidx Dios loj ree bejn.

²⁷ Dxel rēb reeman loj Jesús:

—Ad rayagbeetan.

Badxi' Jesúsán, rēbaman:

—Ni'qui naj ad zanitan lojdi chu banee guialrniabee gūnan ni guin ree.

Tijb bēn guyu tio'p xi'n

²⁸ Basnuu Jesús rēbaman loj ree bixhioz rniabee ree bixhioz nē loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'n-man, dxel rēbaman loj tijbix: “Xi'n, wej yandxej bigu-ieen dxiin loj guiniaa yu' uv.” ²⁹ Badxi'xan, rēbix: “Ad zatan.” Per dxelri bayūjnx xgab zianz wejx. ³⁰ Abi' rēba-man loj stijb xi'nman din chex, badxi'xan, rēbix: “Yo dad, gazacan.” Per ad wejtix. ³¹ Yan, ¿chu loj grop reex been ni rēn xdad reex?

Badxi' reeman laan, rēb reeman:

—Xin rēbaman loj yaloj guin.

Dxel rēb Jesús loj reeman:

—Diidxliczi rnin, bēn ruquijx ree impuest con ree bēngunaa naban nadxuudx, yalojl laa reeman chu' lod rniabee Dios guial lojdi. ³² Din bi't Waj, bēn baroobnijs bejn ree par gulūūman lëjt xhienaag guibandi, per ad bililadxtidi xtiidxaman. Guiaad ree bēn ruquijx im-puest con ree bēngunaa naban nadxuudx, bililadx ree-man xtiidxaman. Per lëjt majsi baguiaadi gra ree ni guin, ad bayūjntidi xgab por xtolidi din nililadxidi laa-man.

Xcwent ree mojs guijdx

(Mr. 12:1-12; Lc. 20:9-19)

³³ Rēb tēē Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxūbinman uv ree loj xguiniaa-man, dxel beenman gurajl gadēd ro'n, beenchaaw tēē-man tijb luar lod grii xnijs uv guin, abi' bazoobaman ti-jb yu ya da't din guiya'p guidib guiniaa guin.

‘Zianz badēēdaman laan garol loj ree bēn gūūn dxiin lojn, zētaman zijt. ³⁴ Chi bidxin dxej yaru' ree uv guin, guxhaalaman tio'p choon ree xmojsaman chigxii ree-man ni rayalaman. ³⁵ Per ree bēn rūjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagūjt reeman, stijbaman ba-caaguaiaj reeman. ³⁶ Dxel bēn naj xguiniaan guxhaalaman mazri ree mojs guial loj ree bēn we yaloj, per ziangajc beennē ree bēn guin laa reeman.

³⁷ ‘Ni bigra, guxhaal xi'nman guial gunaladxaman: “Zajpqui reeman da xi'nan respekt.” ³⁸ Per chi baguiaa ree bēn guin xi'nman, rēb loj lasa' reeman: “Xin guinan naj xin tia' guidxliuj guin, yagūjt reex din gacan du xieen ree.” ³⁹ Abi' gunaaz reeman laax, babēē reeman laax loj guiniaa guin dxel bagūjt reeman laax.

⁴⁰ Dxel gunabdiidx Jesús loj ree bēn caneenēman, rēbaman:

—Chi yadxin bēn naj xguidxliuj laan, ¿xhie naladxidi gūūnnēman bēn guin ree?

⁴¹ Abi' rēb reeman loj Jesús:

—Ad zayataman gugüjtaman bén guin ree, dxel gudëëman guidxliuj guin garol loj ree ben ren, bén yayü ni rayalaman chi guidxin dxej yaru' ree uv guin.

⁴² Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guiaj ni gulëëgo'n ree bén rüjn yu.

Laan goc ni mazri been sirv gojcnë yu guin.

Laan naj ni been Dios,

abi' dád radxa du loj ree.

⁴³ Zeel rnin lojdi, zariicadi loj xguialrniabee Dios abi' ben ren ree yayu xluaridi, bén wali ree güün zi'c rënman. ⁴⁴ Abi' chutëëz bén yab guiic guiag guin, zarooxaman, guiáad bal yab guiag guin guiicaman zanidlojman.

⁴⁵ Chi biguiejn ree bixhioz rniabee ree bixhioz con ree bénfarisew guin ni cayü Jesús zi'c cwent, dxel gogbee reeman guial laa reeman cuza'taman. ⁴⁶ Abi' guyën reeman niniaaz reeman laaman, per bidxeb reeman bejn ree guial rliladx reeman laaman naj bén rudëëd xtiidx Dios loj ree bejn.

Xcwent guialruxhliaa

22 Basnuu Jesús beman zi'c cwent loj reeman rëbaman:

² —Xguialrniabee Dios naj zi'c tijb rey bén been lani-jro' chi baxhliaa xi'nman. ³ Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. ⁴ Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'-nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.” ⁵ Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, ⁶ yu' tëë reeman gunaaz mojs guin ree gudi-jn reeman laa reeman abi' bagüjt reeman laa reeman. ⁷ Chi gogbee rey guin zian, dád bidxe'chaman. Guxhaalaman bén naj ree xsuldadaman persi bagüjt reeman bén guin ree baze'c tëë reeman lidx reeman. ⁸ Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree bén gunen ad najt guial ni't reeman. ⁹ Yan, gol wej lod radxaag lasa' ree nejz, gol güjdx loj ree bén guidxaalojtzidi din gui't reeman loj guialruxhliaa guin.” ¹⁰ Abi' brii ree mojs guin wej reeman lunejz guin ree, bato'p reeman gra ree bén bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

¹¹ Per chi guyu rey guin din guguaaman biooz guin ree, baguaaman tijb bén ad najcwt xab ni rayal gacwaman loj guialruxhliaa guin. ¹² Abi' rëb rey guin lojman: “Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?” Dxel achet badxejl niëjb bén guin. ¹³ Zianz rëb rey guin loj ree bén cagui's guialraw: “Gol guxhii guia'x në yaax, gol bazaal tëëx xchu lod nacay da't lod goonx gaw tëë layix.” ¹⁴ Din zien ree bejn rdxejl, per ad grataman chu'.

¿Rayal gax impuest ya?

(Mr. 12:13-17; Lc. 20:19-26)

¹⁵ Dxel baza ree bénfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. ¹⁶ Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniee diidxli, abi' walil rulüül guial xhienaag rën Dios guiban bejn, ad ridxga' tëëtil chu naj bejn. Din lojl tiblojzi naj bejn.

¹⁷ Guna du lojn: ¿Zagdxen ya yadijxan impuest loj César o ad zagdxetan ya?

¹⁸ Per gogbee gajc Jesús xgabmal ni cayüjn reeman, abi' rëbaman loj reeman:

—Bén rusquiee, ¿chexc zeel raguilidi mod xhienaag gutidia'di naj? ¹⁹ Gol balüü tijb cintabl lon ni rguijxnëdi impuest.

Dxel badëëd reeman tijban lojman, ²⁰ abi' gunabdiidx Jesús loj reeman, rëbaman:

—¿Chu loj ca lojn chu tëë laj ca lojn?

²¹ Badxi' reeman laan, rëb reeman:

—Laj César në lojman.

Dxel rëbaman:

—Gol badëëd loj César ni naj xieen César, guiáad loj Dios gol badëëd ni naj xieen Dios.

²² Chi biguiejn reeman zian, dád badxaloj reeman, dxel basa'n reeman laaman, zianz zia reeman.

Gunabdiidx reeman xcwent guial yaban ree bengüt

(Mr. 12:18-27; Lc. 20:27-40)

²³ Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad rliladxt reeman guial yaban ree bengüt, zeel rëb reeman loj Jesús:

²⁴ —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix. ²⁵ Du lojn guyu tijb famil lod gojc reex gajdx bijch. Baxhliaa xin yaloj guin, per güjtix abi' guial ad guyut xi'nx, dxel bijch barojpix baxhliaanë béngunaa guin. ²⁶ Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. ²⁷ Chi bara reex güjt dxel güjt béngunaa guin. ²⁸ Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliaanë laaman?

²⁹ Badxi' Jesúsán, rëbaman:

—¿Ragdxadi guial ad nünbeetidi xtiidx Dios ad nünbee tëëtidi xhienaag naj xguialrniabeeman! ³⁰ Din chi yaban ree bengüt, ad zuxhliatri reeman ad zudëëd tëëtri xi'n reeman guxhliaa, ma gac reeman zi'c ree anjl yu' xanyabaa. ³¹ Abi' xcwent ni yaban ree bengüt, ¿gadidi gool ya lod ca guial Dios gajc rëb: ³² “Naj naj xDios Abraham, xDios Isaac në xDios Jacob?” Abi' Dios ad najtaman xDios ree bengüt, najman xDios ree bén naban.

³³ Chi biguiejn ree bejn zian, dád badxaloj reeman zi'c rulüüman laa reeman.

Mandamient mazri zojbloj

(Mr. 12:28-34)

³⁴ Chi gogbee ree bénfarisew guial achet badxejl niëjb ree bénsadusew loj Jesús, dxei baya'n reeman di-idix badxaag lasa' reeman. ³⁵ Abi' tijb ree bénfarisew guin, bén naj mextr rajc ley, gunabdiidxaman loj Jesús din guidoon xhie guiëbaman, rëbaman:

³⁶ —Mextr, ¿con mandamientan mazri zojbloj loj gra ree mandamient ni zëed loj ley?

³⁷ Badxi' Jesúsán rëbaman:

—“Guyën xDadil Dios guidiblagaa guidib guijc guidib ladxil.” ³⁸ Laan naj mandamient mazri zojbloj. ³⁹ Zian-gajc naj mandamient rarojp ni rëb: “Guyën ree bejn zi'c rën lüj gajc.” ⁴⁰ Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bén badëe xtiidx Dios loj ree bejn.

Chu loj xdiaa za Cristo

(Mr. 12:35-37; Lc. 20:41-44)

⁴¹ La'tgaj nadxag lasa' ree bénfarisew guin, gunabdi-idix Jesús loj reeman, rëbaman:

⁴² —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

⁴³ Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

⁴⁴ Dios rëb loj bén rniabee naj:

“Gurej da ladbeen, xt gabecan xin rdxe'ch ree lüj guial'.”

⁴⁵ Yan, bal xi'n Davi naj Cristo, ¿chexquiza zeel rëb Davi lojman Dad?

⁴⁶ Achutczí gojc nadxi' xtiidx Jesús, ni'czi tijb diidx. Abi' diidx dxejzii achutczí bayax niniabdiidx xhienin lojman.

Ni rüjn ree mextr rajc ley në ree bénfarisew

(Mr. 12:38-40; Lc. 11:37-54; 20:45-47)

23 Rëb Jesús loj ree bejn në loj ree xbejnman:

² —Mextr rajc ree ley con ree bénfarisew rulüü reeman xhie rën guiëb ni ca loj xley Moisejs. ³ Zeel gol bazoob xtiidx reeman, gol been tëë gra ni na reeman lojdi, per ad güündi zi'c rüjn reeman, din laa reeman ni ren na reeman abi' ni ren rüjn reeman. ⁴ Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. ⁵ Gra ni rüjn reeman, rüjn reeman laan din yadxaloj bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdx. ⁶ Ruladx reeman cwe reeman lod rayal rbej ree bén zojbloj, loj tijb guialraw, abi' ziangajc rüjn reeman lën ree yadoo.

⁷ Ruladx tëë reeman gugajpdioz bejn laa reeman zagdx niz lunejz guiëb tëë reeman loj reeman mextr.

⁸ Per lëjt ad sëëbladixidi guinee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. ⁹ Ni'qui tijb loj bénguidxliuj, bén ad najt xdadidi, ad guiëbidi dad, din tijbzi xdadidi yu', laaman yu' xanyabaa. ¹⁰ Ad güün tëëdi naguiejn yayagbee ree bejn lëjt zi'c bén rniabee, din tijbzi bén rniabee yu', laaman naj Cristo. ¹¹ Bén mazri zojbloj lojdi, laaman rayal güün sirv lojdi. ¹² Din bén rlies xvalor gajc achet lasajcaman. Guiáad bén rüjn naya, zajs xvaloraman.

¹³ ¿Probza lëjt mextr rajc ley në lëjt bénfarisew, bén rusquieel, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bén rën ree gac xbejnman.

¹⁴ ¿Probza lëjt mextr rajc ley në lëjt bénfarisew, bén rusquieel, din raca'di lidx ree béngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

¹⁵ ¿Probza lëjt mextr rajc ley në lëjt bénfarisew, bén rusquieel, zizadi guidibdoo rguilidi bén gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

¹⁶ ¿Probza lëjt, bénlutia'p!, rëbidi: “Achet güünan bal id züjn bejn ni guneeaman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxei ma rüjn naguiejn güünman ni guneeaman.” ¹⁷ ¿Natontidi, wed natia'p lojdi! ¿Conin mazri lasajc: Or guin ya o yadoo beenle' or guin?

¹⁸ Rëb tëëdi: “Achet güünan bal id züjn bejn ni guneeaman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeaman.” ¹⁹ ¿Bénlutia'p! ¿Conin mazri lasajc par lëjt: Gon guin ya o altar beenle' gon guin?

²⁰ Bén ruza't altar guin ad altar quintzan ruza'taman, nëgajc gra ni dxiib lojn ruza'taman. ²¹ Guiáad bén ruza't yadoo guin, ad yadoo quintzan ruza'taman, Diosan ruza'taman din lidxaman naj yadoo guin. ²² Abi' bén ruza't xanyabaa, Diosan ruza'taman në lod zojba-man.

²³ ¿Probza lëjt mextr rajc ley në lëjt bénfarisew, bén rusquieel, rbëëcadi bidxtil, anís nëtëë comin ni rayal gudëëdi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tëëtiidi loj xnejz Dios. Laa reen rayal güündi, per ad cwëëladixidi gudëëdi ni rayal loj Dios. ²⁴ ¿Bénlutia'p, rajpidi cudad chitëë guiëbidi tijb bizëdlajs, abi' rguiejbidi tijb camell!

²⁵ ¿Probza lëjt mextr rajc ley në lëjt bénfarisew, bén rusquieel, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaan nëtëë guialrdxe'ch lasa'. ²⁶ ¿Bénfarisew lutia'p: Yalojxgaj gol basia, zian guiguien waliquidi naya-di loj Dios!

²⁷ ¿Probza lëjt mextr rajc ley në lëjt bénfarisew, bén rusquieel, najdi zi'c baa nayë' culor naquich, guijcan rguien nix da't, per lënan guidxa ree xdxijt bengüt në

graloj ree ni dxuudx. ²⁸ Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

²⁹ ;Probza lëjt mextr rajc ley në lëjt bënfarisew, bën rusquiee!, rüjndi xbaa ree bën badëë xtiidx Dios loj ree bejn, abi' rüjnchaawidi xbaa ree bën goc benza'c, ³⁰ dx-el rëbidi: "Bal nabajnan xtiamp ree dux bēngulalan, ad nēt dunujn nagüjt bēn badëë ree xtiidx Dios loj ree bejn." ³¹ Abi' con ni guin ree, rayünbeegajquidi guial loj xdiaa bēn bagüjt ree bēn badëë xtiidx Dios loj ree bejn zëëdidi. ³² ;Gol balooxa ni guzuloj been xbēngulalidi!

³³ ;Bëndol, xi'n xindxab! ;Xhienaa laadi loj castiro' ni yu' gabijl? ³⁴ Zeel gaxhalan lojdi bēn gudëë ree xtiidx Dios, bēn rajc ree në ree mextr. Per yu' reeman gugüjtidi, yu' reeman gucaadi loj crüjz, yu' tēë reeman quindi lēn ree xyadoodi abi' sunalidi laa reeman guiedx por guiedx din güündi laa reeman xhienin. ³⁵ Zianan zeel guijquidi yab xtol gra ree bēn bagüjt bēn goc ree benza'c diizd Abel bēn guban xnejz loj Dios xt Zacarías xi'n Berequías, bēn bagüjt reeman lule' yadooro' Jerusalén. ³⁶ Diidxliczi rnin lëjt, xcasti gra ree ni guin yab guijc ree bēn riga' loj guidxliuj yan.

Roon Jesús por Jerusalén
(Lc. 13:34-35)

³⁷ Rëb tēë Jesús:

—;Bēn Jerusalén, bēn Jerusalén, rugüjtidi bēn rudëë ree xtiidx Dios loj ree bejn abi' rucaaguiajdi bēn rxhial Dios lojdi! ;Bëlcz volt guyēnan nuchagan lasa'di, zi'c rüjn tijb guid ruchajg lasa' ree xi'nb lēn xhiilib, per ad gutiëjbtidi! ³⁸ Zianan zeel yaya'n ladxidi zi'c tijb guiedx lod achut zobj. ³⁹ Abi' rnin lëjt diizd yan ad zuguaatrudi naj, xt chi guidxin dxej guiëbidi: "iNünle' Dios bēn guxhaalaman!"

Rëb Jesús guial yaze'n yadooro'
(Mr. 13:1-2; Lc. 21:5-6)

24 Chi barii Jesús lēn yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. ² Abi' rëb Jesús loj reeman: —Diidxliczi rnin, gra ni cuguiaadi yu' dxej ni'qui tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit
(Mr. 13:3-23; Lc. 21:7-24; 17:22-24)

³ La'tgaj zobj Jesús guijc guia' la Olivos, gubig ree xbejnman lojman, rëb reeman:

—Rayēnan nal goc gac zian. ;Xhie ree sen gac chi ma zidyob gui'til stijb, në chi ma zidyob nit guidxliuj?

⁴ Dxel rëb Jesús loj reeman:

—Gol gojp cudad achu gusquiee lëjt. ⁵ Din zien ree bejn gui't guiëb reeman guial por naj zëëd reeman, guiëb tēë reeman: "Naj naj Cristo", abi' zien bejn gusquiee reeman. ⁶ Per lëjt chi guiguiejni cayajc wadijl o zëëb diidx guial gac wadijl, ad guidxebidi din zian naj gac. Per ad wadxint dxej nit guidxliuj. ⁷ Din til nacion con stijb nacion, në bēn rajp guialrniabee con stijb bēn rajp guialrniabee. Abi' gui't xudoxh në gubijn

niz ni niz guie. ⁸ Gra ree nine ree gac chi ma suloj gualzi guin.

⁹ Dxel yayü ree bejn lëjt loj ree bēn gusagzi lëjt, gugüjt reeman lëjt, abi' gra ree bēnguidxliuj guidxe'ch lëjt guial najdi da bejnan. ¹⁰ Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree bēn ralen laa reeman.

¹¹ Gui't tēë zien ree bēn gusquiee, guiëb reeman guial rudëëd reeman xtiidx Dios, abi' zien bejn gusquiee reeman. ¹² Abi' guial dād zien ni mal gac, zien da't bēn ad zēntri ree lasa'. ¹³ Per bēn sudxi'ch loj guialrliladxaman naj, xt dxej chigra guibanman, laaman yayal xanyabaa. ¹⁴ Abi' xtiidx Dios ni canin lëjt yan guire'chan guidibcz guidxliuj din gagbee gra bejnan, dxelri nit guidxliuj.

¹⁵ Zianan zeel chi guguaadi zobj tijb ni dxuudx, ni ad rüjnt sirv lēn yadooro' Jerusalén, zi'c gunee Daniel bēn badëë xtiidx Dios loj ree bejn (bēn gool gui'ch guie ree, gol bignia'), ¹⁶ guial bēn zobj ree Judea rayal guxüün reeman che reeman dajn. ¹⁷ Guiáad ree bēn yē'p guijc yulidx dxejzii, ad yayu lēnülidx reeman par tia' xhie xieen reeman. ¹⁸ Abi' ree bēn za' dajn, ad yayejc reeman chigxii xab reeman. ¹⁹ ;Probza ree bēngunaa nüü xi'n o bēn ca' ree xindobëz lēn ree dxejzii!

²⁰ Gol gurejdx gunab Dios chitëë gac zian tiamp nayaag o dxej raziiladx ree bejn ya. ²¹ Din nadxel dād gualziro' chu', zi'c ad wayajctcz diizd guia'xhej chi gad guidxliuj gacchaaw ad yu' tēët dxej gac zian.

²² Abi' bal id Dios gucwëëz gualzi chu' lēn ree dxej guin, ni'qui tijb bejn ad zalaat, per gucwëëzaman laa reen por ree bēn guleman.

²³ Lēn ree dxejzii bal chu na lojdi: "Gol baguiaa, laa Cristo za' guie", o "Gol baguiaa laaman za' ni", ad bal chililadxidi. ²⁴ Din zi't zien ree bēn gusquiee na guial laa reeman naj bēn guxhaal Dios o na reeman guial laa reeman naj bēn rudëëd xtiidx Dios. Abi' züjn reeman milagr ree në graloj ni yadxaloj bejn din gusquiee reeman laa reeman, abi' bal zile'n xt në ree bēn gulej Dios gusquiee reeman. ²⁵ Ma rni xgajn lojdi ni gac.

²⁶ Zeel bal chu na lojdi: "Gol baguiaa laa Cristo za' niz loj yujbidx", ad bal chedi o na reeman lojdi: "Laa Cristo yu' lēnü ni", ad bal chililadxidi. ²⁷ Din zi'c chi rē'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bēn guxhaal Dios stijb. ²⁸ Bēn rliladx ree naj gui't reeman lon, zi'c chi rado'p ree golbich lod naga' tijb begüt.

Gui't Bēn guxhaal Dios stijb
(Mr. 13:24-37; Lc. 21:25-33; 17:26-30, 34-36)

²⁹ Chi ma gudëd ree dxej ni gac ree gualzi guin, guicajy loj gubijdx, ad zusnit bëëw, guiyajb ree bajl xanyabaa abi' gra ree ni yu' xanyabaa guiniib. ³⁰ Dxel guiguien tijb sen xanyabaa guial ma gui't Bēn guxhaal Dios. Abi' gra ree bēnguidxliuj goon da't chi guguaa reeman Bēn guxhaal Dios, rdiinman bacha' zëëdaman loj zaj con xguialrniabeeman. ³¹ Dxel guixhiaal ree xi-anjlaman, abi' rejs da't gucwejdx reeman trompejt, din

yadxajg lasa' ree bën guleman, bën za' ree gralad guidiblagaa guidxliuj.

³² 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëed tiamp nalaa. ³³ Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lëjt. ³⁴ Diidxliczi rnin lëjt guial gra ree ni guin gac chi gad ree bën naban yan guiët.

³⁵ Guidxliuj në xanyabaa zanijt reen, per da diidxan ad zanijttaan.

³⁶ 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

³⁷ 'Zi'c goc gulal chi guban Noé, zian gac chi yaguaaad Bén guxhaal Dios. ³⁸ Din chi gad Dios guixhiaal guidaoh loj guidxliuj, bejn ree, raw reeman, rë' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman.

³⁹ Abi' ad bidxgatzci reeman, dxejlczi gol guidaoh abi' zinë nijs laa reeman, ziangajc gac chi yaguaaad Bén guxhaal Dios. ⁴⁰ Dxej guin, lod za' tio'p ree xinguaaw dajn, tijbix yaza, stijbix yaya'n. ⁴¹ Guiáad lod cayoijt tio'p ree bëngunaa, tijbaman yaza, stijbaman yaya'n.

⁴² 'Zeel gol guzujsin din ad ragbeetidi xhie dxej yaguaaad xDadidi. ⁴³ Gol been xgab, bal tijb bejn ragbee xhie guxin xhie tëë horan chu' xingubaan lidxaman cwanx, zabejnaaman abi' ad zatiëjbtaman chu' xingubaan guin lidxaman. ⁴⁴ Zianan zeel gol guzujsin, din ad ragbeetidi dxejlczi yaguaaad Bén guxhaal Dios.

Mojs za'c në mojs guiidx (Lc. 12:41-48)

⁴⁵ '¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor? ⁴⁶ Xiquilbaa mojs cayüjn dxiin zi'c rayal chi yadxin xpatronx. ⁴⁷ Din diidxliczi rnin lëjt, patron guin zusa'n gra xieenman loj mojs guin. ⁴⁸ Per bal naj mojs guin mojs dxuudx, naladxix: "Zaglaari da patronan." ⁴⁹ Zianz suloj gusagzix los demazri ree mojs guin, suloj gawix, guië'në tëëx xingu' ree. ⁵⁰ Abi' yadxin xpatronx tijb dxej ni ad ragbeetix ad rbëz tëëtix laaman. ⁵¹ Dxel dáad castiro' gudëed patron guin laax, guixhiaal tëëman laax lod rayal ree bën rusquiee, lod goonx gaw tëë layix.

Xcwent chii biinxdüb

25 Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. ² Gaay reem been xgab xhie güün reem, per za gaay reem ad beent xgab. ³ Biin ad beent ree xgab guin binë xguij reem per ad binët reem mazri sejt ni che'cnë ree guij guin. ⁴ Guiáad ree biin been xgab guin xhie güün reem, binë reem za tib lumejtga sejt con xguij reem. ⁵ Abi' guial goglaa badxin xinruxhliaa guin, bi't bacaal loj gra reem, abi' goodyëjs reem. ⁶ Cost garol guiaal, biguien cha' tijb bejn rëbaman: "¡Laa xinruxhliaa guin ma zi-

aad, gol tagchaaglojx!" ⁷ Dxel bixche gra ree biinxdüb guin, abi' beenchaaw xguij reem. ⁸ Abi' gaay ree biin ad beent xgab guin xhie güün reem, rëb reem loj za gaay biin been xgab guin: "Gol baneesii tibda'n xsejti-di, din dux guijn ma cayü' reen." ⁹ Per badxi' reemin rëb reem: "Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc." ¹⁰ Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bida'cw ro' port. ¹¹ Dxel chi badxin za gaay biin bisii ree sejt guin, rëb reem: "¡Dad, dad, guxhal din yadxu'n!" ¹² Per badxi' xan rëbix: "Diidxliczi rnin, ad nünbeetan lëjt."

¹³ Dxel basnuu Jesús rëbaman:

—Zeel gol guzujsin din ad ragbeetidi goc yaguaaad Bén guxhaal Dios.

Xcwent bën badëed milia

¹⁴ Dxel rëb tëë Jesús:

—Xguialrniabee Dios naj zi'c tijb bën ma grii cheman zijt, abi' gurejdx ree xmojsaman, basa'n xmiliaman loj reeman. ¹⁵ 'Loj tijbaman badëeman gaay mil cintabl, loj zatijbaman badëeman zatio'p milan, guiáad loj zatijbaman badëeman za timilan. Loj tijbgaj reeman badëedaman ni naladxaman zajc güünnë reeman dxiin, dxel briitaman zëman zijt. ¹⁶ Abi' mojs cwa' gaay mil cintabl guin beennëman laan dxiin abi' beenman gan za ziant gajcan. ¹⁷ Ziangajc been mojs cwa' tio'p milan, beenman gan za tio'p mil gajcan. ¹⁸ Per mojs cwa' timil cintabl guin bitëenman luyuj persi baquie'chaman cintabl guin ni badëed xpatronman.

¹⁹ 'Gojc xchej da't dxel badxin patron guin abi' babëeman cwent con la reeman. ²⁰ Yaloj bidxin mojs cwa' gaay mil cintabl guin abi' bayüman zagaay milan, rëbaman: "Dad, lüj banee gaay milan lon, yan, laa za gaay milan guie ni benan gan." ²¹ Dxel rëb patron guin lojman: "Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj." ²² Zianz bidxin mojs cwa' zatio'p mil cintabl guin rëbaman: "Dad, lüj banee tio'p milan lon, yan, laa zatio'p milan guie ni benan gan." ²³ Dxel rëb patron guin lojman: "Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj."

²⁴ 'Per chi bidxin mojs cwa' timil cintabl guin, rëb loj xpatronman: "Dad, naj ragbee guial ad rayatil bejn, rabëel guialnaza'c lod ad rgu'til bin, rato'p tëël guialnaza'c lod ad rtie'chtil bin. ²⁵ Zeel bidxeban abi' biquiechan xmilial lën liuj, yan, laa xmilial guie." ²⁶ Badxi' patron guinan, rëbaman: "Mojs mal, mojs ploj, bal ragbeel rabën guialnaza'c lod ad rgu'tan bin, ratop tëën guialnaza'c lod ad rtiechtan bin. ²⁷ Adil nilu' da milian lën bancw, din chi naguialan naca'nan con xi'n nan ni beenan gan." ²⁸ Dxel rëb patron guin loj ree bën za' yagaj: "Gol biquied timil cintabl guin lojx, gol badëedan loj xin rajp chii milan. ²⁹ Din bën rajp zaca'-man mazri, abi' gapaman zro' da't, per bën rajp ta'nzi,

xt ni rajpaman chiquied lojman. ³⁰ Abi' mojs ad rünjt sirv guin gol bazaalix xchuni lod nacay, lod goonx, lod gaw tēē layix."

Xgualguxtis Jesús

³¹ 'Chi gui't Bén guxhaal Dios, gui'taman con xgualr-niabeeman, nē con gra ree xianjlaman din cweman lod nabeeman. ³² Dxel gra ree bēnguidxliuj yado'p lojman, abi' cweman laa reeman zi'c rünj tijb bēn rajp xiil chi rabēēcaman xiil ree loj ree dxib. ³³ Abi' guzujman bēn naj ree xbejnman xladbeeman, guiáad ree bēn ad najt xbejnman guzujman xladruvejsaman. ³⁴ Dxel guiēb rey guin loj ree bēn za' xladbeeman: "Gol guda bēn ma nūjnle' da Dadan. Gol guyu loj guialrniabee najcchaaw par lējt, diizd chi go'tchaaw guidxliuj. ³⁵ Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'-nan. ³⁶ Chi byaadx da xaban, lējt banee ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj." ³⁷ Dxel guiēb ree bēn za' ladbee guin: "Dad, ¿goc baguiaan lūj rliaanl, abi' baneen ni gudaw-il?, ¿o goc baguiaan lūj we'quil nijs, abi' baneen nijs gu'l? ³⁸ ¿Goc baguiaan lūj zizal zi'c tijb benzit, abi' baneen lod baya'n, o goc biyaadx xabil, abi' baneen ni gotil? ³⁹ ¿Abi' goc baguiaan lūj ragxuul, o guyul ladxguiib, abi' budganajn lūj?" ⁴⁰ Dxel guiēb rey guin loj reeman: "Diidxiczi rnin lojdi, gra yudar beendi da bejn reen majsi ad najt reeman bēn lasajc, najn beendi yudar."

⁴¹ 'Dxel guiēbaman loj ree bēn za' xladruvejsaman: "Gol biquied lon, benmal gol chej loj bajl ni ad yu't dxej yayü' ni ma naj par xindxab nē ree xbejnx. ⁴² Din chi gulaanan, ad baneetidi ni niawan, chi we'can nijs, ad baneetidi ni niē'n. ⁴³ Chi bizaan zi'c benzit, ad baneetidi lod naya'-nan, chi biyaadx da xaban, ad baneetidi ni nia'cwan. Abi' chi gogxuun nē chi guyu'n ladxguiib, ad bidganajtdi naj." ⁴⁴ Dxel guiēb reeman lojman: "Dad, ¿goc baguiaan lūj rliaanl o re'quil nijs, o zizal zi'c tijb benzit, o goc baguiaan lūj ryaadx xabil, o ragxuul, o yu'l ladxguiib, abi' ad bayidxga'tan lūj?" ⁴⁵ Abi' yadxi'-man laan guiēbaman: "Diidxiczi rnin lējt, gra ni ad beentidi din nūjndi yudar da bejn reen majsi ad najt reeman bēn lasajc, najn ad beentidi yudar." ⁴⁶ Laa reeman yayal loj casti tiblayaa, guiáad ree bēn been zi'c rayal, laa reeman rayal guialnaban tiblayaa con Dios.

Baya'n reeman diidx xhienaag guiniaaz reeman Jesús
(Mr. 14:1-2; Lc. 22:1-2; Jn. 11 :45-53)

26 Chi gulox gunee Jesús diidx guin ree, dxel rēb loj ree xbejnman:

² —Lējt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crūjz.

³ Lēn ree dxejzii badxaag lasa' ree bixhioz rniabee ree bixhioz, con xguxtis ree bēn Israel, lidx Caifás quijb bixhioz zojbloj. ⁴ Ni baya'n reeman diidx xhienaag gusquiee reeman Jesús din guiniaaz reeman laaman, abi' gugūjt reeman laaman. ⁵ Per rēb reeman:

—Ad zaguieent ree zian loj lanij guin chitēē gac naquie' luguiedx guin.

Ruroob tijb bēngunaa perfum guiyc Jesús
(Mr. 14:3-9; Jn. 12 :1-8)

⁶ Chi za' Jesús luguiedx Betania lidx Simón, bēn rniece reeman Leproso, ⁷ bidxin tijb bēngunaa ca'man tijb lumejt guidxan perfum ni lasajc wayējx. Abi' la'tgaj zojb Jesús xan mex, baroobaman perfum guin guiyc Jesús. ⁸ Chi baguiaa ree xbejn Jesús ni been bēngunaa guin, dád bidxe'ch reeman, abi' rēb reeman:

—¿Chexc zeel bixie' perfum guin? ⁹ Zile' nido'n zro' da't din nūjnan yudar bēnprob ree.

¹⁰ Chi biguiejn Jesús ni canee reeman, rēbaman loj reeman:

—¿Chexc zeel rdxe'chidi bēngunaa guin? Zagdxē naj ni beenman naj. ¹¹ Din bēnprob guin ree zianczi za'nē reeman lējt, sa'n naj ad ziantczi gazunē'n lējt. ¹² Abi' ni baroobaman perfum guin guican, rēn guiēban guial ma beenchaaw xgajman naj par chi guiguie'chan.

¹³ Diidxiczi rnin, bantēēz guin guire'ch xtiidxza'c Dios loj guidxliuj, zū ree bejn gra ni been bēngunaa guin por naj, din gusaaladx reeman laaman.

Rayü Judas Jesús
(Mr. 14:10-11; Lc. 22:3-6)

¹⁴ Loj guidxiptio'p ree xbejn Jesús, bēn la Judas Iscariote, bigneenēman bixhioz rniabee ree bixhioz, ¹⁵ rēbaman loj reeman:

—¿Plac guneedi din yanen Jesús lojdi?

Abi' badēēd reeman gajlbichii milia plajt lojman.

¹⁶ Diizd dxejzii guzulojman raguuilaman mod xhienaag yayüman Jesús.

Gudawnē ree xbejn Jesús xche
(Mr. 14:12-25; Lc. 22:7-23; Jn. 13 :21-30; 1Co. 11 :23-26)

¹⁷ Dxej ni guzuloj lanij ni raw ree bejn guiadxtil ni ad yu't levadur, gubig ree xbejn Jesús lojman, rēb reeman:

—¿Ban guin rēnl yaguieenchaawan ni yadaaw ree guxhin lanij pascw?

¹⁸ Badxi' Jesúsán rēbaman:

—Gol chej Jerusalén lidx bēn guin, gol biguiedx lojman: "Na Mextr: Ma bidxin xihoraman abi' rēnman tēdaman pascw lidxil con ree xbejnman."

¹⁹ Dxel been ree xbejnman zi'c rēbaman, been tēē reeman ni gaw reeman guxhin lanij pascw.

²⁰ Chi gure guiaal, zojb Jesús xan mex con guidxiptio'p ree xbejnman. ²¹ Abi' la'tgaj cayaw reeman, rēbaman loj reeman:

—Diidxiczi rnin, tijb gajc lējt yayü naj.

²² Abi' dád guyunaya reeman, zianz guzuloj rniabdiidx tijbgaj reeman loj Jesús, rēb reeman:

—¿Najn ya, Dad?

²³ Badxi' Jesúsán, rēbaman:

—Bén cayaw loj pliajt ni cayaw gajcan, laaman yayü naj. ²⁴ Walican, Bén guxhaal Dios naj guial sacaman

zi'c rëb loj xtiidx Dios. Per ;probza bën yayü laaman!, zagdxeli naj par laaman ad niutaman loj guidxliuj.

²⁵ Dxel Judas bën yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

²⁶ La'tgaj cayaw reeman, cwa' Jesús guiadxtil, badëë-daman quixtëë loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

²⁷ Dxel cwa'man tib cojp vin, chi gulox badëëdaman quixtëë loj Dios, badëëdaman cojp guin loj reeman, rëbgajman:

—Gol gu' gradi loj cojp guie. ²⁸ Din laan naj da rejnan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejz cüb xhienaag gap ree bejn perdon loj Dios por xtol reeman. ²⁹ Abi' di-idxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

Rëb Jesús guial guiëb Bëd ad nünbeetaman laaman

(Mr. 14:26-31; Lc. 22:31-34; Jn.13 :36-38)

³⁰ Chi gulox biil reeman tijb cant par Dios, dxel zë reeman guijc guia' Olivos. ³¹ Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.” ³² Per chi yabanan, yaloj naj ganeed ga gajn Galilea dxelri gui'tidi.

³³ Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

³⁴ Per rëb Jesús lojman:

—Diidxiczi rnin lojl, yan guxhin gajc chi gad guid cwidxa', mal rëbil choon volt guial ad nünbeetil naj.

³⁵ Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

Gurejdx gunab Jesús Dios lod la Getsemaní

(Mr. 14:32-42; Lc. 22:39-46)

³⁶ Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

³⁷ Dxel zinëman Bëd con grop ree xi'n Zebedeo, zianz guzuloj cayunayaman abi' ad nixtri yu' luxdooman.

³⁸ Zianz rëbaman loj reeman:

—Dád yu'naya luxdoon, rulüü ma gugüjt guialyu'-naya guin naj. Gol baya'n guie ad gaayëjsidi.

³⁹ Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëë naj loj guialzi ni gadëëdan, per ad gac zi'c rënan, gac zi'c rënl.

⁴⁰ Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbacaalidi ya, din sunëdi naj? ⁴¹ Gol batie'ch xbacaalidi gol gurejdx gunab tëë Dios, chitëë güün xindxab lëjt gan, din rënnquidi güündi zi'c rayal, per xcuerpidi ad rtiëjbtan.

⁴² Ni barojp volt wejman gurejdx gunabaman Dios, rëbaman:

—Dad, bal id zile' tëd guialzi ni naj gadëëdan, bal rüjn naguiejn gadëëdanan gacri zi'c rënl.

⁴³ Chi badxinman lod za' ree xbejnman stijb, laa reeman naayëjs guial dád guidxa bacaal loj reeman. ⁴⁴ Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. ⁴⁵ Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bén guxhaal Dios ma bidxin hor yayü reeman laaman loj ree bëndol. ⁴⁶ Gol bixche, yo' ree, gol baguiaa laa bën yayü naj ma zëëd gajxh.

Gunaaz reeman Jesús

(Mr. 14:43-50; Lc. 22:47-53; Jn.18 :2-11)

⁴⁷ Sta caneenë Jesús bën naj ree xbejnman, chi bidxin Judas bën naj gajc tijb xbejn Jesús. Bidxinëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bën Israel laa reeman. ⁴⁸ Abi' Judas bën bayü laaman mal rëbxgajman loj ree bën guin: “Bën gawan xid xhajg, laaman raguillidi, gol gunaazaman.” ⁴⁹ Chi bidxin Judas bibigaman loj Jesús, dxel rëbaman:

—iXchan, Mextr!

Laa gudaw gajcaman xid xhajgaman.

⁵⁰ Abi' rëb Jesús lojman:

—Judas, been ni zidguieenl.

Dxel gubig ree bën guin, gunaaz reeman Jesús persi zinë reeman laaman.

⁵¹ Per tijb ree bën za'në Jesús yagaj, gulëë xiespadaman dxel gutü'man guidiajg xmojs quijb bixhioz zojbloj. ⁵² Dxel rëb Jesús lojman:

—Bagu'chaaw xiespadil xluaran. Din bën rdil con espad, con espad rëjtaman. ⁵³ ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil ree xianjlaman din gagnë reeman naj?

⁵⁴ Per ¿xozo gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

⁵⁵ Loj hor guin gajc rëb Jesús loj ree benzien guin:

—¿Chexc zeel zëëdidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lënn yadooro' Jerusalén balün lëjt xtiidx Dios, abi' ad gunaaztidi naj. ⁵⁶ Per gra ree ni guie caya-jc din gac cumplid ni bacaa ree bën badëë xtiidx Dios loj ree bejn.

Loj hor guin gajc baxüün ree xbejn Jesús, guro'nladx reeman laaman.

Za' Jesús loj ree guxtis Israel

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷ Bén gunaaz ree Jesús binë reeman laaman lidx Caifás, quijb bixhioz zojbloj, yagaj badxaag lasa' ree mextr rajc ley con ree xguxtis ree bën Israel. ⁵⁸ Abi'

Béd ziji ziji nalaman Jesús, xt lule' lidx bixhioz guin. Dxel guyuman abi' gurejnëman Bén rajp ree lidx bixhioz guin, din guguaaman xhie güünnë ree Bén guin Jesús.

⁵⁹ Guiáad ree bixhioz rniabee ree bixhioz con gra ree guxtis guin raguil reeman xhie gusquiee reeman din gutedia' reeman Jesús din nabee reeman guiëtaman.

⁶⁰ Per ad radxejlt xhienaag gutedia' reeman laaman majsi zien ree Bén basquiee. Dxel bibig zatio'p reeman, ⁶¹ rëb reeman:

—Bén guie rëb: “Zile' yase'nan xyadoo Dios abi' loj choon dxejzi yayünanan.”

⁶² Dxel guzuli quijb bixhioz zobjloj guin, rëbaman loj Jesús:

—¿Nid zadxi'lan ya? ¿Waliqui ni canee ree Bén guin contr lüj ya?

⁶³ Per achet rëb Jesús. Dxel rëb bixhioz guin lojman:

—Por Dios Bén naban, rniabeen lüj guna diidxi. Guna bal lüjn naj Cristo, Xi'n Dios.

⁶⁴ Badxi' Jesúsán rëbaman:

—Waliquil. Rni tëën lëjt, zuguaadi Bén guxhaal Dios zobjaman xladbee Dios Bén rajp guialrniabee abi' zuguaa tëëdi gui'taman loj zaj xanyabaa.

⁶⁵ Chi biguiejn bixhioz guin zian, gudixya' xabaman, rëbaman:

—Diosan canee guijdx Bén guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rniee guijdxaman Dios. ⁶⁶ Yan, ¿xhie nadi?

Badxi' ree Bén guinan rëb reeman:

—Rajal guiëtix.

⁶⁷ Dxel bacojp xhiejn reeman lojman, gudijn reeman laaman, yu' tëë reeman wëëz ro'man, ⁶⁸ rëb reeman lojman:

—Bal lüjn naj Cristo, guneeja' chu gudin lüj.

Rëb Béd ad nünbeetaman Jesús

(Mr. 14:66-72; Lc. 22:56-62; Jn. 18 :15-18, 25-27)

⁶⁹ La'tgaj zobj Béd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, Bén Galilea.

⁷⁰ Per Béd gurexuuman, rëbaman niz loj gra reeman:

—Ad ragbeetan xhienin rnieel.

⁷¹ Chi zëman niz ro' port baguaa stijb biin rüjn dxiin yagaj laaman, abi' rëbim loj ree Bén riga' yagaj:

—Në Bén guin nal Jesús Bén Nazaret.

⁷² Per Béd gurexuuman stijb, xt baza'taman Dios, rëbaman:

—Ad nünbeetan Bén guin.

⁷³ Dxel ad gojct xchej, gubig ree Bén riga' yagaj loj Béd, rëb reeman lojman:

—Laa rguen gajc në lüj naj xbejn reeman, din zi'cgajc rniee reeman rnieel.

⁷⁴ Per Béd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan Bén guin.

Hor guin gajc guridxa' tijb gujd. ⁷⁵ Abi' basaalexam-an guial rëb Jesús lojman: “Chi gad gujd cwidxa', mal

rëbil choon volt ad nünbeetil naj.” Dxel barii Béd yagaj abi' dád naya biinman.

Binë reeman Jesús loj Pilato

(Mr. 15:1; Lc. 23:1-2; Jn. 18 :28-32)

27 Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. ² Dxel guxhii reeman laaman abi' binë reeman laaman loj gobernador Pilato.

Güjt Judas

³ Dxel Judas, Bén bayü Jesús, chi baguaaman guial ma naj guiët Jesús, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, ⁴ rëbaman loj reeman:

—Ma benan dol guial banen tijb Bén achet dol rajp.

Badxi' reeman laan rëb reeman:

—Xhieczy yaguieenan, lüj gunaj!

⁵ Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

⁶ Dxel bato'p ree bixhioz rniabee guin milia guin, abi' rëb reeman:

—Ad rayalt yadxe' ree milia guin lën lod ru gon, din con laan bio' Bén guiët.

⁷ Dxel be reeman diidx, abi' con milia guin guzii reeman xguidxliuj Bén rüjn trast bajn ree, din gacan lod guiguie'ch ree benzit. ⁸ Zeel xt yan la guidxliuj guin Yuj Rejn. ⁹ Zian gojc cumplid ni gunee Jeremías, Bén badëe xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree Bén Israel lasajcaman, ¹⁰ abi' con milia guin guzii reeman xguidxliuj Bén rüjn trast bajn ree, zi'c gunabee Dios naj.”

Rniabdiidx Pilato loj Jesús

(Mr. 15:2-5; Lc. 23:3-5; Jn. 18 :33-38)

¹¹ Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree Bén Israel ya?

Badxi' Jesúsán, rëbaman:

—Najcan.

¹² Abi' chi cutedia' ree bixhioz rniabee ree bixhioz con ree guxtis Israel laaman, achetdzi radxi'man. ¹³ Dxel rëb Pilato lojman:

—¿Nid riguiejnl gra ni canee reeman contr lüj ya?

¹⁴ Per Jesús ni'qui tijb diidx ad badxi'taman, zeel dád badxa loj gobernador guin.

Gunabee reeman guiët Jesús

(Mr. 15:6-20; Lc. 23:13-25; Jn. 18 :38-19:16)

¹⁵ Lën ree dxej lanij, ruslaa gobernador Pilato tijb Bén yu' ladxguib Bén guiëb ree bénguiedx guin laa, zi'c naj xcostumbr reeman. ¹⁶ Lën ree dxejzii yu' Barrabás ladxguib, tijb Bén nünbee ree bejn niz ni niz guie.

¹⁷ Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bën rëb ree bejn naj Cristo?

¹⁸ Rëbaman zian guial gogbeeman ganaxzi guial-nadëdlojn zeel bayü reeman Jesús.

¹⁹ La'tgaj zobj Pilato lod rüjnman guialguxtis, bidxin xruson lacheelaman, rëbaman lojman: "Adxhie güün-nël bën guin achet dol rajpaman, din dád nadxuudx gune'xchalan laaman nuche."

²⁰ Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman.

²¹ Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

²² Abi' rëb Pilato loj reeman:

—¿Xhieza günnë'n Jesús, bën rëb ree bejn naj Cristo?

Badxi' gra reeman laan rëb reeman:

—¡Bacaaman loj crüjz!

²³ Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaman loj crüjz!

²⁴ Chi baguiaa Pilato guial achet rile' güünman, al mazri naquie' cayün ree bën guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bën guie, xcwentidan.

²⁵ Badxi' gra ree bën guinan rëb reeman:

—¡Du gujcan, në guijc du xi'nan cwiban guial guiëtaman!

²⁶ Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

²⁷ Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. ²⁸ Dxel gulëë reeman xabaman bascajcw reeman laaman tijb lajd xnia. ²⁹ Abi' beenchaaw reeman tijb coron guiëjch badxe' reeman laan guijcaman, zianz бага's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bën Israel!

³⁰ Abi' rucojp xhiejn reeman lojman, laagajc tëë yag ni ca'man rugaz reeman guijcaman. ³¹ Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

Cwa Jesús loj crüjz

(Mr. 15:21-32; Lc. 23:26-43; Jn. 19:17-27)

³² Chi zinë reeman Jesús, badxaagloj reeman tijb bën Cirene, laman Simón, abi' been reeman laaman naguiejn byaaman xcrüjz Jesús.

³³ Chi bidxin reeman tijb luar la Gólgota (rën guiëban Xluar Calaver), ³⁴ ni badëëd reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

³⁵ Chi gulox bacaa reeman laaman loj crüjz, dxel gudxijt reeman suert guijc xabaman din yala' reeman laan. ³⁶ Dxel gurej reeman yagaj din gap reeman laaman. ³⁷ Abi' guijc crüjz guin bacaa reeman lejtr ni rëb, chexc zeel cwaman loj crüjz. Rëb lejtr guin: "BEN GUIE NAJ JESÚS XREY REE BEN ISRAEL."

³⁸ Në tio'p xin gubaan bacaa reeman loj crüjz, tijbix xladbee Jesús stijbix xladruvejsaman. ³⁹ Abi' ree bën rdëd, rnieeguijdx reeman Jesús, runij guijc reeman, ⁴⁰ rëbgaj reeman:

—Lüj rëb, nuse'nl yadooro' abi' loj choon dxejzi nayünlan, baslaa lüj gajc. Bal walil najl Xi'n Dios baguiajt loj crüjz guin.

⁴¹ Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

⁴² —Baslaax ben ren ree, abi' ad rajct ruslaa laaga-jquix. Bal wali najx xrey ree bën Israel, yaguiajtix loj crüjz guin, din yaliladx reex. ⁴³ Rililadxix Dios. ¡Yan, guslaa Dios laax, bal wali rënman laax, din rëbix: "Xi'n Dios najx"!

⁴⁴ Abi' nëgajc ree xingubaan ca cwë'man ruze' laaman.

Güjt Jesús

(Mr. 15:33-41; Lc. 23:44-49; Jn. 19:28-30)

⁴⁵ Dxel diizd garol dxej bicajy loj guidib guidxliuj, xt raca choon wadxe. ⁴⁶ Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëëladxil naj?

⁴⁷ Yu' ree bën za' yagaj, chi biguiejn reeman, rëb reeman:

—Laaman cabejdx Elías, bën badëë xtiidx Dios loj ree bejn.

⁴⁸ Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan. ⁴⁹ Per rëb los demazri reeman:

—Basa'nx, din yaguiaa ree don zidgaslaa Elías laax ya.

⁵⁰ Zianz gurixdiaj Jesús rejs da't stijb, dxel güjtaman.

⁵¹ Loj hor zii goxya' lajd nal lën yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tëë ree guiajro'. ⁵² Guiáad ree baa bixal reenu, abi' zien ree bejn bën naj xbejn Dios, bën ma güjt ree baban. ⁵³ Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

⁵⁴ Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bën guin.

⁵⁵ Zien ree béngunaa guzanal Jesús diizd Galilea, bën been tëë ree laaman yudar, za' reeman zijt ruguiaa reeman ni cayajc. ⁵⁶ Loj reeman no'ch María Magdale-

na, në Li xniaa Santiaaw con Xiëb nètëë xniaa ree xi'nga Zebedeo.

Biguie'ch Jesús

(Mr. 15:42-47; Lc. 23:50-56; Jn. 19:38-42)

⁵⁷ Chi gure guiaal, bidxin tijb benrijcw laman Xiëb, bën Arimatea, në laaman binal Jesús. ⁵⁸ Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. ⁵⁹ Abi' cwa'man cuerp guin batüübaman tijb lajd naya. ⁶⁰ Dxel biquie'chaman laaman lën tijb baa cüb ni gudëenman par laagajcaman lën tijb guiaj. Zianz basiaawaman ro' baa guin con tijb guiajro', ziataman. ⁶¹ Abi' zobj María Magdale-na con stijb bën la gajc Li, ro' baa guin.

Rajp ree suldad ro' xbaa Jesús

⁶² Chi bareguiaal, dxej raziiladx ree bejn, wej ree bixhioz rniabee ree bixhioz në ree bënfarisew, bigneenë reeman Pilato, ⁶³ rëb reeman lojman:

—Dad, rasaaduladxan, chi ziz naban bën rusquiee ni, rëbaman guial chi gac choon dxej yabanman. ⁶⁴ Zeel gunabee guiyaawdx'i'ch ro' baa guin xt chi gac choon dxej, chitëë gui't ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

⁶⁵ Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdx'i'ch ro' baa guin zi'c rëndi.

⁶⁶ Abi' zë reeman, dxel basiaawdx'i'ch reeman ro' baa guin. Zianz basa'n reeman suldad guin ree cayajp reeman laan.

Raban Jesús

(Mr. 16:1-8; Lc. 24:1-12; Jn. 20:1-10)

28 Chi gudëd dxej raziiladx ree bejn, bareguiaal chidumingw, María Magdalena con stijb bën la gajc Li biquiaa reeman ro' baa guin. ² Dxel bi't tijb xudoxh, guial biguiajt tijb xianjl Dios diizd xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. ³ Dád rliajman bacha' zi'c chi rë'p nijs, guiáad xabaman naquichbëjn. ⁴ Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. ⁵ Dxel rëb anjl guin loj ree búngunaa guin:

—Ad rdxebidi, ragbeen cayguilidi Jesús bën cwa loj crüjz. ⁶ Per achutri laaman guie, ma babanman zi'c naman. Gol guida nial din guguaadi lod gudixh reeman laaman. ⁷ Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

⁸ Dxel cari da't baza reeman ro' baa guin rdxeb reeman rabaa tëë reeman, ruxüün reeman zia reeman zicojn reeman xbejn Jesús. ⁹ La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudliidx reeman guia'man, ¹⁰ abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

Ni rëb ree suldad

¹¹ La'tgaj zia ree búngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc. ¹² Dxel wej ree bixhioz rniabee guin bigneenë reeman guxtis Israel ree persi baya'n reeman diidx xhie güün reeman. Abi' dad zro' milia badëed reeman loj ree suldad guin, ¹³ rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” ¹⁴ Abi' bal gagbee gobernador, dunujn yaneenë' laaman chitëë xhie güünnëman lëjt.

¹⁵ Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bën Israel xt yan.

Rxhial Jesús bën naj ree apóstoles

(Mr. 16:14-18; Lc. 24:36-49; Jn. 20:19-23)

¹⁶ Guidxiptib ree xi apóstoles Jesús, wej reeman Galilea, guijc tijb guia' lod rëb Jesús che reeman. ¹⁷ Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. ¹⁸ Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. ¹⁹ Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, ²⁰ gol balüü tëë reeman din guzoob reeman diidx gra ni ma rnin lëjt. Abi' naj gazunë' lëjt gradxejczy xt chi nit guidxliuj. Amén.

San Marcw

Rzuloj Waj rulüüman xtiidxa'c Jesucrist (Mt. 3:1-12; Lc. 3:1-9, 15-17; Jn. 1:19-28)

1 Ze guzuloj xtiidxa'c Jesucrist, Xi'n Dios.
² Guyu tijb bén badëë xtiidx Dios loj ree bejn brii lajman Isafas, bacaaman xtiidx Dios, rëbaman:
 Naj rxhial tijb bén ned lojl, bén güünchaaw xnejzil.
³ Rguien cha' tijb bén rbidxa' loj yujbidx, rëbaman:
 "Gol beenchaaw xnejz dux Dad ree, gol guxhal tijb nejz nali."
⁴ Zian bi't Waj bén baroobnijs bejn ree, guzujman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman. ⁵ Gra ree bén zojb niz Judea, në ree bén Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruuroobnijs Waj laa reeman loj guiw Jordán.
⁶ Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn daj. ⁷ Chi guneenëman bejn ree, rëbaman:
 —Xichan zëed tijb bén mazri zojbloj guial lon, ni'qui xgurëchaman ad zajct gaxhiecan guial mazri zojbloj-man guial lon. ⁸ Naj curobnijs lëjt con nijs, per laaman guroobnijs lëjt con xSprijt Dios.

Riobnijs Jesús (Mt. 3:13-17; Lc. 3:21-22)

⁹ Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiw Jordán. ¹⁰ Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. ¹¹ Dxel biguien cha' bejn xanyabaa, rëbaman:
 —Lüj naj da Xi'nan, rënan lüj rabaanë' tëën lüj.

Been xindxab Jesús prueb (Mt. 4:1-11; Lc. 4:1-13)

¹² Dxel binë xSprijt Dios Jesús loj yujbidx. ¹³ Ni guzman tiuu dxej tiuu guiaal, loj ree bedoxh. Abi' been xindxab laaman prueb chitëë nuzoobaman xtiidx Dios, guiáad ree xianjl Dios gunaj laaman.

Rzuloj Jesús rulüüman bejn ree niz Galilea (Mt. 4:12-17; Lc. 4:14-15)

¹⁴ Chi mal guyu Waj ladxguiib, wej Jesús niz Galilea bigneeman xtiidxa'c Dios, ¹⁵ rëbaman:

—Ma bidxin dxej zëed xguialrniabee Dios gajxh, zeel gol bayüjn xgab por xtolidi, gol bililadx tëë xtiidxa'caman.

Rbejdx Jesús tajp ree bén gac xbejnman (Mt. 4:18-22; Lc. 5:1-11)

¹⁶ La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl. ¹⁷ Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

¹⁸ Loj hor guin gajc basa'n guijxh rniaaznë reeman bëjl persi zinal reeman Jesús.

¹⁹ Guzaman zatibda'n, dxel baguiaaman Jacob con Waj bén naj ree xi'n Zebedeo, yu' reeman loj barcw rayüjnchaaw xguijxh reeman. ²⁰ Dxel gurejdx Jesús laa reeman, abi' basa'n reeman Zebedeo loj barcw guin, bén naj xdad reeman con ree xmojsaman, guiáad laa reeman zinal reeman Jesús.

Rabëë Jesús xindxab luxdoo tijb bejn (Lc. 4:31-37)

²¹ Chi bidxin Jesús luguiedx Capernaum. Abi' dxej raziiadx ree bejn guyuman lën xyadoo ree bén Israel culüüman laa reeman. ²² Dád radxa loj reeman zi'c rnieenëman laa reeman guial rulüüman laa reeman zi'c tijb bén rniabee, ad rulüütaman zi'c rulüü ree mex-tr rajc ley. ²³ Lën yadoo guin yu' tijb xin yu' xindxab luxdoo, dxejczy guridxa'x rëbix:

²⁴ —¿Xhie rënl con dunujn, Jesús bén Nazaret? ¿Zëedil ya zidganijt il dunujn? Nünbeen lüj, ragbeen guial naya nalil najl xi'n Dios.

²⁵ Dxel gudilë Jesús xindxab guin, rëbaman:

—¡Bacwëëz ro'l, barii luxdoo xin guin!

²⁶ Abi' been xindxab guin xin guin zi'c bén rëjtya', zianz gurixdiajx rejs, bariix luxdoo xin guin. ²⁷ Graczi ree bén riga' dád badxaloj reeman, riniabdiidx loj lasa' reeman rëb reeman:

—¿Xhie ree nicüban rulüü bén guin? ¡Con guialrniabee ni rajpaman xt ree xindxab ruzoob xtiidxaman!

²⁸ Tibrajtzi bire'ch xtiidx Jesús guidib niz Galilea.

Rayüjn Jesús xnasuegr Bëd (Mt. 8:14-15; Lc. 4:38-39)

²⁹ Bariiz reeman lën yadoo guin, binë Jesús Jacob con Waj lidx Simón con Andrejs. ³⁰ Abi' naga' xnasuegr Simón, yu'man xliaadoxh. Dxel bagojn reeman Jesús

guial ragxuuman. ³¹ Abi' gubigaman cwë'man gu-naazaman yaaman, gulesaman laaman. Loj hor guin gajc bariiman xliaa guin dxel guzuloj cudëëdaman ni gaw reeman.

Rayüjn Jesús zien ree bénragxuu

(Mt. 8:16-17; Lc. 4:40-41)

³² Chi ma gurej guiaal, binë reeman bénragxuu ree lod za' Jesús, në ree bén yu' xindxab luxdoo. ³³ Graczi ree bén luguiedx guin bido'p ruyu lod za' Jesús. ³⁴ Bayüjn Jesús zien ree bén rajc ree gadxagayaa guial-guijdx, babëë tëëman zien ree xindxab luxdoo ree bejn. Per ad rudëëtaman mod guinee ree xindxab guin guial nünbee reex laaman.

Rulüü Jesús xtiidx Dios niz Galilea

(Lc. 4: 42-44)

³⁵ Bixche Jesús rsildoo, chi ziiz nacay, briiman luguiedx guin wejman tijb luar lod achutczí bejn zojb, persi gurejdx gunabaman Dios. ³⁶ Abi' Simón con ree xcompniaraman bigdiil reeman laaman. ³⁷ Chi badxejl reeman laaman, rëb reeman lojman:

—Gra ree bejn cayguil lüj.

³⁸ Per rëbaman loj reeman:

—Yo' ree guiedx ni riga' ree gajxh din gulün xtiidxza-'c Dios, din par zian zialan.

³⁹ Abi' balüü Jesús xtiidx Dios lën ree xyadoo ree bén Israel guidib niz Galilea babëë tëëman xindxab luxdoo ree bejn.

Rayüjn Jesús tijb bén rajc guialguijdx la lepra

(Mt. 8:1-4; Lc. 5:12-16)

⁴⁰ Tijb bén rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

⁴¹ Baya Jesús laaman, baqui'man laaman, rëbgajman:

—Rënan, bayajc.

⁴² Chi gunee Jesús zian, hor guin gajc bayajc bén guin abi' baya xcuerpaman. ⁴³ Dxel bagu'nejz Jesús laaman, rëbaman lojman:

⁴⁴ —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

⁴⁵ Per bén guin chi ziaman guzuloj catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'n-man lod achut bejn zojb. Per gra lad rza ree bejn rej reeman lod za'man.

Rayüjn Jesús xin nëjt xcuerp

(Mt. 9:1-8; Lc. 5:17-26)

2 Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'-man yagaj, ² tibratzi bido'p zien da't reeman lod za'-man, xt ni'quid rdaant ro' port chu' reeman, guiáad laaman culüüman laa reeman xtiidx Dios. ³ Dxel bidxin tajp ree bejn yagaj lejn reeman tijb xin nëjt xcuerp.

⁴ Per ad gojct niunë reeman laax lod za' Jesús guial bén guixiuj guidxa. Abi' guxhal reeman guiyc yu lod za'-man persi gulet reeman xinragxuu guin guidib ni naga'x loj xt lod za' Jesús. ⁵ Chi baguiaa Jesús guial riladx reeman laaman, rëbaman loj xinragxuu guin:

—Xi'n, ma benan xtolil perdon.

⁶ Per yagaj zojb tio'p choon ree mextr rajc ley, been reeman xgab naladx reeman: ⁷ “¿Chexc zeel rníee xin guin zian? ¿Chexc zeel rüjnx mazri xin zojbloj guial loj Dios? Achutczí rajc rüjn perdon dol tijbzi Dios.” ⁸ Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? ⁹ ¿Conin ad nawëëgt gac, guial guiën loj bénragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj”? ¹⁰ Per yan gulün lëjt guial Bén guxhaal Dios rajpaman guialrniabee loj guidxliuj guie din güünman dol ree perdon. Dxel rëbaman loj xinragxuu guin:

¹¹ —Lüj rnin, bixche, baca' ni go'til loj baguiaj lidxil.

¹² Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree bén riga' yagaj. Abi' gra reeman badxaloj, ruza't reeman Dios zagdx, rëb reeman:

—Ni'qui tijb ad waguiaat ree zi'c naj ni cayguiaa ree yan.

Rbejdx Jesús Leví

(Mt. 9:9-13; Lc. 5:27-32)

¹³ Dxel wej Jesús ro'nijsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios. ¹⁴ Chi cadëdaman, baguiaaman Leví xi'n-gaan Alfeo, zojbaman lod ruquixxaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

¹⁵ Dxel chí cayaw Jesús lidx Leví con zien ree bén ruquixx impuest në ree bén ad nabant zi'c rën Dios, gra reeman zojbne Jesús xan mex con ree xbejnman, guial zinal zien ree bejn laaman. ¹⁶ Chi baguiaa ree bënfarisew con ree mextr rajc ley guial cayawnë Jesús bén guin ree, rëb reeman loj ree xbejnman:

—¿Chexc zeel rawnë xmextridi bén ruquixx ree impuest në ree bëndol?

¹⁷ Chi biguiejn Jesús ni rëb reeman, zeel rëbaman:

—Bënnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mt. 9:14-17; Lc. 5:33-39)

¹⁸ Lën ree dxej zii guba'n ree xbejn Waj bén ruoobnijs bejn ree, në ree bënfarisew. Abi' yu' ree bén gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bënfarisew?

¹⁹ Badxi' Jesús laan rëbaman:

—Wen, ¿zajc guiba'n ree biooz za' loj guialruxhliaa ya la'tgaj za'në xin cuxhliaa guin laa reeman? La'tgaj za-

'nëx laa reeman ad zajct guiba'n reeman. ²⁰ Per guidxin dxej chiquiedix loj reeman, abi' chi guidxin dxej guin dxej guiba'n reeman.

²¹ 'Achut bën rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. ²² Ad rgu' tēēt bejn vin cüb lēn anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lēn anfr cüb.

Rgui'ch ree xbejn Jesús trigo dxej raziiladx ree bën Israel

(Mt. 12:1-8; Lc. 6:1-5)

²³ Tijb dxej raziiladx ree bën Israel, cadēd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadēd reeman. ²⁴ Dxel rēb ree bēnfarisew loj Jesús:

—¿Chexc zeel rün ree xbejn ni ad rayalt gac dxej raziiladx ree bejn?

²⁵ Per rēb Jesús loj reeman:

—¿Gadidi gool loj xtiidx Dios ya ni been Davi chi gu-laanman con ree xcompniaraman? ²⁶ Tiamp ni goc Abiatar bixhioz rniabee gra ree bixhioz, guyu Davi lēn xyadooro' Dios, gudawnē ree xcompniaraman guidxtil ma nagle' abi' bixhiosi ree rayal gaw laa reen.

²⁷ Rēb tēē Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn. ²⁸ Abi' naj, guial najn Bēn guxhaal Dios, ra'pan guialrniabee dxej raziiladx ree bejn.

Rayajc tijb xin naxü'n tiblax yaa

(Mt. 12:9-14; Lc. 6:6-11)

3 Tijb dxej guyu Jesús lēn tijb yadoo. Lēn yadoo guin za' tijb xin naxü'n tiblax yaa. ² Abi' ree bēn yu' lēn yadoo guin rula'ch reeman Jesús din guidoon zayünman laax dxej raziiladx reeman ya, din gac gute-dia' reeman Jesús. ³ Dxel rēb Jesús loj xin naxü'n yaa guin:

—Bisu, guzuj galay guin.

⁴ Abi' rēbaman loj ree bēn guin:

—¿Xhie rayal gūün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugūjtaman laaman?

Per ad badxi't reeman xtiidxaman. ⁵ Dxel rdxe'ch Jesús ruguiaaman loj gra reeman, dād guyunaya luxdooman guial ad guyēnt reeman naya lasa' reeman. Zianz rēbaman loj xin guin:

—Basli yaal.

Abi' basli yaax, loj hor guin gajc bayajcan. ⁶ Chi baza ree bēnfarisew guin, zianz baya'n reeman diidx con ree xbejn Herodes din gugūjt reeman Jesús.

Zien ree bejn riga' ro'nijsdoo

⁷ Per Jesús zē gajcaman ro'nijsdoo Galilea con ree xbejnman. Zien da't ree bēn Galilea con ree bēn Judea binal laaman, ⁸ nē ree bēn Jerusalén con ree bēn Idumea, nē ree bēn zojb zatiblad ro' guiiwro' Jordán,

nē ree bēn Tiro con ree bēn zojb niz Sidón. Dād zien ree bejn wej lod za' Jesús guial gogbee reeman ni rünman. ⁹ Zeel rēbaman loj ree xbejnman din guzujsin reeman tijb barcw par laaman chitēē gutēē ree bēn guin laaman. ¹⁰ Guial ma bayünman zien ree bejn, zeel rbig gra ree bēnragxuu lojman din guqui' reeman laaman. ¹¹ Guiaad ree bēn yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rēb reeman:

—¡Lüj naj Xi'n Dios!

¹² Per gunabeeman xindxab guin ree chitēē guiēb re-ex chu laaman.

Rbe Jesús chiptio'p ree apóstoles

(Mt. 10:1-4; Lc. 6:12-16)

¹³ Dxel wē'p Jesús tijb ruguia', abi' gurejdxaman gra ree bēn guleman. Zianz wej reeman, ¹⁴ loj gra reeman gulejman chiptio'p reeman din su reeman con laaman zianczi guixhiaal tēēman laa reeman chigtie'ch reeman xtiidx Dios. ¹⁵ Abi' badēēman guialrniabee din yayün reeman bēnragxuu ree yabēē tēē reeman xindxab luxdoo ree bejn. ¹⁶ Bēn guie ree naj guidxiptio'p ree bēn gule Jesús: Simón bēn gulēēlajman Bēd, ¹⁷ Jacob con Waj, bēn naj ree xi'n Zebedeo, gunee Jesús laa reeman Boanerges (rēn guiēban, xi'n guzi-aaw); ¹⁸ nē Andrejs, Filip, Tol, Matew, Tumajs con Jacob xi'n Alfeo, nē Tadeo, nētēē Simón bēn bi'ch loj ree bēn Cananistas, ¹⁹ con Judas Iscariote bēn bayü Jesús.

Rēb ree bejn ca' Jesús xguialrniabee Beelzebú

(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnēman laa reeman lod zojbaman. ²⁰ Dād zien ree bejn bido'p yagaj stijb, xt ni'quid bile't niajw Jesús con ree xbejnman. ²¹ Chi gogbee ree xfamil Jesús, dxel bidxin reeman din yaca' reeman laaman guial rēb reeman guijcaman rajc.

²² Abi' ree mextr rajc ley bēn zēēd ree Jerusalén rēb reeman:

—Bēn guin rabēē xindxab luxdoo ree bejn por xguialrniabee Beelzebú, xin rniabee ree xindxab.

²³ Dxel gurejdx Jesús laa reeman, rēbaman:

—¿Xhienaa yabēē satanás lasa' xindxab gajquix?

²⁴ Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, ²⁵ zian-gajc tijb famil, bal rdilnē lasa' reeman, nayob la' lasa' reeman. ²⁶ Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

²⁷ 'Abi' achut zajc chu' lidx tijb bēngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

²⁸ 'Naj rni lojdi guial yu' perdon par gra dol ni rün bejn, yu' tēē perdon par gra diidxguijdx ni rniee bejn chutēēz. ²⁹ Per bēn guinieeguijdx xSprijt Dios, ad yu't dxej gacaman perdon, ma banijtaman loj Dios.

³⁰ Rēb Jesús zian guial rēb reeman yu' xsprijt xindxab luxdooman.

Xniaa Jesús con ree bijchaman

(Mt. 12:46-50; Lc. 8:19-21)

³¹ Hor guin bidxin xniaa Jesús con ree bijchaman yu lod za'man, per ad bile't niu reeman zeel guxhaal reeman b́en chignee laaman. ³² Dxel ree b́en zobjnē laaman yagaj bagojn reeman laaman, rēb reeman:

—Laa xniaal con ree bijchil za' lule' guin cayguuil reeman lūj.

³³ Badxi' Jesús xtiidx reeman rēbaman:

—¿Chunin naj da nan con ree da bichan?

³⁴ Dxel baguaaman b́en zobj ree gadēd lod zobjaman, rēbaman:

—B́en guie ree naj da nan con ree da bichan, ³⁵ din graczi ree b́en rūjn ni rēn Dios, laa reeman naj da bichan, da zanan nē da nan.

Xcwent b́en rtie'ch bin

(Mt. 13:1-9; Lc. 8:4-8)

4 Zatijb dxej culūū Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wē'paman loj tijb barcw yu' lojnijs guin, abi' gurejman lojn guiáad ree b́en guin riga' reeman ro' nijs guin. ² Zien ree ni balūūman laa reeman, rūman laan loj reeman zi'c cwent, loj ree ni culūūman laa reeman rēbaman:

³ —Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman. ⁴ Chi catie'chaman laan, ta'nan biajb lunejz abi' bidxin ree biguijn gudaw reeb laan. ⁵ Zata'nan biajb loj ree guiaj lod ad riga't zien yuj, abi' cari gulejnan guial ad zient yuj riga'. ⁶ Per chi gunan gubijdx, bigoolan abi' guial ad zro't liujn yu', gubidxan. ⁷ Zata'nan biajb loj ree yaquiejch. Abi' chi guni'san, banidloj yaquiejch guin laan, abi' ad cwat ladan. ⁸ Per zata'nan biajb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tēē ni cwa tibgayuu.

⁹ Rēb tēē Jesús loj reeman:

—B́en rēn gucaagdiajg, gol bacaagdiajg.

Chexc zeel rulūū Jesús con cwent ree

(Mt. 13:10-17; Lc. 8:9-10)

¹⁰ Chi ma baya'nnē Jesús zata'nz ree bejn con guidx-iptio'p ree xbejnman, dxel gunabdiidx reeman xhie rēn guiēb cwent guin. ¹¹ Badxi'man laan rēbaman:

—Dios ma basa'n lējt din chignia'di xhienaag naj xguialrniabeeman ni goc naguie'ch par lējt, sa'n ree b́en ad rliladxt xguialrniabeeman, con ganaxzi ree cwent naj guial gulūn laa reeman. ¹² Din majsi rani loj reeman, per ad zuguaat reeman, majsi rigueijn reeman, per ad zignia't reeman chitēē yayejc reeman loj Dios abi' gūūnman perdon xtol reeman.

Rusignia' Jesús xcwent b́en rtie'ch bin

(Mt. 13:18-23; Lc. 8:11-15)

¹³ Abi' rēb Jesús loj reeman:

—¿Nid rignia'di ya xhie rēn guiēb cwent guin? ¿Xhieza naag chignia'di gra ni ganin lojdi? ¹⁴ B́en

gutie'ch bin guin, laaman naj zi'c b́en rtie'ch xtiidx Dios. ¹⁵ Bin biajb lunejz, naj zi'c ree b́en rigueijn xtiidx Dios, per rdxin gajc xindxab rquiedix laan luxdoo reeman. ¹⁶ Yu' ree b́en naj zi'c bin biajb loj ree guiaj. Rigueijn reeman xtiidx Dios abi' dád nix ru luxdoo reeman rigueijn reeman laan. ¹⁷ Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din gūūn reeman laa reeman ni mal por xtiidx Dios, laa rusa'n gajc reeman ni rliladx reeman. ¹⁸ Yu' tēē ree b́en naj zi'c bin ni biajb loj yaquiejch. Rigueijn reeman xtiidx Dios, ¹⁹ per ru reeman xgab por ree ni riga' loj guidxliuj guie. Rusquiee guialnaza'c laa reeman rēn reeman gap reeman graloj. Abi' guial yu' xgab guin guijc reeman, zianz rucwēēz rucaagdiajg reeman xtiidx Dios, abi' achet sirv rūjn ni rucaagdiajg reeman. ²⁰ Per yu' ree b́en naj zi'c bin biajb loj yuj zagdx, ridxga' reeman laan con guidib luxdoo reeman. Rūjn reeman zi'c rēn Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

Achet ni naguie'ch yu'

(Lc. 8:16-18)

²¹ Abi' rēb Jesús loj reeman:

—Achut b́en ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. ²² Din achet ni naguie'ch yu' ni ad zaguient ad yu' tēēt ni ralan ni ad zagbeet bejn. ²³ B́en rēn gucaagdiajg, gol bacaagdiajg.

²⁴ Rēb tēē Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustēdguienman lējt. ²⁵ Din b́en ma rignia' xtiidx Dios, chignia'man mazri. Per b́en ad rignia't, xt ta'n ni rignia'man ad zignia'traman.

Xcwent guial rni's bin

²⁶ Rēb tēē Jesús loj reeman:

—Xguialrniabee Dios naj zi'c rzajc b́en rxūbin loj xguiniaaman. ²⁷ Din majsi naga'yējsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. ²⁸ Din yuj guin gajc rusni's laan, yaloj rliejnan najn tijb gui'xhdoo, dxel ririin dojn, zianz rtia ladan. ²⁹ Chi ma gojc reen dxel raru' reen guial ma bidxin tiamp yado'p reen.

Xcwent xhaj moxtajs

(Mt. 13:31-32; Lc. 13:18-19)

³⁰ Rēb tēē Jesús:

—¿Xhienaag ganin naj xguialrniabee Dios, o xhienaag gūn diidx lojdi din chignia'di xhienaag naj xguialrniabeeman? ³¹ Rnin lojdi guial xguialrniabee Dios naj zi'c naj xhaj moxtajs. Chi rxūbin reeman laan. Laan naj ni mazri ni dobēz loj gra ree bin yu' loj guidxliuj. ³² Per chi ma guxūbin reeman laan, rni'san rajcan mazri naroo loj gra ree cwaan, xt rajc rūjn xguixbitia's ree biguijn xidxan.

Balüü Jesús con ganax cwent
(Mt. 13:34-35)

³³ Balüü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' ree-man. ³⁴ Ad rulüütaman laa reeman zezi, bal id zulüü-man con cwent. Per chi ma za'man con ree xbejnman dxel rusignia'man laa reeman zagdx xhie rën guiëb ree ni rëbaman.

Racwëez Jesús bidoxh
(Mt. 8:23-27; Lc. 8:22-25)

³⁵ Dxej zii, chi gure guiaal, rëb Jesús loj ree xbejnman: —Yo' ree zatiblad ro' nijs guin.

³⁶ Dxel basa'n reeman bën riga' ree yagaj, wë'p ree-man loj barcw ni yu' Jesús zinë reeman laaman con ree barcw ren. ³⁷ Dxel brii bidoxh loj nijs guin, xt guzuloj cadxa nijs loj barcw guin. ³⁸ Per Jesús naga'yëjsaman loj barcw guin tijb luar naj xijchan, nucuugaman tijb al-moad. Dxel bacwëen reeman laaman rëb reeman:

—¡Mextr! ¿Nid yu'l xgab ya? ¡Ma cayzëeb ree xan nijs!

³⁹ Abi' bixche Jesús, bacwëezaman bidoxh guin rëb tëëman loj nijs guin:

—¡Bacwëez, bayajcdxe!

Dxel bayajcdxe bi guin con nijs guin. ⁴⁰ Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

⁴¹ Per laa reeman dád bidxeb reeman abi' rniabdiidx loj lasa' reeman:

—¿Chu bën guin zeel xt bi con nijs ruzoob xtiidxaman?

Rayüjn Jesús tijb xin yu' xindxab luxdoo
(Mt. 8:28-34; Lc. 8:26-39)

5 Chi badxin Jesús con ree xbejnman zatiblad ro' nijsdoo guin, xdajn ree bën Gadara, ² baguiajtzi Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, ³ guial nabanx ni. Achutczí rajc rixhii laax ni'qui con caden. ⁴ Zien volt ma guxhii reeman yaax në guial'x con caden, per rüjn-gajquix gan rurooxix laan. Achut rüjn laax gan. ⁵ Dxejz guiaal rizax niz dajn con lad ree baa, rbixdiajx rguuil-guijdx laagajquix con guial. ⁶ Zijtri baguiaax Jesús, baxüünx bigchaaglojx laaman abi' bazuxibix lojman. ⁷ Zianz guneex rejs rëbix:

—¿Xhie rën! con naj Jesús, Xi'n Dios yu' xanyabaa? Rniaaban lojl ad gusagzil naj.

⁸ Rëbix zian, guial cayëb Jesús lojx:

—¡Xindxab, barii luxdoo xin guin!

⁹ Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

¹⁰ Abi' rëbix lojman chitëë guixhiaalaman xindxab guin ree lood ren.

¹¹ Abi' gajxh yagaj riga' zien ree cüch cayaw reeb.

¹² Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

¹³ Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb.

¹⁴ Guiáad ree bën cayajp laa reeb, baxüün reeman bi-cojn reeman luguiedx në ree dajn abi' zien ree bejn wej biquiaa ni goc. ¹⁵ Chi bidxin reeman lod za' Jesús, baguiaa reeman xin barii xindxab guin ree luxdoo, zo-jbix najcw xabix, ma badëdguienx. Abi' bidxeb ree-man. ¹⁶ Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin. ¹⁷ Dxel guzuloj rëb reeman loj Jesús din yazaman niz ladx reeman.

¹⁸ Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman.

¹⁹ Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj ree-man gra ni ma been Dios por lüj, xhie tëë naag baya-man lüj.

²⁰ Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badx-aloj.

Rayajc xi'n Jairo në búngunaa bagaal xab Jesús
(Mt. 9:18-26; Lc. 8:40-56)

²¹ Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman.

²² Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, ²³ abi' guzajcaman laaman liaadx, rëbaman:

—Ma cayëjt da xi'nan. Yo'sii din gudxiib yaal gui-jquim din yayajquim din guibanm.

²⁴ Zinët Jesús bën guin, dád zien bejn zinal laaman xt rixa't reeman laaman. ²⁵ Loj graczi reeman no'ch tijb búngunaa, ma gojc chiptio'p ijs ragxuuman ryajbaman rejn. ²⁶ Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. ²⁷ Chi biguiejnman gra ni rüjn Jesús, gudëdaman lad ree bën guin, gubigaman niz xijchaman dxel bagaalaman xabaman. ²⁸ Guial gunaladxaman: "Gugalzan xabaman, ma bayajc gajcan." ²⁹ Loj hor zii gajc gulëjz biajbaman rejn, abi' gogbeeman ma bayajcaman. ³⁰ Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

³¹ Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. ³² Per Jesús ruguiaaman gra lad din guguiaaman chu baqui' laaman.

³³ Abi' guidib rnij búngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. ³⁴ Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdex. Ma bayajquil guialguijdx ni goquil.

³⁵ Sta canee Jesús zian, chi bidxin ree bèn guza lidx Jairo, rëb reeman loj Jairo:

—Ma gūjt xi'n! Ad ruslenril mextr guin mazri.

³⁶ Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

³⁷ Ad cwëjbt Jesús ninal gra ree bèn riga' laaman, Bëdzi, con Jacob, con Waj bijch Jacob. ³⁸ Chi bidxin reeman lidxaman, baguiaa Jesús cayajc naquie' guial roon rbixdiaj reeman. ³⁹ Dxel guyuman lënü abi' rëbaman loj reeman:

—¿Chexc zeel roon rbixdiajdi? Ad gūjttim, naga'yëjsim.

⁴⁰ Per baze' reeman laaman. Dxel gunabeeman barii gra reeman, zianz binëman xdadim con xniaam con ree bèn zinëman, lod naga' bindo guin. ⁴¹ Dxel gunaazaman yaam rëbaman:

—Talita, cumi —Rën guiëban: Lūj rnin, bindoo, bixche.

⁴² Loj hor ziigajc bixchem guzuloj cazam. Yu'm chip-tio'p ijz. Abi' dád badxa loj ree bèn riga'. ⁴³ Per gunabee Jesús laa reeman chitëë chu loj guiëb reeman ni goc, gunabee tëëman gudëëd reeman ni gawim.

Radxin Jesús Nazaret

(Mt. 13:53-58; Lc. 4:16-30)

6 Baza Jesús yagaj, badxin ladxaman con ree xbejnman. ² Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bèn cucaagdiajg dád badxa loj reeman ni rnieeman, abi' rëb reeman:

—¿Ban basiid bèn guin gra ni rnieeman? ¿Ban gulëëman guialrignia' guin abi' chu badëë guialrniabee zeel rüjnman milagr guin ree?

³ ¿Nid laaman naj bèn carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zobj luguedx guie.

Abi' ad bidxga't reeman Jesús. ⁴ Per rëbaman loj reeman:

—Guidibczí rajp reeman respejt tijb bèn rudëë xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

⁵ Ad bile't nūjn Jesús zien ree milagr yagaj. Bëlzi ree bënragxuu bayüjnman, badxiib yaaman guiyc reeman.

⁶ Dád badxalojman guial ad bililadxt reeman laaman. Dxel zëman guiedx naj ree gajxh, ziglüüman bejn ree.

Rxhiaal Jesús guidixptio'p ree xbejnman chiglüü reeman xtiidx Dios

(Mt. 10:5-15; Lc. 9:1-6)

⁷ Dxel gurejdx Jesús guidixptio'p ree xbejnman, abi' guxhaalaman tio'p gaj reeman. Badëëman guialrniabee loj reeman din yabëë reeman xindxab ree luxdoo ree bejn. ⁸ Dxel gunabeeman din achetctzi chinë reeman par runejz, ni'qui guijxh, ni'qui guialraw, ni'qui

milía, tijbzi yagriadx reeman, ⁹ con xgurëch reeman, con tijbzi lajd najcw reeman. ¹⁰ Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dx-ej yazadi luguedx guin. ¹¹ Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxiip guxyuj guia'di zi'c sen guial ad rënt reeman guzoob reeman diidx. Din naj rni lojdi, guial dxej ni yadëëd ree bejn cwent loj Dios mazri casti naroob yayal reeman guial loj ree bèn Sodoma në Gomorra.

¹² Zianz brii reeman ziguedx reeman loj ree bejn guial rayal yayüjn reeman xgab por xtol reeman.

¹³ Abi' rabëë reeman zien ree xindxab luxdoo ree bejn, zien tëë ree bënragxuu gudëëb reeman sejt, abi' bayüjn reeman laa reeman.

Gūjt Waj bèn baroobnijs bejn ree

(Mt. 14:1-12; Lc. 9:7-9)

¹⁴ Chi biguiejn rey Herodes ni rüjn Jesús guial ruza't ree bejn laaman guidibczí, rëb reeman:

—Waj, bèn baroobnijs bejn ree ma baban, zeel rajpaman guialrniabee rüjnman milagr ree.

¹⁵ Per yu' reeman rëb:

—Elíasan, bèn rudëë xtiidx Dios loj ree bejn.

Yu'za reeman rëb:

—Tijb bèn rudëë xtiidx Dios loj ree bejnman lasa' ree bèn gocli.

¹⁶ Chi biguiejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

¹⁷ Rëb Herodes guin zian din laagajcaman gunabee gunaa reeman Waj, abi' badxe'man laaman ladxguilib por Herodías. Herodías naj xbëngunaa Felip bijch Herodes. Per Herodes cwa'man Herodías. ¹⁸ Abi' guial rëb Waj loj Herodes:

—Ad laat tia' xbëngunaa bijchil.

¹⁹ Zeel bidxe'ch Herodías Waj, guyënman nugüjta-man laaman. Per ad rile'tan, ²⁰ din rdxeb Herodes guial ragbeeman rüjn Waj ni rën Dios, rüjn tëëman zi'c rayal, zeel ad cwëjbtaman xhie nūjnnë Herodías Waj. Majsi ad ragbeet Herodes xhie gūjnman por ni rëb Waj lojman, per ruladxaman gucaagdiajgaman ni rnieeman.

²¹ Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bèn rniabee ree në par ree bèn rniabee ree suldad nëtëë ree bèn zobjloj niz Galilea. ²² Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojman:

—Gunab ni rëntzil, naj gune laan.

²³ Xt badëë xtiidxaman gudëëman ni guiniabtzim, majsi garol ni rajpaman. ²⁴ Dxel bariim bignabdiidx loj xniaam, rëbim:

—¿Xhie ganaaban?

Badxi'man laan rëbaman:

—Gunab guiyc Waj bèn ruoobnijs bejn ree.

²⁵ Laa bayugajquim lod za' rey Herodes, rëbim lojman:

—Yan gajc rënan guneel guijc Waj, bén ruuobnijs bejn ree, guneelan loj tijb pliajt.

²⁶ Dád guyu naya Herodes, per mal badëed xtiidxaman guidib loj ree bén riga', zeel ad bile't nibexuuman nudëëman ni gunabim. ²⁷ Dxel gunabee Herodes tijb suldad din chica'x guijc Waj. ²⁸ Zianz wej suldad guin lën ladxguib guin, gutü'x guijc Waj badxe'xan loj pliajt binëxan lojm. Dxel bayü loj xniaamin.

²⁹ Chi gogbee ree xbejn Waj guial ma güjtaman, bac'a' reeman xcuerpaman persi biquie'ch reeman laaman.

Ruyaán Jesús gaay mil bejn

(Mt. 14:13-21; Lc. 9:10-17; Jn.6 :1-14)

³⁰ Chi bayejc ree xi apóstoles Jesús, be reeman diidx lojman gra ni been reeman në ni balüü reeman. ³¹ Dxel rëb Jesús loj reeman:

—Gol guda, yo' dunujz ree niz lod achut bejn zobj din yaziiladx ree ta'n.

Rëbaman zian guial dád zien ree bén zia zien tëë ree bén zëed, xt ni'qui guial gaw reeman ad rile'tan.

³² Dxel Jesús con ree bén naj ree apóstoles zë reeman loj barcw tijb luar lod achut zobj. ³³ Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

³⁴ Chi baguiajt Jesús loj barcw guin, baguiaaman bén guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. ³⁵ Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zobj niz guie.

³⁶ Güjdx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

³⁷ Per rëb Jesús loj reeman:

—Lëjt gol badëed ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct ni rüjn bejn gan loj tio'p gayuu dxej.

³⁸ Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

³⁹ Dxel gunabeeman din cwe tibcwaa gaj reeman loj guixya'. ⁴⁰ Zianz gurej reeman zian, yu' lod gure tibgayuu reeman, yu' lod gure tü'pchi reeman. ⁴¹ Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badëëman quixtëë loj Dios, gula'man guiadxtil guin badëëman loj ree xbejnman persi gudi's reeman laan loj ree bén riga', gudi's tëëman grop bëjl guin loj gra reeman. ⁴² Graczi reeman gudaw xt bigdxinladx reeman, ⁴³ abi' staczi bacha reeman chiptio'p dxüm guiadxtil laay con bëjl ni baya'n. ⁴⁴ Loj ree bén gudaw no'ch cost gaay mil xin-guiaaw.

Rza Jesús loj nijs

(Mt. 14:22-27; Jn.6 :16-21)

⁴⁵ Dxel gunabee Jesús guyu ree xbejnman loj barcw din tédgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree.

⁴⁶ Chi gulox bazaadiidxnëman laa reeman, wejman guijc tijb guia', persi gurejdx gunabaman Dios. ⁴⁷ Chi ma cabej guiaal, ma yu' barcw guin galay nijs guiáad Jesús baya'n xtijbzaman guijc guia' guin. ⁴⁸ Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bén tédnejz. ⁴⁹ Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. ⁵⁰ Dád cadxeb reeman por ni cuguiaa reeman. Per guneenë Jesús laa reeman rëbaman:

—¡Gol bagu' luxdoodi, ad bal rdxebidi, najn!

⁵¹ Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, ⁵² din nayaaw xquiarguejn reeman, abi' ad bignia't reeman milagr ni beenman con guiadxtil guin ree.

Rayüjn Jesús bënragxuu ree Genesaret

(Mt. 14:34-36)

⁵³ Chi ma gudëd reeman lojnijs guin bidxin reeman xdajn ree bén Genesaret, yagaj guxhii reeman barcw guin ro' nijs. ⁵⁴ Naabzi baguiajt reeman loj barcw guin, laa bayünbee gajc ree bejn Jesús. ⁵⁵ Abi' gutie'ch reeman diidx guidib niz yagaj. Dxel guzuloj zinë ree bejn bënragxuu ree lod riguejntzi reeman za' Jesús. ⁵⁶ Bantëëz zëman, majsi guiedx narooob o guiedx dobëz o ranch ree, rguixh reeman bënragxuu guin ree niz lod tédaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bén багаal xabaman bayajc.

Ni rüjn persi rüjn bejn dol

(Mt. 15:1-20)

7 Tijb dxej, tio'p choon ree bënfarisew con ree mextr rajc ley, bén guza ree Jerusalén, bibig reeman loj Jesús. ² Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. ³ (Din bënfarisew në gra ree bén Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin. ⁴ Në chi raza reeman luguia', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quib reeman re, con vajs, con ree trast guib, në xloon reeman riguib reeman.) ⁵ Zeel bënfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree? ¿Chexc zeel raw reeman zianzi?

⁶ Dxel rëb Jesús loj reeman:

—¡Bén rusquiee!, waliqui ni gunee Isaías por lëjt, bén badëë xtiidx Dios loj ree bejn, chi bacaaman:

Bén guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

⁷ Xlia'czi rën da't reeman naj, abi' rulüü reeman bejn ree ganaxzi ni rbëëguijc ree bénguidxliuj.

⁸ Yan, rusa'ndi xtiidx Dios tibladi persi zinalidi xcostumbr ree bénguidxliuj.

⁹ Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tibladi. ¹⁰ Rëb Moisejs: “Gojp respekt xdadil con xni-aal”, abi' “Bén guzaal diidxmal guijc xdad o xniaa, rayal guiëtaman.” ¹¹ Per lëjt rëbidi guial zile' guiëb bejn loj xDadaman o xniaaman: “Ad zajct gūnan lūj yudar, din gra ni ra'pan naj Corbán” (Corbán rën guiëb gran naj par Dios). ¹² Rëbidi, bén guiëb zian, ad zile'tri gūn xdad xniaaman yudar. ¹³ Abi' rbëëladxidi xtiidx Dios persi zinal xcostumbridi ni rulüü lasa'di, në zien ree ni ren rüjndi lasa' ree ni guin.

¹⁴ Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tëë ni ganin:

¹⁵ Ad ni rawt bejn rüjn persi rüjnman dol. Ni ririi ro'-man në ni rüjnman, laan rüjn persi rüjnman dol.

¹⁶ ¡Bén rën gucaagdiajg, gol bacaagdiajg!

¹⁷ Chi baza Jesús lod za' ree bén guin bayuman lënu, dxel gunabdiidx ree xbejnman xhie rën guiëb ni rëbaman. ¹⁸ Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol, ¹⁹ din ni raw bejn ad rejtan luxdoo, rejn lënman, abi' rari-in?

Zian basignia'man guial ad rüjnt bejn dol por ni rawzaman. ²⁰ Rëbaman:

—Ni ririi ro' bejn në ni rüjnman, laan rüjn persi rüjnman dol. ²¹ Din guijc bejn zëëd graloj xgab mal, guial rüjn ni dxuudx, guialgubaan, guialrugjnt lasa', ²² guial rzunë béngunaa ren o xinguaaw ren, guialrzëëblad xieen ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrüjn benro', në guial rüjn ni ad rayalt. ²³ Graczi ree ni guin zëëd guijc bejn, abi' laan rüjn persi rüjnman dol.

Rayajc xi'n tijb bén Sirofenicia

(Mt. 15:21-28)

²⁴ Chi baza Jesús niz yagaj, zëman niz Tiro në Sidón. Dxel guyuman tijb lënu guial ad guyëntaman niagbee ree bejn, per ad gojct nuquie'ch lojman. ²⁵ Din gogbee gajc xniaa tijb bindoo yu' xindxab luxdoo. Abi' wej xni-aam lod za' Jesús zian bazuxibaman lojman. ²⁶ Ad najtaman bén Israel, najman bén Sirofenicia. Dxel guzajcaman liaadx loj Jesús din yabëëman xindxab guin luxdoo bindoo guin. ²⁷ Per rëb Jesús lojman:

—Badëëdxgaj mod gaw yaloj ree xindoo, din ad rayalt chiquied bejn guiadxtil loj xi'nman din gudëëman laan gaw ree bë'cw.

²⁸ Badxi' bén guinan rëbaman:

—Waliquil, Dad, per në ree bë'cw raw xguiadxtil laay reem ni ryajb xan mex.

²⁹ Dxel rëb Jesús:

—Laaqui guneel. Ma zajc yaguaajl, ma barrii xindxab guin luxdoo xi'nl.

³⁰ Chi badxin lidx Bén guin, baguiaaman laa bindo guin naga' loj loon, ma barrii xindxab guin luxdoo.

Bayajc tijb bén nacwa't ad rniee tëëtaman zagdx

³¹ Baza Jesús niz Tiro, gudëdaman niz Sidón, në loj ree guiedx riga' Decápolis abi' bidxinman ro'nijsdoo Galilea. ³² Ni bidxinne reeman tijb xinguaaw nacwa'tix ad rajc tëët rnieex zagdx. Abi' rëb reeman loj Jesús din gudxiib yaaman guijquix. ³³ Zianz binë Jesús laax tibladi, badxe' xbacwënman lën guidiajguix, abi' con xhiejnman bagaalamani lüdxix. ³⁴ Dxel gules lojman xanyabaa, banajladxaman, rëbaman:

—¡Efata! —rën guiëban: ¡Baxal!

³⁵ Loj hor zii gajc baxal ree guidiajg xin guin, baban lüdxix dxel guzuloj caneex zagdx. ³⁶ Dxel gunabee Jesús laa reeman chitëë chu loj guiëb reeman ni goc. Per guial rëbaman zian, mazri rü reeman laan loj ree bejn. ³⁷ Dád badxa loj reeman rëb reeman:

—Xi zagdx naj gra ree ni rüjnman, xt rüjnman persi riguejn ree Bén nacwa't, abi' ree bengop rniee reeman.

Ruyaani Jesús tajp mil bejn

(Mt. 15:32-39)

8 Tijb dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

² —Rayan Bén guin ree din ma gojc choon dxej nadxu'në' reeman guie, abi' ad ca't ni gaw reeman. ³ Abi' bal yaxhalan laa reeman lidx reeman sin guialraw, dool yadaj reeman lunejz, din yu' reeman zëëd zijt.

⁴ Dxel rëb ree xbejnman:

—Per, ¿ban guin yuca'n ni gaw ree Bén guin, achutczu bejn zojb niz guie?

⁵ Dxel gunabdiidxaman loj reeman rëbaman:

—¿Bël guiadxtil ca'di?

Abi' rëb reeman:

—Gajdxan.

⁶ Dxel gunabeeman gurej ree Bén guin luyuj. Zianz cwa'man guigajdx guiadxtil guin, badëëman quixtëë loj Dios, abi' gula'man laa reen badëëd loj ree xbejnman persi gudi's reeman laa reen loj gra ree Bén guin.

⁷ Nëgajc tio'p choon ree bëjldoo ca' reeman, abi' badëëman quixtëë loj Dios dxel gunabeeman gudi's reeman në laa reeb loj ree Bén guin. ⁸ Graczi reeman gudaw xt bigdxinladx reeman, abi' staczi bacha reeman gajdx dxüm guiadxtil laay në bëjl ni baya'n. ⁹ Bén gudaw ree naj reeman cost tajp mil. Chi gulox gudaw reeman, dxel bazaadiidxnë Jesús laa reeman. ¹⁰ Zianz guyuman loj barcw con ree xbejnman zë reeman niz Dalmanuta.

Rniab ree bénfarisew tijb milagr loj Jesús

(Mt. 16:1-4; Lc. 12:54-56)

¹¹ Dxel bidxin ree bénfarisew, guzuloj cadildiidxnë reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zëedaman. ¹² Dxel banajladx Jesús, rëbaman: —¿Chexc zeel rëndi günan tijb milagr? Diidxli ganin, achetczi milagr günan guguaadi.

¹³ Dxel basa'nman laa reeman, bayuman loj barcw zatijb, zignë ree xbejnman stiblad ro' nijs guin.

Xlevadur ree bénfarisew

(Mt. 16: 5-12)

¹⁴ Bayanladx ree xbejn Jesús ninë reeman guialraw, tijbzi guiadxtil ca' reeman loj barcw guin. ¹⁵ Abi' chi rëbaman loj reeman:

—Gol gojp cudad con xlevadur ree bénfarisew në xlevadur Herodes.

¹⁶ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

¹⁷ Abi' gogbee Jesús ni canee reeman, zianz rëbaman:

—¿Chexc zeel rëbidi guial ad ca'tidi guiadxtil? ¿Staczi ad rignia'tidi ya? ¿Sta nayaaw xquiarguiejndi ya? ¹⁸ Yu' guiaalojdi per rulüü ad ruguaatidi, yu' guidiajguidi per rulüü ad riguijntidi. ¿Nid rusaaladxidi ya? ¹⁹ Chi gudi'san gaay guiadxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

²⁰ Dxel rëbaman:

—Laadx chi gudi'san gajdx guiadxtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

²¹ Dxel rëbaman:

—¿Staczi ad waygnia'tidi ya?

Rayüjn Jesús tijb Bén ad ranit loj

²² Chi bidxin Jesús guiedx Betsaida con ree xbejnman. Binë ree bejn tijb Bén ad ranit loj, rëb reeman loj Jesús din gugaalaman guiaalojman. ²³ Dxel gunaaz Jesús yaaman gulëëman laaman luguiedx guin, abi' gudëëb xhiejnman guiaalojman, baqui'man guiaalojman. Zianz gunabdiidxaman rëbaman:

—¿Rajc ruguaal ta'n ya?

²⁴ Dxel guzuloj cuguiaaman, abi' rëbaman:

—Ruguan bejn ree, per rulüü naj reeman zi'c yag ni caza.

²⁵ Dxel bagaal Jesús guiaalojman stijb, abi' rëbaman lojman din guguaadxiichaman, dxel guzuloj cuguiaaman zagdxë, naynidxuj ma ruguaaman gra. ²⁶ Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhien-aag bayajc lojl.

Rëb Bëd guial Jesús naj Cristo

(Mt. 16:13-20; Lc. 9:18-21)

²⁷ Bazanë ree xbejn Jesús niz Galilea, wej reeman guiedx riga' ree Cesarea de Filipo. Chi zë reeman lune-jz gunabdiidx Jesús loj ree xbejnman, rëbaman:

—¿Chu rëb ree bejn najn?

²⁸ Badxi' reeman laan rëb reeman:

—Yu' reeman rëb lüj naj Waj Bén baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree Bén badëëd xtiidx Dios loj ree bejn gocli.

²⁹ Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

³⁰ Per rëb Jesús loj reeman achu loj guiëb reeman zian.

Rugojn Jesús guiëtaman

(Mt. 16:21-28; Lc. 9:22-27)

³¹ Guzuloj Jesús rëb loj ree xbejnman:

—Rayal sagdiaj da't Bén guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

³² Zagdxë basignia'man laa reeman. Dxel gulëëcaan Bëd laaman, rëbaman lojman chitëë rëbraman zian.

³³ Per badxi' lojman baguiaa ree xbejnman, dxel gudilëman Bëd rëbaman:

—¿Bisüd lon, Satanás!, din ad por Diost zëed ree xgab ni rüjnl, rüjnl zi'c naj xixgab bénguidxliuj.

³⁴ Dxel gurejdx ree xbejn Jesús con ree Bén riga' ya-gaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Siibnejzaman guialzi ni tëdzaman abi' guidnalaman naj. ³⁵ Din Bén mazri rën guialnaban ni rajpaman loj guidxliuj guie, zadxin dxej gusëëbaman laan, per Bén guiët por naj në por da diidxan, zajpaman guialnaban tiblayaa con Dios. ³⁶ ¿Xhie gan güün bejn gapaman gra ni yu' loj guidxliuj bal canijtaman loj Dios? ³⁷ Din ad zile't sii bejn xguialnabanman xanyabaa. ³⁸ Din Bén yatunë naj në da diidxan niz loj ree bëndol Bén ad zinalt ree xnejz Dios, Bén riga' ree yan, ziangajc naj, najn Bén guxhaal Dios, yatunë'n laaman chi guialan con xguialrniabee da Dadan con ree xianjlamen.

9 Rëb tëë Jesús loj reeman:

—Diidxliczi ganin, yu' ree Bén za' guie, ad zëjtt xt guguaa reeman gui't xguialrniabee Dios.

Bidxaa Jesús loj choon ree xbejnman

(Mt. 17:1-13; Lc. 9:28-36)

² Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman. ³ Balaa xabaman bacha', gojcan naquichbëj, achutczi rguib lajd zian loj guidxliuj guie. ⁴ Dxel baguiaa reeman Elías në Moisejs cayünë reeman Jesús diidx. ⁵ Abi' rëb Bëd lojman:

—Mextr, ¿zagdxen nadxu'n guie! Yaguieenan choon ranch, tijban par lűj, tijban par Moisejs, zatijban par Elías.

⁶ Per ad ragbeet Bėd xhienin caneeman guial dád bidxeb reeman. ⁷ Loj hor guin biguiajt tijb ząj beenan bala guijc reeman, abi' loj ząj guin biguien cha' bejn řebaman:

—Bėn guie naj da Xi'nan, bėn řen da'tan, gol bazoob xtiidxaman.

⁸ Abi' chi baguiaa reeman gadėd lod za' reeman achutri za'nė Jesús, tijbzi laaman za' yagaj. ⁹ La'tgaj cayguiajt reeman ruguia' guin, řeb Jesús loj reeman chitėė chu loj guiėb reeman ni baguiaa reeman, xt yaban Bėn guxhaal Dios. ¹⁰ Abi' laaz reeman ragbee ni baguiaa reeman, rniabdiidx tėė loj lasa' reeman xhie řen guiėb guial yabanman loj ree bengűt. ¹¹ Dxel gunabdiidx reeman loj Jesús, řeb reeman:

—¿Chexc zeel řeb ree mextr rajc ley guial yaloj Elías gui't?

¹² Badxi'man laan řebaman:

—Walican yaloj Elías gui't, laaman guzuxnejz gra. Per, ¿chexc zeel ca loj xtiidx Dios guial Bėn guxhaal Dios sagdiaj da'taman ad zėn tėėt reeman laaman?

¹³ Naj rni lojdi guial mal bi't Elías, abi' beennė reeman laaman ni guyėntzi reeman zi'c ca loj xtiidx Dios ni rayal sacaman.

Rayűjn Jesús tijb xin yu' xindxab luxdoo

(Mt. 17:14-21; Lc. 9:37-43)

¹⁴ Chi badxin Jesús lod za' sta'n ree xbejnman, baguiaaman dád zien bejn riga', nė ree mextr rajc ley za' yagaj cadildiidx reeman con ree xbejnman. ¹⁵ Chi baguiaa reeman zėėd Jesús, dád badxa loj reeman abi' baxűűn reeman bicajpdioz reeman laaman. ¹⁶ Dxel gunabdiidxaman loj reeman řebaman:

—¿Chexc zeel cadildiidxidi?

¹⁷ Abi' řeb tijb bėn za' yagaj:

—Mextr, zidnė' da xi'nan lojl guial yu' xindxab luxdoo abi' nusa'nx laax gop. ¹⁸ Bantėėz guin za'x, chi ru xindxab guin luxdoox rureeyujx laax, abi' rbėėx bichijn ro'x, raw tėė ree layix, dxel ratiaguix. Ma gunaaban loj ree xbejnł din nabėė reeman xindxab guin, per ad gojct reeman.

¹⁹ Zeel řeb Jesús:

—Bėn ad řliladxt! ¿Xt goc gazunė'n lėjt gadaan tėėn lėjt? Gol tanė xinzii guie.

²⁰ Dxel binė reeman laax lojman. Per chi baguiaa xindxab guin laaman, laa bagűjtya'gajquix xin guin, bareeyujx laax abi' rbixűjpix ririi tėė bichijn ro'x. ²¹ Dxel gunabdiidx Jesús loj xdadix řebaman:

—¿Goc guzuloj rajquix zian?

Badxi'man laan řebaman:

—Diizd xindobėzix. ²² Dád zien volt ruzaalix laax loj guij nė loj nijs din guiėtix. Zeel bal zajc gűűnl xhienin por dunujn, gognė dunujn, baya dunujn.

²³ Dxel řeb Jesús lojman:

—¿Chexc zeel nal, "bal zajcan"? Graczan zajc bal chu řliladx naj.

²⁴ Dxel gurixdiaj xdadix řebaman:

—¿Řliladxan lűj, gognė naj din chililadxan mazri!

²⁵ Chi baguiaa Jesús cado'p zien bejn dxel gudilėman xindxab yu' luxdoo xin guin, řebaman:

—Xindxab gop nacwa't tėė, rniabeen lűj din yariil luxdoo xin guin. Ad bal yayejcril luxdoox zatijb.

²⁶ Dxel gurixdiaj xindxab guin, abi' bagűjtya'x laax za-tijb abi' bariix luxdoox, basa'nx laax zi'c xingűt zeel řeb ree bejn guial ma gűjtix. ²⁷ Per gunaaz Jesús yaax gule-saman laax, dxel guzulix.

²⁸ Dxel bayu Jesús lėnű con ree xbejnman, abi' gunabdiidx reeman lojman, řeb reeman:

—¿Chexc zeel ad gojct nalėėn xindxab guin luxdoo xin guin?

²⁹ Badxi' Jesúsán řebaman:

—Par yarii lasa' ree xindxab guin, rayal cwedx guini-abidi Dios guiba'n tėėdi.

Rugojn Jesús zatijb guial guiėtaman

(Mt. 17:22-23; Lc. 9:43-45)

³⁰ Chi baza reeman yagaj, gudėd reeman niz Galilea, per ad guyėnt Jesús chu niagbee guial cadėdaman niz yagaj, ³¹ guial culűű ree xbejnman, řebaman:

—Yayű reeman Bėn guxhaal Dios loj ree bėn gugűjt laaman, per ni gac choon dxej yabanman.

³² Per laa reeman ad bignia't reeman ni řebaman, abi' bidxeb reeman niniabdiidx reeman lojman.

¿Chu mazri zojbloj?

(Mt. 18:1-5; Lc. 9:46-48)

³³ Dxel badxin Jesús Capernaum con ree xbejnman, abi' badxin reeman yu lod zojb reeman. Dxel gunabdiidxaman loj reeman řebaman:

—¿Xhie diidxan rūdi lunejz chi zio'p ree?

³⁴ Per achet řeb reeman guial cadildiidx reeman lunejz chu reeman mazri zojbloj. ³⁵ Dxel gurej Jesús, gurejdxaman guidxiptio'p reeman, řebaman:

—Bal chu bėn řen gac mazri bėn zojbloj lojdi, rayal gűűn laagajcaman zi'c tijb bėn ad zojblojt gűűn tėėman sirv loj gradi.

³⁶ Dxel cwa'man tijb xindoo, bazujman laax galay reeman, zianz gudiidxaman laax, řebaman:

³⁷ —Bėn řidxga' tijb xindoo por naj, najn řidxga'man, guíaad bėn řidxga' naj, bėn guxhaal najn řidxga'man.

Bėn ad za't contr dunuj ree za'man con dunuj ree

(Lc. 9:49-50; Mt. 10 :42)

³⁸ Řeb Waj loj Jesús:

—Mextr, baguiaan tijb bejn rabėėman xindxab luxdoo ree bejn por xguialrniabeel. Per badxoonan guial ad najtaman dux bejn ree.

³⁹ Badxi' Jesúsán řebaman:

—Ad rudxoondi, din bėn rūjn milagr por da guialrniabeen, ad zile't guinieeguijdxaman naj. ⁴⁰ Bėn ad za't contr dunuj ree, za'man con dunuj ree. ⁴¹ Chutėėz bėn gunee majsı tibxijgzi nijs lojdi guial najdi xbejn Cristo, diidxli rnin guial ziangajc yu' ni gudėėd Dios lojman.

Bén ruzaalguiiw bejn din güünman dol

(Mt. 18:6-9; Lc. 17:1-2)

⁴² 'Chutëez bén guzaalguiiw tijb bén qui rliladxri naj din güünman dol, par laaman zagdxeli naj guixhii ree-man tijb guiaj mulin yëjnman guzaal reeman laaman loj nijsdoo. ⁴³ Bal laagajc yaal rusajb lüj loj dol, zagdxeli gutü'n. Mazri zagdxé chu' con tibladi yaal xanyabaa, guial che con grop yaal gabijl loj bajl ni ad yu't dxej yayü', ⁴⁴ lod ad rëjtt ree bizog lod ad rayü' tëët bajl. ⁴⁵ Abi' bal laagajc guial rusajb lüj loj dol, zagdxeli gutü'n. Mazri zagdxé chu' con tibladi guial xanyabaa guial che con groplad guial gabijl lod yu' bajl ni ad yu't dxej yayü', ⁴⁶ lod ad rëjtt ree bizog lod ad rayü' tëët bajl. ⁴⁷ Bal laagajc guialoj rusajb lüj loj dol, zagdxeli gulëën. Mazri zagdxé chu' con tibladi guialoj xanyabaa guial che con groplad guialoj gabijl lod yu' bajl ni ad yu't dxej yayü', ⁴⁸ lod ad rëjtt ree bizog lod ad rayü' tëët bajl.

⁴⁹ 'Zi'c ru zëd guijc guialraw, ziangajc ree bén rliladx naj sagdiaj reeman din gac reeman naya.

⁵⁰ 'Ni zagdxé naj zëd, per bal id zajcran naxij, xhieza naag yayaican naxij zatijb? Gol been zi'c rayal chitëë saquidi zi'c zëd ni ad rüjnt sirv, gol gubajnnë tëë lasa'-di zagdxé.

Rulüü Jesús xcwent guial rala' lasa'

(Mt. 19:1-12; Lc. 16:18)

10 Chi baza Jesús Capernaum, dxei wejman niz Judea në stiblad ro' guiiw Jordán. Abi' lod za'-man bido'p ree bejn zatijb, dxei guzuloj culüüman laa reeman zi'c goc xcostumbraman. ² Yu' ree bënfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—Zajc yala' xinguaaw lacheelix ya?

³ Badxi'man laan rëbaman:

—Xhie gunabee Moisejs güündi?

⁴ Abi' rëb reeman:

—Cwëjb Moisejs yala' xinguaaw lacheelix, per gudëëdix gui'ch tia'man guial ma bala' reex.

⁵ Dxei rëb Jesús:

—Rëb Moisejs gac zian guial nadidi. ⁶ Per guial xchej chi gule'cchaaw Dios guidxliuj, "beenman xinguaaw con búngunaa". ⁷ "Zeel xinguaaw gusa'n xdad xniaax din guibannë lacheelix, ⁸ dxei grop reex ma gac zi'c ti-jbzi bejn." Zianan zeel ad najtri reex tio'p, ma naj reex tijbzi. ⁹ Zeel, búnguidxliuj ad rayalt yala'man lasa' ni ma bachajc Dios.

¹⁰ Chi bayu reeman lëñü, gunabdiidx ree xbejnman lojman zatijb, xcwent ni guneeman. ¹¹ Abi' rëbaman loj reeman:

—Xin rala' lacheel, abi' rtia'x ben ren dolan cayüjnx, ¹² ziangajc bal tijb búngunaa yala' lacheelaman abi' tia' xin ren laaman, dolan cayüjnxman.

Rüjnle' Jesús xindoo ree

(Mt. 19:13-15; Lc. 18:15-17)

¹³ Binë ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilë reeman bén binë ree laa reex. ¹⁴ Chi baguiaa Jesús zian, balenman zeel rëbaman:

—Gol badëëd mod gui't reex lon, ad bal rudxoondi. Din lod rniabee Dios naj par ree bén naj zi'c laa reex.

¹⁵ Diidxliczi rnin, bén ad rliladxt xguialrniabee Dios zi'c tijb xindoo, ad zile't chu'man lod rniabee Dios.

¹⁶ Dxei gudiidx Jesús laa reex, badxiib yaaman guijc reex, beenle'man laa reex.

Xcwent tijb xinrijcw

(Mt. 19:16-30; Lc. 18:18-30)

¹⁷ Chi ma gusnuu xnejz Jesús, ruxüün tijb xinguaaw bidxinx abi' bazuxibix lojman, dxei gunabdiidxix rëbix:

—Mextr za'c, xhie rayal günan din ga'pan guialnaban tiblyaa con Dios?

¹⁸ Badxi' Jesús laan rëbaman:

—Zhexc zeel nal lon benza'c? Achut naj benza'c, ti-jbzi Dios. ¹⁹ Lüj rajc ree mandamient, "Ad gugüjtil bejn, ad sunël búngunaa ren, ad cwanl, ad cwëël xtiidx bejn ad gusquiee tëël, gojp respekt xdad xniaal."

²⁰ Dxei rëbix loj Jesús:

—Mextr, gra ree ni guin cayünan diizd xindoon.

²¹ Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëëd milia guin loj ree bënprob, zian gapil guialnaza'c xanyabaa dxei guidnalil naj majsi xhietëz saquil.

²² Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

²³ Dxei baguiaa Jesús loj gra reeman, abi' rëbaman loj ree xbejnman:

—Dád nawëëg naj chu' benrijcw loj xguialrniabee Dios!

²⁴ Dád badxa loj ree xbejnman ni rëbaman. Per rëbaman loj reeman zatijb:

—Xi'n, jben yu'guijc mazri ni rajpaman, dád nawëëg naj chu'man loj xguialrniabee Dios! ²⁵ Adli nawëëgt téd tijb camell xan gagux guial chu' tijb benrijcw loj xguialrniabee Dios.

²⁶ Chi biguien reeman diidx guin ree, mazri badxa loj reeman, dxei rniabdiidx loj lasa' reeman, rëb reeman:

—Zchu zajc laa loj xcasti Dios?

²⁷ Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

²⁸ Dxei guzuloj rëb Béd loj Jesús:

—Dunujn basa'nan graczi ni raya'pan persi zud-naalan lüj.

²⁹ Badxi' Jesús an rëbaman:

—Diidxliczi ganin lëjt, chutëez bén rusa'n lidx, o bi-jch, o bizan, o xdad xniaa, o lacheel o xi'n, o guidxliuj ree por naj në por xtiidxza'c Dios, ³⁰ loj guidxliuj guie tia'man tibgayuu volt mazri guial loj ni basa'nman, bal

najn lidxaman, bijchaman, bizanman, xniaaman, xi'n-man, në xguidxliujman, majsi guidib wazagdiaj, abi' guidxin dxej gapaman guialnaban tiblyayaa con Dios. ³¹ Per dád zien ree bën naj bën yaloj yan, gac reeman bën bigra, guiáad ree bën naj bën bigra yan, gac reeman bën yaloj.

Rugojn Jesús zatijb guial guiëtaman (Mt. 20:17-19; Lc. 18:31-34)

³² Chi zë reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bën nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

³³ —Rëbaman loj reeman: Lëjt ragbee guial ziyo' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtan, yayü tõe reeman naj loj ree bën ad najt bën Israel. ³⁴ Guze' reeman naj, gucojp xhiejn reeman lon, quin reeman gugüjt tõe reeman naj, per yayon dxej yabanan.

Ni gunab ree Jacob con Waj (Mt. 20:20-28)

³⁵ Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

³⁶ Abi' gunabdiidxaman rëbaman:

—¿Xhie rëndi günan?

³⁷ Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xladbeel, zatijb dunujn yadxu' xladruvejsil.

³⁸ Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiëtidi zi'c guiëtan ya?

³⁹ Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tõe di zi'c naj, ⁴⁰ per guial cwedi da ladbeen o da ladruvejsan, ad najt rayal gune laan, din ma najn par ree bën rayal laan.

⁴¹ Chi biguien zachii xbejn Jesús ni rëb reeman, dád balen reeman Jacob con Waj, ⁴² per gurejdx Jesús laa reeman rëbaman:

—Lëjt ragbee guial ree bën rniabee loj guidxliuj guie, rniabee reeman bejn ree zi'ctzi rën reeman, guiáad ree bën zøjbloj rüjnnë reeman bejn ree zi'ctzi rën reeman por guialrniabee ni rajp reeman. ⁴³ Per con lëjt ad rayalt gac zian. Din bal chu rën gac bën rniabee lojdi, rayal güünman sirv lojdi, ⁴⁴ guiáad bën rën gac bën zøjbloj, rayal güünman sirv loj gradi zi'c bën nado'. ⁴⁵ Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan din günan laa reeman sirv, abi' con da guialnabanan gaguixan por xtol zien ree bënguidxliuj.

Rayajc guiaaloj tijb xin ad ranit loj la Bartimeo (Mt. 20:29-34; Lc. 18:35-43)

⁴⁶ Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bën la Timeo, zøjbix cwë' nejz rniabix carda. ⁴⁷ Chi biguiejnx cadëd Jesús bën Nazaret niz yagaj, guzuloj cabidxa'x rëbix:

—¡Jesús, xdiaa Davi, baya naj!

⁴⁸ Dád zien ree bejn ridilë laax din yacwëëz ro'x. Per mazri rejs rbidxa'x rëbix:

—¡Xdiaa Davi, baya naj!

⁴⁹ Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

⁵⁰ Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús. ⁵¹ Gunabdiidx Jesús lojx rëbaman:

—¿Xhie rën! günan por lüj?

Badxi'xan rëbix:

—Mextr, rënan yani lon.

⁵² Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

Ru Jesús Jerusalén

(Mt. 21:1-11; Lc. 19:28-40; Jn. 12:12-19)

11 Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman, ² rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb. ³ Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

⁴ Dxel wej reeman, bidxaagloj gajc reeman burdo guin, caduub runejz ro' tijb port, abi' guxhieci reeman laab.

⁵ Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

⁶ Badxi' reeman laan zi'c rëb Jesús, abi' cwëjb ree bën guin zinë reeman laab. ⁷ Bidxinnë reeman laab lojman, badxiib xab reeman xijchib, persi gudxibaman laab. ⁸ Zien ree bejn riguijxh xab niz lod rdëdaman, yu' tõe reeman rutüüg zijn persi rguijxh reeman laan niz lod rdëdaman.

⁹ Abi' zi'c ree bën ned, në ree bën nal rbixdiaj reeman, rëb reeman:

—¡Gagnëman dunuj ree yan! ¡Nagle' bën zëed por Dios! ¹⁰ ¡Nagle' bën zëed nabee zi'c dux bëngulal ree rey Davi! ¡Quixtëe dux Dad ree Dios Bén yu' xanyabaa!

¹¹ Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

Bazaal Jesús diidx guijc yag higo
(Mt. 21:18-19)

¹² Chi bareguiaa, barii reeman Betania. Dxel guzuloj calaan Jesús. ¹³ Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xti-amptanan. ¹⁴ Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!
Abi' biguiejn ree xbejnman ni rëbaman.

Rabëë Jesús bën ruto' ree ro' yadooro' Jerusalén
(Mt. 21:12-17; Lc. 19:45-48; Jn. 2:13-22)

¹⁵ Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëëman bën cuto' ree në ree bën cazii. Barexguiataman xmex ree bën ruchaa milia con xyagxhil ree bën ruto' ree palom, ¹⁶ ad rtiëjbtaman xhie chu'në ree bejn ro' yadoo guin. ¹⁷ Abi' guzuloj culüüman laa reeman, rëbaman:

—Loj xtiidx Dios rëb: "Lidxan grii laj yu lod rbejdx rniab bejn Dios." Per lëjt nünndan zi'c lidx ree xin-gubaan.

¹⁸ Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguil ree-man mod xhienaag gugüjt reeman Jesús, guial rdxeb reeman laaman din gra bejn radxaloj ni rulüüman.

¹⁹ Chi ma caxhin, bazanë ree xbejn Jesús Jerusalén.

Tijb yag higo ni gubidx
(Mt. 21:20-22)

²⁰ Chi bareguiaa rsildoo, badëd reeman niz lod zojb yag higo guin, abi' baguiaa reeman ma gubidx diizd li-ujn. ²¹ Dxel basaaladx Bëd ni rëb Jesús, abi' rëbaman lojman:

—Mextr, ¡baguiaa yag higo ni bazaalil diidx guijc ma gubidxan!

²² Badxi' Jesúsán rëbaman:

—Gol bililadx Dios. ²³ Din diidxliczi ganin, bal chu guiëb loj guia' guin: "Bisüd guie bialb loj nijsdoo", bal id yu' nawëëg luxdooman, bal rililadxaman, gac ni guneeman. Zian gacan. ²⁴ Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'-dan. ²⁵ Guiáad chi ribejdx rniabidi Dios, bal yu' bën rdxe'chidi, gol beenman perdon din ziangajc xDadidi bën yu' xanyabaa güünman perdon xtolidi. ²⁶ Din bal id züjndi perdon, ziangajc xDadidi Bën yu' xanyabaa ad züjntaman perdon xtolidi.

Xguialrniabee Jesús
(Mt. 21:23-27; Lc. 20:1-8)

²⁷ Chi badxin reeman Jerusalén. Chi caza Jesús niz lën yadooro' Jerusalén guin, dxei gubig bixhioz rniabee ree bixhioz con ree mextr rajc ley con ree xguxtis ree bën Israel, ²⁸ gunabdiidx reeman loj Jesús, rëb reeman:

—¿Xhie guialrniabee rajpil zeel rüjnl ni guin ree?
¿Chu banee guialrniabee lojl güünl zian?

²⁹ Badxi' Jesúsán rëbaman:

—Ziangajc naj yu' ni ganabdiidxan lojdi, bal yadxi'-dan dxei ganin chu banee guialrniabee güünan ni guin ree. ³⁰ ¿Chu guxhaal Waj bidgaroobnijsaman bejn ree? ¿Dios ya o bénguidxliuj? Gol badxi'n.

³¹ Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: "¿Chexquiza zeel ad bililadxtidi laaman?" ³² Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman rililadx guial gojc Waj tijb bën badëë xti-idx Dios loj ree bejn, bën wali guneë xtiidx Dios. ³³ Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu banee guialrniabee güünan ni guin ree.

Xcwent ree mojs guijdx
(Mt. 21:33-46; Lc. 20:9-19)

12 Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxei beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

‘Zianz badëëman laan garol loj ree bën güün laan dxiin, briitaman zëman zijt. ² Chi bidxin dxei yala' ree-man uv guin, guxhaal tijb xmojsaman din chigxiiman ni rayalaman. ³ Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi. ⁴ Dxel guxhaal bën naj xguidxliuj laan zatijb xmojsaman, per ziangajc, ba-caaguiaj reeman laaman, gula' reeman guijcaman abi' guneeguijdx reeman laaman. ⁵ Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

⁶ ‘Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: "Zajp reeman da xi'nan respejt." ⁷ Per ree bën guin, rëb loj lasa' reeman: "Xin guin naj xin yaya'nnë guidxliuj guin, yagüjt reex din gacan du xieen ree." ⁸ Dxel gunaaz reeman laax, bagüjt reeman laax abi' babëë reeman laax loj guidxliuj guin.

⁹ Dxel gunabdiidx Jesús loj ree bën caneenëman, rëbaman:

—Yan, ¿xhie naladxidi güün bën naj xguidxliuj laan? Zi'taman din gugüjtaman bën guin ree, dxei gudëëman guidxliuj guin loj ree ben ren.

¹⁰ ‘¿Nid wayoolidi loj xtiidx Dios ya?, lod rëb:

Guiaj ni gulëëgo'n ree bën rüjn yu, laan goc ni mazri been sirv gojcnë yu guin.

¹¹ Zian been dux Dad ree Dios, zeel radxaduloj ree.

¹² Chi biguiejn ree bën rniabee guin ni guneë Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

Xcwent Impuest
(Mt. 22:15-22; Lc. 20:20-26)

¹³ Guxhaal reeman tio'p choon ree bénfarisew në tio'p choon ree xbejn Herodes lod za' Jesús, din yaguil reeman mod guinee Jesús diidx ni gudxiib reeman guiç din gac cwe'c reeman xguialquiaman. ¹⁴ Abi' rëb reeman:

—Mextr, dunujn rayagbee guial lüj rnnee diidxli ad ridxga' tētil chu naj bejn. Din par lüj tiblojzi naj bejn, abi' walil rulül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

¹⁵ Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

¹⁶ Dxel badëed reeman cintabl guin lojman, abi' rëbaman:

—¿Chu loj ca lojn, chu tēē laj ca lojn?

Badxi' reeman laan rëb reeman:

—Loj César ca lojn në lajman.

¹⁷ Dxel rëb Jesús loj reeman:

—Gol badëcliza loj César ni naj xieen César, guiáad loj Dios gol badëed ni naj xieen Dios.

Dád badxa loj reeman ni rëbaman.

Xcwent guial yaban ree bengüt
(Mt. 22:23-33; Lc. 20:27-40)

¹⁸ Tio'p choon ree bénsaducew bignaj Jesús, laa reeman ad riladxt guial yaban ree bengüt. Zeel gunabdiidx reeman loj Jesús rëb reeman:

¹⁹ —Mextr, loj xley Moisejs rëb guial bal guiët tijb xinguaaw abi' achut xi'n x guyu con lacheelix, bijch xin güt guin guxhliane bēngunaa bizējb guin din chu' xi'n reex zi'c gulüü xi'n xingüt guinan. ²⁰ Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. ²¹ Dxel bijch barojpix baxhliane bēngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, ²² abi' zianz baxhliane guigajdx reex, zianz bara reex güjt achut xi'n reex guyu con laaman. Ni bigra tēē në bēngunaa guin güjt. ²³ Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhliane laaman?

²⁴ Badxi' Jesús reeman:

—Ad laat naj xgab rüjndi guial ad nünbeetidi xtiidx Dios ad ragbee tēetidi xhienaag naj xguialrniabeeman.

²⁵ Din chi yaban ree bengüt, ad zuxhliatri reeman, ad zudë tēetri xi'n reeman guxhliaa, ma gac reeman zi'c ree anjl yu' xanyabaa. ²⁶ Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguiaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.” ²⁷ Din Dios ad najtaman xDios

ree bengüt, najman xDios ree bén naban. Zeel ad laat naj xgab rüjndi.

Mandamient mazri zojbloj
(Mt. 22:34-40)

²⁸ Chi biguiejn tijb mextr rajc ley badxi' Jesús xtiidx reeman zagdx guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zojbloj loj gra ree mandamient?

²⁹ Badxi'man laan rëbaman:

—Mandamient mazri zojbloj rëban: “Gol bacaagdiajg, bén Israel, dux Dad ree Dios, tijbzi laaman naj Dios.

³⁰ Guyën xDadil Dios guidiblagaa guidib guiç guidib ladxil.” Laan naj mandamient mazri zojbloj. ³¹ Mandamient rarojp, rëban: “Guyën ree ben ren zi'c rën lüj gajc.” Achet mandamient mazri zojbloj guial loj grop ree mandamient guie.

³² Dxel rëb mextr guin loj Jesús:

—Zagdxequi guneel, Mextr. Waliquil tijbzi Dios yu', achutri ben ren yu'. ³³ Abi' guidib guiç guidib ladx bejn guiënman laaman guidiblagaa, guiën tēēman ben ren ree zi'c rën laagajcaman. Laan naj ni mazri zojbloj guial loj gra gon ni rudëed bejn loj Dios.

³⁴ Chi biguien Jesús badxi' mextr guinan zagdx, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

Chu loj xdiaa za Cristo
(Mt. 22:41-46; Lc. 20:41-44)

³⁵ Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi? ³⁶ Awa Davi guin gajc guneel por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxë'ch ree lüj guia'.”

³⁷ Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bén riga' lën yadoo guin dád nix yu' lux-doo reeman rucaagdiajg reeman xtiidxaman.

Ni rüjn ree mextr rajc ley
(Mt. 23:1-36; Lc. 11:37-54; 20: 45-47)

³⁸ Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdx, ruladx tēē reeman gugajpdioz ree bejn laa reeman con respet nix lunejz. ³⁹ Abi' lën ree yadoo ruladx reeman cwe reeman lod rbej ree bén zojbloj, ziangajc rüjn reeman lod ritaw reeman. ⁴⁰ Raca' tēē reeman lidx ree bēngunaa bizējb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti naroob yayal reeman.

Gon badëed tijb béngunaa bizëjb

(Lc. 21:1-4)

⁴¹ Tijb dxej zojb Jesús lèn yadooro' Jerusalén niz lod za' alcancia ni ru gon, abi' ruguiaaman rgu' ree bejn milia lèn alcancia guin, në zien ree benrijcw rgu' zro' milia. ⁴² Dxel bidxin tijb béngunaa bizëjb prob, badxe'-man tio'p zintabldoo ni lasajc ta'nzi. ⁴³ Abi' gurejdx Jesús bèn naj ree xbejnman, rëbaman:

—Diidxli rnin lojdi guial bèn bizëjb prob guin mazri lasajc gon badxe'man guial loj gon badxe' gra ree bèn guin. ⁴⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

Rëb Jesús guial yaze'n yadooro' Jerusalén

(Mt. 24:1-2; Lc. 21:5-6)

13 Chi barii Jesús lèn yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tõe naj ree yu guin!

² Badxi' Jesús rëbaman:

—Zi'c ruguiaa yu naroob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mt. 24:3-28; Lc. 21:7-24; 17:22-24)

³ Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Bëd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

⁴ —Guna, ¿goc gac zian? ¿Xhie sen gac chi ma zidyob gac zian?

⁵ Badxi' Jesús laan rëbaman:

—Gol gojp cudad chitëe chu gusquiee lëjt. ⁶ Din zien ree bèn gui't guiëb reeman guial por naj zëed reeman, guiëb tõe reeman: “Naj naj Cristo”, abi' gusquiee reeman zien bejn.

⁷ Per lëjt chi guiguiejndi cayajc wadijl o zëeb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj. ⁸ Din til nacion con stijb nacion, til tõe bèn rajp guialrniabee con stijb bèn rajp guialrniabee, gui't tõe ree xudoxh në gubijn niz ni niz guie. Zian gac chi ma suloj ree guialzi ni naj gac.

⁹ Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lèn ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman. ¹⁰ Per yalojxgaj rüjn nagueijn guire'ch xtiidxa'c Dios loj gra ree nacion, dxelri nit guidxliuj. ¹¹ Chi chinë reeman lëjt loj ree guxtis, ad bal chu'di xgab, ad bal güün tõe di xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjtta guinee, xSprijt Diosan guinee. ¹² Abi' guidxin dxej yayü bejn laagajc bijchaman din guiëtix, ziangajc ree bèn naj dad yayü laagajc xi'n reeman, abi' ree bejn yayü xdad xniaa reeman par guiët reeman. ¹³ Gra bèn-

guidxliuj guidxe'ch lëjt guial najdi da bejnan, per bèn sudxi'ch loj ni rliladxaman naj xt dxej chigra guibanman, laaman yayal xanyabaa.

¹⁴ Chi guguaadi zojb tijb ni dxuudx lèn yadooro' Jerusalén, zi'c bacaa Daniel, bèn badëe xtiidx Dios loj ree bejn diidz gulal (bèn gool ree gui'ch guie, gol big-nia'n), guial bèn zojb ree niz Judea chigxüün reeman niz dajn. ¹⁵ Guiáad bèn yë'p guijc yu lidx dxejzii, ad yayu lëñü lidxaman tia' xhie xieenman. ¹⁶ Guiáad bèn za' dajn, ad yayejc lidxaman chigxii xabaman.

¹⁷ jProbza ree béngunaa nüü xi'n o bèn ca' ree xindobëz lèn ree dxej zii! ¹⁸ Gol gurejdx gunab Dios chitëe yayal gac zian tiamp nayaag, ¹⁹ din dád guialziro' chu' dxejzii ree, zi'c ad wayajctczi diidz chi beenchaaw Dios guidxliuj, ad yu' tõeetri dxej gac zian. ²⁰ Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bèn rënman, bèn gulejman par laaman.

²¹ Bal chu na lojdi: “Gol baguiaa, laa Cristo za' guie”, o “laaman za' ni”, ad bal chililadxidi. ²² Din gui't zien ree bejn, na reeman guial laa reeman naj Cristo o na reeman laa reeman naj bèn rudëe xtiidx Dios loj ree bejn, abi' güün reeman milagr ree në ree graloj ni yadxaloj ree bejn, din gusquiee reeman laa reeman, abi' bal zile'n xt zajc në ree bèn gulej Dios gusquiee reeman. ²³ Zeel gol gojp cudad, ma bagojnxgajn lëjt gra ni gac.

Gui't Bën guxhaal Dios zatijb

(Mt. 24:29-35, 42-44; Lc. 21:25-36)

²⁴ Per lèn ree dxej ni ma gudëd gra ree guialzi guin, zacajy loj gubijdx abi' ad zusnitri bëew, ²⁵ zayajb ree bajl yu' xanyabaa guiáad gra ree ni yu' xanyabaa guiniib reen. ²⁶ Dxel guguaa ree bejn Bën guxhaal Dios rdiinman bacha' zëedaman loj zaj con xguialrniabee naroobaman. ²⁷ Abi' guixhiaal ree xianjlaman guidiblagaa guidxliuj din guchajg reeman lasa' ree bèn ma naj par Dios.

²⁸ Gol badxe'guijc ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. ²⁹ Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin. ³⁰ Diidxli rnin lëjt guial gra ree ni guin gac chi gad ree bèn naban lèn ree dxej guie guiët.

³¹ Guidxliuj në xanyabaa zaniyt reen, per da diidxan ad zadëdt gacan cumplid.

³² Per achut ragbee xhie dxejn xhie tõe horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

³³ Zeel gol gojp cudad, gol guzujsin tõe, gol gurejdx gunab Dios din ad ragbeetidi goc gac zian. ³⁴ Ni guin ree naj zi'c chi ririi tijb bejn rejman zijt. Abi' chi gadaman grii rudëeman dxiin loj tijbgaj ree xmojsaman, rniabee tõeeman susin bèn rajp ro' port. ³⁵ Yan ziangajc lëjt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' guid, o rsildoo. ³⁶ Zeel gol guzusin din bal dxejczi guialan ad guidxaaglojn lëjt ad cayüjntidi

zi'c rayal. ³⁷ Abi' ni canin lojdi, loj gradi caninan: Gol guzujsin.

Baya'n reeman diidx xhienaag guiniaaz Jesús
(Mt. 26:1-5; Lc. 22:1-2; Jn. 11 :45-53)

14 Zatio'p dxej riaadx gal lanij pascw, lanij raw ree bejn guiadxtil ni ad yu't levadur. Abi' ree bixhioz rniabee ree bixhioz con ree mext rajc ley, raguil ree-man mod xhienaag gusquiee reeman Jesús, din guiniaaz reeman laaman gugüjt reeman laaman. ² Per rëb reeman:

—Ad zaguieent ree zian loj ree dxej lanij guin, chitëë gac naquie'.

Baroob tijb béngunaa perfum guiyc Jesús
(Mt. 26:6-13; Jn. 12 :1-8)

³ Dxel chi za' Jesús luguiedx Betania lidx Simón, bën gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojcchaawnën ganax nardo, zianz guxhalaman ro' lumejt guin persi baroobaman perfum guin guiyc Jesús. ⁴ Abi' yu' ree bën za' yagaj bidxe'ch, rëb loj lasa' reeman:

—¿Chexc zeel guxhie'man perfum guin? ⁵ Awa zajc nido'n choon gayuu denario din nünjan yudar bën-prob ree.

Abi' caneeguijdx reeman béngunaa guin.

⁶ Per rëb Jesús loj reeman:

—Gol basa'nman. ¿Chexc zeel ruslendi laaman? Zagdx náj ni beenman con naj. ⁷ Zianczi sunëdi bënprob ree, abi' zajc güündi laa reeman yudar chi guiëndi, sa'n naj ad ziantczi sunëdi naj. ⁸ Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. ⁹ Diidxliczi rnin lëjt, guial guidib loj guidxliuj bantëëz guin guiniee reeman xtiidzxa'c Dios, zü ree bejn diidx ni been béngunaa guin con naj din gusaaladx reeman laaman.

Baguüil Judas mod xhienaag yayüman Jesús
(Mt. 26:14-16; Lc. 22:3-6)

¹⁰ Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman. ¹¹ Chi biguiejn ree bixhioz guin zian, dád babaa reeman. Abi' rëb reeman gudëëd reeman milia lojman. Dxel guzuloj raguilaman mod xhienaag yayüman Jesús.

Gudawnë ree xbejn Jesús xche
(Mt. 26:17-29; Lc. 22:7-23; Jn. 13 :21-30; 1Co. 11 :23-26)

¹² Dxej ni guzuloj lanij raw ree bën Israel guiadxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

¹³ Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaw ca' re yu' nijs. Gol chinalix. ¹⁴ Abi' lod yayux, gol güjdx loj

bën naj lidxan: “Na mextr: ¿Ban lëñü gawnë ree xbejnman yan guxhin pascw?” ¹⁵ Dxel gulüüman lëjt tijb lëñü narooob ni rarojp cwaa, ma najcchaaw lëñü guin. Yagaj gol been ni yadaaw ree xche.

¹⁶ Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

¹⁷ Chi gure guiaal, bidxin Jesús con guidxiptio'p ree xbejnman. ¹⁸ Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bën cayawnë naj, laaman yayü naj.

¹⁹ Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

²⁰ Badxi'man laan rëbaman:

—Loj guidxiptio'pidi, tijb lëjt, bën cugajdx xguiadxtil loj gajc pliajt lod cugajdx da guiadxtilan, laaman.

²¹ Walican guial Bën guxhaal Dios naj sacaman zi'c ca loj xtiidx Dios. Per, i'prob bën yayü laaman! Zagdxeli naj par laaman ad niutaman loj guidxliuj

²² La'tgaj cayaw reeman, cwa' Jesús guiadxtil abi' badëëman quixtëë loj Dios, dxel gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

²³ Dxel cwa'man tijb cojp yu' vin, chi gulox badëëman quixtëë loj Dios, badëëman cojp guin loj reeman, abi' gra reeman gu' vin yu' lojn. ²⁴ Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree bejn perdon loj Dios. ²⁵ Naj rni lëjt, ad yu'tri dx-ej guië'n vin rajcchaawnë uv, xt dxej ni guië'n vin cüb lod rniabee Dios.

Rëb Jesús guial guiëb Bëd ad nünbeetaman laaman
(Mt. 26:30-35; Lc. 22:31-34; Jn. 13 :36-38)

²⁶ Chi gulox biil reeman tijb cant par Dios. Dxel zë reeman ruguia' Olivos. ²⁷ Dxel rëb Jesús loj reeman:

—Graczi tiolnadx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, abi' guire'ch reeb.” ²⁸ Per chi yabanan, yaloj naj ganeed lojdi gan Galilea.

²⁹ Dxel rëb Bëd lojman:

—Majsi gra reeman tiolnadx lüj, per naj ad zaro'n-ladxtan lüj.

³⁰ Badxi' Jesúsán rëbaman:

—Naj rni lüj Bëd, yan guxhin gajc chi gad güjd cwdxa' tio'p volt, choon volt mal rëbil guial ad nünbeetil naj.

³¹ Per naguiejn rüjn Bëd rëbaman:

—Majsi guiëtnë'n lüj, per ad zëtan guial ad nünbeetil lüj.

Abi' graczi reeman rëb zian.

Rbejdx rniab Jesús Dios lod la Getsemaní

(Mt. 26:36-46; Lc. 22:39-46)

³² Chi bidxin reeman tijb luar la Getsemaní, dxel rëb Jesús loj ree xbejnman:

—Gol gurejsii guie, la'tgaj gabedx ganaaban Dios.

³³ Abi' binëman Bëd, Jacob con Waj, dxel guzuloj guyunayaman abi' ad nixtri yu' luxdooan. ³⁴ Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

³⁵ Abi' guzaman zata'n, zianz gurerulojman, gunabaman loj Dios, bal zile' täd ni naj sagdiajman. ³⁶ Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rën.

³⁷ Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya? ³⁸ Gol gurenaa, gol gurejdx gunab Dios chitëë güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

³⁹ Dxel zëman zatijb persi gurejdx gunabaman Dios con diidx guin gajc ree. ⁴⁰ Chi badxinman lod riga' reeman, laagajc reeman naga'yëjs zatijb, guial yu' da't ba-caal loj reeman, abi' ni'quid radxejlt xhie guiëb reeman lojman. ⁴¹ Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbaaalidi din naj, najn Bén guxhaal Dios ma bidxin hor yayü reeman naj loj ree bëndol. ⁴² Gol bixche, yo' ree, laa Bén yayü naj ma zëëd gajxh.

Gunaaz reeman Jesús

(Mt. 26:47-56; Lc. 22:47-53; Jn.18 :2-11)

⁴³ Sta caneenë Jesús laa reeman chi bidxin Judas, Bén goc tijb ree xbejnman. Bidxinnëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. ⁴⁴ Abi' Judas Bén bayü laaman ma bagojnxgajman Bén guin ree rëbaman:

—Bén gawan xid, laaman naj Bén raguilidi, gol gu-naazaman gol chinëman, gol gojpaman ad guslaadi laaman.

⁴⁵ Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. ⁴⁶ Zianz gunaaz ree Bén guin laaman din chinë reeman laaman. ⁴⁷ Per tijb Bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz. ⁴⁸ Dxel rëb Jesús loj ree Bén guin:

—¿Chexc zeel zëëdidi con espad con yag din chinëdi naj zi'c tijb xingubaan? ⁴⁹ Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gu-naaztidi naj. Per gra ree ni guie cayajc din gac cumplid ni ca loj xtiidx Dios.

⁵⁰ Dxel graczi ree xbejn Jesús baxüün, guro'nladx reeman laaman.

Tijb xin binal Jesús

⁵¹ Per guyu tijb xinguiag binalix Jesús, nadüübix tijbzi lajd. Abi' chi gunaaz ree Bén guin laax, ⁵² baslaagajquix lajd guin, zigxüünt ziladix.

Za' Jesús loj ree guxtis

(Mt. 26:57-68; Lc. 22:54-55, 63-71; Jn.18 :12-14, 19-24)

⁵³ Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. ⁵⁴ Abi' zijt zijt binal Bëd Jesús xt rule' lidx bixhioz guin, dxel gurejman rudëj con ree Bén rajp rulidx bixhioz guin,

⁵⁵ Abi' ree bixhioz rniabee ree bixhioz con gra ree guxtis, baguüil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, ⁵⁶ majsi zien reeman rudxiib diidx rusquiee guijcaman, per garent garen rëb tijb gaj reeman. ⁵⁷ Dxel guzuli tio'p choon reeman gunee reeman diidx rusquiee ree contr laaman, rëb reeman:

⁵⁸ —Dunuñn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayü-nanan sin xyudar ree bejn.”

⁵⁹ Per ni'qui zian ad gunee reeman tibloj, garent garen gunee reeman.

⁶⁰ Dxel bixhioz rniabee gra ree bixhioz guzuliman galay ree Bén riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

⁶¹ Per achetdzi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

⁶² Badxi' Jesúsán rëbaman:

—Walican, najcan. Abi' lëjt zuguaadi naj najn Bén guxhaal Dios zooban xladbee Dios Bén ca' gra guialrniabee guguaa tëëdi naj guialan loj zaj xanyabaa.

⁶³ Chi biguiejn bixhioz guin zian, gudixya' xabaman, dxel rëbaman:

—Ad rüjntri naguiejn yadiil ree testiw. ⁶⁴ Lëjt ma biguiejn caneeguijdxix Dios. Yan, ¿xhie nadi?

Abi' graczi reeman rëb, guiëtaman.

⁶⁵ Yu' reeman rucojp xhiejn lojman, ruta'cw tëë reeman lojman, dxel riguin reeman laaman, rëb reeman:

—¿Guneeya' chu gudin lüj!

Guiáad ree Bén rajp yagaj wëëz reeman lojman.

Rëb Bëd ad nünbeetaman Jesús

(Mt. 26:69-75; Lc. 22:56-62; Jn.18 :15-18, 25-29)

⁶⁶ Chi za' Bëd rule' guin, dxel bidxin tijb béngunaa rüjn dxiin lidx bixhioz rniabee guin. ⁶⁷ Chi baguaaman zobj Bëd rudëj guin cucha'man, baguaaman lojman, dxel rëbaman:

—Në lüj za'në Jesús bën Nazaret.

⁶⁸ Per gurexuu Béd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' guïd. ⁶⁹ Dxel baguiaa béngunaa guin Béd zatijb, zianz guzuloj rëbaman loj ree bën riga' yagaj:

—Në bën guin naj xbejn Jesús.

⁷⁰ Per gurexuu Béd zatijb. Gojc xchejdoo rëb ree bën riga' yagaj loj Béd:

—Walican në lüj naj xbejnx din xin Galilea lüj, abi' zi'cgajc rniee reeman rnieel.

⁷¹ Per guzudxi'ch Béd con ni rëbaman, zianz rëbaman:

—Gudëed Dios naj casti bal rusquieen, ad nünbeetan bën nadi.

⁷² Loj hor zii gajc barojp volt guridxa' guïd. Dxel basaaladx Béd guial rëb Jesús lojman: "Chi gad guïd cwidxa' tio'p volt, mal gojc choon volt rëbil ad nünbeetil naj." Chi basaaladxaman zian, dxel guzuloj cayoonman.

Binë reeman Jesús loj Pilato

(Mt. 27:1-2, 11-14; Lc. 23:1-5; Jn. 18 :28-38)

15 Chi bareguiaa rsildoo, badxajg lasa' ree bixhioz rniabee ree bixhioz con ree guxtis Israel në ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato. ² Abi' gunabdiidx Pilato loj Jesús rëbaman:

—¿Lüjn naj xrey ree bën Israel ya?

Badxi' Jesús laan rëbaman:

—Najcan.

³ Abi' ree bixhioz rniabee ree bixhioz zien ni rudxiib reeman guijcaman, ⁴ zeel gunabdiidx Pilato lojman zatijb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

⁵ Per achetctzi badxi' Jesús, zeel dád badxa loj Pilato

Gunabee reeman guïët Jesús

(Mt. 27:15-31; Lc. 23:13-25; Jn. 18 :38-19:16)

⁶ Loj ree dxej lanij pascw, ruslaa Pilato tijb bën yu' ladxguïib, bën rëb ree bën guïedx guin guslaaman.

⁷ Lën ree dxej zii yu' bën la Barrabás ladxguïib con ree ben ren, bën bagüjt ree bejn loj tijb wadijl ni been reeman contr gobiarn. ⁸ Dxel chi bido'p ree bejn, rëb reeman loj Pilato din güünman zi'c naj costumbr, ⁹ Abi' rëb Pilato loj reeman:

—¿Rëndi ya guslaan xreydi?

¹⁰ Rëbaman zian guial ragbeeman bayü ree bixhioz guin laaman por guial rdëdlojzi reeman laaman. ¹¹ Per ree bixhioz rniabee guin badxe' reeman bejn ree diidx din guïëb reeman loj Pilato guslaaman Barrabás.

¹² Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

¹³ Dxel gurixdiaj reeman rëb reeman:

—¿Bacaax loj crüjz!

¹⁴ Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¿Bacaax loj crüjz!

¹⁵ Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

¹⁶ Abi' binë ree xin suldad guin Jesús xlule' palas, yagaj badxaag lasa' gra reex. ¹⁷ Abi' bascajcw reex laaman tijb lajd murad, dxel been reex tijb coron guïëjch badxe' reex guijcaman. ¹⁸ Dxel guzuloj rbixdiaj reex rëb reex:

—¿Guibanri xrey ree bën Israel!

¹⁹ Zianz rugaz reex var guijcaman, rulaa xhiejn reex lojman, abi' ruzuxib reex lojman. ²⁰ Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

Bacaa reeman Jesús loj crüjz

(Mt. 27:32-44; Lc. 23:26-43; Jn. 19 :17-27)

²¹ Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, zi-aadaman bazaman dajn. Abi' been ree suldad guin nagueijn biaaman xcrüjz Jesús.

²² Abi' binë reex Jesús luar la Gólgota, rën guïëban Calaver. ²³ Yagaj badëed reex vin no'ch ni la mirra lojman din guïë'man laan, per ad gu'taman laan. ²⁴ Chi ma bacaa reex laaman loj crüjz, dxel gudxiit reex suert guijc xabaman din guidoon xhie yayal tijbgaj reex

²⁵ Raca gaa rsil bacaa reex laaman loj crüjz. ²⁶ Guijc crüjz guin bacaa reex lejtr ni rëb chexc zeel bacaa reex laaman loj crüjz, rëban: "Xrey ree bën Israel." ²⁷ Chi bacaa reex laaman loj crüjz, në zatío'p ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman. ²⁸ Zian gojc cumplid ni ca loj xtiidx Dios, lod rëb: "Nayabaman loj ree benmal."

²⁹ Abi' ree bën ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, ³⁰ yan baslaa lüj gajc baguiajt tëë loj crüjz zii.

³¹ Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix. ³² Yaguiajtix loj crüjz guin, bal laax naj Cristo, xrey ree bën Israel, din yaguiaa ree, dxel yaliduladx ree.

Xt në ree xingubaan canëman loj crüjz guneequijdx laaman.

Güjt Jesús

(Mt. 27:45-56; Lc. 23:44-49; Jn. 19 :28-30)

³³ Chi gol garol dxej, bicajy guidib guidxliuj xt raca choon wadxe. ³⁴ Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj? ³⁵ Yu' ree bén za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bén badëë xtiidx Dios loj ree bejn.

³⁶ Dxel ruxüün tijbaman, bicajdxaman tijb xiil loj vina-gr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaiaa ree don zi't Elías yalet laax loj crüjz guin ya.

³⁷ Per Jesús dád rejs gurixdiajman, dxel güjtaman.

³⁸ Loj hor zii goxya' lajd nal lën yadooro' Jerusalén, goj-can tio'p lala', diizd guijc guin xt guia' guin goxya'.

³⁹ Dxel suldad rniabee ree suldad guial za'x niz loj Jesús. Chi baguiaax xhienaa güjtaman, rëbix:

—Walican, Xi'n Dios bén guin.

⁴⁰ Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bén naj ben-guiag loj Xiëb. ⁴¹ Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

Biguie'ch Jesús

(Mt. 27:57-61; Lc. 23:50-56; Jn. 19 :38-42)

⁴² Chi bidxin dxej rüjn ree bén Israel gra, chi guixiezi naj dxej raziiladx reeman, ma cabej guiaal, ⁴³ bidxin Xiëb bén za' guiedx Arimatea. Gojcaman tijb xguxtis ree bén Israel, abi' gojp ree bejn laaman respejt, në laaman rbëz xguialrniabee Dios, abi' guyuman valor wejman loj Pilato, persi banabaman xcuerp Jesús.

⁴⁴ Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. ⁴⁵ Abi' rëb suldad guin guial wali-can ma güjtaman, dxel cwëjb Pilato baca' Xiëb cuerp guin. ⁴⁶ Guzii Xiëb tijb lajd, abi' chi baletaman xcuerp Jesús loj crüjz guin dxel batüübaman laaman lajd guin, biquie'chaman laaman lën tijb baa ni bidëen lën tijb guiaj, dxel basiaawaman ro' baa guin con tijb guiajro'.

⁴⁷ María Magdalena con Li xniaa Xiëb, baguiaa reeman lod baquie'ch reeman Jesús.

Raban Jesús

(Mt. 28:1-10; Lc. 24:1-12; Jn. 20 :1-10)

16 Chi gudëd dxej raziiladx ree bejn, María Magdalena, në Salomé, në Li xniaa Jacob, bisii ree-man perfum din chitëëb reeman laan xcuerp Jesús.

² Bareguiaal chidumingw, rsildoo brii reeman wej ree-man ro' xbaa Jesús, naabzi rliejn gubijdx. ³ Chi zë ree-man lunejz, rëb loj lasa' reeman:

—¿Chuzá chisüd guiaj nayaaw ro' baa guin?

⁴ Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. ⁵ Chi guyu reeman lën baa guin, baguiaa reeman tijb xinguiag zo-

jibix ladbee, najcwix lajd naquich yool, abi' bidxeb ree-man. ⁶ Per rëbix loj reeman:

—Ad rdxebidi, raguillidi Jesús bén Nazaret bén cwa loj crüjz. Per ma babanman, achutri laaman guie, gol baguiaa lod gudixh reeman laaman. ⁷ Yan, gol chej gol chiguiex loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguaadi laaman zi'c ma naman lojdi.

⁸ Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

Balüüloj Jesús loj María Magdalena

(Jn. 20:11-18)

⁹ Chi ma baban Jesús, chidumingw rsildoo, yaloj loj María Magdalena balüülojman, bén babëëman gajdx xindxab luxdoo. ¹⁰ María Magdalena guin bicojn ree xbejn Jesús, bén yu'naya ree roon tëë reeman por laa-man. ¹¹ Chi biguiejn reeman guial naban Jesús baguiaa tëë María Magdalena laaman, ad bililadxt reeman.

Balüüloj Jesús loj tio'p ree xbejnman

(Lc. 24:13-35)

¹² Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. ¹³ Dxel bén guin ree bicojn lasa' reeman, per ni'qui laa ree-man ad bililadxt reeman.

Rucaabee Jesús bén naj ree apóstoles

(Mt. 28:16-20; Lc. 24:36-49; Jn. 20 :19-23)

¹⁴ Ni bigratë balüüloj Jesús loj za chiptib ree xbejnman, chi zojb reeman xan mex cayaw reeman, gudilë-man laa reeman guial nad reeman, ad rliladxt reeman bén baguiaa ree laaman guial ma babanman. ¹⁵ Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. ¹⁶ Bén chililadx tiobnijs tëë zajca-man perdon loj Dios. Per bén ad zaliladxt xtiidxza'c Dios, laaman yayal casti. ¹⁷ Sen guie ree gap ree bén chililadx naj: Por da guialrniabeen zabëë reeman xindxab luxdoo ree bejn, zanee tëë reeman diidx ren ree, ¹⁸ zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bénragxuu, zayajc reeman.

Bayë'p Jesús xanyabaa

(Lc. 24:50-53)

¹⁹ Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios.

²⁰ Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa ree-man, been reeman milagr ree, persi gogbee ree bejn guial xtiidxqui Dios naj ni rníee reeman. Amén.

San Lujc

Rxhiaal Lujc gui'ch loj Teófilo

¹ Zien ree b́en ma been nagueijn gucaa ni goc con dunuj ree, ² zi'cgajczi balüü ree bejn dunuj ree, b́en baguiaa ree diidz guia'xchej ni been Jesús nē ni guzacaman, gutie'ch tēē reeman xtiidxaman. ³ Naj baguixnejzchaaw diidz guia'xchejn, dad Teófilo, zeel naladxan zagdxen gucanan xnejz par lüj, ⁴ din chignia'l zagdxē diidxli balüü reeman lüj.

Rugojn tijb anjl gal Waj

⁵ Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón. ⁶ Grop reeman gubajn xnejz loj Dios bazoob tēē reeman diidz graczi ni rniabee Dios, abi' achut rile' guiēb guial rajp reeman dol. ⁷ Per achut xi'n reeman guyu guial ad gojct niu xi'n Elisabet, grop reeman ma naj bengol.

⁸ Tijb dxej ni bayal ree bixhioz no'ch Zacarías loj, been reeman sirv loj Dios, ⁹ zi'c naj xcostumbr ree bixhioz guin, gudxiyt reeman suert din guidoon chu yayal gudxe' goxyaal lēn yadooro' Jerusalén, abi' bayal Zacarías cu'man goxyaal guin. ¹⁰ La'tgaj cagu'man goxyaal guin, gra ree bejn riga' lule' cabejdx canab reeman Dios. ¹¹ Dxel balüüloj tijb xianjl Dios loj Zacarías, za'liman xladbee altar lod cayu goxyaal guin. ¹² Chi baguiaa Zacarías anjl guin, ad badxejlt xhie nūjnman, dád bidxebaman. ¹³ Per rēb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguaaw abi' yagu'l lajx Waj. ¹⁴ Yabaa da'til, nē zien ree bejn yabaa chi galix, ¹⁵ guial gaquix xin lasajc loj Dios. Ad zē'tix vin ni'qui ni gusüdx laax. Abi' diidz chi gadix gal mal za'nē xSprijt Dios laax. ¹⁶ Por laax zien ree b́en Israel yayejc loj xDad reeman Dios. ¹⁷ Laax ned lojman, chu' xSprijt Dios luxdoox gap tēēx guialrniabee zi'c Elías, b́en badēē xtiidx Dios loj ree bejn, yabe'cdxex b́en naj ree dad con xi'n reeman, gulüü tēēx b́en ad ruzoobt ree diidz din guzuxnejzix bejn ree guidxga' reeman laaman chi gui'taman.

¹⁸ Dxel rēb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

¹⁹ Badxi' anjl guinan rēbaman:

—Naj naj Gabriel, rünan sirv loj Dios, laaman guxhaal naj zidnē'n diidxza'c guie lojl. ²⁰ Per yan guial ad

bililadxtil da diidxan, yaya'n! gop ad zajct guinieel xt guidxin dxej gal xindo guin.

²¹ Guiáad ree ben riga' lule' guin cabēz reeman Zacarías yu' nawēēg reeman guial cayaglaaman lēn yadoo guin. ²² Chi bariiman ad rajctri rnieeman, gaz sen rüjnman guial ma baya'nman gop. Dxel gogbee reeman guial yu' xhie baguiaaman lēn yadoo guin.

²³ Zianz baza' ree dxej ni been Zacarías sirv lēn yadoo guin, dxel zia lidxaman. ²⁴ Chi gudēd ree dxej guin, guyu xi'n xbéngunaa Elisabet. Gaay bēēw tib guyuzaman lēnū, rēbaman: ²⁵ “Ze naj ni beennē Dios naj lēn ree dxej guie chitēē guze'ri ree bejn naj.”

Rugojn tijb anjl Li gal Jesús

²⁶ Ni goc xho'p bēēw, guxhaal Dios anjl la Gabriel luguiedx Nazaret ni riga' niz Galilea, ²⁷ din chignajman tijb biinxdüb lam Li. Ma naj tia' tijb xin la Xiēb laam, xin zēēd loj xdiaa rey Davi.

²⁸ Guyu anjl guin lod yu' Li abi' rēbaman:

—¿Xchan Li, Dios ma gulej lüj! Dios za'nē lüj, ma beenle' tēēman lüj loj gra ree béngunaa.

²⁹ Chi baguiaa Li anjl guin dád badxa lojm guial rēbaman zian, abi' gunabdiidxim xhie rēn guiēb ree diidz guin. ³⁰ Dxel rēb anjl guin:

—Li, ad rdxebil din lüj gule Dios beenle' tēēman lüj.

³¹ Chu' xi'n! abi' chi galaman yagu'l lajman JESÚS.

³² Laaman gac b́en zojbloj, guiniee ree bejn laaman Xi'n Dios b́en yu' xanyabaa. Güün dux Dad ree Dios laaman rey zi'c goc xdiaagulalaman Davi, ³³ din nabee-man b́en Israel ree xt goctēēz, abi' xguialrniabeeman ad yu't dxej loxan.

³⁴ Dxel rēb Li loj anjl guin:

—¿Xhienaag chu' da xi'nan awa achut bénguaaw nabannē'n?

³⁵ Badxi' anjl guinan rēbaman:

—Por xSprijt Dios chu' xi'n! abi' xguialrniabee Dios b́en yu' xanyabaa gusiaawan guijquil con xbalan. Zeel xi'n! b́en gal, gacaman naya nali abi' guiniee ree bejn laaman Xi'n Dios. ³⁶ Ziangajc lasa'l Elisabet ma yu' xi'nman, majsi ma najman bengol, b́en rēb ree bejn ad zajct chu' xi'n, per yan ma gojc xho'p bēēw yu' xi'nman.

³⁷ Din Dios graczi zajc güünman.

³⁸ Dxel rēb Li loj anjl guin:

—Dios naj b́en rniabee naj, gacza zi'c rēnman.

Ziat anjl guin.

Rignaj Li Elisabet

³⁹ Lën ree dxej guin wej Li cari da't tijb guiedx ni riga' lad ree guia' niz Judea, ⁴⁰ dxel guyum lënü lidx Zacarías, bagajpdiozim Elisabet. ⁴¹ Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidi-blagaa. ⁴² Abi' gunee Elisabet rejs, rëbaman:

—iDios ma beenle' lüj loj gra ree béngunaa, beenle' tēëman bejndobëz yu' lën! ⁴³ ¿Chuza najn zeel zidganaj xníaa da Diosan naj, bën rniabee? ⁴⁴ Din biguiejnzan cha'l bagajpdiozil naj, laa baniib gajc da bindoon lënan guial babaam. ⁴⁵ Xiquilbaal guial bililadxil, din gac zi'c bagojn Dios lüj.

⁴⁶ Dxel rëb Li:

Ruzatan Dios zagdx,

⁴⁷ rabaanë' tēën laaman, guial ragnëman naj.

⁴⁸ Guial baguiaaman naj, majsi biin rüjnzi sirv lojman naj.

Abi' diizd yan xt goctëëz guza't ree bejn naj, guiëb reeman xiquilbaam.

⁴⁹ Din Dios, bën rniabee, dád zro' naj ni ma beennëman naj.

Naya naliman.

⁵⁰ Ad rbëzt rayaman graczi ree bën ruzoob xtiidxaman.

⁵¹ Zro' naj ni ma beenman con xguialrniabeeman.

Base'nman xixgab ree bën rüjn benro',

⁵² biquiedaman guialrniabee loj ree bën rniabee, guiáad loj ree bën ad zoblojt badëëman guialrniabee loj reeman.

⁵³ Badëëman guialnaza'c loj ree bën biaadx guialraw, guiáad ree benrijcw basa'nman laa reeman zezi.

⁵⁴ Gognëman bën Israel ree, xbejnman,

abi' ad bayanladxtaman nayaman laa reeman,

⁵⁵ zi'c rëbaman loj dux béngulal ree,

Abraham në loj ree xdiaaman.

⁵⁶ Abi' baya'nnë Li Elisabet cost choon bëëw, dxel baguiaj lidxim.

Rajl Waj

⁵⁷ Chi bidxin dxej gojl xi'n Elisabet najx xinguaaw.

⁵⁸ Abi' gogbee ree lasa'man në ree bën zobj gajxh guial baya Dios laaman, dád babaa reeman bignaj reeman laaman. ⁵⁹ Chi ma gojc xindobëz guin toxman, dxel binë reeman laax guyux sen ni ru ree bën Israel.

Abi' guyën reeman nagu' reeman lajdoox Zacarías zi'c la xdadix, ⁶⁰ per gunee xníaa, rëbaman:

—Ad zayutan zian. Rayal gaquim Waj.

⁶¹ Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

⁶² Abi' con sen gunabdiidx reeman loj xdad xindobëz guin chu rënman grii lajx. ⁶³ Zianz gunabaman tiblia' tabl abi' bacaaman lojn: “Waj grii lajx.” Dád badxaloj gra ree bën guin. ⁶⁴ Loj hor ziigajc gojc banee Zacarías, abi' guzuloj cuza'taman Dios zagdx. ⁶⁵ Gra ree bën zo-

jbnëman gajxh dád badxa loj reeman, xt gra ree guiedx riga' lad ree guia' niz Judea gogbee reeman graczi ni goc. ⁶⁶ Guiáad graczi ree bën gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

Ni gunee Zacarías

⁶⁷ Zacarías, bën naj xdad xindo guin guyu xSprijt Dios luxdooman guidiblagaa, zianz guzuloj caneeman, rëbaman:

⁶⁸ Benza'c bendxoon naj Dios, dux Dad ree nayajc ree bën Israel,

guial bi'taman bidganajman dunuj ree nayajc ree xbejnman, bidgalëë tēëman dunuj ree loj ni cayza'c ree.

⁶⁹ Guxhaalaman tijb bën rajp guialrniabee din yabëëman dunuj ree loj ni cayza'c ree,

zëëdaman loj xdiaa rey Davi, bën naj xbejn Dios.

⁷⁰ Zi'c been Dios promejs diizd gocli, zian gunee ree bën badëë xtiidxaman loj ree bejn, bën guban ree zi'c rënman:

⁷¹ guial yabëëman dunuj ree loj ree bën ralen dunuj ree, në loj gra ree bën yu'xyajn dunuj ree,

⁷² yaya tēëman dux béngulal ree,

abi' ad zayanladxtaman promejs ni beenman.

⁷³ Ni ne naj promejs ni beenman loj dux béngulal ree Abraham:

⁷⁴ guial yabëëman dunuj ree loj ree bën ralen dunuj ree,

din chile' yaguieen ree sirv lojman sin guialrdxeb,

⁷⁵ yabajn ree yaguieen tēë ree zi'c rënman, guidib tiamp ni yabajn ree.

⁷⁶ Guiáad lüj xi'n, guinee ree bejn lüj bën rudëë xtiidx Dios loj ree bejn, Dios yu' xanyabaa.

Din nedil chiguieenchaawil xnejz bën naj Dad,

⁷⁷ gulüü tēël xbejnman din gagbee reeman xhienaag gac xtol reeman perdon, laa tēë reeman loj casti.

⁷⁸ Guial raya da't dux Dad ree dunuj ree, zeel guxhaal xi'nman, bën naj zi'c xbacha' gubijdx din gusniman du loj ree,

⁷⁹ guixhial tēëman xquiarguiejn ree bën zë loj nejz-mal, bën ad nabant ree xnejz zi'c rën Dios, gulüü tēëman dunuj ree yadxoo ree loj xnejzaman din yabajn ree zagdx sin wadijl.

⁸⁰ Guiáad xindo guin guni'six guyu tēë xquiarguiejnx mazri por Dios. Guzujx loj yujbidx, xt bidxin dxej gunex xtiidx Dios loj ree bën Israel.

Rajl Jesús

(Mt. 1:18-25)

2 Lën ree dxejzii gunabee rey César Augusto guiyab gra ree bejn guidib lod rniabeeman. ² Laan naj ni yaloj biyab ree bejn chi goc Cirenio gobernador Siria. ³ Graczi ree bejn naj yaguiaj ladx ladx din guiyab reeman. ⁴ Zianan zeel brii Xiëb luguiedx Nazaret ni

riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zëed Xiëb. ⁵ Wejman binëman Li, lacheelaman din guiyab reeman. Ma yu' xi'n Li. ⁶ Abi' la'tgaj za' reeman Belén, bidxin dxej gojl bejndobëz guin. ⁷ Yagaj gol xi'n yaloj Li, dxei batüüba-man bejndobëz guin lajd, gudijxhaman laaman lod ru ni raw ree be, guial ad bidxejlt lënü naya'n reeman.

Bidxin ree xianjl Dios lod za' ree bën rajp xiil

⁸ Gajxh Belén guin za' ree bën rajp xiil, abi' dajn guin gajc rdëd reeman guiaal rajp reeman laa reeb. ⁹ Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman.

¹⁰ Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn. ¹¹ Yan, ladx rey Davi ma gojl bën yabëë lëjt loj ni cazajquidi, laaman naj Cristo, laaman naj Dad. ¹² Abi' din yayünbeedi laaman; nadüübaman lajd, naga'man lod ru ni raw ree be.

¹³ Dxejczy balüüloj zien da't ree anjl cwë' anjl yaloj guin, ruza't reeman Dios zagdxë, rëb reeman:

¹⁴ iBenza'c bendxoon naj Dios bën yu' xanyabaa, abi' loj guidxliuj yabe'cdxëman luxdoo bën rünj ree zi'c rënman!

¹⁵ Chi ma zia ree anjl guin xanyabaa, dxei rëb loj lasa' ree bën rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

¹⁶ Dxei cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be. ¹⁷ Chi baguiaa reeman laaman, be reeman diidxi ni rëb anjl guin loj reeman xcwent bejndobëz guin, ¹⁸ abi' graczi ree bën bigueijn dád badxa loj reeman ni rëb ree bën rajp ree xiil guin. ¹⁹ Per Li, rgu'chaaw luxdoo-man gra ni rucaagdiajgaman, rünj tēëman laan xgab. ²⁰ Dxei zia ree bën rajp ree xiil guin, rabaa reeman rudëë tēë reeman quixtëë loj Dios por gra ni baguiaa reeman bigueijn tēë reeman, guial gojc zi'c rëb anjl guin loj reeman.

Binë reeman Jesús lën yadooro' Jerusalén

²¹ Chi ma gojc toxman gojl bejndobëz guin, badxe' reeman laaman sen ni ru ree bën Israel, bagu' tēë reeman lajman Jesús zi'c rëb anjl guin loj Li chi gad Jesús gacxhie j lënman.

²² Chi bayaaloj ree dxei ni been Li zi'c rünj ree béngunaa rajl xi'n, dxei binë reeman bejndobëz guin loj Dios lën yadooro' Jerusalén. ²³ Been reeman zian din loj ley guin ca: "Gra ree xindoniguiaaw rajl yaloj ma naj reex par Dios." ²⁴ Abi' binë reeman gon par Dios zi'c rniabee ley: rayal chinë reeman tio'p gugdoo o tio'p palomdoo.

²⁵ Tiamp zii zojb bën la Simeón Jerusalén. Najman benza'c rën tēëman Dios, rbëzaman bën gagnë bën Israel ree za'në tēë xSprijt Dios laaman. ²⁶ Abi' por Sprijt guin gogbeeman guial ad zëjttaman xt guguaaman Cristo, bën guixhiaalaman. ²⁷ Dxei por xSprijt Dios wejman lën yadooro' Jerusalén. La'tgaj yu'man lën yadoo

guin, Xiëb con Li bidxinnë reeman Jesús din güün reeman zi'c rniabee ley, ²⁸ zianz gudiidxi Simeón bejndobëz guin baza'taman Dios zagdxë, rëbaman:

²⁹ Dad, yanri ma babedxe luxdon.

Ma zajc guslaal naj guiëtan najn xmojsil, ma gojc zi'c nal.

³⁰ Din con quijb guiaal on ma baguian bën gagnë dunujn.

³¹ Guial ma bazujl laaman loj gra ree bénguidxliuj.

³² Laaman naj biani par ree bën ad najt bën Israel, naj tēëman bacha' par ree xbën Israelil.

³³ Guiaad Xiëb con xniaa Jesús dád badxa loj reeman ni bigueijn reeman rëb Simeón xcwent bejndobëz guin. ³⁴ Dxei beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ru-ladx Dios, per zien reeman ad zënt laaman. ³⁵ Abi' zian gagbeeman xhienaag naj xixgab tijbgaj bejn, guiaad lüj zi'c tijb espad chëëz luxdool chi gac ree ni guin.

³⁶ Yagaj gajc za' tijb béngunaa yo'xh laman Ana, rudëëman xtiidxi Dios loj ree bejn, xdadaman brii laj Fanuel, xdiaagualaman gojc Aser. Benguiagan chi cwa' xinguaaw laaman, abi' gajdx ijsi gubajnnë lacheelaman. ³⁷ Ma gojc tajpgajlbitap ijsi baya'nman bizëjb. Zianczi yu'man lën yadooro', rba'nman rbejdx rniab tēëman Dios. ³⁸ Loj hor ziigajc bibigaman lod za'në Xiëb Li con Jesús, guzuloj cudëëdaman quixtëë loj Dios cuza't tēëman bejndobëz guin loj gra ree bën cabëz guixhiaal Dios bën gagnë bën Jerusalén ree.

Zia reeman Nazaret

³⁹ Chi ma been reeman graczi ni rniabee xley Dios, dxei zia ladx reeman Nazaret ni riga' niz Galilea.

⁴⁰ Cani's bejndobëz guin, cayuman gojl, cayajcaman nasin, cayünle' tēë Dios laaman.

Yu' Jesús lën yadooro' Jerusalén

⁴¹ Gazob ijsi ree xdad Jesús Jerusalén lanij pascw.

⁴² Chi baza' Jesús chiptio'p ijsi, binë ree xdadaman laaman lanij zii zi'c naj xcostumbr reeman. ⁴³ Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén.

⁴⁴ Gunaladx reeman ma no'chaman loj ree bën zia. Zian guza reeman tibdxëj. Per chi baguiil reeman laaman loj lasa' reeman në loj ree bën nünbee reeman, ⁴⁵ achut laaman naguiee. Dxei bayejc reeman zia reeman Jerusalén zatijb zigdiil reeman laaman.

⁴⁶ Xt ni gocri choon dxei badxejl reeman laaman lën yadooro' Jerusalén, zojbaman galay ree mextr rajc ley, cucaagdiajgaman canabdiidxi tēëman laa reeman.

⁴⁷ Gra ree bën cagueijn ni rnieeman caydxaloj reeman guial rajcaman në ree diidxi radxi'man. ⁴⁸ Chi baguiaa ree xdadaman laaman, dád badxaloj reeman, dxei rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lüj.

⁴⁹ Badxi' Jesús laan rëbaman:

—¿Chexc zeel raguillidi naj? ¿Nid ragbeedi ya rayal gūnan xchiin da Dadan?

⁵⁰ Per ad bignia't reeman xhie rën guiëb ni rëbaman.

⁵¹ Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xni-aaman graczan rgu'chaaw luxdooman. ⁵² Zi'cri cani's Jesús cayu tëë mazri xquiarguejnman. Rabaanë Dios laaman rabaanë tëë ree bejn laaman.

Rzuloj Waj rulüüman xtiidx Dios

(Mt. 3:1-12; Mr. 1:1-8; Jn. 1:19-28)

3 Chi goc chiin ijz rniabee rey Tiberio, abi' Poncio Pilato najman gobernador Judea, Herodes najman gobernador Galilea, bijchaman Felip najman gobernador Iturea në Traconite, guiáad Lisanias najman gobernador Abilinia. ² Anás në Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx. ³ Dxel gudëd Waj graczi ree guiedx riga' ro' guiiw Jordán, rëbaman loj ree bejn din yayüjn reeman xgab por xtol reeman tiobnijs tëë reeman, din gūn Dios xtol reeman perdon. ⁴ Zian gojc cumplid ni bacaa Isaías bën badëë xtiidx Dios loj ree bejn, lod rëbaman:

Rguien cha' tijb bën rbidxa' loj yujbidx, rëbaman: “Gol beenchaaw xnejz dux Dad ree Dios, gol guxhal tijb nejz nali.

⁵ Gra ree la'ch yadxa reen guiáad ree guia' con ree lom yayajc reen tibloj, në ree nejz volt yayaali

yadxa tëë ree lunejz ni ad najt tibloj.

⁶ Gra ree bénguidxliuj guguiáa bën guixhiaal Dios gagnë dunuj ree.”

⁷ Chi brii zien ree bejn din guroobnijs Waj laa reeman, rëbaman loj reeman:

—¿Xi'n xindxab lëjt! ¿Chu bagojn lëjt guial laadi loj castiro' ni zëëd? ⁸ Gol gubajn zagdxë din guiguien guial waliqui ma bayüjndi xgab por xtolidi, ad guiëb tëë loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham. ⁹ Abi' ree bën ad zinalt xnejz Dios zi'c rayal, ma zidyob dxej ni gūnnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

¹⁰ Dxel gunabdiidx reeman, rëb reeman:

—¿Xhie rayal yaguieenan?

¹¹ Badxi' Wajn rëbaman:

—Bën yu' tio'p xab, rayal gudëëman tijban loj bën achet rajp. Guiáad bën yu' ni raw, rayal gudëëman ta'-nan loj bën ryaadxan.

¹² Në tio'p choon ree bën ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ¿xhie rayal yaguieenan?

¹³ Badxi' Wajn, rëbaman:

—Ad guquijxidi mazri guial loj ni rayal guquijxidi.

¹⁴ Yu' tëë ree suldad gunabdiidx lojman rëb reex:

—Laadxza dunujn, ¿xhie rayal yaguieenan?

Badxi'man laan rëbaman:

—Ad cwëëxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziibnejz tëë ni rajxidi.

¹⁵ Guiáad ree bejn gagbeenezdoo reeman bal Wajn naj Cristo, ¹⁶ per rëbaman loj gra reeman:

—Naj curoobnijs lëjt con nijs. Per zëëd tijb bën guroobnijs lëjt con xSprijt Dios në bajl. Laaman rajp mazri guialrniabee guial lon, ni'qui xgurëchaman ad zajct gaxhiecan. ¹⁷ Abi' zi'c raya trigo zian gūnnëman bejn. Din bën zinal ree xnejz Dios yayal reeman lod rni-abeeman, guiáad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'. ¹⁸ Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxza'c Dios. ¹⁹ Gudilë tëëman rey Herodes guial cwa'-man Herodías xbéngunaa bijchaman Felip, në por graczi ni mal ni ma beenman. ²⁰ Per luar nidxga' Herodes xtiidx Waj aal beenman zatijb ni mal: badxe'-man Waj ladxguuib.

Riobnijs Jesús

(Mt. 3:13-17; Mr. 1:9-11)

²¹ Chi curoobnijs Waj bejn ree nëgajc Jesús guroobnijs. Abi' la'tgaj cabejdx canabaman Dios, bixal xanyabaa

²² zianz biguiajt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'nan, rënan lüj rabaanë tëën lüj.

Bén goc ree xdiaagual Jesús

(Mt. 1:1-17)

²³ Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Elí. ²⁴ Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb, ²⁵ Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai, ²⁶ Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá, ²⁷ Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri, ²⁸ Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, ²⁹ Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat, ³⁰ Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim, ³¹ Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán, ³² Natán gojc xi'n Davi, Davi gojc xi'n Isaí, Isaí gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón, ³³ Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, ³⁴ Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor,

³⁵ Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, ³⁶ Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec, ³⁷ Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán, ³⁸ Cainán gojc xi'n Enós, Enós gojc xi'n Set, Set gojc xi'n Adán, guíaad Adán gojc xi'n Dios.

Been xindxab Jesús prueb

(Mt. 4:1-11; Mr. 1:12-13)

4 Yu' xSprijt Dios luxdoo Jesús guidiblagaa. Chi bazaman guiwro' Jordán dxe biné xSprijt Dios laaman lod naj yujbidx. ² Ni guzuman tiuu dxe tiuu guíaal, abi' been xindxab laaman prueb. Achetdzi gudawaman dxej zii ree, zianz gulaanman. ³ Dxel rëb xindxab guin lojman:

—Bal wali najl Xi'n Dios, gunabee yayajc guíajc guie guiadxtil.

⁴ Badxi' Jesús laan rëbaman:

—Loj xtiidx Dios rëb: “Ad ganaxtizi guiadxtil guiban bejn, nêgajc gra diidx rniee Dios.”

⁵ Dxel biné xindxab guin laaman tijb guíajc guíajc ya da't, lod balüux laaman gra ree nacion riga' loj guidxli-uj. ⁶ Abi' rëb xindxab guin lojman:

—Gunen graczi guialrniabee nê guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan. ⁷ Bal guzuxibil lon abi' guien da'til naj, graczan gac xieenl.

⁸ Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guien tëel laaman, abi' tijbzi laaman been sirv.”

⁹ Dxel biné xindxab guin laaman Jerusalén, abi' gulë'pix laaman guíajc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diizd guie xt luyuj, ¹⁰ din loj xtiidx Dios rëb:

Dios guixhiaal ree xianjlaman din guinia reeman lüj.

¹¹ Yales reeman lüj con yaa reeman, chitëe quíilguíjdx guíajc guíajc.

¹² Badxi' Jesús laan rëbaman:

—Rëb tëe loj xtiidx Dios: “Ad güünl prueb xDadil Dios.”

¹³ Chi ad badxejltri xhienaag güün xindxab guin Jesús prueb, dxe biquiedix tiblädëd.

Rzuloj Jesús rulüüman bejn ree niz Galilea

(Mt. 4:12-17; Mr. 1:14-15)

¹⁴ Badxin Jesús niz Galilea, yu' xSprijt Dios luxdoo guidiblagaa, abi' guidibczi niz yagaj bire'ch xtiidxaman. ¹⁵ Rulüüman bejn ree lën ree yadoo guidib niz yagaj, abi' graczi reeman ruza't laaman zagdx.

Radxin Jesús Nazaret

(Mt. 13:53-58; Mr. 6:1-6)

¹⁶ Badxin Jesús Nazaret luguiedx lod guni'saman. Abi' dxej raziiladx ree bejn guyuman lën yadoo zi'c naj

xcostumbraman. Dxel guzuliman persi biilaman xtiidx Dios. ¹⁷ Badëëd reeman guí'ch ni bacaa Isaías bën badëë xtiidx Dios loj ree bejn. Chi bachijlaman loj guí'ch guin, badxejlaman lod rëb:

¹⁸ XSprijt dux Dad ree Dios za'në naj, din laaman ma beenle' naj din ganen xtiidxza'caman loj ree bënprob.

Guxhaalaman naj din gugojnan bejn ree xhienaag laa reeman loj ni rzajc reeman, yaxhal tëen loj ree bën lutia'p.

Gün tëen yudar bën rusagzi reeman,

¹⁹ din gugojnan guial ma bidxin dxej za'cdxoon ni güünle' Dios bejn ree.

²⁰ Dxel batüüb Jesús guí'ch guin bayüman laan loj bën rüjn yudar lën yadoo guin, zianz gurejman. Graczi ree bën riga' yagaj rugiaadxi'ch laaman. ²¹ Dxel guzu- loj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguejndi.

²² Graczi reeman cuza't laaman zagdx caydxa tëe loj reeman diidxza'cdxoon ni caneeman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

²³ Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na tëedi: “Ni ma baguejnan beenl Capernaum nêgajc guie beenan najn ladxil.”

²⁴ Rëb tëe Jesús:

—Diidxliczi rnin, ni'czi tijb bën rudëë xtiidx Dios loj ree bejn, ad rënt reeman laaman ladx gajcaman. ²⁵ Gol basaaladx dád zien ree búngunaa bizëjb zojb Israel lën ree dxej guban Elías bën badëë xtiidx Dios loj ree bejn, chi ad golt guia choon iz garol, abi' guyu gubijn guidibczi. ²⁶ Per ad guxhaalt Dios Elías guin loj tijb ree bën bizëjb zojb Israel, guxhaalaman laaman loj tijb bën bizëjb zojb guiedx la Sarepta, gajxh Sidón. ²⁷ Nê lën ree dxej guban Eliseo bën badëë xtiidx Dios loj ree bejn, dád zien ree bejn rajc guialguíjdx la lepra, per ni'czi tijb reeman ad bayüjntaman, tijbzi bën Siria bayüjnman laman Naamán.

²⁸ Chi biguejcn gra ree bën yu' lën yadoo guin ni rëb Jesús, dád balen reeman. ²⁹ Bisu reeman babëë reeman Jesús luguiedx guin, dxe biné reeman laaman ro' tijb bala' ya guial naj guiedx guin guíajc tijb guíajc, din gutedia' reeman laaman. ³⁰ Per gudëd Jesús galay reeman, ziataman.

Rabëë Jesús xindxab luxdoo tijb bejn

(Mr. 1:21-28)

³¹ Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman.

³² Abi' dád badxaloj reeman ni rulüüman guial rnieenëman laa reeman con guialrniabee.

³³ Lën yadoo guin yu' tijb xin yu' xindxab luxdoo, abi' guridxa' xindxab guin rëbix:

³⁴ —Basa'n dunujn, ¿xhie rënl con dunujn, Jesús bën Nazaret? ¿Zëëdil ya zidgani'jtil dunujn? Nünbeen lüj, naya nalil najl xi'n Dios.

³⁵ Dxel gudilë Jesús xindxab guin, rëbaman lojx:
—¡Bacwëëz ro'l, barii luxdoo xin guin!
Zianz badxe'bi xindxab guin xin guin luyuj guidib niz
loj reeman, bariitix luxdoox achetci goquix. ³⁶ Graczi
reeman badxaloj, rëb loj lasa' reeman:
—¿Xhie ree diidx guin rnieeman? ¡Con guialrniabee
ni rajpaman, rniabeeman rarii ree xindxab luxdoo ree
bejn!
³⁷ Abi' guidibczi niz yagaj bire'ch xtiidxaman.

Rayün Jesús xnasuegr Bëd
(Mt. 8:14-15; Mr. 1:29-31)

³⁸ Dxel barii Jesús lën yadoo guin, abi' wejman lidx
Simón. Ragxuu xnasuegr Simón guin yu'man xliaa-
doxh zeel guzajc reeman Jesús liaadx din yayünman
laaman. ³⁹ Zianz basajb loj Jesús lod naga'man gun-
abeeman yarii xliaa guin, abi' bariin. Loj hor ziigajc bix-
cheman guzuloj cudëëman ni gaw reeman.

Rayün Jesús zien ree bënragxuu
(Mt. 8:16-17; Mr. 1:32-34)

⁴⁰ Chi ma wëëz gubijdx, graczi ree bën rajp bënragx-
uu bën rajc ree gadxagayaa guialguijdx binë reeman
laa reeman loj Jesús, persi badxiib yaaman guijc tijb
gaj reeman, bayünman laa reeman. ⁴¹ Në zien ree
bënragxuu guin rarii xindxab luxdoo, rbidxa' reex rëb
reex:

—¡Lüj naj Xi'n Dios!
Per gudilëman xindxab guin ree, ad cwëjbtaman
niniee reex, guial ragbee reex laaman naj Cristo.

Rulüü Jesús xtiidx Dios niz Galilea
(Mr. 1:35-39)

⁴² Chi bareguiaa, barii Jesús luguiedx guin zëman lod
achut bejn zojb. Per raguiil ree bënguiedx guin laa-
man, bidxin reeman lod za'man abi' rëb reeman loj-
man din yaya'nnëman laa reeman. ⁴³ Per rëbaman loj
reeman:

—Në ree luguiedx ren rayal chinë'n xtiidxza'c Dios
guial xhienaag naj xguialrniabeeman, din par zian
guxhaalaman naj.

⁴⁴ Zian basnuu guneeman xtiidx Dios lën ree yadoo
niz Galilea.

Rniaaz reeman zien bëjl
(Mt. 4:18-22; Mr. 1:16-20)

5 Tijb dxej chi za' Jesús ro' nijs Genesaret, bidxin
ree benzien. Xt rxa't reeman laaman guial rën ree-
man gucaagdiajg reeman xtiidx Dios. ² Dxel baguiaa
Jesús tio'p barcw ro' nijs guin; ni basa'n ree bën rniaaz
bëjl la'tgaj caguiib xguijxh reeman ni rniaaznë reeman
bëjl. ³ Zianz wë'paman loj tijb barcw ni naj xbarcw
Simón, abi' rëbaman lojman din gudxigaman laan niz
galay nijs guin. Dxel gurejman, guzuloj culüüman bejn
ree. ⁴ Chi gulox guneenëman laa reeman, dxel rëba-
man loj Simón:

—Binë barcw guin lod mazri naxhit, gol bazaal xgui-
jxhidi din guiniaazidi bëjl.

⁵ Badxi' Simón laan rëbaman:
—Mextr, gudëd guiaalczi baguieenan dxiin, achutci
bëjl wanaazan. Per bal lüj na, yazaalan guijxh guin ree.
⁶ Chi bazaal reeman guijxh guin ree loj nijs guin, bëjl
zien da't gunaaz reeman xt guzuloj cayaxya' ree guijxh
guin. ⁷ Abi' been reeman sen loj ree xcompniar ree-
man bën yu' ree loj stijb barcw guin, din chiguieen ree-
man laa reeman yudar. Dxel wej reeman, abi' bacha
reeman bëjl guin ree loj grop barcw guin xt ma nizëëb
reen xan nijs. ⁸ Chi baguiaa Simón Bëd ni goc, bazux-
ibaman loj Jesús rëbaman:

—Biquied lod za'n, Dad, din bëndol naj.

⁹ Guial Simón con ree bën za'nëman badxa loj ree-
man guial dád zien bëjl gunaaz reeman. ¹⁰ Ziangajc
badxaloj ree Jacob con Waj, bën naj ree xi'n Zebedeo,
naj tëë reeman xcompniar Simón. Per rëb Jesús loj
Simón:

—Ad rdxebil, din diizd yan guto'pil bejn ree par Dios
luar guiniaazil bëjl.

¹¹ Dxel babëë reeman barcw guin ree loj nijs guin,
basa'n reeman laa reen, zinalt reeman Jesús.

Rayün Jesús tijb bën rajc guialguijdx la lepra
(Mt. 8:1-4; Mr. 1:40-45)

¹² Chi za' Jesús tijb luguiedx, bidxin tijb bën rajc guial-
guijdx la lepra, guidibczaman ma yu' guialguijdx guin.
Chi baguiaaman Jesús laa bazuxib gajcaman, basajb
lojman luyuj, rëbaman:

—Dad, bal rën, zajc yayünl naj.

¹³ Zianz basli yaa Jesús baqui'man laaman, rëbaman:
—Rënan. Bayajc.

Loj hor ziigajc bayajc bën guin. ¹⁴ Dxel rëb Jesús loj-
man:

—Achuczi loj guiëbil guial ma bayajquil. Lojzi bixhioz
wej din guguiaaman lüj. Binë gon ni rayal chinël zi'c
gunabee Moisejs din gagbee gra bejn guial ma baya-
jquil.

¹⁵ Per guixie guixie mazri bire'ch xtiidx Jesús por gra
ree ni zagdxë rünman. Abi' dád benzien rdo'p din gu-
caagdiajg reeman ni rnieeman yayün tëëman laa ree-
man guialguijdx ni rajc reeman. ¹⁶ Guiáad laaman rej-
man niz lod achut bejn zojb, persi rbejdx rniabaman
Dios.

Rayün Jesús bën nëjt xcuerp
(Mt. 9:1-8; Mr. 2:1-12)

¹⁷ Tijb dxej culüü Jesús bejn ree, abi' zojb tio'p choon
ree bënfarisew në ree mextr rajc ley, zëëd reeman
guiedxdo ni riga' ree niz Galilea në niz Judea, në
Jerusalén. Za'në xguialrniabee Dios laaman persi
rayünman bënragxuu ree. ¹⁸ Dxel bidxin tio'p choon
ree bejn, bidxinë reeman tijb xin nëjt xcuerp, naga'x
loj da. Abi' guyën reeman niunë reeman laax lënü guin
din niguijxh reeman laax lod za' Jesús. ¹⁹ Per ad badxe-
jlt ban niz niunë reeman laax guial bën guixiuj riga' ya-
gaj. Dxel wë'p reeman guijc yu guin, abi' biquied ree-
man tex dxiib guijcan, zianz gulet reeman xinragxuu
guin guidib naga'x loj da guin, gudijxh reeman laax

galay ree bén guin lod za' Jesús. ²⁰ Chi baguiaa Jesús guial rliiladx reeman laaman; rëbaman loj xinragxuu guin:

—Xi'n, ma benan xtolil perdon.

²¹ Per ree mextr rajc ley con ree bénfarisew guzuloj cayüjn reeman xgab: “¿Chu xin guin zeel rüjnx mazri xin zobjloj guial loj Dios? Achutcz rajc rüjn perdon dol, tijbzi Dios.”

²² Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? ²³ ¿Conin ad nawëëgt gac, guial guiën ya: “Ma naj xtolil perdon”, o guiën: “Bixche guza tëë”? ²⁴ Per yan, gulün lëjt guial Bén guxhaal Dios rajpaman guialrniabee loj guidxliuj guie din güünman perdon dol ree.

Dxel rëb Jesús loj xinragxuu guin:

—¿Bixche, baca' ni go'til loj! Baguij lidxil.

²⁵ Loj hor guin gajc bixchex guidibloj gra ree bén riga' yagaj balesix ni go'tix loj, zianz zia lidxix ruza'tix Dios zagdx. ²⁶ Graczi reeman badxaloj ruza't tëë reeman Dios zagdx abi' dád bidxeb reeman, rëb reeman:

—¿Ni'qui tijb ad waguiaat ree zi'ct naj ni cayguiaa ree yan!

Rbejdx Jesús Leví

(Mt. 9:9-13; Mr. 2:13-17)

²⁷ Chi gudëd gojc zian, baguiaa Jesús tijb bén ruquijx impuest, laman Leví, zobjaman lod ruquijxaman. Abi' rëbaman lojman:

—Tanal naj.

²⁸ Dxel bisu Leví, guro'nldaxaman gran zinaltaman Jesús.

²⁹ Abi' been Leví lanijro' lidxaman par Jesús, në zien ree bén ruquijx impuest zobj nëtëë ree ben ren zobjnë reeman xan mex. ³⁰ Per ree bénfarisew ree në ree mextr rajc ley, bén nuchajg gajc ree bénfarisew guin, guzuloj caneeguidx reeman xbejn ree Jesús, rëb reeman:

—¿Chexc zeel rë' rawnëdi bén ruquijx ree impuest në ree bëndol?

³¹ Badxi' Jesús laan rëbaman:

—Bënnadaan ree ad riaadxt reeman doctor, bén-ragxuu ree laa reeman riaadxt Doctor. ³² Ad zialtan par ree benza'c, zialan par ree bëndol din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mt. 9:14-17; Mr. 2:18-22)

³³ Bénfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénfarisew dád zien volt rba'n reeman rbejdx rniab tëë reeman Dios, guiáad ree xbejn ganax rë' raw reeman.

³⁴ Badxi' Jesús laan rëbaman:

—¿Wen zäjc güündi naguiejn ya guiba'n ree biooz za' loj guialruxhlaa, la'tgaj za'në xin cuxhlaa guin laa reeman? ³⁵ Per guidxin dxej chiquiedix, dxel guiba'n reeman.

³⁶ Rëb tëëman loj reeman:

—Achut bén rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nëtëë yan ad zuguiaatan zagdx loj lajdyojx guin. ³⁷ Ad rgu' tëët bejn vin cüb lën anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen. ³⁸ Zeel vin cüb rayal chu'n lën anfr cüb din ni'qui tijb reen ad zaxint. ³⁹ Abi' tijb bén ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

Rgui'ch ree xbejn Jesús trigo dxej raziiladx ree bén Israel

(Mt. 12:1-8; Mr. 2:23-28)

⁶ Tijb dxej raziiladx ree bén Israel, la'tgaj cadëd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman. ² Abi' yu' ree bénfarisew rëb loj reeman:

—¿Chexc zeel rüjndi ni ad rayalt güündi dxej raziiladx ree bejn?

³ Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gu-laaman con ree xcompniaraman? ⁴ Guyuman lën xyadoo Dios, cwa'man guiadxtil ma nagle' ree gu-dawaman con ree xcompniaraman, ni ad rayalt niajw reeman bixhiosi ree rayal gaw laa reen.

⁵ Rëb tëë Jesús loj reeman:

—Bén guxhaal Dios rajpaman guialrniabee dxej raziiladx ree bejn.

Rayajc tijb xin naxü'n tiblad yaa

(Mt. 12:9-14; Mr. 3:1-6)

⁶ Zatiijb dxej raziiladx reeman, guyu Jesús lën tijb yadoo abi' guzuloj culüüman bejn ree. Yagaj za' tijb xin naxü'n yaa ladbee. ⁷ Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. ⁸ Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin. ⁹ Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdx ya o ni mal? ¿Guslaaman xguialnaban bejn ya o gugüjtaman laaman?

¹⁰ Dxel baguiaa Jesús gra ree bén riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax. ¹¹ Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

Rbe Jesús chiptio'p ree apóstoles

(Mt. 10:1-4; Mr. 3:13-19)

¹² Lën ree dxej zii wej Jesús tijb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj. ¹³ Chi bareguiaa, gurejdxaman

bén nal ree laaman, dxele gulejman chiptio'p reeman loj reeman, abi' guneeman laa reeman apóstoles. ¹⁴ La reeman: Simón, bén gulëelajman Béd, Andrejs bijch Simón, Jacob, Waj, Felip, Tol, ¹⁵ Matew, Tumajs, Jacob xi'n Alfeo, Simón, bén bi'ch loj ree bén cananistas, ¹⁶ Judas xi'n Jacob, nè Judas Iscariote bén bayü Jesús.

Rulüü Jesús zien ree bejn

(Mt. 4:23-25)

¹⁷ Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman nè ree ben ren, bén zëed ree niz Judea nè Jerusalén nè ree bén zëed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëëman laa reeman guialguijdx ni rajc reeman. ¹⁸ Nè ree bén yu' xindxab luxdoo bayajc. ¹⁹ Zeel graczi ree bejn rën guqui' laaman, guial rayüjnman laa reeman con xguialrniabeeman.

Xiquilbaa ree bejn

(Mt. 5:1-12)

²⁰ Dxele baguiaa Jesús loj ree xbejnman, abi' rëbaman: —Xiquilbaadi bënprob, din lëjt rayal loj xguialrniabee Dios.

²¹ 'Xiquilbaadi bën rliaan ree yan, din Dios gunee ni gawidi xt chigdxinlaxidi.

'Xiquilbaadi bën roon ree yan, din zadxin dxej guxi-jdxidi.

²² 'Xiquilbaadi chi rdxe'ch bejn lëjt, chi rabëëca reeman lëjt, rnieeguijdx tëë reeman lëjt, naladx reeman najdi bendxuudx guial rliadxidi Bén guxhaal Dios.

²³ Gol babaa gol badxe' tëë luxdoodi zagdx chi güün-nè reeman lëjt zian, din zro' ni tia'di yu' xanyabaa, din ziangajc beennè xbéngulal reeman bén badëe ree xtiidx Dios loj ree bejn.

²⁴ 'Per probza lëjt benrijcw, din ma guyuxgaj luxdoodi nix.

²⁵ 'Probza lëjt bén raw xt rigdxinlax yan, din zadxin dxej guiliaandi.

'Probza lëjt bén ruxijdx yan, din zadxin dxej goondi guial chu'nayadi.

²⁶ 'Probza lëjt, bén ruladx ree guilies bejn xvalor, din zian beennè ree xbéngulal reeman bén goc ree bén rusquiee, rëb reeman rudëe reeman xtiidx Dios loj ree bejn.

Guyën bén rdxe'ch lüj

(Mt. 5:38-48; 7:12)

²⁷ 'Per ganin lëjt bén rucaagdiajg ree da diidxan: Gol guyën bén ralen lëjt, gol gojc benza'c con ree bén yu'xyajn lëjt, ²⁸ gol bazaar diidxa'c guijc ree bén ruzaal diidxmal guijquidi, gol gurejdx gunab Dios por ree bén rnieeguijdx lëjt. ²⁹ Bal chu chëëz tiblax hajguil, badëed zatibladan, bal chu cwëëxuu xchamarril, ad cwexuul chinëman nè xmanguil. ³⁰ Chutëëz bén rniab xhienin lojl, badëedan. Bal chu rquied xhie xieenl, ad

bal yanabilan. ³¹ Gol beennè ree bejn zi'c rëndi güünne reeman lëjt.

³² 'Bal rëndi ganaxzi bén rën lëjt, ¿xhieza ni zagdxen cayüjndi? Din xt bëndol ree rüjn zian, rën reeman bén rën laa reeman. ³³ Abi' bal rüjndi wen ganaxzi bén rüjn lëjt wen, ¿xhieza ni zagdxen cayüjndi? Din xt bëndol ree rüjn zian. ³⁴ Ziangajc bal rudëedidi ni rguin' ganaxzi bén naladxidi zajc yaguijx lojdi, ¿xhieza ni zagdxen cayüjndi? Din xt nè ree bëndol rudëed rguin' ree bén naladx reeman zajc yaguijx loj reeman. ³⁵ Per lëjt gol guyën bén ralen lëjt, gol been reeman wen. Gol badëed qu'n reeman, ad cwëzidi xhie tia'di guijcan. Zian tia'di zro' guialnaza'c ni gunee Dios bén yu' xanyabaa, gac tëëdi xi'nman, din laaman naj benza'c con ree bén ad rudëet quixtëe lojman nè con ree benmal. ³⁶ Gol baya bejn zi'c raya dux Dad ree Dios bejn.

Xcwent guialrula'ch

(Mt. 7:1-5)

³⁷ 'Ad gula'chidi, ad gudxiib tëëdi ni mal guijc ree bejn chitëe saquidi zian, gol been perdon din gaquidi perdon. ³⁸ Gol badëed ni riaadx ree bejn, Dios mazri zro' naj ni guneeman zi'c tijb bols guidxadi. Din zi'c rudëedidi loj ree bejn, ziant gajc naj ni gunee Dios lojdi.

³⁹ Rëb Jesús loj reeman zatijb diidx:

—¿Wen zajc chinë bën lutia'p zatijb bën lutia'p ya?

¿Nid zayajb grop reeman ro' bala' ya? ⁴⁰ Tijb Bén cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

⁴¹ 'Ad gula'chil ben ren por faltdobëz ni rajpaman, zagdxeli guyu xgab por falt naroob ni rajpil. ⁴² Abi' bal mazri falt naroob rajpil, ¿xoxa guiëbil loj zatijb bejn: "Ad laat naj ni rüjnl"? ¡Bén rusquiee! yalojxgaj been zi'c rayal, chi ma beenl zian dxele ma zile' guiëbil loj zatijb bejn: "Ad laat naj ni rüjnl".

Por ni rtia loj yag rayünbee bejn xhie yagan

(Mt. 7:17-20; 12:33-35)

⁴³ 'Ad yu't yag zagdx rtia ni guijdx loj, ad yu' tëët yag guijdx rtia ni zagdx loj. ⁴⁴ Din tijbgaj yag rayünbee bejn xhie yagan por ni rtia lojn. Ad raru't higo loj yaquieëjch, ad raru' tëët uv loj gui'xh. ⁴⁵ Benza'c rnieeman diidxa'c din laan yu' luxdooan, guiáad benmal rnieeman diidxmal din laan yu' luxdooan. Din ni yu' luxdoo bejn laan rnieeman.

Tio'ploj cimiant

(Mt. 7:24-27)

⁴⁶ '¿Chexc zeel rnieedi naj, "Dad, Dad", abi' adza rüjntidi ni rñin? ⁴⁷ Ganin lojdi chu naj zi'c Bén ri't lon, riguijman ni rën, abi' rüjnman laan: ⁴⁸ laaman naj zi'c tijb Bén been yu, yaloj xgaj gudëenman naxhit xt chi bila loj guiaj, dxele gulesaman xcimiantan guijc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guijc guiaj. ⁴⁹ Per Bén riguijman da diidxan abi' ad rüjntaman

laan, najman zi'c tijb bén been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblayaazi base'nan laan.

Rayajc xmojs tijb suldad rom xin rniabee ree suldad
(Mt. 8:5-13)

7 Chi gulox guneenë Jesús bejn ree, dxel zëman Capernaum. ²Yagaj zojb tijb suldad Rom xin rniabee ree suldad. Yu' tijb xmojsix xin rën da'tix, ragxuu mojs guin ma rulüücüi guiëtix. ³Chi biguiejn suldad rniabee guin ruza't ree bejn Jesús, guxhaalix tio'p choon ree bén rniabee Israel lojman din chisajc reeman liaadx yayüjnman xmojsix. ⁴Abi' bidxin reeman loj Jesús guzajc reeman liaadx, rëb reeman:

—Gagnësiil suldad rniabee guin, ⁵din rën x Bén du-lad ree, në yan por laax gojc dux yadoo ree.

⁶Dxel binë Jesús laa reeman. Per chi ma cadxin reeman gajxh lidix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lënu lidixan, ⁷zeel ad bayaxtan nial quijb naj nidgadilan lüj. Per con gunee diizd lod za'l din yayajc da mojsan. ⁸Din zi'c naj yu' ree Bén rniabee naj, ziangajc naj yu' ree da sul-dadan xin rniabeen. Chi rën loj tijb reex: “Wej”, rejx. Chi rën loj zatijbix: “Guda”, ri'tix. Abi' chi rën loj da mojsan: Been ni guin, rüjngajquixan.

⁹Chi biguiejn Jesús zian, dád badxa lojman ni rëb suldad guin, abi' badxi' lojman loj gra ree Bén zinal laaman, rëbaman:

—Diidxiczi rnin, ni'qui Israel ad wadxaaglojtan tijb Bén rililadx da't Dios zi'c rililadx xin guin Dios.

¹⁰Chi badxin ree xin guxhaal suldad rniabee guin lidix, baguiaa reex ma bayajc mojs guin.

Rasban Jesús xi'n tijb béngunaa bizëjb

¹¹Chi gudëd gojc zian, wej Jesús tijb luguiedx la Naín binë ree xbejnman, në zien ree ben ren. ¹²Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman Bén bizëjb. Zien da't ree Bénluguiedx guin zinal laaman.

¹³Chi baguiaa Dad Jesús laaman, bayaman laaman, dxel rëbaman lojman:

—Ad roonl.

¹⁴Abi' bibig Jesús baqui'man xcaj xingüt guin, dxel guzudxe ree Bén zinë laax. Zianz rëbaman lojx:

—Xi'n, naj rni lojl: ¡Bixche!

¹⁵Dxel gureli xin guin, guzuloj caneex, zianz bayü Jesús laax loj xniaax. ¹⁶Chi baguiaa reeman zian, graczi reeman bidxeb guzuloj cuza't reeman Dios zagdx, rëb reeman:

—Du loj ree ma gules Dios tijb Bén zobjloj, Bén rudëë xtiidx Dios loj ree bejn.

Rëb tëë reeman:

—Ma bi't Dios din gagnë ree xbejnman.

¹⁷Abi' guidib niz Judea në ree guiedx riga' niz yagaj gogbee ree bejn ni been Jesús.

Bigneenë ree xbejn Waj Jesús
(Mt. 11:2-19)

¹⁸Gogbee Waj gra ree ni cayüjn Jesús, guial bagojn ree xbejnman laaman. Abi' gunee man tio'p reeman, ¹⁹dxel guxhaalaman laa reeman loj Jesús din chignab-diidx reeman bal laacaman naj Cristo Bén naj diidx gui't, Bén cabëz reeman, o cwëz reeman ben ren ya. ²⁰Abi' bibig reeman, guneenë reeman laaman, rëb reeman lojman:

—Waj Bén ruroobnijs bejn ree guxhaal dunujn lojl zudganabdiidx bal lüjcan naj Cristo Bén naj diidx gui't, Bén caylëjzan o yalëjzan ben ren ya.

²¹Hor ziigajc bayüjn Jesús zien da't ree Bénragxuu, në ree Bén rdoob, nëtëë ree Bén yu' xindxab luxdoo, baxhal tëëman loj ree Bénlutia'p. ²²Dxel badxi' Jesús xtiidx ree Bén guxhaal Waj, rëbaman:

—Gol chej, gol chiguiedx loj Waj ni cuguiaadi në ni caguiejndi. Gol güjdx lojman guial ma ruguiaa ree Bénlutia'p, ma rajc rza ree bencoj, ma rayajc tëë ree Bén goc guialgujdx la lepra, ma rigueijn ree Bén nacwa't, guiáad ree bengüt ma baban reeman, abi' ree Bénprob ma caguiejn reeman xtiidxza'c Dios.

²³¡Xiquilbaa ree Bén ad zucwëëzt chililadx naj!

²⁴Chi baza ree Bén guxhaal Waj, guzuloj Jesús canee-man xcwent Waj loj ree bejn, rëbaman:

—¿Chu naladxidi naj Bén biquiaadi loj yujbidx? ¿Naladxidi ya najman zi'c tijb biqui runiib bi? ²⁵¿O chu biquiaadi? ¿Tijb Bén najcw lajd zagdx, ya? Lëjt ragbee guial Bén rajcw ree lajd zagdx, në ree Bén naban zagdx, lën palas zojb reeman. ²⁶¿Chu biquiaadi? ¿Tijb Bén rudëë xtiidx Dios loj ree bejn ya? Per diidxiczi rnin lojdi, biquiaadi tijb Bén mazri zobjloj guial loj tijb Bén rudëë xtiidx Dios loj ree bejn. ²⁷Wajn naj Bén ruza't xtiidx Dios, lod rëb:

Naj rxhial tijb Bén ned lojl,
Bén güünchaaw xnejzil.

²⁸Rnin lëjt, loj graczi ree Bénguidxliuj ad wayut Bén rudëë xtiidx Dios loj ree bejn, Bén mazri zobjloj guial loj Waj. Per majsi zian, Bén ad zobjlojt loj xguialrniabee Dios, laaman mazri zobjloj guial loj Waj.

²⁹Gra ree bejn, në ree Bén ruquijx impuest Bén baroobnijs Waj, chi biguiejn reeman ni rëb Jesús bignia' reeman guial rüjn Dios zi'c rayal. ³⁰Per ree Bénfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

³¹Rëb tëë Jesús:

—¿Xhienaag ganin lëjt naj ree Bén riga' loj guidxliuj guie yan? ¿Chu naj zi'c laa reeman? ³²Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdxan par nuya'di, per ad baya'tidi, badoolan ni naya ree, per ad biintidi.” ³³Din bi't Waj Bén baroobnijs bejn ree, ad rawtaman ad rë' tëëtaman vin, abi' rëbidi xindxab yu' luxdoo man.

³⁴Yan bi't Bén guxhaal Dios, rawaman rë' tëëman vin, abi' rëbidi guial dád nalaman ruladxaman guië'man, ruchajg tëëman Bén dol ree con ree Bén ruquijx im-

puest. ³⁵ Per xguialrignia' Dios, rguienan por ree xbejnman.

Rej Jesús lidx tijb bénfarisew la Simón

³⁶ Tijb bénfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex. ³⁷ Dxel tijb búngunaa dxuudx zojb gajc luguiedx guin. Chi gogbeeman cayaw Jesús lidx bénfarisew guin, bidxinnëman tijb lumejt yu' perfum. ³⁸ Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxguijcaman laan, cayawaman xid guia'man curoob tēëman laan perfum guin. ³⁹ Chi baguiaa bénfarisew guin zian, beenman xgab: "Balgui zian wali Bén guin najman Bén rudëë xtiidx Dios loj ree bejn, zagbeeman chunin cuqui' laaman xhie tēë naag naban búngunaa guin, najman bendxuudx." ⁴⁰ Dxel rëb Jesús loj bénfarisew guin:

—Simón, yu' tijb ni ganin lüj.

Badxi' bénfarisew guinan rëbaman:

—Gunan, mextr.

⁴¹ Abi' rëb Jesús lojman:

—Tijb Bén rudëëd milia rgui'n ree bejn, ral tio'p ree bejn lojman. Tijbaman nuzëëb gaaygayuu denario, zatijbaman nuzëëb tü'pchiin. ⁴² Grop reeman ad beent gan naguijx lojman, per Bén badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ¿chu loj grop reeman mazt guiën laaman?

⁴³ Badxi' Simón laan, rëbaman:

—Par naj, Bén bazëëb mazri zro' guin.

Dxel rëb Jesús:

—Waliquil.

⁴⁴ Zianz baguiaa Jesús loj búngunaa guin, abi' rëbaman loj Simón:

—¿Ruguaal búngunaa guie ya? Chi guyu'n lidxil ad baneetil nijs niëd guia'n. Guiáad laaman gudiibaman guia'n con nijs brii lojman, abi' bacwiidxaman laan con guidxguijcaman. ⁴⁵ Ad gudawtil naj xid, guiáad laaman diizd chi guyu'n ad rbëzt rawaman xid guia'n. ⁴⁶ Achet sejt badxe'l guican, per laaman ma badxe'man perfum guia'n. ⁴⁷ Zeel rnin lüj, gra ree xtolaman ma gojc perdon guial rën da'taman naj. Per Bén yu' ta'nz xtol abi' rajcaman perdon, ta'nz rënman naj.

⁴⁸ Dxel rëb Jesús loj búngunaa guin:

—Ma naj gra xtolil perdon.

⁴⁹ Guiáad ree Bén zojbnëman yagaj guzuloj canabdiidx loj lasa' reeman, rëb reeman:

—¿Chu Bén guin zeel xt në ree dol rüjnman perdon?

⁵⁰ Per rëb Jesús loj búngunaa guin:

—Ma najl perdon guial rliladxil naj, baguiaj zagdx ad ruril xgab.

Búngunaa been ree Jesús yudar

8 Chi gudëd gojc zian, wej Jesús gra ree guiedx narooB në ree guiedx dobëz bicojnman biglöö tēëman xhienaag naj xguialrniabee Dios. Në guidxiptio'p

ree apóstoles binëman, ² nētëë tio'p choon ree búngunaa, Bén babëëman xindxab luxdoo, në ree Bén bayünman guialguijdx ni rajc reeman. Loj reeman no'ch María Magdalena, Bén babëë Jesús gajdx xindxab luxdoo. ³ Në Xuan, lacheel Cuza, Cuza guin goc Bén nulen xchiin Herodes. Në Susan nētëë zien ree búngunaa ren, been reeman yudar Jesús con ni rajp reeman.

Xcwent Bén rtie'ch bin

(Mt. 13:1-9; Mr. 4:1-9)

⁴ Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

⁵ —Tijb bejn zëman zigtie'chaman bin. Chi catie'chaman laan, ta'nan biajb lunejz abi' balëë ree bejn guijcan gudaw tēë ree biguijn laan. ⁶ Zata'nan biajb loj ree guiaj, chi gulejn reen gubidx reen guial ad yu' xcojpt loj ree guiaj guin. ⁷ Zata'nan biajb loj ree yaquie'ch. Abi' chi guni's reen tijbzi, banidloj yaquie'ch guin laa reen. ⁸ Zata'nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel guneeaman rejs rëbaman:

—Bén rën gucaagdiajg, gol bacaagdiajg.

Chexc zeel rulöö Jesús con cwent ree

(Mt. 13:10-17; Mr. 4:10-12)

⁹ Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

¹⁰ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman. Per loj gra reeman rünan zi'c cwent din majsi rani loj reeman, per ad zuguaat reeman, majsi riguijxn reeman, per ad zignia't reeman.

Rusignia' Jesús xcwent Bén rtie'ch bin

(Mt. 13:18-23; Mr. 4:13-20)

¹¹ 'Ni ne rën guiëb xcwent Bén rtie'ch bin: Bin guin naj zi'c xtiidx Dios, ¹² guiáad bin biajb runejz naj zi'c ree Bén riguijxn xtiidx Dios; per rdxin gajc xindxab rquiedix laan luxdoo reeman chitëë chililadx reeman laan abi' gac reeman perdon. ¹³ Guiáad bin biajb loj ree guiaj, naj zi'c ree Bén riguijxn xtiidx Dios, abi' dád nix ru luxdoo reeman riguijxn reeman laan, per guial naj reeman zi'c cwaan ni ad yu't liuj, rliladx reeman laan tibladëd abi' chi rzagdiaj reeman laa rusa'n gajc reeman ni rliladx reeman. ¹⁴ Guiáadza bin biajb loj ree yaquie'ch, naj zi'c ree Bén riguijxn xtiidx Dios; per ru reeman xgab por gra ree guialnaza'c riga' loj guidxliuj guie rüjn tēë reeman ni rëntzi reeman, abi' zianz rucwëëz rucaagdiajg reeman xtiidx Dios ad rüjn tēët reeman ni rënman. ¹⁵ Guiáad bin biajb loj yujza'c, laan naj zi'c ree Bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tēë reeman loj xnejzaman, zianczi rüjn reeman ni rënman.

Achet ni naguei'ch yu'

(Mr. 4:21-25)

¹⁶ 'Achut bén ruze'c tijb guij dxei ruta'cwaman laan, ad rudxe' tēetaman laan xan lon, ruzujman laan ya din gusnin loj ree bén chu' lēnū. ¹⁷ Achet ni naguei'ch yu' ni ad zaguiet ad yu' tēet ni ralan ni ad zagbeet bejn, zadxin dxei gagbee bejn laan.

¹⁸ 'Zeel gol bacaagdiajg zagdxe, bén ma rignia' gusnuu chignia'man mazri, per bén ad rignia't, xt ta'n ni naladxaman rignia'man ad zignia'traman.

Xniaa Jesús con ree bijchaman

(Mt. 12:46-50; Mr. 3:31-35)

¹⁹ Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'. ²⁰ Abi' yu' bén bagojn Jesús rēbaman: —Laa xniaal con ree bijchil za' lule' guin rēn reeman guinieenē reeman lūj.

²¹ Badxi' Jesús laan rēbaman:

—Bén rucaagdiajg ree xtiidx Dios rūjn tēē reeman zi'c rēnman, laa reeman naj da nan laa tēē reeman naj da bichan.

Racwēēz Jesús bidoxh

(Mt. 8:23-27; Mr. 4:35-41)

²² Tijb dxei guyu Jesús loj barcw con ree xbejnman, abi' rēbaman loj reeman:

—Yo' ree zatiblad ro' nijs guin.

Zianz zē reeman. ²³ La'tgaj cadēd reeman loj nijs guin, goodyēs Jesús. Dxei guzuloj cabi' bidoxh loj nijs guin, abi' cadxa nijs loj barcw guin, ma cazēēbczi barcw guin xan nijs. ²⁴ Dxei bacwēēn reeman Jesús, rēb reeman:

—¡Mextr! ¡Mextr! ¡Ma cayzēēb ree xan nijs!

Abi' bixche Jesús gunabeeman bacwēēz bidoxh guin nē xtūjp nijs guin, zianz gulējz reen dxei bayajcdxe.

²⁵ Abi' rēbaman loj reeman:

—¿Conza xguialrliladxi?

Per laa reeman dád bidxeb reeman badxa tēē loj reeman, abi' canabdiidx loj lasa' reeman rēb reeman:

—¿Chu bén guin zeel rniabeeman bi nē nijs, abi' ru-zoob reen xtiidxaman?

Rayūjn Jesús tijb xin yu' xinxab luxdoo

(Mt. 8:28-34; Mr. 5:1-20)

²⁶ Dxei badxin Jesús con ree xbejnman xdajn ree bén Gadara, ni riga' zatiblad ro' nijs Galilea. ²⁷ Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xinxab luxdoo. Ad rajcwt xabix, ad nabantix lēnū, ganaxzi ro' ree baa nabanx.

²⁸ Chi baguiaax Jesús bazuxibix lojman, guneex rejs rēbix:

—¿Xhie rēnl con naj, Jesús, Xi'n Dios yu' xanyabaa? Rniaaban lojl ad gusagzil naj.

²⁹ Rēbix zian guial ma canabee Jesús din yarii xinxab guin luxdoo. Ma gojc xchej naaz xinxab guin laax. Abi' ma guxhii ree bejn yaax nē guia'x con

caden chitēē ban chex, per rutūguia'gajquix caden guin abi' rulaagdxa xinxab guin laax niz lod achut bejn zojb.

³⁰ Gunabdiidx Jesús lojx rēbaman:

—¿Chu lal?

Badxi'xan rēbix:

—Legión lan.

Rēbix zian guial zien da't ree xinxab yu' luxdoo.

³¹ Rēb ree xinxab guin loj Jesús chitēē guixhiaalaman laa reex gabijl. ³² Dajn guin riga' zien ree cūch cayaw reeb. Zeel rēb ree xinxab guin lojman din gudēēman mod chu' reex lēn ree cūch guin, dxei cwējbaman.

³³ Zianz barii reex luxdoo bayu reex lēn ree cūch guin, abi' guzuloj cuxūn reeb zianz bitidia' reeb ro' bala' xt loj nijs, lod gu' reeb nijs abi' gūjt reeb.

³⁴ Chi baguiaa ree bén cayajp ree cūch guin ni goc, baxūn reeman bicojn reeman bejn ree luguiedx nē ree dajn. ³⁵ Dxei wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xinxab guin ree luxdoo, zojbix guia'man ma na-jcw xabix, ma badēdguienx abi' bidxeb reeman.

³⁶ Guiaad ree bén baguiaa ni goc, be reeman diidx loj reeman xhienaag bayajquix. ³⁷ Graczi ree bén zojb Gadara gunab loj Jesús din yazaman yagaj guial dád rdxeb reeman. Dxei bayē'paman loj tijb barcw, ziata-man. ³⁸ Guiaad xin barii xinxab guin ree luxdoo rēbix lojman din chinalix laaman, per ad cwējbtaman, rēbaman lojx:

³⁹ —Baguij lidxil, biguiedx graczi ni been Dios por lūj.

Dxei xiax luguiedx guin abi' bex diidx loj gra ree bejn ni been Jesús por laax.

Rayajc xi'n Jairo nē bēgunaa bagaal xab Jesús

(Mt. 9:18-26; Mr. 5:21-43)

⁴⁰ Chi badxin Jesús zatiblad ro' nijs guin, dád rabaa gra ree bén za' yagaj guial badxinman din mal cabēz reeman laaman. ⁴¹ Dxei bidxin bén la Jairo, laaman rniabee lēn tijb xyadoo ree bén Israel. Bazuxibaman loj Jesús, rēbaman lojman din cheman lidxaman, ⁴² guial yu' tijb xi'nman biin chiptio'p ijs, ma guiētczim. Chi zē Jesús dád zien ree bejn zinal laaman xt rixa't reeman laaman.

⁴³ Abi' tijb bēgunaa no'ch loj reeman, ma gojc chiptio'p ijs ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayūjn laaman. ⁴⁴ Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

⁴⁵ Dxei gunabdiidx Jesús rēbaman:

—¿Chu baqui' naj?

Abi' graczi reeman rēb guial ad laat reeman baqui' laaman. Zianz rēb Bēd loj Jesús:

—Mextr, graczi ree bejn xt rixa't reeman lūj cucadxa tēē reeman lūj, abi' rniabdiidxil chu baqui' lūj.

⁴⁶ Per rēb Jesús zatijb:

—Yu' chu baqui' naj din gogbeen yu' tijb bén ma bayajc con da guialrniabeen.

⁴⁷ Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bën guin chexc zeel baqui'man xabaman abi' loj hor guin gajc bayajcaman. ⁴⁸ Dxel rëb Jesús lojman:

—Xi'n, ma bayajquil guial bililadxil naj, baguiaj za-gdxe.

⁴⁹ Sta caneenë Jesús béngunaa guin, chi bidxin tijb bën guza lidx jairo, bën rniabee lën xyadoo ree bën Israel, rëbaman loj jairo:

—Mal güjt xi'nl, ad ruslenril Mextr guin.

⁵⁰ Per chi biguiejn Jesús zian, rëbaman loj jairo:

—Ad rdxebil, bililadxzi, zayajcqui xi'nl.

⁵¹ Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniaa bindo guin. ⁵² Graczi ree bën riga' yagaj cayoon, yu'naya tõe reeman por laam. Per rëb Jesús loj reeman:

—Ad roondi, ad güjttim, naga'yëjszim.

⁵³ Graczi reeman baze' laaman guial ma ragbee reeman güjtim. ⁵⁴ Dxel gunaaz Jesús yaam, guneeman rejs, rëbaman:

—Bindoo, bixche.

⁵⁵ Loj hor ziigajc babanm, bixchem. Dxel gunabee Jesús badëëd reeman ni gudawim. ⁵⁶ Dád badxa loj ree xdadim, per rëb Jesús loj reeman achu loj guiëb reeman ni goc.

Rxhiaal Jesús guidxiptio'p ree xbejnman chiglüü reeman xtiidx Dios

(Mt. 10:5-15; Mr. 6:7-13)

9 Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tõe reeman bënragxuu ree. ² Guxhaalaman laa reeman chiglüü reeman xhienaag naj xguialrniabee Dios, yayüjn tõe reeman bënragxuu ree. ³ Rëbaman:

—Ad chinëdi xhienin par runejz: ni'qui yagrliaxdidi, ni'qui guijxh, ni'qui guialraw, ni'qui milia, ni'qui stibne-jz xabidi. ⁴ Chutëëz lidx guidxindi, tib gol baya'nzi xt chi yazadi luguiedx guin. ⁵ Bal yu' guiedx lod ad rënt reeman lëjt, gol baza yagaj, gol gudxijp guxyuj guia'di zi'c tijb sen guial ad rënt reeman guzoob reeman xtiidx Dios.

⁶ Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tõe reeman bënragxuu ree.

Riguiejn Herodes ni cayüjn Jesús

(Mt. 14:1-12; Mr. 6:14-29)

⁷ Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bën baroobnijs bejn ree ma baban, ⁸ yu' tõe reeman rëb Elíasan bën badëë xtiidx Dios loj ree bejn ma balüüloj, yu'za reeman rëb, tijb ree bën badëë xtiidx Dios loj ree bejn gocli ma baban. ⁹ Per rëb Herodes:

—Naj gajc gunabee biru' yëjn Waj. ¿Chuza bënan rigueijnan ruza't ree bejn xcwent ni cayüjnman?

Zianan zeel rüjn Herodes nagueijn guguaaman Jesús.

Ruyaana Jesús gaay mil bejn

(Mt. 14:13-21; Mr. 6:30-44; Jn. 6:1-14)

¹⁰ Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczi bejn zojb, gajxh guiedx Betsaida. ¹¹ Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tõe reeman bënragxuu ree.

¹² Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin din yaguaaj reeman chitiil lod yaya'n reeman luguiedx doo ree në ree ranch, chitiil tõe ni gaw reeman din lod nadxu' ree achetczi yu'.

¹³ Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

¹⁴ Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

¹⁵ Abi' bagojn reeman laa reeman persi gurej gra reeman zian. ¹⁶ Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree bën guin. ¹⁷ Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

Rëb Bëd guial Jesús naj Cristo

(Mt. 16:13-19; Mr. 8:27-29)

¹⁸ Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman: —¿Chu rëb ree bejn najn?

¹⁹ Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías bën badëë xtiidx Dios loj ree bejn, yu' tõe reeman rëb lüj naj tijb ree bën badëë xtiidx Dios loj ree bejn gocli, bën ma baban.

²⁰ Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

Rugojn Jesús guiëtaman

(Mt. 16:20-28; Mr. 8:30-9:1)

²¹ Rëb Jesús loj reeman achuczi loj guiëb reeman zian, ²² rëb tõe reeman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

²³ Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman guialzi ni tēdzaman guixie guixie abi' guidnalaman naj. ²⁴ Din bēn mazri rën guialnaban ni rajpaman loj guidxliuj guie, zadxin dxej gusēebaman laan, per bēn guiēt por naj, zajpaman guialnaban tiblayaa con Dios. ²⁵ ¿Xhie gan güün bejn gapaman gra ni yu' loj guidxliuj abi' nitaman loj Dios? ²⁶ Bal chu ratu guza't naj nē da diidxan, ziangajc naj najn Bēn guxhaal Dios, yatunē'n laaman chi guialan con da guialrniabeen loj xbiani da Dadan nētēē loj xbiani ree xianjlaman. ²⁷ Per diidxliczi rnin loj di, yu' ree bēn za' guie ad zējtt xt guguaa reeman xguialrniabee Dios.

Bidxaa Jesús loj choon ree xbejnman

(Mt. 17:1-8; Mr. 9:2-8)

²⁸ Chi gudēd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia', binēman Bēd con Waj con Jacob. ²⁹ La'tgaj cabejdx canabaman Dios, bidxaa lojman guiáad xabaman gojcan naquichbēj bidiin tēen bacha'. ³⁰ Dxejcz gulentie tio'p ree bejn, caneenē reeman laaman. Tijbaman naj Moisejs zatijbaman naj Elías. ³¹ Yu' reeman galay biani cayü reeman diidx guial guiēt Jesús Jerusalén. ³² Majsi yu' bacaal loj Bēd nē loj ree xcompniaraman, batie'ch xbaaal reeman persi baguaa reeman xbiani Jesús con zatio'p ree bēn za'nēman. ³³ Chi ma baza ree bēn caneenē Jesús, rēb Bēd lojman:

—Mextr, ¡zagdxen nadxu' ree guie! Zajc yaguieenan choon ranch, tijban par lūj, tijban par Moisejs zatijban par Elías.

Per ad ragbeet Bēd xhienin caneeman. ³⁴ La'tgaj caneeman zian, biguiajt tijb zaj xt guijc reeman, chi ma yu' reeman lēn zaj guin dād bidxeb reeman. ³⁵ Dxel loj zaj guin biguien cha' bejn, rēbaman:

—Bēn guie naj da Xi'nan bēn rēn da'tan. Gol bacaagdiajg xtiidxaman.

³⁶ Chi gulox biguien cha'man loj zaj guin, baguaa reeman xtijbzi Jesús za'man. Abi' ad gutie'cht reeman diidx. Lēn ree dxej zii achutcz loj rēb reeman ni baguaa reeman.

Rayūjn Jesús tijb xin yu' xindxab luxdoo

(Mt. 17:14-21; Mr. 9:14-29)

³⁷ Bareguiaa, chi baguiajt reeman guijc guia' guin, dād benzien brii bigchaagloj Jesús. ³⁸ Abi' tijb bēn no'ch loj reeman guridxa', rēbaman lojman:

—¡Mextr!, been wen baguaa da xi'nan din tijbzi laax ra'pan. ³⁹ Tijb xindxab ru luxdoox abi' rucwixdiajx laax, rugūjtya'x laax rbēē tēēx bichijn ro'x. Dād rusagdiajx laax ad rēntix guslaax laax. ⁴⁰ Ma gunaaban loj ree xbejn loj nabēē reeman xindxab guin, per ad gojct reeman.

⁴¹ Badxi' Jesús laan rēbaman:

—¡Benguijdx, bēn ad riladxt! ¿Xt goc gazunē'n lējt gadaan tēen lējt? Tanē xi'nl guie.

⁴² Chi cabig xin guin basajb xindxab guin laax luyuj, bagūjtya'x laax zatijb. Per gunabee Jesús barii xindxab

guin, bayūjnman laax dxel bayūman laax loj xdadix.

⁴³ Graczi reeman badxaloj guialrniabee ni rajp Dios.

Rugojn Jesús zatijb guial guiētaman

(Mt. 17:22-23; Mr. 9:30-32)

La'tgaj caydxa loj reeman ni cayūjn Jesús, rēbaman loj ree xbejnman:

⁴⁴ —Gol bacaagdiajgchaaw ni ganin lējt: yayü reeman Bēn guxhaal Dios loj ree bejn.

⁴⁵ Per laa reeman ad bignia't reeman ni rnieeman guial ad badēētaman mod nignia' reeman, abi' bidxeb reeman niniabdiidx reeman lojman xhie rēn guiēb ni rēbaman.

¿Chu mazri zojbloj?

(Mt. 18:1-5; Mr. 9:33-37)

⁴⁶ Dxel guzuloj ree xbejnman rēb loj lasa' reeman chu loj gra reeman mazri zojbloj. ⁴⁷ Per gogbee Jesús xgab ni cayūjn reeman abi' cwa'man tijb xindoo, bazujman laax cwē'man, ⁴⁸ dxel rēbaman loj reeman:

—Bēn ridxga' tijb xindoo por naj, najn ridxga'man, guiáad bēn ridxga' naj, bēn guxhaal najn ridxga'man. Din bēn rūjn sirv lojdi, laaman mazri zojbloj lojdi.

Bēn ad za't contr dunuj ree za'man con dunuj ree

(Mr. 9:38-40)

⁴⁹ Rēb Waj loj Jesús:

—Mextr, baguaan tijb bejn rabēēman xindxab luxdoo ree bejn por xguialrniabeel. Per badxoonan guial ad najtaman dux bejn ree.

⁵⁰ Per rēb Jesús lojman:

—Ad rudxoondi, din bēn ad za't contr dunuj ree, za'man con dunuj ree.

Gudilē Jesús Jacob con Waj

⁵¹ Chi ma cadxin dxej yayē'p Jesús xanyabaa, dxel beenman xgab guial rūjn naguiejn cheman Jerusalén.

⁵² Guxhaalaman bēn guned ree, wej reeman tijb guiedxdo nulen Samaria bitiil reeman lod yaya'n reeman. ⁵³ Per ad cwējbt ree bēn Samaria guin nudēēd reeman lod naya'nman guial gogbee reeman cheman Jerusalén. ⁵⁴ Chi baguaa Waj con Jacob zian, rēb reeman lojman:

—Dad, ¿rēnl ya yanabeen guiat bajl xanyabaa din gunijtan bēn guin ree zi'c been Elías bēn badēē xtiidx Dios loj ree bejn?

⁵⁵ Dxel badxi' loj Jesús loj reeman, abi' gudilēman laa reeman rēbaman:

—¿Nid ragbeedi ya guial loj xindxab zēēd ni rnieedi?

⁵⁶ Naj, Bēn guxhaal Dios, ad zialtan din gunijtan xguialnaban bejn loj Dios, zialan din yabēn laa reeman loj dol.

Dxel zē reeman zatijb guiedx.

Bēn rēn chinal Jesús

(Mt. 8:19-22)

⁵⁷ Chi zē reeman lunejz, tijb bejn rēb loj Jesús:

—Dad, rënan guidnaalan lüj bantëez guin chel.

⁵⁸ Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

⁵⁹ Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëta-man.

⁶⁰ Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

⁶¹ Dxel rëb zatijb bén guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

⁶² Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdx. Ziangajc bén rën guidnal naj, bal id zusa'nman graczi tiblax ad zile't chu'man loj xguialrniabee Dios.

Rxhial Jesús gayojnchii bejn

10 Chi gudëd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman. ² Rëbaman loj reeman:

—Diidxliczi, zien bejn rën gucaagdiajg xtiidx Dios, per ad zient bén gulüü laa reeman yu'. Zeel gol gurejdx gunab Dios din guixhiaalaman mazri zien bén gulüü laa reeman. ³ Gol chej, naj rxhial lëjt zi'c rej ree xiil galay ree cuyojt. ⁴ Ad chinëdi guijxh, ni'qui milia, ni'qui zatib nejx xgurëchidi, ad sudxedi guinieenëdi bejn ree runejz. ⁵ Bantëez lënü chu'di, yalojxgaj gol gūjdx: "Dios yabe'cdxe luxdoodi." ⁶ Abi' bal lënüzii yu' ree bén rayal guialnaza'c guin, zaya'n nan yagaj. Guiáad bal id rayal reeman laan zayejcan con lëjt. ⁷ Yagaj gol baya'n, gol gudaw, gol gu' ni gunee reeman. Din bén rüjn dxiin rayal gaxaman. Yagajzi gol baya'n ad bal yaya'ndi lood ren. ⁸ Chi guidxindi tijb guiedx lod yaca' reeman lëjt, gol gudaw ni gunee reeman. ⁹ Gol bayün ree bénragxuu yu' ree luguiedx guin, gol gūjdx tēē loj reeman: "Ma zëed xguialrniabee Dios gajxh par lëjt."

¹⁰ Per bal guidxindi tijb guiedx lod ad rënt reeman yaca' reeman lëjt, gol brii lunejz, gol gūjdx loj reeman:

¹¹ "Xt xgoxyuj ladxidi ni cwa du guia'n, radxiijpan zi'c tijb sen guial ad bidxga'tidi dux tiidxan. Per gol gogbee, guial ma zëed xguialrniabee Dios gajxh par lëjt." ¹² Naj rni lëjt guial dxej yadëed ree bejn cwent loj Dios, mazri casti naroob yaya' reeman guial loj ree bén gure guiedx Sodoma.

Bén ad bazoobt ree xtiidx Dios

(Mt. 11:20-24)

¹³ Rëb tēē Jesús:

—¡Probza lëjt bén Corazín! ¡Probza lëjt bén Betsaida! Din bal guiedx Tiro në guiedx Sidón niajc gra ree mila-

gr ni goc ladxidi, diizd gocli nayün reeman xgab por xtol reeman, niajcw reeman lajd ya's nuroob tēē cob-dëj guijc reeman zi'c tijb sen guial ma bayün reeman xgab por xtol reeman. ¹⁴ Per rnin lojdi guial dxej yadëed ree bejn cwent loj Dios, mazri casti naroob yaya'liidi guial loj ree bén Tiro në ree bén Sidón.

¹⁵ Guiáad lëjt, bén Capernaum, ad naladxidi yaya'liidi xanyabaa, lëjt yaya' gabijl.

¹⁶ Dxel rëb Jesús loj ree xbejnman:

—Bén ridxga' lëjt, najn ridxga'man, per bén ad ridxga't lëjt, najn ad ridxga'taman. Guiáad bén ad ridxga't naj, bén guxhaal najn ad ridxga'taman.

Badxin ree bén gayojnchii guxhaal Jesús

¹⁷ Chi badxin ree bén gayojnchii guxhaal Jesús, dád rabaa reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

¹⁸ Abi' rëb Jesús loj reeman:

—Waliquidi, naj baguia, zi'czi rë'p nijs basëeb xguialrniabee xindxab. ¹⁹ Naj banee lëjt guialrniabee din gulëedi guijc ree bëel në guijc ree nixüb, në par güün-di gan loj xguialrniabee xindxab sin guial güünx lëjt xhienin. ²⁰ Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

Rabaa Jesús

(Mt. 11:25-27; 13:16-17)

²¹ Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdx, Dad, lüj rniabee xanyabaa në loj guidxliuj, din ni baquie'chil loj ree bén rajc në loj ree bén rignia', laan ma balüül loj ree bén ad rajcza'ct. Zian gojcan Dad, din zian guyën.

²² 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tēet nünbee Dios, tijbzi Jesucrist xi'nman con ree bén rënman güünbee Dios.

²³ Dxel baguiaaman loj ree xbejnman, abi' rëbaman lojzi reeman:

—Xiquilbaa ree bén guguaa ni cuguaadi. ²⁴ Din naj rni lojdi, zien ree bén badëe xtiidx Dios loj ree bejn në ree rey guyën nuguaa ni cuguaadi, per ad baguiaat reeman laan. Guyën reeman nucaagdiajg reeman ni cucaagdiajguidi, per ad bacaagdiajgt reeman laan.

Xcwent tijb bén Samaria

²⁵ Tijb mextr rajc ley guzuliman guneenëman Jesús. Abi' din güünman laaman prueb, gunabdiidxaman lojman rëbaman:

—Mextr, ¿xhie rayal günan din ga'pan guialnaban tiblayaa con Dios?

²⁶ Badxi' Jesús laan rëbaman:

—¿Xhie ca loj ley badëe Dios loj Moisejs? ¿Xhienaag rignia'lan?

²⁷ Abi' rëb mextr guin:

—“Guyèn xDadil Dios guidib guiyc guidib ladxil guyèn tèè ben ren zi'c rën lüj gajc.”

²⁸ Badxi' Jesús laan, rëbaman:

—Zagdxequi badxi'lan. Bal güünl zian zajpil guialna-ban tiblayaa con Dios.

²⁹ Per guyèn mextr guin naya'nman zagdx, gunab-diidxaman loj Jesús, rëbaman:

—¿Chu bénan guiënan zi'c rën naj gajc?

³⁰ Dxel be Jesús tijb cwent lojman, rëbaman:

—Tijb Bén Israel briiman Jerusalén zëman guiedx Jericó. Abi' gunaaz ree xingubaan laaman, gudijn reex laaman gulan tèè reex gra ni ca'man xt në xabaman, basa'n reex laaman ma güjtczaman. ³¹ Dxel gudëd tijb bixhioz niz yagaj, per chi baguiaaman Bén guin, zijt bicaaman volt, zëtaman. ³² Në tijb Bén Levita Bén rüjn yudar bixhioz ree, gudëd niz yagaj, chi baguiaaman Bén guin, zijt bicaaman volt, zëtaman. ³³ Per tijb Bén Samaria gudëd niz yagaj, chi baguiaaman Bén guin, bayaman laaman, ³⁴ dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binëman laaman lëñü lod raya'n ree bejn. Yagaj gunajman laaman. ³⁵ Chi bareguiaa, chi ma yaguiaj Bén Samaria guin, gulëëman milia xieen tio'p dxej dxiin badëëman laan loj Bén naj lidxan, rëbaman lojman: “Gunaj Bén guie, bal gunijtil mazri, naj yaguix laan chi yaye'can.”

³⁶ Dxel rëb Jesús loj mextr guin:

—Yan, loj guiyon ree Bén guin, ¿chu Bénan guyèn Bén gudin ree xingubaan guin?

³⁷ Badxi' mextr guinan rëbaman:

—Bén baya laaman.

Dxel rëb Jesús lojman:

—Baguiaj, been ziangajc con ben ren.

Rignaj Jesús Mart në Li

³⁸ Basnuu Jesús zëman abi' bidxinman tijb guiedx-doo, yagaj wejman lidx tijb biin la Mart. ³⁹ Yu' tijb xbëlim lam Li. Gurej Li guin guia' Jesús cucaagdiaiguim ni caneeman. ⁴⁰ Per Mart guin mazri ruquiejnne gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Güjdx lojm din güünm naj yudar.

⁴¹ Badxi' Jesús laan rëbaman:

—Mart, Mart, dád rul xgab guial yu' da't xmandadil.

⁴² Per tijbzi ni mazri zojbloj yu'. Li gulejm ni mazri zojbloj, abi' achut zajc chiquiedan lojm.

Rulüü Jesús xhienaag cwedx guiniab bejn Dios

(Mt. 6:9-15; 7:7-11)

11 Tijb dxej cabejdx canab Jesús Dios. Abi' chi gu-lox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj Bén baroobnijs bejn ree.

² Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,

rayal yaya'p da'tan lajl respekt.

Gac zi'c rniabeel.

Gac zi'c rën loj guidxliuj, zi'c rajc xanyabaa.

³ Bazaladx ni yadaawan guixie guixie.

⁴ Been dunujn perdon gra ree ni mal ma baguieenan, zi'c raguieenan perdon Bén rüjn ree dunujn ni mal.

Ad tiëbil güün xindxab dunujn gan yaguieenan dol, babëë dunujn loj gra ni mal.

⁵ Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidxix, guiëbidi: “Miw, baneesii choon guidxtil gagui'nan, ⁶ din bi't tijb da miwan abi' achet ra'pan gudëdan lojx.” ⁷ Dxel nax diidz lëñü guin: “Ad ruslenl naj. Ma nayaaw ro' da portan. Ma naga'yë'snë' ree da xi'nan. Ad zile't chixchejn gunen laa reen.” ⁸ Per rnin lëjt, majsi bal id zixchex din gunee ni ryaadxidi guial rajc xmiwidi laax. Per züjnx naguiejn chixchex din gunee ni ryaadxidi chitëë guslenridi laax. ⁹ Zeel rnin lëjt: Gol gunab loj Dios, laaman gunee ni rniabidi. Gol baguiilaman, zadxejlidi laaman. Gol gurejdx gunabaman, zidxga'man lëjt. ¹⁰ Din Bén rniab, zaca'man. Abi' Bén rguil, zadxejlaman guiáad Bén rbejdx rniab laaman zidxga'man laaman.

¹¹ ¿Lëjt najdi dad, wen zudëëdi tijb guiaj loj xi'ndi ya chi guiniabix guidxtil?, ¿o zudëëdi tijb bëel ya chi guiniabix bëjl? ¹² ¿O zudëëdi nixüb ya chi guiniabix dxi-jt? ¹³ Nacli lëjt najdi bëndol rajc rudëëdi ni zagdx loj xi'ndi. ¿Diidxgui xDadidi Bén yu' xanyabaa, nid zudëë xSprijtaman loj ree Bén rniab laaman ya!

Rëb ree bejn ca' Jesús xguialrniabee Beelzebú

(Mt. 12:22-30; Mr. 3:19-27)

¹⁴ Caybëë Jesús tijb xindxab basa'n tijb bejn gop. Abi' chi barii xindxab guin guzuloj canee Bén guin. Dxel dád badxaloj ree bejn. ¹⁵ Per yu' reeman rëb:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

¹⁶ Yu'za reeman par güün reeman laaman prueb, rëb reeman lojman din güünman milagr zëëd xanyabaa.

¹⁷ Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman. ¹⁸ Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabeex. Canin zian guial rëbidi por xguialrniabee Beelzebú rabën xindxab luxdoo ree bejn. ¹⁹ Per bal rabën xindxab luxdoo ree bejn por xguialrniabee Beelzebú, ¿chuza rudëëd guialrniabee loj ree xbejndi din yabëë reeman xindxab? Zeel laagajc reeman rulüü guial ad laat rnieedi. ²⁰ Per por xguialrniabee Dios rabën xindxab luxdoo ree bejn, laan rën guiëb guial ma za'në xguialrniabee Dios lëjt.

²¹ Bal tijb béngojl da't ca' xguibaman, rajp lidxaman. Ad zajct cwan bejn ni rajpaman. ²² Per bal guidxin Bén mazri gojl guial lojman güünman laaman gan abi' chisüdaman guib ni ca'man tia' tëëman gra ni rajpaman.

²³ 'Bén ad za't con naj, za'man contr naj, guiáad bén ad ruto'pt bejn par naj rtie'chaman laa reeman.

Xindxab rayejc
(Mt. 12:43-45)

²⁴ 'Chi rarii tijb xindxab luxdoo tijb bejn, abi' rza xindxab guin niz loj yujbidx rguilix lod yaziiladxix. Chi ad rdxejlt lod yaziiladxix, dxei rüjnx xgab naladxix: "Za-gdxeli yaye'can lod bariin." ²⁵ Abi' chi rayejquix ruguiaax luxdoo bén guin, najn zi'c tijb lëñü lod bilioob lod najcchaaw tää. ²⁶ Dxei rica'x zagajdx ree xindxab naj mazri xinmal guial lojx. Abi' ru gra reex luxdoo bén guin. Dxei piorli raya'nman guial zi'c gocaman yaloj.

Xiquilbaa ree bén ruzoob xtiidx Dios

²⁷ La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—iXiquilbaa béngunaa bazuj lüj loj guidxliuj, bén baslaa tää lüj!

²⁸ Per badxi' Jesús laan rëbaman:

—iMazri xiquilbaa ree bén rucaagdiajg xtiidx Dios ruzoob tää reeman xtiidxaman!

Rniab ree bejn güün Jesús tijb milagr
(Mt. 12:38-42; Mr. 8:12)

²⁹ Zi'cri cado'p ree bejn lod za' Jesús, abi' guzuloj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaa reeman, tijbzi zi'c guzac Jonás bén badëë xtiidx Dios loj ree bejn. ³⁰ Zi'c goc Jonás tijb sen par ree bén gure guiedx Nínive, ziangajc Bén guxhaal Dios najman tijb sen par ree bén naban yan. ³¹ Abi' bén goc reina guiedx Sabá, zabanman chi yadëëd ree bejn cwent loj Dios dxei guiëbaman guial ree bén riga' yan, yayal reeman xcasti Dios. Din laaman dád zijt guzaman bicaagdiajgaman xguialrajc rey Salomón. Abi' yan, naj za'në'n lëjt, mazri lasajcan guial loj rey Salomón. ³² Ziangajc ree bén guban guiedx Nínive, zaban reeman chi yadëëd ree bejn cwent loj Dios abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

Guiaaloj bejn naj zi'c biani
(Mt. 5:15; 6:22-23)

³³ 'Achut rucaaguij tijb guij par sun lod naguie'ch, achu tää ruta'cw laan lën tijb yagalm. Rayal sun lod guiguienan din gusnin loj bén chu' lënü. ³⁴ Guiaaloj bejn naj zi'c tijb biani par xcuerpaman. Bal por ni ruguiaal rüjnl ni zagdx, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay. ³⁵ Gojp cudad chitëë chinë guiaalojl lüj loj nejz mal luar loj nejz zagdx. ³⁶ Abi' bal ni'qui tibda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

Ni rüjn ree mextr rajc ley në ree bénfarisew
(Mt. 23:1-36; Mr. 12:38-40; Lc. 20:45-47)

³⁷ Chi gulox gunee Jesús laa reeman, tijb bénfarisew rëb loj Jesús din chitaw Jesús lidxaman. Chi guyuman, zianz gurejman xan mex. ³⁸ Abi' bénfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman. ³⁹ Per rëbaman loj reeman:

—Najdi zi'c tijb vajs con pliajt ni naya xijch, rguienti benza'c, per luxdoodi yu' da't guialgubaan në ni mal. ⁴⁰ iBennad! iNid bén been gajc xcuerpidi been luxdoodi ya? ⁴¹ Zeel gol been yudar bén achet rajp din guiguien guial najquidi benza'c.

⁴² i'Probza lëjt bénfarisew! Rbëëcadi ni naj par Dios, rüjndi chii lala' ni rajpidi zi'c bidxtil në rud në graloj ni rxübindi abi' rudëëdi tijban loj Dios. Per ad rüjntidi zi'c rayal ad rën täädi Dios. Gol bidxga' Dios ad gucwëëz tää gudëëdi ni rudëëdi lojman.

⁴³ i'Probza lëjt, bénfarisew! guial ruladxidi cwedi lod rbej ree bén zojbloj lën ree yadoo, ruladx täädi gugajpdioz ree bejn lëjt zagdx niz lunejz.

⁴⁴ i'Probza lëjt, mextr rajc ley në lëjt bénfarisew, bén rusquiee!, din najdi zi'c baa ni ad rguient, abi' ad ragbeet ree bejn rë'p reeman guijcan.

⁴⁵ Dxei gunee tijb mextr rajc ley, rëbaman loj Jesús: —Mextr, në dunujn caneeguijdxil guial rëbil zian.

⁴⁶ Badxi' Jesús laan rëbaman:

—iZiangajc lëjt mextr rajc ley, probza lëjtl, guial rniabeedi bejn ree güün reeman ni nawëëgda't abi' rniabeezidi güün bejn zian guiáad lëjt ni'qui ta'n ad rüjntidi laa reeman yudar din güün reeman zi'c rëndi.

⁴⁷ i'Probza lëjtl, guial rüjnchaawidi xbaa ree bén badëë xtiidx Dios loj ree bejn, bén bagüjt gajc ree xbéngulalidi. ⁴⁸ Zian ragbee ree bejn guial ruladxidi ni been ree xbéngulalidi. Laa reeman bagüjt ree bén badëë ree xtiidx Dios loj ree bejn, guiáad lëjt rayüjnchaawidi xbaa reeman.

⁴⁹ 'Zeel Dios guial ragbeeman gra ni gac, rëbaman: "Gaxhalan bén rudëë ree xtiidx Dios loj ree bejn, në ree apóstoles, yu' reeman gugüjtidi yu' tää reeman sunalidi din güündi laa reeman xhienin." ⁵⁰ Abi' bén naban ree yan, laa reeman yadëëd cwent loj Dios por rejn ni guxhie' ree bén badëë xtiidx Dios loj ree bejn, bén güt ree diizd chi go'tchaaw guidxliuj, ⁵¹ diizd xrejñ Abel xt xrejñ Zacarías bén bagüjt reeman ro' yadooro' Jerusalén. Zeel rnin lëjt guial ree bén naban yan, laa reeman quix por gra reeman.

⁵² i'Probza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rüjnt naguiejn chu'di loj xnejz Dios abi' rudxoondi chu' ree bejn loj xnejzaman.

⁵³ Chi gunee Jesús zian, dád bidxe'ch ree bénfarisew guin në ree mextr rajc ley. Abi' guzuloj zien ree ni rniabdiidx reeman lojman, ⁵⁴ din guidoon xhie guiëbaman din chile' gutedia' reeman laaman.

Xlevadur ree bénfarisew

12 La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloj loj ree xbejnman:

—Gol gojp cudad con xlevadur ree bénfarisew, rën guiëban gapidi cudad con ni rusquiee reeman. ² Din achet ni naguie'ch yu' ni ad zaguiet, ad yu' tēet ni ralan ni ad zagbeet bejn. ³ Zeel gra diidx ni ma gunee-di lod nacay, zaguietn ree bejn laan lod nayni. Guiáad ree diidx ni ma guneedi ralan lēnū, yu' chi cwidxa' ree-man guiniee reeman diidx guin ree diidx guijc ree yu.

Chu rayal guidxeb bejn

(Mt. 10:28-31)

⁴ Rnin lējt, ad ridxebidi bēn rēn ree gugūjt lējt din zile' gugūjt reeman xcuerpidi, sa'n xsprijtidi ad zile't gugaal reeman laan. ⁵ Ganin lējt chu rayal guidxebidi: gol bidxeb Dios bēn rajp guialrniabee guial chi ma biquiedaman xguialnabandi zajc guzaalaman lējt gabi-jl. Zeel gol bidxebaman.

⁶ Lējt ragbee guial biguijndoo ree ad lasajct reeb wayējx, per Dios ad rayanladxtaman ni'qui tijb reeb. ⁷ Guiáad lējt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

Bén rēb loj ree bejn guial najman xbejn Jesucrist

(Mt. 10:32-33; 12:32; 10:19-20)

⁸ Rnin lējt, chutēēz bēn guiēb loj ree bejn guial najman da bejnan, ziangajc naj najn Bēn guxhaal Dios guiēn loj ree xianjl Dios guial da bejnan najman. ⁹ Per bēn guiēb loj ree bejn guial ad najtaman da bejnan, ziangajc guiēn loj ree xianjl Dios guial ad najtaman da bejnan.

¹⁰ Chutēēz bēn guinieeguijdx Bēn guxhaal Dios zajcaman perdon, sa'n bēn guinieeguijdx xSprijt Dios, ad zajctaman perdon.

¹¹ Chi chinē reeman lējt lēn ree yadoo o loj ree juejs nē loj ree guxtis, ad aal chu'di xgab xhienaag yadxi'di xtiidx reeman. ¹² Din chi guidxin hor ni guinieedi, xSprijt Dios gunee diidx guinieedi.

Xcwent tijb xinrijcw

¹³ Tijb bēn no'ch loj ree benzien guin rēb loj Jesús: —Mextr, gūjdx loj da bichan din guneex ni rayalan.

¹⁴ Per rēb Jesús lojx:

—¿Chu bazuj naj gūnan guialguxtis o gagui'san ni tia'di?

¹⁵ Rēb tēēman loj reeman:

—Gol gojp cudad; ad sēēbladixidi gapidi ni rajp ree ben ren, din ad ni rajpt bejn runee guialnaban.

¹⁶ Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. ¹⁷ Dxel beenx xgab naladxix: “¿Xhienaag gūnan? Ad ra'ptan lod gagu'chaawan guialnaza'c guin ree.” ¹⁸ Abi' gunal-

adxix: “Ma ragbeen xhienaag gūnan. Guse'nan yu lod rgu'chaawan da guialnaza'can din gūnan mazri yu na-roob ree lod gagu'chaawan laa reen, nē graczi ni ra'-pan. ¹⁹ Dxel guiēn, dád zien guialnaza'c ra'pan par zien ijz, yaziiladxan, gawan, guiē'n yabaa tēēn.” ²⁰ Per rēb Dios lojx: “Xin tont, yanguxhin gajc guiētil, laadx ni nagu'chaawil, ¿chu yaya'nnē laan?”

²¹ Zian rzajc bēn rgu'chaaw ni za'c par laagajcaman, per loj Dios achet rajpaman.

Achetczi rayal chu' bejn xgab

(Mt. 6:25-34)

²² Dxel rēb Jesús loj ree xbejnman:

—Naj rni lējt: Ad chu'di xgab por ni gawidi par guibandi ni'qui por lajd ni gacwidi. ²³ Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman. ²⁴ ¡Gol baguiaa balo ree! Ad rxübint reeb ad rato'p tēet reeb guialnaza'c, ad rajp tēet reeb lod yagu'chaaw reeb guialnaza'c guin, per Dios rudēēd ni raw reeb. ¡Abi' mazri lasajquidi guial loj reeb! ²⁵ ¿Wen guial ru da'tidi xgab ma gūn lējt gajc mazri ziool ya? ²⁶ Abi' bal ni'qui zian ad zile't gūndi, ¿xhieczy gan rudi xgab por ni ren ree?

²⁷ ¡Gol baguiaa xhienaag rini's ree guiaa dajn! Ad rūjnt reen dxiin ad rguib tēet reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman. ²⁸ Abi' bal gui'xh dajn ruzujchaaw Dios yan, majsi guixiezi che'can. ¡Diidxgui lējt, bēn ad rliladxza'ct ree laaman nid zuneeman ni gacwidi ya! ²⁹ Zeel ad rudi xgab xhie gawidi o xhie guiē'di, ad bal tib yu'zidi laan xgab. ³⁰ Din bēn ad nūn-beet ree Dios rūjn zian. Laa reeman ru xgab por gra ree ni guin. Per lējt yu' xDadidi, laaman ragbeechaaw xhienin riaadxidi. ³¹ Per yalojxgaj gol baguiil gūndi zi'c rniabee Dios, laaman gunee gra ni ryaadxidi.

Guialnaza'c yu' xanyabaa

(Mt. 6:19-21)

³² Lējt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenēdi laaman.

³³ Gol bato' ni rajpidi din gudēēdan loj ree bēnprob. Gol been naguiejn gūndi gan guialnaza'c ni ad rarar ni yu' xanyabaa, lod ad zut xingubaan cwan laa reen lod ad zacabe tēet reen. ³⁴ Din lod rajpidi guialnaza'c guin, yagaj za' xquiarguiejndi.

Gol guzujsin

³⁵ Gol guzujsin zi'c bēn ma najcw xab ca' tēē xguijman par griiman. ³⁶ Gol been zi'c ree mojs cabēz yadxin xpatron reex, bēn zē loj guialruxhlaa, din diob guixhial reex ro' port yayuman chi gucaaman. ³⁷ ¡Xiquilbaa ree mojs naga'nnaa cabēz xpatron reex! Naj rni lējt, laagajc patron guin cwe'c laa reex xan mex, dxel chicchaa xabaman din gudēēman ni gaw reex. ³⁸ Xiquilbaa reex bal guidxaagloj xpatron reex laa reex naga'nnaa reex, majsi yadxinman garol guiaal o chi ma cayreguiaal ya. ³⁹ Gol been xgab, bal tijb bejn ragbeeman xhie hor

chu' xingubaan lidxaman cwanx, ad zatiëjbtaman chu'x lidxaman. ⁴⁰ Zianan zeel gol guzujsin din ad rag-beetidi dxejczy gui't Bén guxhaal Dios.

Mojs za'c në mojs guiidx
(Mt. 24:45-51)

⁴¹ Dxel gunabdiidx Béd loj Jesús, rëbaman:
—Dad, ¿par dunujzan bel cwent guin ya o par gra ree bejn?

⁴² Badxi' Jesús laan, rëbaman:
—¿Chu lëjt naj zi'c tijb mojs za'c, nazobdiidx, rusa'n xpatronx laax lidxaman persi rulenx gra ree mojs rudëë tëëx ni raw reex chi rajl hor? ⁴³ Xiquilbaa mojs cayüjn dxiin zagdx chi yadxin xpatronx. ⁴⁴ Din di-idxliczi rnin lëjt, zusa'n gra xieen patron guin loj mojs guin. ⁴⁵ Per bal naladx mojs guin: “Zaglaari yaguaad da patronan”, zianz sulojx gusagzix gra ree bén rüjn dxiin yagaj, zi'c béngunaa zi'c xinguaaw, dxei suloj gawix, guië'x südx tëëx, ⁴⁶ abi' yadxin xpatronx tijb dx-ej ni ad rbëztix në tijb hor ni ad ragbeetix. Dxel dád casti narooob gudëëd patron guin laax, guixhiaalaman laax lod rayal ree bén ad ruzoobt diidx.

⁴⁷ “Din tijb mojs ragbee ni rën xpatronx güünx, abi' ad za'tix porvinid ad ruzoob tëëtix diidx, dád casti narooob tëdix. ⁴⁸ Per mojs ad ragbeet ni rën xpatronx güünx abi' güünx ni rayal casti, ta'nz tëdix casti. Din bén badëëd Dios quiargueijn, mazri zien ni rayal güünman por quiargueijn ni badëëd Dios lojman. Ziangajc bén badëëd Dios guialrniabee, mazri zien ni rayal güünman por guialrniabee ni badëëd Dios lojman.

Por Jesús rlia' lasa' ree bejn
(Mt. 10:34-36)

⁴⁹ “Zialan loj guidxliuj zi'c tijb bén zidgacaaguij xhienin, abi' ;ma rën nejzdoon tiaguijn! ⁵⁰ Gazaagdiajn guiët tëën, abi' ;dád yu'nayan diizd yan xt chi gacan cumplid! ⁵¹ Ad naladxidi zialan loj guidxliuj par yabecdxeen luxdoo bejn, zialan din guial guililadx ree-man naj chu' wadijl. ⁵² Din diizd yan, lod naj reeman gaay loj tijb famil, til choonman contr tio'paman, tio'paman contr choonaman. ⁵³ Dad su contr xi'nman guiáad xi'nman su contr laaman; na su contr xi'ndxa'-paman guiáad laam su contr laaman; abi' nasuegr su contr xwalidxaman guiáad laam su contr laaman.

Sen rguien xanyabaa
(Mt. 16:1-4; Mr. 8:11-13)

⁵⁴ Rëb tëë Jesús loj ree benzien guin:
—Chi ruguiaadi ririi zäj niz lod rëëz gubijdx, rëbidi: zal guia, abi' rajc gajc zian. ⁵⁵ Abi' chi ririi bi niz sur, rëbidi: gac nalaa, abi' rajc gajc zian. ⁵⁶ ;Bén rusquiee! Ragbeedi xhie rën guiëb sen rguien xanyabaa në loj guidxliuj, ¿chexquiza zeel ad ragbeetidi xhie rën guiëb ni cayajc loj guidxliuj yan?

Babej zagdx con Bén rdxe'ch lüj
(Mt. 5:25-26)

⁵⁷ ¿Chexc ad rüjnt lëjt gajc xgab conin naj ni zagdx? ⁵⁸ Bal chu Bén rudëëd lüj loj guxtis, been nagueijn baya'nnëman diidx zagdx la'tgaj yu' tiamp, chitëë yayüman lüj loj guxtis, abi' guxtis guin yayü lüj loj ree Bén cu' lüj ladxguiib. ⁵⁹ Naj rni lüj, ad zariitil ladxguiib guin xtczi quixil gra ni na guxtis guin.

Gol bayüjn xgab por xtolidi

13 Lën gajc ree dxejzii wej tio'p choon ree bejn biguie reeman diidx loj Jesús guial bagüjt Pilato tio'p choon ree Bén Galilea, abi' bago'chaman xrejn reeman con xrejn ree be bagüjt reeman par gudëëd reeman loj Dios zi'c gon. ² Dxel rëb Jesús:

—Ad bal naladxidi guzajc ree Bén Galilea guin zian guial naj reeman mazri bëndol guial loj gra ree Bén Galilea. ³ Din naj rni lëjt guial ad ziantan. Abi' bal id za-yüjndi xgab por xtolidi ziangajc saquidi. ⁴ Ad bal naladxidi Bén chiinbichoon güt ree chi guxa't torre ni la Siloé laa reeman, naj reeman mazri bëndol guial loj gra ree Bén zojb Jerusalén. ⁵ Naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

Xcwent yag higo ni ad rtiat

⁶ Dxel be Jesús tijb cwent loj reeman, rëbaman:
—Tijb bejn gojpaman yag higo lod nagu'man uv, abi' biquiaaman bal ca higo lojn, per achetczy bidxaagloj-man. ⁷ Dxel rëbaman loj Bén rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetczy rdxaglojn. Batüügan din nawëëgzi rüjnan loj guidxliuj guie.” ⁸ Per rëb Bén rajp guidxliuj guin: “Dad, basa'nsiin zatib ijz, yabeciaan yuj xanan gagu' tëënan abon. ⁹ Rupent zian tian, per bal id zacan dxei tügen.”

Bayüjn Jesús tijb béngunaa ca bëw xijch

¹⁰ Tijb dxej raziiladx ree bejn, culüü Jesús bejn ree lën tijb yadoo, ¹¹ yagaj za' tijb béngunaa ma gojc chiinbi-choon ijz ragxuuman, tijb xindxab basa'n laaman con tijb bëw xijchaman, ad rile'tczy yaliman. ¹² Chi baguiaa Jesús laaman, gurejdxaman laaman, rëbaman:

—Na, ma bayajquil guialguiidx ni goquil.

¹³ Dxel badxiib yaaman guijcaman; abi' loj hor guin gajc baliman, zianz guzuloj cuza'taman Dios zagdx. ¹⁴ Per Bén rniabee lën yadoo guin dád bidxe'chaman guial bayüjn Jesús Bén guin dxej raziiladx ree bejn, dxei rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

¹⁵ Badxi' Dad Jesús laan rëbaman:

—Bén rusquiee, ¿nid rxhiec xgo'ndi o xburidi dxej raziiladx ree bejn ya par chiquië'di laa reeb nijs? ¹⁶ Bén-gunaa guie zëëdaman loj xdiaa Abraham, ma gojc chi-

inbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

¹⁷ Chi rëb Jesús zian, gra ree bén rdxe'ch laaman baya'n xtu; per graczi ree bejn rabaa guial ruguaa ree-man gra ree ni zagdxe ni rüjnman.

Xcwent xhaj moxtajs
(Mt. 13:31-32; Mr. 4:30-32)

¹⁸ Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabee-man? ¹⁹ Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidx-an.

Xcwent levadur
(Mt. 13:33)

²⁰ Rëb Jesús zatijb:

—¿Xhienaag ganin naj xguialrniabee Dios? ²¹ Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

Port nadëë
(Mt. 7:13-14, 21-23)

²² Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman.

²³ Abi' tijb bejn gunabdiidx lojman rëbaman:

—Dad, ¿ta'nz ree bén gac perdon ya?

Badxi' Jesús laan rëbaman:

²⁴ —Gol been nagueijn din chu'di niz ro' port nadëë, din naj rni lëjt, zien ree bén rën chu', per ad zile't chu' reeman. ²⁵ Din chi chisu bén naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.” ²⁶ Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.” ²⁷ Per naman lojdi: “Ma rnin, ad ragbeetan ban guzadi. Gol biquied lon bëndol.” ²⁸ Ni goondi gaw tëë layidi chi guguaadi Abraham, Isaac, Jacob, në gra ree bén badëë xtiidx Dios loj ree bejn, za' reeman lod rniabee Dios, guiáad lëjt yariicadi. ²⁹ Din gui't ree bén sa gra lad guidiblagaa guidxliuj din cwe reeman gaw reeman lod rniabee Dios. ³⁰ Abi' zien ree bén bigra yan, laa reeman gac bén yaloj nadxel. Guiáad ree bén naj bén yaloj yan, laa reeman gac bén bigra.

Roon Jesús por Jerusalén
(Mt. 23:37-39)

³¹ Hor guin gajc bidxin tio'p choon ree bénfarisew, abi' rëb reeman loj Jesús:

—Baguiaj, baza niz guie, din rën rey Herodes gugüj-taman lüj.

³² Badxi' Jesús laan rëbaman:

—Gol chej gol chiguiedx loj bén rusquiee zii: “Yan, në guixie yabën xindxab yayün tëën bénragxuu ree, abi'

widx gulooxan.” ³³ Per naj rayal gusnuu da nejzan yan në guixie në widx, din ad najt guial guiët tijb bén rudëë xtiidx Dios loj ree bejn luguiedx ren bal id najn Jerusalén.

³⁴ “Bén Jerusalén, bén Jerusalén, rugüjtidi bén rudëë ree xtiidx Dios loj ree bejn rucaaguaaj tëëdi gra ree bén rxhiaal Dios lojdi! ¡Bëlczi volt guyënan nuchagan lasa'-di zi'c rüjn tijb guid ruchajg lasa' ree xi'nb lën xhiilib, per ad cwëjbtidi! ³⁵ Zianan zeel yaya'n ladxidi zi'c tijb guiedx lod achut zojb. Abi' rnin lëjt, diizd yan ad zuguaatrudi naj xt chi guidxin dxej guiëbidi: “¡Nüjnle' Dios Bén zëed por laaman!”

Rayüjn Jesús tijb bén rzaaguij

14 Tijb dxej raziiladx ree bejn wej Jesús bitawaman lidx tijb bénfarisew rniabee. Yu' ree bénfarisew guin cula'ch laaman xhie güünman, ² guial za' tijb xinragxuu lojman rzaaguij. ³ Dxel gunabdiidx Jesús loj ree mextr rajc ley në loj ree bénfarisew guin, rëbaman: —¿Zajc yayüjn bejn bénragxuu dxej raziiladx ree bejn ya o ad zajctan?

⁴ Per laa reeman achetci rëb reeman. Dxel gunaaz Jesús xinragxuu guin bayüjnman laax, abi' rëbaman loj din yaguaaj. ⁵ Dxel rëbaman loj ree bénfarisew guin: —¿Bal tijb xburidi o tijb xgo'ndi yab lën tijb bizë, nid zabëëdi laab ya, majsi naj dxej raziiladx bejn?

⁶ Abi' achet gojc nadxi' reeman.

Bén rej ree loj guialruxhliia

⁷ Chi baguiaa Jesús rbe ree biooz luar lod rbej ree bén mazri zojbloj, rëbaman loj reeman:

⁸ —Bal chu guinee lüj chel loj tijb guialruxhliia, ad cwel luar rbej ree bén mazri zojbloj. Din zajc guidxin zatijb biooz mazri zojbloj guial lojl, ⁹ abi' gui't bén gunee gropidi naman lojl: “Badëed lod zojbil cwe bén guie.” Dxel rayal chel guidib ratul chisobil loj yagxhil bigra. ¹⁰ Zeel chi guinee reeman lüj, zagdxeli bisob loj yagxhil bigra, din chi gui't bén gunee lüj naman lojl: “Miw, badëd loj tijb luar mazri zojbloj.” Zian, gra ree bén zojbnël xan mex guza't lüj zagdxe. ¹¹ Din bén rlies xvalor gajc, yaya'nxtuman. Guiáad bén rüjn naya zajs xvaloraman.

¹² Dxel rëb Jesús loj bén gunee laaman:

—Bal goc cu'l guialraw, ad guinee xmiwil, ni'qui lasa'l, ni'qui bijchil, ni'qui benrijcw zojbnël gajxh. Din laa reeman yu' dxej guinee reeman lüj, abi' zian yanee reeman ni gudaw reeman lidxil. ¹³ Zagdxeli naj, chi güünl tijb lanij, gunee bénprob ree, në ree bén ad nadaant yaa, në ree bencoj con ree bénlutia'p. ¹⁴ Xiquilbaal bal güünl zian, din laa reeman ad zajct yanee ni badëëdil. Per chi guidxin dxej yaban ree bén bazoob xtiidx Dios, Dios yaguijx laan lojl.

Xcwent bén been tijb lanij

¹⁵ Chi bigueijn tijb bén zojbnë Jesús xan mex ni rëbaman, rëbaman loj Jesús:

—¡Xiquilbaa ree bén yayal gaw lod rniabee Dios!

¹⁶ Dxel rëb Jesús lojman:

—Tijb bejn badxe' guialraw par xche, abi' guneeman zien da't ree bejn. ¹⁷ Chi ma gojl hor gaw reeman xche, guxhaal xmojsaman din chex chiguiedxix loj ree biooz guin: "Gol guda din graczi ma najcchaaw." ¹⁸ Per graczi reeman guzuloj caynab perdon. Bén yaloj guin, rëbaman: "Yan gajczi guzin tijb guidxliuj, rayal chiquianan; been wen gūjdx lojman din gūnman naj perdon." ¹⁹ Zatijbaman rëb: "Guzin gaay nejz go'n, yan chiguienan laa reeb prueb guidoondon rajc rūjn reeb dxiin ya; been wen gūjdx lojman din gūnman naj perdon." ²⁰ Zatijbaman rëb: "Yan gajczi baxhlian zeel ad zile't guialan." ²¹ Chi badxin mojs guin bagojn xpatronx gra ni rëb ree bén guin, dád balenman, dxel rëbaman lojx: "Baquiejn wej niz galay ni, në niz lād ree nejz, tanë gra ree bénprob në ree bén ad nadaant yaa, në ree bencoj con ree bénlutia'p." ²² Chi ma been mojs guin zian, dx-el rëbix lojman: "Dad, ma benan ni nal, per sta yu' gajc luar lidxil." ²³ Dxel rëbaman lojx: "Wej niz loj carreter në niz loj ree nejz la's, been naguiejn ben ren ree din gui't reeman din cha lënü lidxan. ²⁴ Din naj rni lojdi, ni'czi tijb ree bén gunen yaloj ad zajwt guialraw benchaawan par xche."

Ni rayal gūn ree bén rën gac xbejn Jesús

²⁵ Dád zien ree bejn zinal Jesús; abi' badxi' lojman loj reeman rëbaman:

²⁶ —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, në guial loj xi'ndi, o bijchidi o bizandi, rayal tēē guiëndi naj mazri guial loj xguialnabandi, din bal id zūjndi zian ad zajct gaquidi da bejnan. ²⁷ Bén ad rënt sagdiaj guidnal tēēman naj, ad zajct gacaman da bejnan.

²⁸ 'Bal chu rën gūn tijb yu naroob, znid yalojxgaj cweman ya din cwēēman cwent zadaan xmiliaman ya din gulooxaman laan? ²⁹ Din bal sulojman xcimiantan abi' ad zulooxtaman laan, graczi ree bén guguaa laan guze' laaman, ³⁰ guiëb reeman: "Guzuloj cayūjn bén guin yu abi' ad gojct nulooxaman laan."

³¹ 'O bal tijb rey gūn wadijl contr zatiyb rey, znid yalojxgaj cweman ya gūnman xgab zūjn chii mil xsul-dadaman gan loj stijb rey zidnë gajl mil suldad ya?

³² Per bal naladxaman ad zūjntaman gan loj rey guin, la'tgaj sta za' rey guin zijt, guixhiaalaman bén chinë ree xrusonman din yaya'n reeman diidx ad zut wadijl.

³³ Yan, ziangajc rnin lojdi, chutëēz lëjt bal id zusa'n gra ni rajpidi din guidnalidi naj, ad zajct gaquidi da bejnan.

Bal id zajcri zëd naxij

(Mt. 5:13; Mr. 9:50)

³⁴ Dxel rëb Jesús:

—Ni zagdxë naj zëd. Per bal id zajcran naxij, zhxieza naag yayajcan naxij zatiyb? ³⁵ Ad rūjntan sirv par luyuj ni'qui par loj abon, rzëēbzán. ¡Bén rën ree gucaagdiajg, gol bacaagdiajg!

Xcwent xiil gunit

(Mt. 18:10-14)

15 Gra ree bén ruquijx impuest në gra ree bëndol, bibig reeman lod za' Jesús din gucaagdiajg reeman ni rnieeman. ² Guiáad ree bēnfarišew con ree mextr rajc ley rnieeguijdx reeman laaman, rëb reeman:

—Ruchajg bén guin bëndol ree rawnë tēēman laa reeman.

³ Dxel rëb Jesús loj reeman:

⁴ —Bal tijb bejn rajp tibgayuu xiil abi' rniyt tijbib, znid rusa'nman zatajpgajlchiinbitapib dajn ya abi' rigdiilaman xiil gunit guin xt lodzi radxejlaman laab? ⁵ Abi' chi radxejlaman laab rabaaman, rudxiibaman laab dx-idyējman. ⁶ Dxel chi radxin lidxaman, ruto'p ree xmiwaman në ree bén zojbnēman gajxh abi' rëbaman loj reeman: "Gol babaa zi'c rabaan, din ma badxejlan da xiilan be gunit." ⁷ Yan, rnin lëjt, ziangajc rabaanë Dios tijb bén rayūjn xgab por xtol guial loj tajpgajlchiinbitap benza'c ad ryaadxt yayūjn xgab por xtol.

Xcwent milia ni bizëēb

⁸ 'O bal tijb bēngunaa rajpaman chii milia plajt abi' rusëēbaman tijban, znid ruze'caman guij ya rulooob tēēman lënü abi' raguuilaman laan zagdxë da't xt lodzi radxejlan? ⁹ Abi' chi radxejlaman laan, ruto'p ree xmiwaman në ree bén zojbnēman gajxh, abi' rëbaman loj reeman: "Gol babaa zi'c rabaan din ma badxejlan milia basëban." ¹⁰ Yan, naj rni lojdi, ziangajc rabaa ree xianjl Dios por tijb bëndol rayūjn xgab por xtol.

Xcwent bén rūjn perdon xi'n

¹¹ Rëb tēē Jesús loj reeman:

—Tijb bejn yu' tio'p xi'nman. ¹² Abi' xin naj mazri xinguag, rëb loj xdadix: "Dad, banee ni rayal gaca'n." Dxel badëēman ni rayal tijbgaj reex. ¹³ Ad gojct xchej ni cwa' reex ni rayal reex, xin naj xinguag guin bato'gajquix graczi ni badëēd xdadix lojx, abi' con milia guin wejx zijt bignijt xlia'x graczi xmiliax guial beenx ni rëntzix. ¹⁴ Per chi ma banijitix gran, dxel guyu gubijn niz lod za'x abi' guzuloj biaadx ni gawix. ¹⁵ Dxel wejx bignabix dxiin loj tijb bén zojb yagaj, abi' guxhaalaman laax chigajpax cūch ree dajn. ¹⁶ Guial tant rliaanx xt guyēnx niajwix ni raw ree cūch guin, per achut rudëē laan. ¹⁷ Dxel beenx xgab naladxix: "¡Zien ree xin rūjn dxiin lidx da Dadan xt sobr rūjn ni raw reex, guiáad naj guie ma guiētan bējz! ¹⁸ Yan, yazaan yaya' lidx da dadan din guiēn lojman: Dad, ma benan dol loj Dios në lojl. ¹⁹ Ad rayaltri guinieel naj xi'n; been naj cwent zi'c tijb ree xmojsil." ²⁰ Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxūnman bigchaaglojman laax, abi' gudiidxaman laax gudaw tēēman laax xid. ²¹ Dxel rëbix lojman: "Dad, ma benan dol loj Dios në lojl, ad rayaltri guinieel naj xi'n." ²² Per rëb xdadix loj ree xmojsaman:

"Gol baquiejn gol tanë lajd zagdex, gol bascajcwixan, gol badxe' tijb guiibnil yaax gol baslëë tëëx gurëch, ²³ gol chica' go'n mazri nadaan, gol bagüjtib din yadaaw ree yaguieen ree lanij. ²⁴ Din par naj ma güjt da xi'n'an abi' yan ma babanx, gunijtix abi' ma badxexlix." Dxel guzuloj cayüjn reeman lanij.

²⁵ 'La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguejnx cucwejdx reeman cuya' tëë reeman. ²⁶ Dxel gurejdxix tijb xmojs xdadix, gunabdiidix xhienin cayajc lidix. ²⁷ Badxi' mojs guinan rëbix: "Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix." ²⁸ Per dád bidxe'ch xingol guin, abi' ad guyëntix nayux. Zeel wej xdadix biguiedxaman lojx din yayux. ²⁹ Dxel rëb loj xdadix: "Lüj ragbee ma gojc xchej cayünan xchiinl, zianczi ruzoban xtiidxil; per ni'czi tijb ad waneetil tijb dxibdobëz din günnë' ree da miwan lanij. ³⁰ Guiaad yan baguiaad xi'n'l, xin ma bignijt xlia' xmilial con ree búngunaa dxuudx, abi' gunabeel güjt go'n mazri nadaan par laax."

³¹ 'Dxel badxi' xdadix laan rëbaman: "Xi'n, zianczi za'l con naj, graczi ni ra'pan naj xieenl. ³² Per yan rayal yaguieen ree lanij yabaa tëë ree, din bijchil xin ma güjt par naj, ma babanx, gunijtix abi' ma badxexlix."

Xcwent tijb mojs rniabee ree mojs

16 Rëb tëë Jesús loj ree xbejnman:
—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman. ² Dxel gurejdxaman laax rëbaman lojx: "¿Xhie rën guiëb ni riguejnan cayüjn? Banee cwent lon xcwent xchiinl, din achetri dxiin gunen lojl." ³ Dxel guzuloj beenx xgab gunaladxix: "¿Xhienaag günan yan ma gusa'n da patronan naj sin dxiin? Ad yu'tan gojl günan dxiin dajn, ratu tëën ganaaban carda. ⁴ Ma ragbeen xhienaag günan din guiën ree bejn naj chi ad züntran dxiin." ⁵ Dxel gurejdxix tijb gaj ree bën ral loj xpatronx, rëbix loj bën bidxin yaloj: "¿Plac ralil loj da patronan?" ⁶ Abi' rëbaman: "Ralan tibgayuu barril sejt lojman." Dxel rëbix: "Cwa' gui'ch guie lod ca ni ralil lojman, been zatijban bacaa lojn ralil tü'pchiizan." ⁷ Dxel gunabdiidix loj zatijbaman rëbix: "Laadx lüj, ¿plac ralil?" Abi' rëbaman: "Tib gayuu ingujch trigo." Zianz rëbix: "Cwa' gui'ch guie lod ca ni ralil lojman, been zatijban bacaa lojn ralil tajpgajlzan." ⁸ Dád badxaloj patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinal xnejz Dios.

⁹ Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblyaa.

¹⁰ 'Bal chu rüjn zi'c rayal con ta'n ni rudëëd bejn lojman, zünman zi'c rayal con zro'n. Ziangajc bën ad rüjnt zi'c rayal con ta'n ni rudëëd bejn lojman, ad zün gajctaman zi'c rayal con zro'n. ¹¹ Yan, ziangajc bal id züjndi zi'c rayal con ni za'c yu' loj guidxliuj guie, ¿chu gap lëjt confianz con guialnaza'c yu' xanyabaa? ¹² Bal

id züjndi zi'c rayal con ni ad najt xieendi, ¿chu gunee lëjt ni rayalidi?

¹³ 'Ni'qui tijb mojs ad zajct güünx sirv loj tio'p patron; din zadxe'chix tijbaman abi' zën x zatijbaman; o zajquix xinza'c con tijbaman abi' zün x tiblax zatijbaman. Zeel ad zajct güündi sirv loj Dios, në loj milia.

¹⁴ Abi' ree bënfarisew guial mazri rën reeman milia, chi biguejnx reeman ni rëb Jesús guzuloj cuze' reeman laaman. ¹⁵ Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

Xley Moisejs con xguialrniabee Dios

¹⁶ 'Xley Moisejs në ni bacaa ree bën badëë xtiidx Dios loj ree bejn, naga'loj been reen dxiin xt chi bi't Waj bën baroobnijs bejn ree. Abi' diid nadxel guzuloj rirë'ch xtiidxza'c Dios xhienaag naj xguialrniabeeman, abi' zien ree bejn rüjn naguiejn chu' loj xguialrniabeeman.

¹⁷ 'Adli nawëëgt nit xanyabaa në guidxliuj, guial yaya'n tijb diidx zëed loj ley guin guial ad zajctan cumplid.

Rulüü Jesús xcwent guial rala' lasa'

(Mt. 19:1-12; Mr. 10:1-12)

¹⁸ 'Bal tijb xinguaaw rala' lacheelix abi' rtia'x ben ren, dolan cayüjnx. Ziangajc xin rtia' tijb búngunaa bala' lacheel, dolan cayüjnx.

Xinrijcw con Lazr

¹⁹ Basnuu Jesús, rëbaman:

—Guyu tijb xinrijcw, guzujchaawix con ganaxczi lajd zagdex, abi' guixie guixieci rüjnx lanijro'. ²⁰ Guyu tëë tijb xinprob brii lajx Lazr, rbejx ro' xport xinrijcw guin abi' guidiblagax ca guiadx. ²¹ Rën nejzdoo Lazr guin gawix ni rijab xan xmex xinrijcw guin. Abi' xt ree bë'cw rbig rlie' reeb loj ree guiadx ni cax.

²² 'Chi bidxin dxej güjt Lazr dxel bignë ree xianjl Dios laax lod naj nix da't, lod za' Abraham. Në xin rijcw guin güjt, abi' bigue'chix. ²³ Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham. ²⁴ Dxel gurixdiajx rëbix: "Dad Abraham, baya naj, guxhaal Lazr din gugajdx lupunt xbacwënx din gui'tix yasiaalyujx lüdxan, din dád cazaagdiajn loj bajl guie."

²⁵ Per badxi' Abraham xtiidix rëbaman: "Xi'n, basaal-adx guial dád nix guyu luxdool chi gubanl loj guidxliuj, guiaad Lazr dád naya gubajnx. Yan, rayalix lod yabaax guiaad lüj rayalil lod sagdiaj. ²⁶ Nëtëë yan bën za' ree guie ad zajct tëd reeman yagaj, ni'qui ree bën za' yagaj ad zajct tëd reeman guie, din za' bala'ro' du galay ree."

²⁷ 'Dxel rëb xinrijcw guin lojman: "Rniaaban lojl dad, been wen guxhaal Lazr lidx da dadan, ²⁸ lod zojb gaay ree da bichan din chicojnx laa reex chitëë në laa reex gui't luar guie, lod yu' zro' casti." ²⁹ Per rëb Abraham lojx: "Ma rajp reex gui'ch ni bacaa Moisejs con ree bën badëë xtiidx Dios loj ree bejn, laan rayal guidxga' reex." ³⁰ Abi' rëb xinrijcw guin: "Walil, dad Abraham, per

ad zaliladxt reex, sa'n bal yaban tijb bén ma güjt chigneenëman laa reex, zayüjn reex xgab por xtol reex." ³¹ Per rëb Abraham lojx: "Bal id ridxga' reex xtiidx Moisejs në xtiidx ree bén badëë xtiidx Dios loj ree bejn, ad zaliladxt reex majsij yaban tijb bén ma güjt."

Bén ruzaalguiiw bejn din güünman dol

(Mt. 18:6-7, 21-22; Mr. 9:42)

17 Rëb Jesús loj ree xbejnman:
—Zianczi yu' ree ni ruzaalguiiw bejn din güünman dol, per i;probza naj bén ruzaalguiiw zatijb bejn guial güünman dol! ² Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar guzaalguiiwaman tijb bén qui rililadxri naj din güünman dol. ³ i;Gol gojp cudad!
'Bal xhie tijb ni mal güün tijb lasa'l, guneenëman. Abi' bal bayüjnman xgab por ni beenman, beenman perdon. ⁴ Majsij gajdx volt loj tibdxej güünman xhienin contr lüj, abi' bal gui'taman loj gajdx volt naman: "Been naj perdon ad züntran zian", rayal güün laaman perdon.

Guialrniabee në guialrliladx

⁵ Dxel rëb ree xi apóstoles Jesús lojman:
—Banee dunujn mazri guialrliladx.
⁶ Abi' rëb Jesús loj reeman:
—Bal naj xguialrliladxidi majsij zi'czi naj xhaj moxtajs, zile' guiëbidi loj yagro' guin: "Bia'xh guie, bisob loj nijsdoo", zuzooban xtiidxidi.

Ni rayal güün tijb mojs

⁷ 'Bal tijb lëjt rajp tijb mojs, abi' chi yaguaad mojs guin bigla'x yuj o bigajpiz begui'xh ree ya, zwen zëjbidi lojx ya: "Guyu, gurej din gawil"? ⁸ Ad zëjbidi zian, guiëblidi: "Bachaa xabil, been ni gawan, guda'n. Chi lox gawan guië' tēen dxei ma zajc gawil guië' tēel."
⁹ Abi' wed ni'qui quixtëe ad zudëetidi lojx din cayüjnzix ni rayal güünx. ¹⁰ Ziangajc lëjt chi loox güündi gra ni gunabee Dios dxei guiëbidi: "Nayajcan mojs ni ad rüjnt sirv, din baguieenzan ni rayal yaguieenan."

Rayüjn Jesús chii ree bén rajc guialguijdx la lepra

¹¹ Chi ma caxin Jesús Jerusalén, gudëdaman guiedx riga' ree niz Samaria në niz Galilea. ¹² Abi' chi cayuman tijb luguiedx dobëz, bigchaagloj chii ree bén rajc guialguijdx la lepra laaman. Per zijt guzuj reeman, ¹³ rbixdiaj reeman, rëb reeman:

—i;Jesús, Mextr, baya dunujn!

¹⁴ Chi baguiaa Jesús laa reeman, rëbaman loj reeman:

—Gol chej loj ree bixhioz din guguaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman. ¹⁵ Dxel tijbaman chi gogbeeman ma bayajcaman, bayejcaman, rbixdiajman rudëëman quixtëe loj Dios. ¹⁶ Abi' bazuxibaman loj Jesús, basajb lojman xt luyuj persi badëëman quixtëe lojman. Abi' najman bén Samaria. ¹⁷ Dxel rëb Jesús:

—i;Nid chii naj ree bén bayajc ya? i;Con zagaa reeman? ¹⁸ i;Tijbzi benzit guie bayejc ya rudëëman quixtëe loj Dios?

¹⁹ Dxel rëbaman loj bén guin:

—Bisu. Baguiaj, ma bayajquil guial bililadxil naj.

Xhienaag gui't xguialrniabee Dios

(Mt. 24:23-28, 36-41)

²⁰ Gunabdiidx ree bënfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguaa bejn.

²¹ Abi' achut guiëb: "Laan za' guie", o "Laan za' ni" ya, din xguialrniabee Dios mal za'n galaydi.

²² Dxel rëbaman loj ree xbejnman:

—Zaxin dxei guiëndi guguaadi Bén guxhaal Dios majsij tibdxejzi, per ad zuguiaatidi laaman. ²³ Abi' yu' reeman na lëjt: "Laaman za' guie", o "Laaman za' ni" ya, ad bal chinalidi laa reeman. ²⁴ Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. ²⁵ Per yalojxgaj sagdiajman abi' ad zënt ree bén riga' yan laaman. ²⁶ Zi'c goc gulal chi guban Noé, zian gac chi gui't Bén guxhaal Dios. ²⁷ Din nadxel gudaw ree bejn, gu' reeman, baxhliiaa reeman badëë tēe xi'n reeman baxhliiaa xt chi bidxin dxei guyu Noé lēn barcwro' ni beenman, abi' guzuloj guiadoxh ni bagüjt gra reeman. ²⁸ Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tēe reeman yu ree. ²⁹ Per chi brii Lot luguiedx Sodoma, guzuloj biyajb guij xanyabaa në azufre, abi' güjt gra reeman. ³⁰ Ziangajc gac dxei ni gui't Bén guxhaal Dios.

³¹ 'Dxei ni gac zian, bén yē'p guijc yu ad zaguijttaman chiglēe ni nagu'man lēnū. Abi' bén za' daj, ad zayejct lidxaman. ³² Gol basaaladx ni guzac lacheel bén brii laj Lot. ³³ Bén mazri rēn guialnaban rajpaman loj guidxliuj guie, zaxin dxei gunijtaman laan, per bén guiët por naj, zajpaman guialnaban tiblaxaa con Dios. ³⁴ 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. ³⁵ Guiáad lod cay-ojt tio'p ree bēngunaa, tijbaman sa zatijbaman yaya'n. ³⁶ Abi' lod za' tio'p ree xinguaaw daj, tijbix sa zatijbix yaya'n.

³⁷ Chi biguiejn ree xbejnman zian, rëb reeman:

—i;Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

Xcwent tijb bēngunaa bizëjb në tijb juejs

18 Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman. ² Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tēetaman bejn ree. ³ Luguiedx zigajc zojb tijb bēngunaa bizëjb, rniabaman loj juejs guin din güünman guialguxtis gagnëman laaman loj bén rdxech laaman. ⁴ Xchej ad bidxga't juejs guin bēn-

gunaa bizëjb guin, per zianz laagajcaman been xgab naladxaman: "Majsi ad rdxehtan Dios ad ridxga' tēetan bejn ree, ⁵ per bēngunaa guie ad rucwēēt ruslenman naj. Zagdxeli naj gūnan laaman yudar chitēē ri'traman naga gad da pacensan chigra."

⁶ Dxel rēb Jesús loj reeman:

—Zian gunee juejs mal guin. ⁷ Diidxgui Dios, ¿nid za-gnēman bēn guleman ya bēn rbejdx rniab ree laaman dxej guiaal? ¿Wen zaglaa gagnēman laa reeman ya?

⁸ Naj rni lējt guial ad zaglaa gagnēman laa reeman. Per chi gui't Bēn guxhaal Dios, ¿chuj ni zadxaaglojra-man bēn rliladx Dios loj guidxliuj ya?

Xcwent bēnfarisew con bēn ruquijx impuest

⁹ Be Jesús zatijb cwent par ree bēn naladx tijbzi laa reeman naj benza'c guial loj ree ben ren, rēbaman:

¹⁰ —Tio'p ree xinguaaw wej lēn yadooro' Jerusalén persi gurejdx gunab reex Dios, tijbix naj xinfarisew, za-tijbix naj xin ruquijx impuest. ¹¹ Xin farisew guin, za'lix cabejdx canabix Dios, rēbix: "Quixtēē runen lojl, Dad, guial ad najtan zi'c ree ben ren, naj reeman bēn-gubaan, benmal, bēn za'nē bēngunaa ren, ni'qui zi'c naj bēn ruquijx impuest guin. ¹² Rba'nān tio'p volt lēn xuman, abi' gra ni rūnan gan rūnanan chii lala' persi runen tijban lojl." ¹³ Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rēb-gajx: "¡Dios, baya naj najn tijb xindol!" ¹⁴ Naj rni lējt guial xin ruquijx impuest guin ma been Dios laax per-don chi bayejc lidix, per xin farisew guin ad beenta-man laax perdon. Din bēn rliēs xvalor gajc achet lasaj-caman loj Dios, guíaad bēn rūjn naya laaman mazri lasajc loj Dios.

Rūjnle' Jesús xindoo ree

(Mt. 19:13-15; Mr. 10:13-16)

¹⁵ Binē ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilē reeman bēn zinē ree laa reex. ¹⁶ Per gurejdx Jesús laa reeman, rēbaman loj reeman:

—Gol badēē mod gui't reex lon, ad bal rudxoondi, din lod rniabee Dios naj par ree bēn naj zi'c laa reex. ¹⁷ Din naj rni lējt, bēn ad rliladxt xguialrniabee Dios zi'c tijb xindoo, ad zile't chu'man loj xguialrniabee Dios.

Xcwent tijb xin rijcw

(Mt. 19:16-30; Mr. 10:17-31)

¹⁸ Tijb xin rniabee, gunabdiidx loj Jesús rēbix:

—Mextrza'c, ¿xhie rayal gūnan din ga'pan guialna-ban tiblayaa con Dios?

¹⁹ Badxi' Jesús laan, rēbaman:

—¿Chexc zeel nal lon benza'c? Achut naj benza'c, ti-jbzi Dios. ²⁰ Lūj rajc ree mandamient: "Ad sunēl bēngu-naa ren, ad gugūjt il bejn, ad cwanl, ad cwēēl xtiidx be-jn, gojp respejt xdad xniaal."

²¹ Dxel rēbix loj Jesús:

—Gra ree ni guin cayūnan diizd xindoon.

²² Chi biguiejn Jesús zian, rēbaman:

—Yu' zatijb ni ryaadx gūūnl: bigto' gra ni rajpil dxel gudēēl milia guin loj ree bēnprob. Zian gapil guial-naza'c xanyabaa, dxel gui'til guidnalil naj.

²³ Chi biguiejn xin guin zian, dád guyunayax guial dád xinrijcwan. ²⁴ Chi baguiaa Jesús guial dád yu'-nayax, rēbaman:

—¡Dád nawēēg naj chu' benrijcw loj xguialrniabee Dios! ²⁵ Adli nawēēgt tēd tijb camell xan gagux, guial chu' tijb bēn rijcw loj xguialrniabee Dios.

²⁶ Abi' ree bēn biguiejn ni rēb Jesús, rēb reeman:

—¿Chu za zajc laa loj xcasti Dios?

²⁷ Dxel rēbaman loj reeman:

—Yu' ni ad zajct gūūn bēnguidxliuj, per Dios graczan zajc gūūnman.

²⁸ Dxel rēb Bēd lojman:

—Dad, ma basa'nān graczi ni raya'pan persi zud-naalan lūj.

²⁹ Zianz rēb Jesús:

—Diidxliczi rnin lojdi, chutēēz bēn rusa'n lidx, lacheel, bijch, o xdad, o xniaa, o xi'n guial rūjnman zi'c rniabee Dios, ³⁰ mazri zien ni tia'man loj guidxliuj guie. Abi' zajpaman guialnaban tiblayaa con Dios.

Rugojn Jesús zatijb guial guiētaman

(Mt. 20:17-19; Mr. 10:32-34)

³¹ Gurejdx Jesús guidxiptio'p ree xbejnman tiblad, abi' rēbaman loj reeman:

—Yan, ziyo' ree Jerusalén lod gac zi'c bacaa ree bēn badēē xtiidx Dios loj ree bejn xcwent Bēn guxhaal Dios. ³² Yayū reeman laaman loj ree benzit, guze' ree-man laaman, guinee reeman laaman ni rēntzi ree-man, abi' gucojp xhiejn reeman lojman. ³³ Quin ree-man laaman dxel gugūjt reeman laaman, per ni yayon dxej yabanman.

³⁴ Per laa reeman ad bignia'tczi reeman ni rēbaman, ad ragbee tēēt reeman chexc zeel rēbaman zian din ad bile't nignia' reeman xhie rēn guiēb ni gunee-man.

Rayajc guialoj tijb bēnlutia'p

(Mt. 20:29-34; Mr. 10:46-52)

³⁵ Chi ma cadxin Jesús gajxh guiedx Jericó, tijb bēnlutia'p, zojbaman cwē' nejz rniabaman carda. ³⁶ Chi gog-beeman cadēd zien ree bejn, gunabdiidxaman xhie cayajc. ³⁷ Abi' rēb reeman lojman guial Jesús bēn Nazaret cadēd niz yagaj. ³⁸ Dxel gurixdiajman rēba-man:

—¡Jesús, xdiaa Davi, baya naj!

³⁹ Bēn ned ree rdilē reeman laaman din gucwēēz ro'-man, per mazri rbixdiajman, rēbaman:

—¡Xdiaa Davi, baya naj!

⁴⁰ Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rēbaman:

⁴¹ —¿Xhie rēnl gūnan por lūj?

Badxi'man laan rēbaman:

—Dad, rēnan yani lon.

⁴² Dxel rēb Jesús lojman:

—¡Ma zile' guguaal! Ma bayajquil guial bililadxil naj.

⁴³ Hor guin gajc bani loj bén guin, abi' binalaman Jesús rudëëman quixtëë loj Dios. Nê gra ree bén baguiaa ni goc rudëë quixtëë loj Dios.

Wej Jesús lidx Zaqueo

19 Guyu Jesús luguiedx Jericó abi' guzuloj cadë-daman luguiedx guin. ² Yagaj zojb tijb benrijcw laman Zaqueo. Laaman rniabee ree bén ruquijx impuest. ³ Rën Zaqueo guin güünbeeman Jesús, per ad rile't guguaaman laaman guial dád zien ree bejn abi' laaman najman bendop. ⁴ Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod täd Jesús. ⁵ Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

⁶ Dxel cari da't baguiajt Zaqueo, abi' dád rabaaman zignëman Jesús. ⁷ Chi baguiaa ree bejn zian, gra ree-man guzuloj caneeguijdx Jesús rëb reeman zigya'n-man lidx tijb bëndol. ⁸ Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bénprob. Abi' bal yu' bén baquijxan mazri guial loj ni naj quixaman, yayünan tajp volt mazri guial loj ni gulaanan.

⁹ Dxel rëb Jesús lojman:

—Yandxej ma been Dios perdon gra ree bén zojb lidx Zaqueo guial rliladxaman Dios zi'cgajc Abraham. ¹⁰ Din Bén guxhaal Dios zëëdaman zidgadiilaman bén ad zët ree loj xnejz Dios din laa reeman loj xcasti Dios.

Xcwent milia

¹¹ Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios. ¹² Dxel rëbaman loj reeman:

—Guyu tijb bejn, zëëdaman loj tijb famil zojbloj. Zë-man zijt lod tia'man guialrniabee din gacaman rey dx-el yajejcaman nabee ladxaman. ¹³ Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: "Gol beennë milia guin dxiin xt chi guidxin dxej yaguialan." ¹⁴ Per ree bén ladxaman guial rdxe'ch reeman laaman, guxhaal reeman tibcwaa ree bén zinal laaman persi biguiedx reeman guial ad rënt reeman gac bén guin xrey reeman. ¹⁵ Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan. ¹⁶ Mojs bidxin yaloj rëbix: "Dad, milia ni baneel ma beenan gan chii volt mazri." ¹⁷ Dxel rëb rey guin lojx: "Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx."

¹⁸ Chi bidxin mojs barojp guin, rëbix: "Dad, milia ni baneel lon ma beenan gan gaay volt mazri." ¹⁹ Ziangajc rëb rey guin loj mojs guin: "Lüj nabee gaay guiedx."

²⁰ Dxel bidxin zatijb mojs guin abi' rëbix: "Dad, laa xmilial guie, badxe'chaawanan lën tijb baydoo, ²¹ din

bidxeban lüj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil." ²² Dxel rëb rey guin: "Mojs guiidx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan. ²³ ¿Chexc ad badëëtäl da milian nigui'n bejn din chi naguialan naca'nan con guidib xi'nan?" ²⁴ Dxel rëb rey guin loj ree bén za' yagaj: "Gol baca' milia zii lojx, gol badëëdan loj xin ca' mazran." ²⁵ Abi' rëb ree-man loj rey guin: "Dad, per ma ca'x zro'n." ²⁶ Badxi'-man laan rëbaman: "Bén rajp zro', zaca'man mazri, per bén rajp ta'nzi, xt ta'n ni rajpaman chiquied lojman. ²⁷ Abi' ree bén rdxe'ch naj bén ad guyënt ree niajcan rey, gol tanë reeman guie, gol bagüjt reeman lon."

Ru Jesús Jerusalén

(Mt. 21:1-11; Mr. 11:1-11; Jn. 12:12-19)

²⁸ Chi gulox rëb Jesús zian, dxel basnuu zëman Jerusalén. ²⁹ Chi bidxinman gajxh guiedx Betfagé con Betania, nê gajxh guia' la Olivos, dxel guxhaal tio'p ree xbejnman, ³⁰ rëbaman loj reeman:

—Gol chej guiedxdo riga' guin, chi guidxindi guidx-aaglojdi tijb burquie'n, caduub, achut wabib laab. Gol guxhiequib gol tanëb. ³¹ Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

³² Wej ree bén guxhaalaman bidxaagloj gajc reeman zi'cgajczi rëb Jesús loj reeman. ³³ Abi' chi caxhiee ree-man bur guin, gunabdiidx ree bén naj xbur laab, rëb reeman:

—¿Chexc zeel caxhiequidi bur guin?

³⁴ Badxi' reeman laan, rëb reeman:

—Din Dad Jesús cayaadx laab.

³⁵ Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. ³⁶ Abi' ree bejn rguijxh xab reeman lunejz lod zë Jesús. ³⁷ Chi ma zë reeman gajxh laguiajt ni naj guia' la Olivos, gra ree bén zinal Jesús guzuloj rbixdiaj reeman guial dád rabaa reeman abi' ruza't reeman Dios zagdxen por gra ree milagr ni ma baguiaa reeman. ³⁸ Rëb reeman:

—¡Nüjnle! Dios bén zëëd por laaman! ¡Yu' guialrabaa xanyabaa! ¡Benza'c bendxoon naj Dios bén yu' xanyabaa!

³⁹ Dxel ree bénfarisew no'ch loj ree bén zinal laaman, rëb reeman lojman:

—Mextr, gudilë ree bén guin chitëë rniee reeman zian.

⁴⁰ Per badxi'man laan rëbaman:

—Naj rni lëjt, bal yacwëëz ro' reeman, guiaj ree cwixdiaj zian.

⁴¹ Chi bidxinman gajxh Jerusalén, dxel baguiaaman guiedx guin, zianz biinman por laan. ⁴² Rëbaman:

—¡Bén Jerusalén, xi nix majsí yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. ⁴³ Din guidxin dxej ni güün ree bén rdxe'ch lëjt tijb ze' gadëd ladxidi, abi' gra lad gusiaaw reeman lëjt, ⁴⁴ gugüjt reeman lëjt. Dxel gunijt

reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios lëjt.

Rabëë Jesús bén ruto' ree ro' yadooro' Jerusalén
(Mt. 21:12-17; Mr. 11:15-19; Jn. 2 :13-22)

⁴⁵ Chi bidxin Jesús ro' yadooro' Jerusalén, guzuloj caybëëman bén cuto' ree në ree bén cazii, ⁴⁶ rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nünndan zi'c lidx ree xingubaan.

⁴⁷ Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguil reeman mod din gugüjt reeman laaman. ⁴⁸ Per ad radxejt xhienaag güün reeman, din graczi ree bejn rucaagdiajg chaaw ni rulüüman laa reeman.

Xguialrniabee Jesús
(Mt. 21:23-27; Mr. 11:27-33)

20 Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, ² abi' rëb reeman lojman:

—Guna, ¿chu na güünl ni guin ree? ¿Chu banee guialrniabee lojl?

³ Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: ⁴ ¿chu guxhaal Waj bidgaroobnijsaman bejn ree, Dios ya o bénguidxliuj?

⁵ Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiza zeel ad bililadxtidi laaman?” ⁶ Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman riladx guial Waj gojc Bén badëë xtiidx Dios loj ree bejn.

⁷ Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree. ⁸ Dxel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

Xcwent ree mojs guijdx
(Mt. 21:33-44; Mr. 12:1-11)

⁹ Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree Bén güün dxiin lojn, zëtaman zijt. ¹⁰ Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree Bén rüjn dxiin loj guiniaa guin gudijn reeman mojs guin abi' badxi' reeman laax zezi. ¹¹ Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi. ¹² Zianz guxhaalaman zatijbix, per gudiilguijdx reeman laax abi' babëë reeman laax loj guiniaa guin.

¹³ Dxel rëb Bén naj xguidxliuj laan: “¿Xhienaag günan yan? Gaxhal da xi'nan xin rën da'tan, wed zajp reeman

laax respekt.” ¹⁴ Per chi baguiaa ree Bén guin laax, rëb loj lasa' reeman: “Xin guinan naj xin yaya'nnë guidxliuj guin. Yagüjt reex din gacan du xieen ree.” ¹⁵ Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree Bén caneenëman, rëbaman:

—Yan, ¿xhie naladxidi güünnë Bén naj xguidxliuj laan Bén guin ree? ¹⁶ Naj rni lojdi guial zi'taman din gugüjtaman Bén guin ree dxel gudëëman guidxliuj guin loj ree ben ren.

Chi biguiejn reeman zian dxel rëb reeman:

—¿Gagnë Dios ad zajct zian!

¹⁷ Per Jesús baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree Bén rüjn yu,

laan naj ni mazri been sirv gojcnë yu guin.

¹⁸ Chutëëz Bén yab guijc guiaj guin, gacaman zi'c tijb ni riroox, guiáad bal yab guiaj guin guijcaman, gacaman zi'c tijb ni ryüüdëj.

Xcwent impuest

(Mt. 21:45-46; 22:15-22; Mr. 12:12-17)

¹⁹ Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree. ²⁰ Abi' guxhaal reeman Bén zigla'ch ree laaman din güünzi reeman guial gulüü naj reeman benza'c, din yaguil reeman mod guinee Jesús diidx ni gudxiib reeman guijc, din chile' yayü reeman laaman loj gobernador Rom. ²¹ Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tël zi'c rayal, din par lüj tiblojzi naj bejn, abi' walil rulüül guial xhienaag rën Dios guiban bejn. ²² ¿Zagdxen ya radijxan impuest loj rey César, o ad zagdxetan?

²³ Per gogbee gajc Jesús xgab mal ni cayüjn reeman abi' rëbaman loj reeman:

²⁴ —Gol balüü tijb cintabl lon. ¿Chu loj ca lojn chu tël laj ca lojn?

Badxi' reeman laan, rëb reeman:

—Loj rey César ca lojn në lajman.

²⁵ Dxel rëbaman loj reeman:

—Gol badëëcliza loj rey César ni naj xieen César, guiáad loj Dios gol badëë ni naj xieen Dios.

²⁶ Abi' gra ni guneeaman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeaman abi' achetri rëb reeman.

Xcwent guial yaban ree bengüt

(Mt. 22:23-33; Mr. 12:18-27)

²⁷ Tio'p choon ree bénsaducew bignaj Jesús, Bén-sadusew guin ree ad riladxt reeman guial yaban ree bengüt, zeel rëb reeman loj Jesús:

²⁸ —Mextr, loj xley Moisejs rëb guial bal guiët tijb xingüaaw abi' achut xi'nx guyu con lacheelix, bijch xingüt

guin guxhlaanë béngunaa bizëjb guin din chu' xi'n re-ex zi'c gulüü xi'n xin güt guinan. ²⁹ Guyu tijb famil lod goc reex gajdx bijch. Baxhlaa xin yaloj guin, per güjtix abi' ad guyut xi'n reex con lacheelix. ³⁰ Dxel bijch baro-jpix baxhlaanë béngunaa guin, per güjtigajquix ad guyu gajct xi'n reex. ³¹ Zianz baxhlaanë xin bayon guin béngunaa bizëjb guin, zianz baxhlaanëman guigajdx reex abi' gra reex güjt achut xi'n reex guyu con laa-man. ³² Ni bigratë në béngunaa guin güjt. ³³ Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhlaanë laaman?

³⁴ Dxel rëb Jesús loj reeman:

—Loj guidxliuj guie ruxhlaa ree bejn abi' rudëed xi'n reeman ruxhlaa. ³⁵ Per ree bën yaban zatijb, bën rayal ree gap guialnaban tiblyaa con Dios, ad zuxhlaatri reeman ad zudëe tēētri xi'n reeman guxhlaa, ³⁶ din ad zējttri reeman, gac reeman zi'c ree xianjl Dios. Gac tēē reeman xi'n Dios guial ma baban reeman. ³⁷ Abi' xcwent ni yaban ree bengüt, xt Moisejs rëb zian tiblyaj loj xtiidx Dios lod rëbaman guial baguiaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob. ³⁸ Din Dios ad najtaman xDios ree bengüt, najman xDios ree bën naban, din par laaman gra ree bejn naban.

³⁹ Dxel yu' ree mextr rajc ley, rëb lojman:

—Mextr, zagdxequi guneel.

⁴⁰ Abi' achetri bayax reeman niniabdiidx reeman lojman.

Chu loj xdiaa zëed Cristo

(Mt. 22:41-46; Mr. 12:35-37)

⁴¹ Rëb Jesús loj ree bejn:

—¿Chexc zeel rëb ree bejn guial zëed Cristo loj xdiaa rey Davi? ⁴² Awa Davi guin gajc guneel loj libr Salmos, rëbaman:

Dios rëb loj dux Dad ree:

“Gurej da ladbeen,

⁴³ xt gabecan xin rdxe'ch ree lüj guial'.”

⁴⁴ Yan, bal xi'n Davi naj Cristo. ¿Chexquiza zeel rëb Davi guin lojman Dad?

Ni rüjn ree mextr rajc ley

(Mt. 23:1-36; Mr. 12:38-40; Lc. 11:37-54)

⁴⁵ La'tgaj cucaagdiajg gra ree bejn ni rëb Jesús, rëb loj ree xbejnman:

⁴⁶ —Gol gojp cudad con ree mextr rajc ley. Din ruladx reeman sa reeman gacw reeman lajd zagdx ruladx tēē reeman gugajpdioz ree bejn laa reeman con respekt niz lunejz, abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman. ⁴⁷ Raca' tēē reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti naroob yayal reeman.

Gon badëed tijb béngunaa bizëjb

(Mr. 12:41-44)

21 Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benri-jcw gon lën alcancia. ² Baguiaa tēēman tijb béngunaa bizëjb prob, cagu'man tio'p cintabldoo lën alcancia guin. ³ Dxel rëb Jesús loj ree xbejnman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin. ⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

Rëb Jesús guial yaze'n yadooro' Jerusalén

(Mt. 24:1-2; Mr. 13:1-2)

⁵ Tio'p choon ree xbejn Jesús cayü reeman diidx xcwent ree guiaj zagdx najcchaawnë yadooro' Jerusalén, në ree ni lasajc ni rudëed ree bejn par suchaaw yadoo guin. Dxel rëb Jesús loj reeman:

⁶ —Gra ni cuguaadi yan, zadxin dxej ni'qui tijb guiaj ad zaya'nt guijc stijban, gran yaze'n.

Ni gac chi gad guidxliuj nit

(Mt. 24:3-28; Mr. 13:3-23)

⁷ Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

⁸ Zianz rëb Jesús loj reeman:

—Gol gojp cudad achu gusquiee lëjt. Din zien ree bën gui't guiëb reeman guial por naj zëed reeman guiëb tēē reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman. ⁹ Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit guidxliuj.

¹⁰ Rëb tēē Jesús loj reeman:

—Til nacion con stijb nacion, til tēē bën rajp guialrniabee con stijb bën rajp guialrniabee, ¹¹ gui't tēē xudoxh, në gubijn, në guialgujdxdoxh niz ni niz guie abi' xanyabaa guiguien ree ni nadxeb.

¹² Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguib chinë tēē reeman lëjt loj ree rey në loj ree gobernador guial najdi da bejnan. ¹³ Zian gac din chile güdi da diidxan loj reeman. ¹⁴ Ad aal chu'di xgab xhie guiëbidi loj reeman. ¹⁵ Din naj gune diidx ni guinieedi gune tēēn quiarguejn. Abi' ni'qui tijb bën rdxe'ch lëjt ad züjnt gan loj xtiidxidi ad zanee tēēt reeman contr lëjt. ¹⁶ Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman. ¹⁷ Gra bénguidxliuj guidxe'ch lëjt guial najdi da bejnan. ¹⁸ Per ni'qui tijb guidxguijquidi ad zanijt por zian. ¹⁹ Abi' bal sudxi'chidi loj xnejz Dios, zajpidi guialnaban tiblyaa con Dios.

²⁰ Chi guguaadi nayaw ree suldad Jerusalén, ma qui nit guiedx guin. ²¹ Dxejzii ree, bën za' ree niz Judea, gol

bigxüün niz dajn ree, abi' ree bén za' guiedx Jerusalén gol brii luguiedx guin, guiáad ree bén za' dajn ad bal yayudi luguiedx guin. ²² Din dxej guin ree gudëed Dios bejn ree casti din gac cumplid zi'c ca loj xtiidxaman. ²³ ¡Probza ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti naroob yayal ree bénluguiedx guin. ²⁴ Yu' ree bén guiët loj wadijl yu' tée reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

Gui't Bén guxhaal Dios zatijb

(Mt. 24:29-35, 42-44; Mr. 13:24-37)

²⁵ 'Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tée reeman guial gac naquie' loj nijsdoo gac tée naquie' por xtüjp nijs. ²⁶ Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen. ²⁷ Abi' guguaa reeman Bén guxhaal Dios, rdiinman bacha' zëedaman loj zaj con xguialrniabeeman. ²⁸ Chi suloj gac ree ni guin, gol bagu' luxdoodi zagdxe gol gules tée lojdi din ma zidyob dxej ni laadi loj casti.

²⁹ Rëb tée Jesús loj reeman:

—Gol baguaa yag higo o xhietëz zatijb yagan. ³⁰ Chi ma caydxib ree xbalagan, lëjt ragbee guial ma zëed tiamp nalaa. ³¹ Ziangajc chi guguaadi ma cayajc ree ni guin, zagbeedi guial ma zëed xguialrniabee Dios gajxh.

³² 'Diidxli rnin lojdi guial gra ree ni guin gac chi gad gra ree bén naban yan guiët. ³³ Guidxliuj në xanyabaa zanijt reen, per da diidxan ad zadëdt gacan cumplid.

³⁴ 'Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt ³⁵ zi'c tijb tramp. Din zian gac dxej guin par gra ree bénguidxliuj. ³⁶ Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tée sudi loj Bén guxhaal Dios.

³⁷ Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos. ³⁸ Abi' rsil-doo rej gra ree bejn lën yadoo guin ricaagdiajg reeman ni rnieeman.

Bayan reeman diidx xhienaag guiniaaz reeman Jesús

(Mt. 26:1-5, 14-16; Mr. 14:1-2, 10-11; Jn. 11 :45-53)

22 Chi ma zidyob lanij pascw, chi raw reeman guiadxtil ni ad yu't levadur. ² Bixhioz rniabee ree bixhioz con ree mextr rajc ley, raguill reeman mod xhienaag gugüjt reeman Jesús guial rdxeb reeman bejn ree.

³ Dxel guyu xindxab luxdoo tijb ree xi apóstoles Jesús, bén la Judas Iscariote. ⁴ Judas guin bigneenë bixhioz rniabee ree bixhioz con ree bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. ⁵ Dád babaa ree-

man abi' rëb reeman guial gudëed reeman milia lojman. ⁶ Zianz cwëjbaman, dxei guzuloj raguillaman mod xhienaag yayüman Jesús, guial ad zagbeet ree bejn.

Gudawnë ree xbejn Jesús xche

(Mt. 26:17-29; Mr. 14:12-25; Jn. 13 :21-30; 1Co. 11 :23-26)

⁷ Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tée reeman tijb xiil, ⁸ dxei guxhaal Jesús Bëd con Waj, rëbaman loj reeman: —Gol biguieen ni yadaaw ree guxhin pascw.

⁹ Abi' gunabdiidx reeman lojman rëb reeman:

—¿Ban guin rën yuguieenan laan?

¹⁰ Zianz rëb Jesús loj reeman:

—Chi chu'di luguiedx guin, guguaadi tijb xinguaaw ca'x tijb re yu' nijs. Gol chinalix xt lod yayux, ¹¹ gol güjdx loj bén naj lidxan: “Na mextr: ¿Con lënü gawnë ree xbejnman guxhin pascw?” ¹² Dxel gulüüman lëjt ti-jb lënü ni rarojp pijs, ma najcchaaw lënü guin. Yagaj gol been ni yadaaw ree xche.

¹³ Zianz wej reeman abi' bidxaagloj reeman gra zi'c-gajczi rëb Jesús loj reeman. Dxel been reeman guialraw guin ni gaw reeman guxhin pascw.

¹⁴ Chi bidxin hor, Jesús con ree bén naj apóstoles gurej reeman xan mex. ¹⁵ Dxel rëbaman loj reeman:

—¡Diidx gocli rënan gawnë'n lëjt pascw guie, chi gad dxej guidxin gazaagdiajn abi' guiëtän! ¹⁶ Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.

¹⁷ Dxel cwa'man tijb cojp yu' vin, chi gulox badëëman quixtëe loj Dios, rëbaman loj reeman:

—Gol cwa' vin guie, gol gudi'san loj gradi. ¹⁸ Din diidxli rnin lëjt, ad yu'tri dxej guiëtän vin xt chi ma canabee Dios guidiblagaa.

¹⁹ Dxel cwa'man guiadxtil badëëman quixtëe loj Dios, zianz gula'man laan, gudi'saman laan loj reeman, rëb-gajman:

—Guiadxtil guie naj da cuerpan ni ma bayün din guiëtän por lëjt. Chi güündi zian, gol been zian guial rusaaladxidi naj.

²⁰ Abi' ziangajc beenman con cojp ni yu' vin guin, chi gulox gudawaman xche, rëbaman:

—Vin guie naj da rejnan ni gaxhie'n chi guiëtän din guixal tijb nejz cüb xhienaag gap ree bejn perdon loj Dios.

²¹ 'Per yan bén yayü naj, laa yaaman xoob loj mex lod xoob gajc yan. ²² Per Bén guxhaal Dios, naj sagdiajman abi' guiëtaman. Per ¡probza bén yayü laaman!

²³ Dxel guzuloj rniabdiidx loj lasa' reeman chu reeman yayü laaman.

Chu mazri zojbloj

²⁴ Dxel guzuloj reeman cadildiidx reeman chu loj gra reeman naj mazri bén zojbloj. ²⁵ Per rëb Jesús loj reeman:

—Bén naj ree rey loj guidxliuj guie rniabee reeman bén ladx reeman zi'ctzi rën reeman, abi' ree bén rniabee, rëb reeman guial rüjn reeman ni zagdxe. ²⁶ Per

lëjt ad rayalt güündi zian, bén mazri zobjbloj lojdi rayal güün laagajcaman zi'c tijb bén ad zobjlojt. Guiáad bén rniabee lojdi rayal güün laagajcaman zi'c tijb mojs.
²⁷ ¿Chu naj mazri bén zobjbloj loj guidxliuj guie? ¿Bén rbej xan mex par gaw ya o bén rbe'c guialraw? ¿Nid bén rbej xan mex guin naj mazri bén zobjbloj ya? Guiáad naj za'n lojdi zi'c tijb bén rbe'c guialraw.
²⁸ 'Lëjtczi za'në naj loj ree dxej cazaagdiajn. ²⁹ Zeel gunen guialrniabee lojdi zi'c banee da Dadanan lon, ³⁰ abi' gawidi loj da mexan lod ganabeen cwe tëedi loj ree yagxhil lod güündi guialguxtis loj gra ree bén za loj guidxiptio'p xdiaa Israel.

Rëb Jesús guial guiëb Bëd ad nünbeetaman laaman
 (Mt. 26:31-35; Mr. 14:27-31; Jn. 13 :36-38)

³¹ Rëb tëë Jesús:
 —Simón, Simón, ma gunab xindxab lëjt din güünx lëjt prueb zi'c rbijb bejn trigo. ³² Per naj ma guredx gu-naaban Dios por lüj chitëë cwëz chililadxil naj. Guiáad lüj chi yazudxi'chil loj ni rliladxil naj zatijb, gognë ree lasa'l din sudxi'ch reeman loj ni rliladx reeman naj.
³³ Dxel rëb Bëd lojman:
 —Dad, ad zaro'nladxtan lüj majsi gayu'në'n lüj ladxguib o xt guiëtnë'n lüj.
³⁴ Abi' rëb Jesús:
 —Naj rni lüj Bëd, yan guxhin gajc chi gad guid cwidx-a', choon volt mal rëbil ad nünbeetil naj.

Zidyob dxej sagdiaj Jesús

³⁵ Dxel gunabdiidx Jesús loj ree xbejnman rëbaman:
 —Chi guxhalan lëjt sin bols, sin milia, në sin gurëch, ¿yu' ni biaadxidi ya?
 Badxi' reeman laan rëb reeman:
 —Achet.
³⁶ Dxel rëbaman loj reeman:
 —Sa'n yan bén rajp milia në bols, gol cwa'n. Guiáad bén ad rajpt espad, gol bato' xabidi din siidi tijban.
³⁷ Din naj rni guial rüjn naguiejn gac zi'c rëb loj xtiidx Dios por naj, lod rëb: "Abi' nayabaman loj ree benmal." Gra ni ca loj xtiidx Dios por naj, naj gacan cumplid.
³⁸ Dxel rëb reeman lojman:
 —Dad, guie naca'n tio'p espad.
 Badxi'man laan rëbaman:
 —Zajquican.

Rbejdx rniab Jesús Dios lod la Getsemaní
 (Mt. 26:36-46; Mr. 14:32-42)

³⁹ Dxel brii Jesús zi'c naj xcostumbraman zëman ruguia' Olivos, abi' binal ree xbejnman laaman. ⁴⁰ Chi bidxin reeman yagaj, rëbaman loj reeman:
 —Gol gurejdx gunab Dios, chitëë güün xindxab lëjt gan.
⁴¹ Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, ⁴² rëbaman:
 —Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rënl.

⁴³ Dxel balüüloj tijb anjl guza xanyabaa lojman persi badëëman laaman gojl. ⁴⁴ Abi' chi cazagdiaj da'taman, mazri con gan cabejdx canabaman Dios ryajb tëë ree xnijs ragneeyaman luyuj zi'c rejn.

⁴⁵ Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa ree-man naga'yëjs, guial yu'naya reeman. ⁴⁶ Zianz rëbaman loj reeman:

—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

Gunaaz reeman Jesús
 (Mt. 26:47-56; Mr. 14:43-50; Jn. 18 :2-11)

⁴⁷ Sta caneenë Jesús bén naj ree xbejnman chi bidxin ree benzien. Në bén brii laj Judas, bén goc tijb ree xbejn Jesús, nedaman loj ree bén guin abi' bibigaman loj Jesús gudawaman laaman xid. ⁴⁸ Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

⁴⁹ Chi baguiaa ree bén za'në Jesús ni cayajc, rëb ree-man lojman:

—Dad, ¿zalëë dux espadan ya?

⁵⁰ Abi' tijb xbejnman gudiilguijdxaman xmojs bixhioz rniabee gra ree bixhioz, gutü'man guidiajg ladbee-man. ⁵¹ Per rëb Jesús loj reeman:

—Guzujr ree benan. Ma gojczy.

Dxel baqui' Jesús guidiajg mojs guin abi' bayünman laan. ⁵² Zianz rëb Jesús loj ree bixhioz rniabee ree bixhioz, con ree bén rniabee ree bén rajp yadooro' Jerusalén con xguxtis ree bén Israel, bén bidxin ree par chinë laaman:

—¿Chexc zeel zëëdidi con espad con yag din chinëdi naj zi'c tijb xingubaan? ⁵³ Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

Rëb Bëd ad nünbeetaman Jesús
 (Mt. 26:57-58, 69-75; Mr. 14:53-54, 66-72; Jn. 18 :12-18, 25-27)

⁵⁴ Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. ⁵⁵ Yagaj gule'c ree bén guin guij galay lule', abi' gurej reeman rudëj guin. Në Bëd gurejnë laa reeman. ⁵⁶ Per tijb béngunaa rüjn dxiin yagaj, chi baguiaaman Bëd zobjbaman rudëj guin, baguiaaman lojman, abi' rëbaman:

—Në bén guin za'në Jesús.

⁵⁷ Per gurexuu Bëd, abi' rëbaman loj bén guin:

—Ad nünbeetan laax.

⁵⁸ Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

⁵⁹ Gudëd cost tib hor, dxel rëb zatijb bejn:

—Nëczi bén guie za'në laaman din nëman naj Bén Galilea.

⁶⁰ Zianz rëb Bëd:

—Ad ragbeetan xhienin rnieel.

Hor ni canee gajc Béd zian guridxa' tijb gujd. ⁶¹ Dxel badxi' loj Jesús baguiaaman loj Béd, abi' basaaladx Béd guial rëb Jesús lojman: "Yan guxhin gajc chi gad gujd cwidxa', choon volt mal rëbil ad nünbeetil naj." ⁶² Dxel barii Béd yagaj, abi' dád naya biinman.

Baze' reeman Jesús gudijn tēē reeman laaman
(Mt. 26:67-68; Mr. 14:65)

⁶³ Bén cayajp ree Jesús, baze' reeman laaman gudijn tēē reeman laaman. ⁶⁴ Guxhii reeman lojman abi' gudijn reeman laaman, dxel rëb reeman lojman:
—iGuneeya' chu gudin lüj!
⁶⁵ Abi' zien ree diidxgujdx rëb reeman lojman.

Za' Jesús loj ree guxtis Israel
(Mt. 26:59-66; Mr. 14:55-64; Jn. 18 :19-24)

⁶⁶ Chi bareguiaa, badxajg lasa' ree guxtis Israel, nē ree bixhioz rniabee ree bixhioz con ree mextr rajc ley, abi' binē reeman Jesús lod radxaag lasa' gra ree xguxtis reeman, dxel rëb reeman lojman:

⁶⁷ —Guna du lojn, ¿lūj naj Cristo ya?
Badxi'man laan rëbaman:
—Bal ganinan ad zaliladxtidi. ⁶⁸ Abi' bal xhie ganabdiidixan lojdi, ad zadxi'tidan. ⁶⁹ Per diidz yan, Bén guxhaal Dios cweman xladbee Dios, bén ca' gra guialrniabee.
⁷⁰ Dxel rëb gra reeman lojman:
—¿Lūjn naj Xi'n Dios ya?
Badxi'man laan, rëbaman:
—Waliquidi najcan.
⁷¹ Zianz rëb reeman:
—¿Xhie mazri rŭjn naguiejn yadiil ree testiw? Dunuj gajc ree ma naguiejn ni nax con quijb xtiidix.

Binē reeman Jesús loj Pilato
(Mt. 27:1-2, 11-14; Mr. 15:1-5; Jn. 18 :28-38)

23 Dxel wajs gra reeman binē reeman Jesús loj Pilato. ² Yagaj guzuloj cutedia' reeman Jesús lojman, rëb reeman:

—Badxaaglojn xin guie cusqueeex bén du ladx ree, rëbix guial ad rayalt yadijx ree impuest loj rey César, rëb tēēx guial laax naj Cristo, naj tēēx rey.

³ Dxel gunabdiidx Pilato lojman rëbaman:
—¿Lūjn naj xrey ree bén Israel ya?
Badxi' Jesús laan, rëbaman:
—Waliquil, najcan.

⁴ Dxel rëb Pilato loj ree bixhioz rniabee ree bixhioz nē loj gra ree bén riga' yagaj:
—Achet xfalt xin guie radxejlan.

⁵ Per laa reeman naguiejnczi rŭjn reeman, rëb reeman:

—Cusqueeex bejn ree guidib niz Judea con ree ni rulüux laa reeman. Guzulojx niz Galilea abi' yan cayŭjnx zian niz guie.

Binē reeman Jesús loj Herodes

⁶ Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús. ⁷ Abi' chi rëb reeman guial najman Bén Galilea, guxhaalaman laaman loj Herodes Bén rniabee Galilea, guial lēn ree dxej guin nē Herodes za' Jerusalén. ⁸ Chi baguiaa Herodes Jesús dád babaaman guial diidz gocli rēnman guguaaman laaman guial bacaagdiajgaman ruza't ree bejn laaman, abi' rbēzaman guguaaman gŭnman tijb milagr. ⁹ Zien ree ni gunabdiidxaman lojman, per Jesús achetdzi badxi'man. ¹⁰ Nē ree bixhioz rniabee ree bixhioz za' yagaj con ree mextr rajc ley, ad rucwēēzt rutedia' reeman laaman. ¹¹ Dxel Herodes con ree xsuldadaman xhiernarajc beennē reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb. ¹² Abi' dxejzii bazuloj baneenē Herodes Pilato zagdxe, din gocli rdxe'ch lasa' reeman.

Gunabee reeman guiēt Jesús
(Mt. 27:15-26; Mr. 15:6-15; Jn. 18 :39-19 :16)

¹³ Dxel bachajg Pilato lasa' ree bixhioz rniabee ree bixhioz con ree guxtis, con ree Bén luguiedx guin, ¹⁴ abi' rëbaman loj reeman:

—Bidnēdi xin guie nadi cusqueeex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi. ¹⁵ Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiētix. ¹⁶ Yan, gudēdan laax casti dxel guslaan laax.

¹⁷ Lēn ree dxej lanij guin ruslaa Pilato tijb Bén yu' ladxguiib zi'c goc xcostumbr reeman. ¹⁸ Per graczi reeman guzuloj rbixdiaj, rëb reeman:

—iBagŭjt xin guin! iBaslaa Barrabás!

¹⁹ Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, nē guial bagŭjtaman bejn. ²⁰ Guneenē Pilato laa reeman zatijb guial guyēnman nuslaaman Jesús, ²¹ per laa reeman gurixdiaj reeman mazri rejs, rëb reeman:

—iBacaax loj crŭjz! iBacaax loj crŭjz!

²² Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiētix. Gudēdan laax casti dxel guslaan laax.

²³ Per laa reeman mazri rbixdiaj reeman, rëb reeman loj Pilato din gucaaman laaman loj crŭjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rēn reeman. ²⁴ Dxel cwējb Pilato beenman zi'c rēn reeman. ²⁵ Abi' baslaaman Barrabás Bén guyu ladxguiib por wadijl nē guial bagŭjtaman bejn, guiáad Jesús bayŭman laaman loj reeman persi beennē reeman laaman zi'ctzi rēn reeman.

Bacaa reeman Jesús loj crüzj
(Mt. 27:32-44; Mr. 15:21-32; Jn. 19:17-27)

²⁶ Chi zinë reeman Jesús din gucaa reeman laaman loj crüzj, gunaaz reeman tijb bén za Cirene laaman Simón. Ziaadaman bazaman dajn, gunabee reeman laaman güüman xcrüzj Jesús din chinalaman laaman.

²⁷ Zien da't bejn zinal laaman, abi' zien ree béngunaa roon rbixdiaj guial raya reeman laaman. ²⁸ Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi. ²⁹ Din zadxin dxej guiëbidi:

“Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.”

³⁰ Dxel suloj guiëb ree bejn loj ree guia': “Gol guxa't du guijcan”, guiáad loj ree lom guiëb reeman: “Gol baquie'ch dunujn.” ³¹ Yan, nacli naj rüjnnë reeman zian, diidxgui lëjt, wed xhieczinin güünnë reeman lëjt.

³² Abi' në tio'p ree xingubaan zinë reeman din tia rex loj crüzj con Jesús. ³³ Chi bixdin reeman lod la Calaver, bacaa reeman Jesús loj crüzj, con grop ree xingubaan guin: tijbix cwa ladbee zatijbix cwa ladruvejs.

³⁴ Abi' chi cucaa reeman Jesús loj crüzj, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan. ³⁵ Zien ree bejn riga' yagaj cuguiaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

³⁶ Në ree xin suldad ruze' laaman, rbig reex rudëed reex vinagr guië'man, ³⁷ rëb reex lojman:

—Bal lüj naj xrey ree bén Israel, baslaa lüj gajc.

³⁸ Abi' guijc crüzj guin bacaa reex lëjtr con diidx grieg, diidx latin, në diidx hebreo, rëban: “Bén guie naj xrey ree bén Israel.”

³⁹ Tijb xingubaan ni ca loj crüzj guin guneex diidxgujdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

⁴⁰ Per zatijbix gudilë xcompniarix, rëbix lojx:

—¿Staczi ad rdxebtil Dios ya majsí lasa'gajc casti guin cadëdil? ⁴¹ Dunuj ryalczi cayzaagdiaj din zian caydijx ni baguieen. Per bén guie achetctzi ni mal wayüjnman.

⁴² Dxel rëbix loj Jesús:

—Basaaladx naj chi ma canabeel.

⁴³ Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

Güjt Jesús

(Mt. 27:45-56; Mr. 15:33-41; Jn. 19:28-30)

⁴⁴ Chi gol garol dxej, bicajy guidibczi guidxliuj xt raca choon wadx. ⁴⁵ Bicajy logbijdx guiáad lajd nal lën yadooro' Jerusalén goxya'n, gojcan tio'p lala'. ⁴⁶ Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

⁴⁷ Chi baguiaa suldad rniabee ree suldad ni goc, baza'tix Dios zagdx, rëbix:

—Walican achet xtol bén guin yu'.

⁴⁸ Chi baguiaa gra ree bén za' yagaj ni goc, dád guyu-naya reeman zia reeman riga'pgaj luxdoo reeman.

⁴⁹ Per gra ree bén nünbee Jesús, con ree béngunaa nal laaman diidz Galilea, zijt guzuj reeman baguiaa reeman gra ree ni goc.

Biguie'ch Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu tijb bejn, bii lajman Xiëb, gojcaman benza'c, beenman zi'c ryal. Gojc ladxaman guiedx Arimatea tijb guiedx naaz Judea. Gojc tëëman tijb xguxtis ree bén Israel. ⁵¹ Nëman rbëz nabee Dios, abi' ad nëtaman bachajg xixgab ree bén bagüjt Jesús. ⁵² Wejman loj Pilato bignabaman xcuerp Jesús. ⁵³ Chi gulox baletaman xcuerp Jesús loj crüzj guin, cwa'man laaman batüüba-man tijb lajd, dxel biquie'chaman laaman lën tijb baa ni bidëen lën guiaj lod achutctzi waguie'ch. ⁵⁴ Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

⁵⁵ Abi' ree béngunaa zidnë Jesús diidz Galilea, në reeman binal abi' baguiaa reeman xbaa Jesús baguiaa tëë reeman xhienaag gudijxh reeman xcuerpaman. ⁵⁶ Chi bayejc reeman, zianz beenchaaw reeman perfum në zaj ni rliaa nejxh ni guidëebaman. Dxel baziiladx reeman dxej raziiladx ree bejn zi'c rniabee ley.

Raban Jesús

(Mt. 28:1-10; Mr. 16:1-8; Jn. 20:1-10)

24 Chi dumingw rsildoo, wej ree béngunaa guin ro' xbaa Jesús binë reeman perfum ni beenchaaw reeman. ² Chi bixdin reeman yagaj, baguiaa reeman guiaj ni bida'cw ro' baa guin ad naga'tri xluaran. ³ Abi' guyu reeman, per ad bidxaaglojtri reeman xcuerp Dad Jesús. ⁴ La'tzi cadxeb reeman ni'quid radxejlt xhie güün reeman, dxejctzi baguiaa reeman tio'p ree bejn za'li reeman gajxh lod za' reeman, najcw reeman lajd bacha'. ⁵ Abi' guial tant bidxeb reeman, basajb loj reeman xt luyuj, dxel rëb ree bén guin loj reeman;

—¿Chexc zeel raguilidi tijb bén naban loj ree bengüt? ⁶ Achuttri laaman guie din ma babanman. Gol basaaladx ni naman lojdi chi guzuman niz Galilea.

⁷ Naman lojdi guial yayü reeman Bén guxhaal Dios loj ree bëndol din gucaa reeman laaman loj crüzj, abi' ni yayon dxej yabanman.

⁸ Dxel basaaladx reeman diidx ni rëb Jesús loj reeman, ⁹ abi' chi baza reeman ro' baa guin, bicojn reeman guidixptib ree xi apóstoles Jesús në los demazri ree xcompniar reeman gra ni baguiaa reeman.

¹⁰ María Magdalena, con Xuan, con Li xniaa Jacob con ree béngunaa ren, laa reeman bignë rusion guin loj ree xi apóstoles Jesús. ¹¹ Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

¹² Per Béd baxüünman biquiaaman lèn baa guin, abi' chi baguiaaman lèn baa guin, lajd ni bidüübzi Jesús baguiaaman, zianz ziaman dád radxalojman por ni goc.

Balüüloj Jesús loj tio'p ree xbejnman

(Mr. 16:12-13)

¹³ Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén. ¹⁴ Chi zë reeman lunejz cayü reeman diidx xcwent gra ree ni goc. ¹⁵ La'tgaj cayü reeman diidx, gu-big Jesús cwë' reeman abi' guzuloj cazanëman laa reeman. ¹⁶ Per majsi cuguiaa reeman laaman, yu' ni badxoon nayünbee reeman laaman. ¹⁷ Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'-nayadi?

¹⁸ Badxi' tijb bën la Cleofas laan, rëbaman:

—Gra ree bejn ragbee ni goc Jerusalén lèn ree dxej guie. ¿Wen tijbzi lüj naj bën guzu Jerusalén ad gog-beetil ni goc ya?

¹⁹ Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús bën Nazaret, laaman goc tijb bën badëë xtiidx Dios loj ree bejn, bën gop guialrniabee zi'c ni beenman në ree diidx ni guneeman niz loj Dios në niz loj ree bejn. ²⁰ Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz. ²¹ Par dunujn laaman naj bën yabëë ree bën Israel loj ree bën rom, per yan gojc choon dxej ni goc ree ni guin. ²² Majsi tio'p choon ree bëngunaa no'ch du lojn bachejb reeman dunujn, guial rsildoo wej reeman ro' baa guin, ²³ abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús. ²⁴ Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree bëngunaa guin, per ad baguiaat reeman Jesús.

²⁵ Dxel rëb Jesús loj reeman:

—¿Xi nawëëg naj chignia'di abi' xi raglaa par chililadxidi gra ni gunee ree bën badëë xtiidx Dios loj ree bejn! ²⁶ ¿Wen id naj ya guial sagdiaj Cristo, dxelri yayë'paman xanyabaa?

²⁷ Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bën badëë xtiidx Dios loj ree bejn.

²⁸ Chi bidxin reeman guiedx lod zë reeman, been Jesús zi'c bën che mazri zijt. ²⁹ Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman.

³⁰ Abi' chi zojbnëman laa reeman xan mex, cwa'man

guiadxtil abi' chi gulox badëëman quixtëë loj Dios, gula'man laan persi badëëman laan loj reeman. ³¹ Hor guin gajc guzajc reeman zi'c bën baxal guialloj, abi' bayünbee reeman laaman. Per laa gunidloj gajcaman, ³² zianz rëb loj lasa' reeman:

—¿Ze'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

³³ Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. ³⁴ Rëb reeman loj grop ree bën guin:

—Walican ma baban Dad Jesús, ma balüülojman loj Simón.

³⁵ Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guiadxtil.

Balüüloj Jesús loj ree xbejnman

(Mt. 28:16-20; Mr. 16:14-18; Jn. 20:19-23)

³⁶ Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

³⁷ Dád badxaloj reeman abi' bidxeb reeman guial gunaladx reeman anman cuguiaa reeman. ³⁸ Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi? ³⁹ Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijt ad ca tëëtaman bëël zi'c ruguiaadi naj.

⁴⁰ Chi rëbaman zian, balüü yaaman në guia'man.

⁴¹ Per laa reeman staczi ad rliladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

⁴² Dxel badëë reeman tiblia' bëjl biguie', ⁴³ abi' cwa'-man laab gudawaman niz loj reeman. ⁴⁴ Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj li-br salmos.

⁴⁵ Dxel guxhalaman xquiarguejn reeman persi bignia' reeman ni ca loj xtiidx Dios, ⁴⁶ abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman. ⁴⁷ Abi' diizd Jerusalén suloj guire'ch xtiidxaman xt guidib loj guidxliuj guial yu' pardon par gra ree bën yayüjn xgab por xtol guililadx tëë reeman naj. ⁴⁸ Lëjt naj testiw xcwent gra ree ni guin. ⁴⁹ Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

Bayë'p Jesús xanyabaa

(Mr. 16:19-20)

⁵⁰ Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. ⁵¹ Abi' la'tgaj cayüjnle-

man laa reeman, wajsaman ziaman xanyabaa. ⁵² Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman. ⁵³ Abi'

guixie guixie yu' reeman lën yadooro' Jerusalén ruza't reeman Dios zagdxe rudëëd tëë reeman quixtëë lojman.

San Juan

Bi't Xi'n Dios loj guidxliuj

¹ Diizd guia'xchej chi gad guidxliuj gacchaaw, mal yu' bën naj xtiidx Dios. Laaman za'në Dios abi' laagajcaman naj Dios. ² Laaman mal za'në Dios diizd guia'xchej. ³ Laaman been graczi ni yu'. Achetczi ni yu' niajc bal id laaman. ⁴ Laaman rajp guialnaban, guiáad guialnaban guin naj bajl par gra bénguidxliuj. ⁵ Bajl guin rusni bën nacay xquiarguejn, abi' ad rajct rutëe guialnacay guin loj bajl guin.

⁶ Guyu tijb bën brii laj Waj, Dios guxhaal laaman, ⁷ bidgaguieman diidx xcwent bën naj xbajl Dios, din gac chililadx gra ree bejn laaman. ⁸ Per ad Wajt goc bajl guin, bi'tzaman bidgaguieman diidx xcwent bajl guin. ⁹ Din bën naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

¹⁰ Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman. ¹¹ Bi'taman loj ree bën Israel, abi' majsi gojcaman bën Israel, per ad bidxga't reeman laaman. ¹² Per, gra ree bën bidxga' laaman bililadx tëe reeman laaman, beenman laa reeman xi'n Dios. ¹³ Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rën bejn chu' xi'nman, por guial rililadx reeman ma naj reeman xi'n Dios.

¹⁴ Jesús, bën naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyënman bejn ree gunee tëëman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. ¹⁵ Chi be Waj xtiidxman loj ree bejn, gunee man rejs, rëbaman:

—Jesús guie naj bën ruzatan, chi nnin guial bën zëed xichan mazri lasajcaman guial lon, din diizd gocli mal yu'man guial lon.

¹⁶ Dád rënman dunuj ree, gra dxejczy raca' dugra ree xguialnaza'caman. ¹⁷ Por Moisejs banee Dios xleyaman duloj ree, per por Jesucrist bayagbee ree xhienaag rën Dios dunuj ree xhie tëe naag naj xtiidxliman. ¹⁸ Ad yu't dxej waguiaa bejn Dios. Bën naj tijbzi xi'nman. Bën nabannë laaman balüü duloj ree xhienaag naj Dios.

Waj bën baroobnijs rëbaman chu naj Jesús

(Mt. 3:11-12; Mr. 1:7-8; Lc. 3:15-17)

¹⁹ Diizd Jerusalén guxhaal ree xguxtis ree bën Israel bixhioz ree con ree bën naj ree levitas persi bignabdiidx reeman loj Waj chu najman.

²⁰ Dxel be Waj diidxli loj reeman, rëbaman:

—Ad najtan naj Cristo.

²¹ Abi' gunabdiidx reeman lojman stijb rëb reeman:

—¿Chuza najl? ¿Lüjn naj Elías ya, bën badëe xtiidx Dios loj ree bejn?

Badxi' Wajn rëbaman:

—Ad najtan.

Dxel gunabdiidx reeman stijb rëb reeman:

—O, ¿lüjn naj bën naj diidx gui't ya, bën gudëe xtiidx Dios loj ree bejn?

Badxi'man laan rëbaman:

—Ad najtan.

²² Abi' rëb reeman:

—¿Chuza najl? Din rayal yugnë'n ruson loj ree bën guxhaal dunujn. Guna chu najl.

²³ Dxel rëb Waj loj reeman:

—Naj naj tijb bën rbidxa' loj yujbidx: "Gol guxhal tijb nejz nali par bën ca' guialrniabee" —zi'c rëb Isaías bën badëe xtiidx Dios loj ree bejn.

²⁴ Abi' ree bën guxhaal ree bënfarisew din guinieenë reeman Waj, ²⁵ gunabdiidx reeman lojman, rëb reeman:

—Bal id lüjn naj Cristo, ni'qui Elías, ni'qui bën naj diidx gui't, bën gudëe xtiidx Dios loj ree bejn, ¿chexquiza zeel ruobnijsil bejn?

²⁶ Badxi' Waj laan rëbaman:

—Naj ruobnijs con nijs, per lojdi no'ch tijb bën ad wayünbeetidi. ²⁷ Laaman naj bën zëed xichan, ni'qui xgurëchaman ad rayalt gaxhiecan guial najman bën mazri lasajc guial lon.

²⁸ Gra niguie gojc lod la Betábara, ni naj stiblad ro' guiiw Jordán, lod baroobnijs Waj bejn ree.

Jesús naj Xi'n Dios

²⁹ Chi bareguiaa, baguiaa Waj zibig Jesús lod za'man, dxel rëbaman:

—Gol baguiaa, bën guin naj bën bacaabee Dios din guiëtaman zi'c xiildoo por xtol ree bénguidxliuj. ³⁰ Laaman bazatan lojdi chi nnin: "Xichan zidnal bën mazri lasajc guial lon, din laaman mal yu' diizd gocli guial lon." ³¹ Ni'qui naj ad gogbeetan guial laaman naj bën gui't, per naj zialan din gurobnijsan bejn ree con nijs din chile' güünbee ree bën Israel laaman.

³² Rëb tëe Waj loj reeman:

—Naj baguiaa biguiajt xSprijt Dios diizd xanyabaa zi'c tijb palom xt guijcaman. ³³ Majsi ad nünbeetan laaman, per bën guxhaal naj baroobnijsan con nijs, laaman na lon: "Chi guguiaa guiat xSprijt Dios xt guijc ti-jb bejn, laaman naj bën runee xSprijt Dios." ³⁴ Naj ma

baguia laaman, abi' ragbeechaawan guial laaman naj Xi'n Dios.

Bén binal ree Jesús yaloj

³⁵ Chi bareguiaa, za' Waj yagaj stijb, za'në tio'p ree xbejnman. ³⁶ Abi' chi baguiaaman cadëd Jesús, dxei rëbaman loj reeman:

—Gol baguiaa, bën guinan naj zi'c xi xiildoo Dios din guiëtaman por xtol bénguidxliuj.

³⁷ Chi bigueijn reeman rëb Waj zian, dxei binal reeman Jesús. ³⁸ Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguilidi?

Badxi' reeman laan rëb reeman:

—Mextr, ¿ban zojbil?

³⁹ Dxei rëb Jesús loj reeman:

—Gol guda din guguaadi.

Dxei wej reeman biquiaa reeman lod zojbaman, abi' baya'nnë reeman laaman dxei guin, guial ma gojl cost raca tajp wadxe.

⁴⁰ Tijb ree xbejn Waj bën binal Jesús, bën bacaagdiajg ni rëb Waj, laaman brii laj Andrejs, bijch Simón Bëd.

⁴¹ Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bën naj Mesías —rën guiëban Cristo.

⁴² Dxei binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

Gurejdx Jesús Felip në Natanael

⁴³ Chi bareguiaa been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

⁴⁴ Ladx Felip guin naj guiedx Betsaida, ni gajc naj ladx Andrejs con Bëd. ⁴⁵ Dxei bigdiil Felip Natanael, abi' rëbaman lojman:

—Ma badxaaglojn bën ruza't Moisejs loj xlibr xleyaman, bën ruza't ree bën badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bën Nazaret.

⁴⁶ Dxei rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguaal.

⁴⁷ Chi baguiaa Jesús zëëd Natanael, rëbaman:

—Guie zëëd tijb bën naj quijb bën Israel, abi' ad rusquieetaman.

⁴⁸ Dxei gunabdiidx Natanael lojman, rëbaman:

—¿Xoza nünbeel naj?

Badxi' Jesús rëbaman:

—Chi gad Felip cwedx lüj, chi za'l xan yag higo, dxei baguian lüj.

⁴⁹ Zianz rëb Natanael lojman:

—Mextr, lüj naj Xi'n Dios, lüj naj rey Israel.

⁵⁰ Badxi' Jesús laan rëbaman:

—¿Riladxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguiaa.

⁵¹ Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguaajt tëë reeman xt guijc Bën guxhaal Dios loj guidxliuj.

Wej Jesús loj tijb guialruxhliia

2 Ni goc choon dxei guyu tijb guialruxhliia luguiedx Caná, ni riga' niz Galilea. Dxei në xnial Jesús za' yagaj, ² abi' në Jesús con ree xbejnman gunee reeman persi wej reeman loj lanij guin. ³ Chi babidx vin, dxei rëb xnial Jesús lojman:

—Achetri vin rajp reeman.

⁴ Badxi' Jesús rëbaman:

—Na, ¿chexquiza zeel nal lon zian? Ad wadxint da hórán günan ni rayal günan.

⁵ Per xniaaman rëb gajcaman loj ree bën cayüjn mandad yagaj:

—Gol been gra ni naman.

⁶ Yagaj za' xho'p ree guiajs guiaj, ni ru nijs ni rüjnnë ree bën Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. ⁷ Abi' rëb Jesús loj ree bën rüjn mandad guin:

—Gol bacha ree guiajs guie nijs.

Dxei bachadi reeman laa reen, ⁸ abi' rëbaman loj reeman:

—Yan gol gulëë ta'nan, gol bigdëën loj bën canabee loj lanij guie.

Dxei bigdëë reeman laan lojman, ⁹ abi' bën canabee loj lanij guin beenman prueb nijs bayajc vin guin, sin guial niagbeeman ban guzan, bën cayüjnz ree mandad guin ragbee, din laa reeman bica' nijs guin. Dxei gurejdxaman xin cuxhliia guin, ¹⁰ rëbaman lojx:

—Graczi bejn rgui's yaloj vin zagdxe, abi' chi ma gu' reeman zilan, dxei rgui'saman vin corrient. Per lüj badxe'chaawil vin zagdxe guin persi cagui'silan yan.

¹¹ Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

¹² Chi gulox gojc zian dxei zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

Babëë Jesús bën ruto' ree ro' yadooro'

(Mt. 21:12-13; Mr. 11:15-18; Lc. 19:45-46)

¹³ Chi ma zidyob pascw xlanij ree bën Israel, wej Jesús Jerusalén. ¹⁴ Abi' ro' yadooro' bidxaaglojman bën cuto' ree go'n, con ree xiil con ree palom, në ree bën zojb xan mex ruchaa reeman xmilia ree bën ziaad lood ren. ¹⁵ Chi baguiaa Jesús zian, dxei beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bën ruchaa milia guin barexguiat tëëman xmex reeman.

¹⁶ Dxei rëbaman loj ree bën cuto' palom:

—¡Gol babëë reeb guie! ¡Ad rüjnnëdi lidx da Dadan zi'c luguia'!

¹⁷ Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸ Zianz rëb ree bën Israel lojman:

—¿Xhie milagr gulüül du lojn din yayagbeen guial rajiil guialrniabee güünl zian?

¹⁹ Badxi' Jesús laan rëbaman:

—Gol base'n yadoo guie, naj yayün laan loj choon dxejzi.

²⁰ Dxel rëb ree bën Israel guin lojman:

—Tiubixho'p ijz goglaa reeman been reeman yadoo guie, ¿guiáad lüj ya yayünlan choon dxejzi?

²¹ Per Jesús xcuerp gajcaman ruza'taman chi ruza'taman yadoo guin. ²² Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëë reeman ni ca loj xtiidx Dios.

Jesús nünbee xixgab gra bejn

²³ Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. ²⁴ Per laaman ad rëbtaman loj reeman chu najman, din laaman nünbeechaaw xhienaag naj xixgab reeman. ²⁵ Ad biaadxtaman chu niëjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

Bigneenë Nicodemo Jesús

3 Guyu tijb bënfarisew brii lajman Nicodemo, gojcaman tijb guxtis loj ree bën Israel. ² Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutczizajc güün lasa' ree milagr ni rüjn bal id za'në Dios laaman.

³ Dxel rëb Jesús:

—Diidxliczi rnin lüj, bën ad zajlt stijb, ad zajct guguaaman xguialrniabee Dios.

⁴ Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xniaaman ya abi' galaman stijb?

⁵ Badxi' Jesús laan rëbaman:

—Diidxliczi rnin, bën ad rirobnijst ad nabannë tëëta-man xSprijt Dios ad zile't yayuman loj xguialrniabee Dios. ⁶ Bën naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban. ⁷ Ad bal radxa lojl guial rnin: “Rüjn naguiejn gal bejn stijb.” ⁸ Din zi'c rbi' bi gralad abi' majsi rigueijn chi rbi'n, per ni'quid ragbeetil ban zëëdan o ban zën. Ziangajc naj xSprijt Dios con gra ree bën nabannë laaman.

⁹ Dxel rëb Nicodemo lojman:

—¿Xhienaag rajc zian?

¹⁰ Badxi' Jesús an rëbaman:

—¿Lüj, naj mextr loj ree bën Israel, ad rignia'til gra ree ni guin ya? ¹¹ Diidxliczi rnin lojl, raneen ni rayag-

been ni baguiaa tëën, per lëjt ad riladxtidi ni ranan.

¹² Bal id riladxtidi chi rnin xcwent ree ni loj guidxliuj guie, ¿xhienaag chililadxtidi bal ganin xcwent ree ni xanyabaa?

¹³ Achut wayej xanyabaa, tijbzi bën biguiat diizd xanyabaa, Bën guxhaal Dios loj guidxliuj. ¹⁴ Abi' zi'c ba-caa Moisejs bëël guiib loj yag niz loj yujbidx, ziangajc Bën guxhaal Dios loj guidxliuj, gucaa reeman laaman loj crüjz, ¹⁵ din gra bën chililadx laaman ad zaniijt reeman loj Dios, gap reeman guialnaban tiblyaa con laaman.

Rën Dios bejn

¹⁶ 'Guial tant rën Dios bënguidxliuj, majsi tijbzi xi'n-man, per guxhaalaman laaman loj guidxliuj, din graczi bën chililadx laaman ad zaniijt reeman loj Dios, gap reeman guialnaban tiblyaa con laaman. ¹⁷ Din Dios ad guxhaalt xi'nman loj guidxliuj din gudëëdaman bejn casti, guxhaalaman laaman din gap ree bejn perdon loj Dios.

¹⁸ 'Bën riladxi Xi'n Dios ad rayaltaman xcasti Dios. Per bën ad riladxt, laaman ma rayal casti guial ad riladxtaman Xi'n Dios, bën naj tijbzi xi'nman. ¹⁹ Bën ad riladxt ree rayal reeman casti, din yan ni bi't bën naj xbajl Dios, mazri bayuladx reeman nejz mal, guial rüjn reeman ganax ni mal. ²⁰ Graczi ree bën rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayün reeman. ²¹ Per ree bën naban zi'c rayal loj Dios, laa reeman rbig loj xbajlaman din guiguien guial graczi ni cayün reeman naj ni rën Dios.

Waj bën baroobnijs ruza'taman Jesús stijb

²² Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. ²³ Nëgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijst reeman. ²⁴ Laan goc chi gad Waj chuladxguiib.

²⁵ Per bëlzi ree xbejn Waj, con za tio'p choon gajc ree bën Israel guzuloj cadildiidx reeman por xcostumbr reeman guial xhienaag gac reeman naya. ²⁶ Dxel biguiedx reeman loj Waj:

—Mextr, bën guzunël stiblad ro' guiiw Jordán, bën bel xtiidx du lojn, në laaman curoobnijs bejn ree abi' gra reeman zinal laaman.

²⁷ Badxi' Waj laan rëbaman:

—Achut zajc gap guialrniabee bal id Dios gudëë laan.

²⁸ Lëjt ragbee guial biguejndi rën guial ad najtan naj Cristo, naj guneed lojman zidgagojnan por laaman.

²⁹ Dunuj ree rayagbee guial loj guialruxhliiaa, xin za'në biingunaa guin, laaxan cuxhliiaa, guiáad xmiwix xin za' con laax rabaanë da'tix laax chi rigueijnx rnieex. Ziangajc naj dád rabaanë'n laaman. ³⁰ Abi' laaman gusnuu gacaman mazri bën zobjloj, guiáad naj gusnuu gacan bën ad lasajct guial lojman.

Bén zëed xanyabaa

³¹ 'Din bén zëed diizd xanyabaa, laaman naj bén rniabee loj gra. Per bénguidxliuj, bénguidxliujzi najman abi' ganax ni yu' loj guidxliuj ruza'taman. Per Bén zëed diizd xanyabaa laaman rniabee gra, ³² abi' rüman ni ma baguiaaman ni ma biguiejn tëëman, per achut rliladx ni rnieeman. ³³ Bal yu' bén rliladx xtiidxaman, zian rguien guial ni diidxli naj xtiidx Dios. ³⁴ Abi' bén zëed por Dios, laaman rü xtiidx Dios guial guidiblagaa badëed Dios xSprijtaman lojman. ³⁵ Dios rën Xi'nman abi' basa'nman gra lojman. ³⁶ Abi' chutëez bén rliladx Xi'nman, laaman rajp guialnaban tiblayaa loj Dios. Per bén ad rtiëjbt chililadx, ad rajptaman guialnaban guin, laaman rayal xcasti Dios.

Jesús con béngunaa Samaria

4 Gogbee ree bénfarisew guial mazri zien bejn ma zinal Dad Jesús mazri zien tëë bejn ru-roobnijsaman guial loj Waj, ² majsi diidxliczi ad Jesústan ru-roobnijs bejn ree, bén naj ree xbejnman ru-roobnijs. ³ Chi gogbeeman zian dxei briiman niz Judea zëman niz Galilea stjib.

⁴ Per chi zëman niz Galilea been naguiejn gudë-daman niz Samaria. ⁵ Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb. ⁶ Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxei gurejman ro' bizë guin. Ma zidyob garol dxei. ⁷ Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxei rëb Jesús lojman:

—Bazaladx ta'n xnijsil guië'n.

⁹ Per guial ad rnieenët lasa' ree bén Israel zagdx con ree bén Samaria, badxi' béngunaa guinan rëbaman:

—¿Chexquiza zeel rniabil nijs lon najl bén Israel awa bén Samaria naj?

(Din bén Israel ree ad rnieenët reeman bén Samaria ree zagdx.) ¹⁰ Badxi' Jesús laan rëbaman:

—Bal zian ragbeel ni rën Dios guneeman lüj, chutëë bënan canab nijs lojl, zanabil nijs lon abi' naj zunen nijs runee guialnaban.

¹¹ Dxei rëb béngunaa guin loj Jesús:

—Dad, ni'quid ca'til ni cwëënël nijs, abi' bizë guin dád naxhitan. ¿Ban chica'l nijs runee guialnaban?

¹² Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

¹³ Badxi' Jesús laan rëbaman:

—Graczi ree bén rë' nijs guie re'c reeman nijs stjib.

¹⁴ Per bén guië' nijs gudëdan, ad yu'tri dxei che'caman nijs. Din nijs gudëdan gacan luxdooan zi'c lod ad rbëzt rajch nijs, abi' nijs guin gudëë guialnaban tiblayaa.

¹⁵ Dxei rëb béngunaa guin lojman:

—Dad, banee nijs guin lon, chitëë che'cran nijs ad zial tëëtran guidca'n nijs guie.

¹⁶ Rëb Jesús lojman:

—Bignee lacheelil, dxei yaguaadil guie.

¹⁷ Badxi' béngunaa guinan rëbaman:

—Achut da bénguaawan yu'.

Dxei rëb Jesús:

—Waliquil achut lacheelil yu', ¹⁸ din ma gojc gaay xin-guiaaw rtia' lüj, abi' yan xin zojbnël ad lacheeltan. Zeel waliqui ni nal.

¹⁹ Chi biguiejnman ni rëb Jesús, dxei rëbaman:

—Dad, ma ragbeen guial lüj naj bén rudëë xtiidx Dios loj ree bejn. ²⁰ Dux béngulalan gunajchi' reeman Dios ruguia' guie, per lëjt najdi bén Israel rëbidi guial Jerusalén naj lod guiniajchi' bejn laaman.

²¹ Badxi' Jesús laan rëbaman:

—Na, zagdx rnin guial guidxin dxei guiniajchi'di dux Dad ree Dios, ad zi'ttridi ruguia' guie ad zej tëëtridi Jerusalén. ²² Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree bén Israel grii bén güün bejn ree perdon. ²³ Abi' ma bidxin dxei ni gra ree bén diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bén rniajchi' laaman. ²⁴ Dios naj Sprijt, abi' bén rniajchi' ree laaman rayal guiniajchi' reeman laaman con guidib luxdoo reeman por xSprijtaman.

²⁵ Dxei rëb béngunaa guin lojman:

—Naj ragbee gui't Bén Jesús, bén la gajc, Cristo. Abi' chi gui'taman, laaman gusignia' dunuj ree gran.

²⁶ Abi' rëb Jesús:

—Najn naj Bén zii, laaman caneenë lüj.

²⁷ Loj hor guin badxin ree xbejn Jesús, abi' dád badx-aloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman. ²⁸ Guiáad béngunaa guin basa'n xreman ro' bizë guin, dxei ziaman luguiedx guin, abi' rëbaman loj ree bejn:

²⁹ —Gol taquiaa tijb Bén ma na graczi ni ma benan. ¿Nid laaman naj Cristo ya?

³⁰ Dxei brii reeman luguiedx guin zë reeman lod za' Jesús. ³¹ Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

³² Per rëbaman loj reeman:

—Laa da guialrawan yu', ni ad nünbeetidi.

³³ Dxei guzuloj canabdiidx loj lasa' reeman rëb reeman:

—¿Ni yu' chu bidnë ni gudawaman ya'n?

³⁴ Dxei rëb Jesús loj reeman:

—Da guialrawan naj günan zi'c rën Dios, Bén guxhaal naj abi' guloox günan ni naman. ³⁵ Lëjt rëb: "Ryaadx zatajp bëëw din gac ni yu' loj guiniaa." Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen. ³⁶ Abi' Bén rato'p loj guiniaa guin, rtia'man ni rayalaman por dxiin ni rünman. Guiáad ni rato'paman naj par lod yu' guialnaban

tiblayaa. Dxel zi'c bën rxübin zi'c bën rato'p, rabaa ree-man tiblojzi. ³⁷ Waliqui ni rëb ree bejn: "Ben ren rxübin, ben ren rato'p guialnaza'c." ³⁸ Naj guxhal lëjt din chig-to'pidi guialnaza'c lod ad beentidi dxiin. Ben ren ree been dxiin, guiaad lëjt gaz bigto'pidi guialnaza'c lod ad beentidi dxiin.

³⁹ Zien ree bën Samaria bililadx Jesús guial be bengu-naa guin diidx loj reeman rëbaman: "Ma gunaman graczi ni benan." ⁴⁰ Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej. ⁴¹ Abi' mazri zien reeman bililadx laaman chi bigueijn reeman ni rnieeman, ⁴² dxel rëb reeman loj bëngunaa guin:

—Bajy yan ad por ni natzil raliduladxan laaman, në-gajc dunujn ma bagueijn ni rnieeman, abi' rayagbeen walican laaman naj Cristo, bën yabëë bënguidxliuj loj dol.

Bayüjn Jesús xi'n xbejn tijb rey

⁴³ Chi goc tio'p dxej guin, baza Jesús niz Samaria abi' zëman niz Galilea, ⁴⁴ majsi laagajcaman rëb guial ni'qui tijb bën rudëë xtiidx Dios loj ree bejn ad rajpt reeman laaman respekt ladx gajcaman. ⁴⁵ Per chi badxinman niz Galilea, bën niz ni ree baca' reeman laaman za-gdxe. Din në laa reeman wej lanij pascw Jerusalén, abi' baguiaa reeman gra ni beenman ni. ⁴⁶ Chi za'man niz ni wejman Caná stijb, lod bayüjnman nijs vin. Abi' luguiedx Capernaum guyu tijb xbejn rey ragxuu xi'nman. ⁴⁷ Chi gogbee bën guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guiëtix. ⁴⁸ Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

⁴⁹ Per rëb bën guin:

—Dad, yo' yan gajc, naga gad da xi'nman guiët.

⁵⁰ Dxel rëb Jesús lojman:

—Baguiaj lidxil, ma bayajc xi'nl.

Bililadx bën guin ni rëb Jesús, abi' zia lidxaman.

⁵¹ La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

⁵² Dxel gunabdiidxaman loj reeman, rëbaman:

—Xhie hor guzuloj banaa da xi'nman?

Abi' rëb reeman lojman:

—Nieey cost raca tijb wadxe bariix xliaa.

⁵³ Dxel basaalex bën guin guial hor ziin rëb Jesús lojman: "Ma bayajc xi'nl." Abi' laaman në gra bën zobj lidxaman bililadx reeman Jesús. ⁵⁴ Ni ne naj milagr barojp ni been Jesús niz Galilea chi bazaman niz Judea.

Bayüjn Jesús tijb bën ad rajct rza

5 Chi gudëd gojc zian, guyu tijb xlanij ree bën Israel, abi' wej Jesús Jerusalén. ² Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. ³ Yagaj riga'

zien ree bënragxuu, zi'c ree bën lutia'p, në ree bencoj con ree bën ad rajct rza, cabëz reeman guiniib nijs yu' lën tanc guin. ⁴ Din gocli goc rguiajt tijb xianjl Dios runiibaman nijs guin, abi' bën ru lojnijs guin yaloj chi caniiban, rayajcaman xhietëëz guialguijdxan rajcaman. ⁵ Dxel loj ree bën guin no'ch tijb bejn, ma gojc zi'ctiubi-choon ijz ragxuuman. ⁶ Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

—Xhienl ya yayajquil?

⁷ Badxi' bënragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

⁸ Dxel rëb Jesús lojman:

—Bixche, baca' ni naal loj, baguiaj.

⁹ Loj hor guin gajc bayajc bën guin, baca' ni naaman loj abi' guzuloj cazaman. Per guial dxej zii naj dxej raziiladx ree bën Israel, ¹⁰ zianz bën Israel zinal ree ley rëb reeman loj bën bayajc guin:

—Yandxej naj dxej raziiladx bejn, ad zajct yaca' ni go'til loj.

¹¹ Badxi' bën guinan rëbaman:

—Bën bayüjn naj naman: "Baca' ni naal loj, baguiaj."

¹² Dxel gunabdiidx reeman lojman rëb reeman:

—Xchu na lojl: "Baca' ni naal loj, baguiaj?"

¹³ Per bën guin ad ragbeetaman chunin bayüjn laaman guial bi'ch Jesús loj ree benzien riga' yagaj. ¹⁴ Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

¹⁵ Dxel zia bën guin abi' biguiedxaman loj ree bën Israel guial Jesús naj bën bayüjn laaman. ¹⁶ Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. ¹⁷ Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

¹⁸ Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹ Rëb Jesús loj reeman:

—Diidxliczi rnin, achet zajc güün Xi'n Dios por xix-gabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. ²⁰ Din Dios rën xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi.

²¹ Din zi'c rasban Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bën nünman xgab. ²² Abi' ad Diost rüjn guialguxtis, bazuj xi'nman din güünman guialguxtis, ²³ din gap gra ree bejn xi'nman respekt zi'cgajc rajp reeman laaman respekt. Bën ad rajpt Xi'n Dios respekt, ad rajp gajctaman respekt xDadaman Dios, bën guxhaal laaman.

²⁴ 'Diidxiczi nnin: Bén ruzoob da diidxan rliladx tēeman Dios, bén guxhaal naj, laaman ma rajp guialnaban tiblyayaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman. ²⁵ Diidxiczi nnin ma bidxin hor, abi' yandxej gajcan, bén naj ree zi'c bengüt loj Dios gucaagdiajg reeman cha' xi'nman. Abi' ree bén guzoob xtiidxaman zajp reeman guialnaban tiblyayaa con Dios. ²⁶ Din zi'c rajp Dios guialnaban, lasa'gajc guialnaban guin ma badēē loj xi'nman, ²⁷ abi' badēēman guialrniabee lojman din gūnman guialguxtis, din laaman naj Bén guxhaal Dios loj guidxliuj. ²⁸ Ad bal radxa lojdi ni nnin, din zadxin dxej guien gra ree bengüt cha' Xi'n Dios, ²⁹ abi' yarii reeman lēn baa. Dxel bén been ree ni ruladx Dios, yaban reeman, din gap reeman guialnaban tiblyayaa con laaman. Guíaad ree bén been ni mal, yaban reeman din yayal reeman casti ni rayal reeman.

Ni rulüü guialrniabee rajp Jesús

³⁰ 'Achet zajc gūnan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaben, rünanan zi'c rēn da Dadan bén guxhaal naj. ³¹ Bal gū da diidx gajcan, achet lasajcan. ³² Per yu' ben ren rü da diidxan, abi' ragbeechaawan guial diidxlin. ³³ Lējt guxhaal bén bignabdiidx ree loj Waj, abi' laaman ganax ni diidxli gunaman. ³⁴ Majsi ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap tēēdi perdon. ³⁵ Waj goc zi'cgajczi tijb bajl ni re'c abi' rusnin, guíaad lējt dād babaadi bidxga'di tijb tiamp ni balüüman lējt. ³⁶ Per naj mazri naj ni gulün lējt guial loj ni balüü Waj lējt por naj. Din ni na da Dadan Dios gūnan, laanan cayūnan yan din guiguien guial diidxli laaman guxhaal naj. ³⁷ Nē da Dadan bén guxhaal naj, laagajcaman be da diidxan, majsi ad waguiejtidi cha'man ad waguiaa tēētiidi laaman. ³⁸ Ad yu'guijc tēētiidi xtiidxaman zeel ad rliladxtidi bén guxhaalaman. ³⁹ Lējt con cudad da't roolidi loj xtiidx Dios, guial ragbeedi con laan gapidi guialnaban tiblyayaa con Dios. Abi' majsi loj xtiidx gajcaman ruza't naj, ⁴⁰ per ad rēntidi chililadxidi naj din gapidi guialnaban guin.

⁴¹ 'Naj ad raguiltan guilies ree bejn da valoran. ⁴² Abi' ragbeechaawan guial ad walit rēndi Dios. ⁴³ Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. ⁴⁴ ¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdxē loj bén naj tijbzi Dios. ⁴⁵ Ad bal naladxidi naj gabec xguialquiadi loj Dios, din bén cwe'c xguialquiadi naj Moisejs, bén rbēzidi gūn lējt yudar. ⁴⁶ Bal bililadxidi ni rēb Moisejs, nē naj zaliladxidi, din Moisejs bacaā loj xtiidx Dios lod ruza't naj. ⁴⁷ Per bal id rliladxidi ni bacaaman, ¿xoza chililadxidi ni nnin lējt?

Bayaan Jesús gaay mil bejn

(Mt. 14:13-21; Mr. 6:30-44; Lc. 9:10-17)

6 Chi gudēd gojc zian, dxel zē Jesús stiblad ro'nijsdoo riga' niz Galilea, nijsdoo la gajc Tiberias.

² Bénguixiuj binal laaman, guial ruguiaa reeman milagr ree ni rüjman rayüjnman bēnragxuu ree. ³ Dxel wē'paman tijb ruguia' abi' gurenē ree xbejnman. ⁴ Dx-ejzii ree ma zidyob pascw, xlanij ree bén Israel. ⁵ Chi gules loj Jesús, abi' baguiaaman zēēd ree bénguixiuj lod za'man, dxel rēbaman loj Felip:

—¿Ban yusii ree ni gaw gra ree bén guin?

⁶ Per rēbzaman zian din guidoon xhie guiēb Felip, din Jesús mal ragbeeman xhie gūnman. ⁷ Dxel badxi' Felipan rēbaman:

—Ni'qui ni rüjn bejn gan loj xhujn bēēw ad zadaant yo' guidxtil din gaw tijbgaj reeman majsi tibia'dogazjan.

⁸ Dxel gunee stijb xbejn Jesús, bén la Andrejs bijch Simón Bēd, rēbaman:

⁹ —Laa tijb xindo ca' gaay guidxtil con zatio'p bējl za' guie. Per, ¿tē'czi taan ni guin par gra bén guin?

¹⁰ Dxel rēb Jesús:

—Gol gūjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguiaw. ¹¹ Dxel cwa' Jesús guidxtil guin ree. Chi gulox badēēman quixtēē loj Dios, badēēman laa reen loj ree xbejnman persi gudi's reeman laa reen loj gra ree bén zojb yagaj. Ziangajc beenman con ree bējl guin, badēēman laa reen zi'ctzi guyēn reeman. ¹² Chi ma bixienladx reeman, dxel rēbaman loj ree xbejnman:

—Gol bato'p gra ree ni laay baya'n, chitēē xhie guizēēb.

¹³ Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guidxtil guin. ¹⁴ Chi baguiaa ree bejn milagr narooob ni been Jesús, rēb reeman:

—Walican bén guin naj bén rudēē xtiidx Dios loj ree bejn, bén naj gui't loj guidxliuj.

¹⁵ Per gogbee Jesús guial rēn reeman chinē naguiejn reeman laaman din gūn reeman laaman rey, dxel bazaman yagaj, wē'paman mazri ladya guijc guia' guin, lod su xtijbaman.

Rza Jesús lonijsdoo

(Mt. 14:22-27; Mr. 6:45-52)

¹⁶ Chi ma cabej guiaal, biguiajt ree xbejn Jesús ro'nijsdoo, ¹⁷ guyu reeman loj tijb barcw, abi' cadēd reeman loj nijs guin din guidxin reeman Capernaum. Ma bica-jy, guíaad Jesús gadaman yadxin. ¹⁸ Dxel guzuloj cabi' bidoxh abi' wajs xtüjp nijs guin. ¹⁹ Chi ma gojc zi'c gaay o xho'p kilometro zē reeman, baguiaa reeman caza Jesús lojnijs guin cabigaman lod zē barcw guin, dād bidxeb reeman. ²⁰ Per rēbaman loj reeman:

—¡Najn, ad rdxebidi!

²¹ Dxel guyēn reeman niuman loj barcw guin, per hor guin gajc bidxin reeman lod zē reeman.

Bigdiil ree bén bayaan Jesús laaman

²² Chi bareguiaal, bén riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zē ree xbejn Jesús per ad nēt laaman.

²³ Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëed Jesús quixtëe loj Dios. ²⁴ Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil ree-man laaman.

Jesús naj bén rudëed guialnaban

²⁵ Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman: —Mextr, ¿goc bi'til guie?

²⁶ Badxi' Jesúsán rëbaman:

—Ragbeechaawan, raguiliidi naj guial gudawidi xt bigdxinladxidi, ad guial baguiaatidi milagr ree ni rü-nan. ²⁷ Ad chu'di xgab guialraw rara, gol guyu xgab guialraw runee guialnaban tiblayaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

²⁸ Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

²⁹ Badxi' Jesús laan rëbaman:

—Ni rën Dios güündi naj guial chililadxidi bén gux-haalaman loj guidxliuj.

³⁰ Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëe ree milagr rüjn? ³¹ Dux béngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëeman guiadxtil biajb xanyabaa loj reeman gudaw reeman.”

³² Badxi' Jesús laan rëbaman:

—Naj rni lojdi: Ad Moisejst badëed guiadxtil guin, da Dadan naj bén runee quijb guiadxtil za xanyabaa.

³³ Guiadxtil runee Dios, laan bi't diizd xanyabaa abi' runeen guialnaban loj bénguidxliuj.

³⁴ Abi' rëb reeman lojman:

—Dad, banee guiadxtil guin du lojn zianczi.

³⁵ Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc bén chililadx naj, ad yu't dxej che'caman nijs. ³⁶ Per zi'c rnin lojdi, majsi ma baguiaadi naj, ad rililadxtidi naj. ³⁷ Gra ree bén ma banee da Dadan lon, gui't reeman lon, abi' bén gui't lon, ad zasiejctan laaman. ³⁸ Din naj zial diizd xanyabaa, zidgaguienan zi'c rën da Dadan bén guxhaal naj, ad par güntan zi'c rënan. ³⁹ Da Dadan bén guxhaal naj, ni rënman naj guial gra ree bén banee-man lon ni'qui tijb reeman ad zunijttan, rënman yas-banan laa reeman chi nit guidxliuj. ⁴⁰ Din rënman guial gra ree bén yayagbee Xi'nman chililadx tëe reeman laaman, gap reeman guialnaban tiblayaa con laaman, guiáad naj yasban laa reeman chi nit guidxliuj.

⁴¹ Dxel guzuloj ree bén Israel caneeguijdx reeman Jesús, guial rëbaman: “Naj naj guiadxtil ni biguiajt diizd xanyabaa.” ⁴² Abi' rëb reeman:

—¿Nid laaxan naj Jesús ya, xi'n Xiëb? Dunuj ree nagueenbee xdadix con xniaax. Yan, ¿chexc zeel nax xanyabaa biguiajtix?

⁴³ Dxel rëb Jesús:

—Gol bacwëez rnieeguijdxidi naj loj lasa'di. ⁴⁴ Dios naj bén guxhaal naj. Achut zile' gui't lon bal id zëe-daman por da Dadan, abi' naj yasban laaman chi nit guidxliuj. ⁴⁵ Loj ree libr ni bacaa ree bén badëe xtiidx Dios loj ree bejn, rëb: “Dios gulüü gra ree bejn.” Zeel gra ree bén rucaagdiajg xtiidxaman, rusiid tëe reeman ni rulüüman laa reeman, laa reeman zëed lon.

⁴⁶ 'Achutczí waguiaa da Dadan Dios, tijbzi bén gux-haalaman loj guidxliuj ma baguiaa laaman. ⁴⁷ Diidxliczi rnin, bén rililadx naj rajpaman guialnaban tiblayaa con Dios. ⁴⁸ Naj naj guiadxtil ni runee guialnaban. ⁴⁹ Xbén-gulalidi gudaw mana loj yujbidx, per ni'czi zian güjt gajc reeman. ⁵⁰ Per naj canin lojdi xcwent guiadxtil za xanyabaa, bén gaw laan gapaman guialnaban tiblayaa con Dios. ⁵¹ Naj naj guiadxtil naban ni biyajb diizd xanyabaa. Bén gaw guiadxtil guie zajpaman guialnaban tiblayaa con Dios. Guiadxtil ni rudëdan, laan naj quijb da cuerpan, gudëdanan din gap ree bénguidxliuj guialnaban.

⁵² Dxel guzuloj ree bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

⁵³ Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëedi xrejnman, ad zajptidi guialnaban. ⁵⁴ Per bén gaw da cuerpan guië' tëeman da rejnman, zajpaman guialnaban tiblayaa con Dios, abi' naj yasban laaman chi nit guidxliuj. ⁵⁵ Din da cuerpan naj quijb guialraw, guiáad da rejnman naj quijb ni guië' bejn. ⁵⁶ Abi' bén raw da cuerpan rë' tëeman da rejnman, laaman nabannë naj, guiáad naj nabannë' laaman. ⁵⁷ Da Dadan bén guxhaal naj, rajpaman guialnaban, abi' naj nabanan por laaman. Ziangajc bén gaw da cuerpan, zajpaman guialnaban tiblayaa con Dios por naj. ⁵⁸ Naj cani xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xbéngulalidi, din laa reeman majsi gudaw reeman mana guin, per güjt gajc reeman. Guiáad bén gaw guiadxtil guie zajpaman guialnaban tiblayaa con Dios.

⁵⁹ Zian balüü Jesús bejn ree lën yadoo Capernaum.

Diidx runee guialnaban tiblayaa

⁶⁰ Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëeg da't naj yayignia' ree ni naman. ¿Chu zajc guidxga' laaman?

⁶¹ Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya? ⁶² ¿Xhieza güündi bal guguaadi Bén guxhaal Dios yayë'paman lod guzuman gocli? ⁶³ Tijbzi por xSprijt Dios rajp bejn guialnaban tiblayaa, bejn ad zile't güün laazaman xhienin. Abi' naj por xSprijt Dios zëed ree diidx ni gunen lojdi, por ree diidx guin rajp bejn guialnaban. ⁶⁴ Per lëjt yu'di ad waliladxt.

Rëb Jesús zian guial ragbeecheawaman diizd yaloj chu ree ad rliadxt laaman chu tëë yayü laaman. ⁶⁵ Rëb tëëman loj reeman:

—Zeel ma rnin lojdi guial achut zile' gui't lon bal id zëëdaman por da Dadan Dios.

⁶⁶ Diizd nadxel, zien ree bën zinal Jesús guro'nladx laaman, abi' ad guzanëtri reeman laaman. ⁶⁷ Dxel rëb Jesús loj guidxiptio'p ree xbejnman:

—¿Në lëjt rën yaguiay ya?

⁶⁸ Per badxi' Simón Bëd laan, rëbaman:

—Dad, ¿chu loj yo'n? Awa xtiidxil zidnë guialnaban tiblaxaa con Dios. ⁶⁹ Dunujn ma baliduladx rayagbee tëën guial lüj naj Cristo, Xi'n Dios naban.

⁷⁰ Dxel rëb Jesús loj reeman:

—¿Nid naj gule guidxiptio'pidi ya? Abi' yan tijb gajqui lëjt naj zi'c xindxab.

⁷¹ Rëb Jesús zian por Judas Iscariote, xi'n Simón, din Judas guin naj bën bayü laaman, majsi tijb gajc xbejnman najman.

Ad rliadxt ree bijch Jesús laaman

7 Chi gudëd gojc zian, wej Jesús loj ree guiedx riga' niz Galilea. Ad guyëntaman niejman niz Judea, guial cayguil ree bën Judea guin laaman din gugüjt reeman laaman. ² Per guial ma zidyob lanij ni rüjn ree bën Israel, chi rbej reeman lën ranch, ³ rëb ree bijch Jesús lojman:

—Brii, wej niz Judea, din në ree xbejn bën riga' ree niz ni guguaa milagr rüjnl. ⁴ Din chi chu rën gagbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

⁵ Gunee ree bijch Jesús zian, guial ni'qui laa reeman ad rliadxt laaman. ⁶ Dxel rëb Jesús loj reeman:

—Ad wadrint da horan, per par lëjt xhietëëz horan naj zagdex. ⁷ Ad zajct guidxe'ch bënguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman. ⁸ Gol wej lanij guin, sa'n naj ad zazaagajtan, din ad wadrint hor ni gazaan.

⁹ Chi gulox rëbaman loj reeman zian, baya'nman Galilea.

Wej Jesús xlanij ree bën Israel

¹⁰ Chi ma zë ree bijch Jesús, dxel nëman zë lanij guin, per ralanzi zëman chitëë chu gagbee. ¹¹ Per yu' ree bën Israel raguiil laaman loj lanij guin, rëb reeman:

—¿Con bën guin ya'n?

¹² Loj gra ree benzien we lanij guin, zienloj ni nree reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

¹³ Per achutczu ruza't laaman loj gra bejn, guial rdxebe reeman guxtis Israel ree.

¹⁴ Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree.

¹⁵ Guíaad ree bën Israel badxaloj reeman, rëb reeman:

—¿Chexc ya'n contzi gra ragbeex, awa ni'quid basiditix?

¹⁶ Dxel rëb Jesús loj reeman:

—Ad guictan carii ni culün lëjt, zëëdan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëëdan por Dios ya.

¹⁸ Bën rulüü ganaxzi ni rbëëguicaman, rüjnman laan din guilies ree bejn xvaloraman. Per bën rüjn mazri din guilies bejn xvalor Dios, bën guxhaal laaman, laaman nree ni diidxli, ad rusquieetaman bejn.

¹⁹ Yan, majsi basa'nnë Moisejs lëjt ley, per ni'qui tijbi-di ad rüjnt zi'c rëb ley guin. ¿Chexquiza zeel rëndi gugüjtidi naj?

²⁰ Badxi' ree bën guinan, rëb reeman:

—Xindxab yu' luxdool. ¿Chuczi rën gugüjt lüj?

²¹ Abi' rëb Jesús loj reeman:

—Por tijbzi milagr ni benan radxalojdi. ²² Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn. ²³ Yan, bal chitëë gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayü-nan tijb bënragxuu dxej raziiladx bejn? ²⁴ Ad rüjndi xgabmal por ni ruguaazidi rüjn bejn, yaloj xgaj gol gogbee zagdex xhie cayüjnman.

Rëb Jesús ban zaman

²⁵ Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguil reeman ya din gugüjt reeman laaman? ²⁶ Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo? ²⁷ Per dunuj ree rayagbeecheaw ban zaman, guíaad chi gui't Cristo, achut gagbee ban saman.

²⁸ Chi biguiejn Jesús zian, la'tgaj culüüman bejn ree lën yadooro' Jerusalén, dxel guneeaman rejs rëbaman:

—¿Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. ²⁹ Per naj nünbee laaman guial zialan diizd lod za'man, laa tëëman guxhaal naj.

³⁰ Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman. ³¹ Loj ree bënguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

Guyën reeman niniaaz reeman Jesús

³² Biguiejn ree bënfarisew ni nree ree bejn Jesús. Abi' laa reeman con ree bixhioz rniabee, guxhaal reeman bën rajp ree ro' yadooro' Jerusalén din guiniaaz reeman Jesús. ³³ Dxel rëb Jesús:

—Ad xchejtri gazunë'n lëjt, dxel yaya'n lod za' bën guxhaal naj. ³⁴ Yaguilidi naj, per ad zadxejltidi naj, din ad zile't gui'tidi lod gazun.

³⁵ Abi' ree bën Israel guin guzuloj rniabdiidx loj lasa' reeman, rëb reeman:

—¿Banczi zajc che bén guin din ad zadxejlaman? ¿Ni zejman lod zojb ree bén Israel loj ree benzit ya, chiglüüman laa reeman në ree bén ad najt bén Israel?
³⁶ ¿Xhie rën guiëb guial naman: “Yaguilidi naj per ad zadxejlaman, din ad zile't gui'tidi lod gazun”?

Nijs runee guialnaban

³⁷ Dxej rliox lanij guin naj mazri dxej zojbloj, dxejzii guzuli Jesús guneeman rejs, rëbaman:

—Bal chu lëjt re'c nijs, gol guda lon din guië'dan.

³⁸ Din bén rliadx naj zi'c ca loj xtiidx Dios, lën lux-dooman gach nijs runee guialnaban.

³⁹ Chi guneee Jesús zian, rën guiëb xtiidxaman guial gra ree bén chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

Gula' lasa' ree bejn

⁴⁰ Yu' ree bén no'ch loj ree benzien guin, chi bacaag-diajg reeman ni guneee Jesús, rëb reeman:

—Walican, bén guin naj gui't guidgadëë xtiidx Dios loj ree bejn.

⁴¹ Yu'za reeman rëb:

—Bén guin naj bén bacaabee Dios.

Per yu' reeman rëb:

—Ad laataman naj Cristo, din ad niz Galileat naj gri-
 iman. ⁴² Loj xtiidx Dios ca guial loj xdiaa rey Davi grii
 Cristo, abi' Belén galaman ladx gajc rey Davi.

⁴³ Zian gojc dxej gula' lasa' reeman por Jesús. ⁴⁴ Zien reeman guyën niniaaz laaman, per achut bayax nini-aaz laaman.

Ad bililadxt ree guxtis Jesús

⁴⁵ Chi bayejc ree bén rajp ro' yadoo guin lod za' ree bënfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnë'tidi laax?

⁴⁶ Dxel rëb ree bén rajp ro' yadoo guin:

—¿Ad goct wayu bén guinee zi'c rnieex?

⁴⁷ Abi' rëb ree bënfarisew guin:

—¿Në lëjt ma cwëjb basquieex lëjt ya? ⁴⁸ ¿Wen yu' ree dux guxtis ree, o bënfarisew ree ma bililadx laax ya?

⁴⁹ ¿Nid ragbeedi ya guial zien ree bén guin banijt loj Dios guial ad nünbeet reeman ley?

⁵⁰ Per bënfarisew la Nicodemo bén bignaj Jesús tijb guxhin, rëbaman loj reeman:

⁵¹ —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

⁵² Badxi' reeman laan rëb reeman:

—¿Wen në lüj za'në ree bén Galilea ya? Basiid zagdx
 loj xtiidx Dios din gagbeel ad goct warii bén rudëë xti-
 idx Dios loj ree bejn niz Galilea.

⁵³ Dxel bare'ch reeman zia lidx lidx reeman.

Béngunaa banaaznë xinguaaw ren

⁸ Per Jesús zëman ruguia' Olivos. ² Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxej gurejman guzuloj culüüman laa reeman. ³ Abi' mextr rulüü ree ley con ree bënfarisew bidxinnë tijb béngunaa banaaznë tijb xinguaaw, dxej bazuj reeman laaman galay ree bén guin, ⁴ zianz rëb reeman loj Jesús:

—Mextr, banaaz béngunaa guie loj mer hor ni yu'në-man xinguaaw ren. ⁵ Abi' loj ley basa'nnë Moisejs dunuj ree ca guial lasa' béngunaa guie rayal guiëta-man con guiaj. ¿Laadx lüj xhie nal?

⁶ Gunabdiidx reeman zian din guidoon xhie guiëba-man din gac gutedia' reeman laaman. Per con basajb lojman abi' guzulojman cucaaman luyuj con xbacwën-man. ⁷ Per guial laa reeman canabdiidxzi canabdiidx reeman lojman, abi' babejlman, rëbaman loj reeman:

—Chutëëz bén ad wayüjnt dol, yaloj laaman gu-caaguaiaj béngunaa guie.

⁸ Dxel basajb lojman stijb, basnuu bacaaman luyuj guin. ⁹ Chi biguiejn reeman ni guneeman, guzuloj cayza tijbgaj reeman, diizd mazri bengol xt bara ree-man baza. Tijbzi béngunaa guin baya'n con Jesús loj ree bén riga' yagaj. ¹⁰ Dxel babejlman, rëbaman loj béngunaa guin:

—¿Con ree bén bidnë lüj? ¿Ni'qui tijb reeman achut xhie been lüj ya?

¹¹ Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiaj yan, ad güünril dol.

Jesús naj bajl par bénguidxliuj

¹² Dxel guneee Jesús stijb, rëbaman loj ree bén riga' yagaj:

—Naj naj bajl rusni bénguidxliuj. Abi' bén guzoob da diidxan, zani xquiargueijnman xhienaag gapaman guialnaban tiblyaa con Dios, ad yu' tëët dxej guicajy xquiargueijnman.

¹³ Abi' ree bënfarisew rëb reeman lojman:

—Lüj gajc ruza't lüj, abi' achet lasajc xtiidxil.

¹⁴ Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëë gan, sa'n lëjt ad ragbee-tidi ban zialan ban tëë gan. ¹⁵ Lëjt rnieedi bejn zi'ctizi naj xixgabidi, sa'n naj achut ruzatan. ¹⁶ Abi' bal guzatan bejn, ganen diidxli, din ad zanetan zi'c naj da xgaben, në da Dadan bén guxhaal naj ragbee guial di-idxli naj ni ganen. ¹⁷ Abi' loj xleydi ca guial chi yu' tio'p bén rniee tiblojzi, diidxliqui naj ni rniee reeman. ¹⁸ Yan, naj gajc naj tijb bén rniee por naj, abi' da Dadan bén guxhaal naj, naj stijb bén rniee por naj.

¹⁹ Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëëtidi da Dadan, din bal nünbeedi naj, ziangajc nünbeedi da Dadan.

²⁰ Zian gunee Jesús la'tgaj rulüüman bejn ree lën yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guini-aazaman.

Lod gan ad zile't gui'tidi

²¹ Gunee Jesús stijb, rëbaman:

—Chi ma gan, zaguilidi naj, per zëjtnë xtolidi, din lod gan ad zile't gui'tidi.

²² Dxel rëb ree bën Israel guin:

—¿Wen ni laagajcaman gugüjt laaman ya, zeel na-man guial ad zajct yo' ree lod cheman?

²³ Abi' rëb Jesús loj reeman:

—Lëjt naj bën ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliuj naj.

²⁴ Zeel rnin, zëjtnë xtolidi. Din bal id zaliladxidi guial naj naj bën najn, zëjtnë xtolidi.

²⁵ Dxel gunabdiidx reeman lojman, rëb reeman:

—¿Chuzal lüj?

Badxi'man laan rëbaman:

—Ma rnin lojdi diidz yaloj. ²⁶ Zien ni ra'pan gulün lëjt ni ganenë' tëën lëjt. Per naj, ni canen loj bénguidxliuj naj ni rucagdiagan rniee bën guxhaal naj, abi' ni rniee-man naj diidxli.

²⁷ Per laa reeman ad gogbeet guial Diosan ruza'taman. ²⁸ Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëëdi guial achetdzi rü-nan por da xgabzan, naj rnie ni ma balüü da Dadan naj. ²⁹ Din laaman guxhaal naj, laaman za' con naj, abi' ad yu't dxej cwëeladxaman naj, guial zianczi rünan ni rayuladxaman.

³⁰ Chi rëb Jesús zian, zien ree bejn bililadx laaman.

Bén wali naj xbejn Dios

³¹ Rëb Jesús loj ree bën Israel bililadx laaman:

—Bal gusnuu guzoobidi da diidxan, waliqui najdi da bejnan, ³² abi' zünbeedi conin naj diidxli, abi' por diidxli guin zalaadi.

³³ Badxi' reeman laan rëb reeman:

—Dunuyn zio'p loj xdiaa Abraham, abi' ad yu't dxej wayajcan zi'c bën nado'. ¿Chexquiza zeel nal du lojn, guial por diidxli zalaan?

³⁴ Dxel rëbaman loj reeman:

—Diidxli rnin lojdi, guial graczi bën rüjn ganaxzi dol, laa reeman naj zi'c bën nado' loj dol. ³⁵ Abi' tijb bën nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamil-ixan. ³⁶ Zeel bal Xi'nman guslaa lëjt, ad najtridi zi'c bën nado'. ³⁷ Ma qui ragbeen guial loj xdiaa Abraham zëe-didi, per lëjt rën gugüjt naj guial ad rayuladxtidi da diidxan. ³⁸ Naj rni ni ma balüü da Dadan naj, sa'n lëjt rüjndi zi'c na xDadidi güündi.

³⁹ Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman.

⁴⁰ Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nünman zian! ⁴¹ Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunuyn achut mazri xi'n nayajcan. Tijbzi Dios naj dux Dadan.

⁴² Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj. ⁴³ Abi' ad rignia'tidi ni rnin, guial ad rëntidi gucaagdiajquidi da diidxan.

⁴⁴ XDadidi naj xindxab, abi' rüjndi zi'c rën x güündi, din diidz yaloj ruladx xindxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëëx xdad guialrusquiee. ⁴⁵ Per guial naj rni lëjt ganax diidxli, ad rliladxtidi naj. ⁴⁶ ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliladxtidi naj? ⁴⁷ Bén naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

⁴⁸ Dxel rëb ree bën Israel guin loj Jesús:

—Waliqui ni ranan guial xindxab yu' luxdool naj tëël bën Samaria.

⁴⁹ Badxi'man laan rëbaman:

—Achut xindxab yu' luxdon, naj cuzob xtiidx da Dadan, per lëjt ganax diidxgujdx rnieedi naj. ⁵⁰ Naj ad raguiltan guilies ree bejn da valoran, majsi yu' bën rën güün bejn zian, abi' laaman rüjn xguialguxtis. ⁵¹ Diidxli rnin lëjt, bën guzoob da diidxan, ad yu't dxej guiëta-man.

⁵² Dxel rëb ree bën Israel guin lojman:

—Yanri ma rayagbeecheaawan guial xindxabqui yu' luxdool. Abraham në gra ree bën badëë xtiidx Dios loj ree bejn, güjt reeman, guiáad lüj nal: “Bén guzoob da diidxan, ad yu't dxej guiëtamán.” ⁵³ ¿Wen mazri lasajquil ya guial loj dux béngulal ree Abraham? Güjta-man, güjt tëë ree bën badëë xtiidx Dios loj ree bejn. ¿Laadx lüj chu naladxil najl?

⁵⁴ Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën na-gajquidi naj xDiosidi. ⁵⁵ Lëjt ad nünbeetidi laaman, sa'n naj nünbeen laaman. Abi' bal ganin ad nünbeetan laa-man, nëgajc naj ma naj bën rusquiee zi'cgajc lëjt. Per nünbeen laaman abi' ruzoban xtiidxaman. ⁵⁶ Xbéngu-lalidi Abraham, babaaman guial guguaaman dxej ni guialan. Abi' chi baguaaman dxej guin, mazri babaa-man.

⁵⁷ Dxel rëb ree bën Israel guin lojman:

—Ni'qui gadil chu' tü'pchii ijz, ¿guiáad lüj ya nal baguaal Abraham?

⁵⁸ Abi' gunee Jesús rëbaman:

—Diidxli rnin lojdi, mal nabanen chi gad Abraham chu'.

⁵⁹ Dxel gules reeman guiaj din nucaa reeman laan Jesús. Per laa guzëeb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

Rayüjn Jesús tijb xin ad ranit loj

9 Chi cadëd Jesús tiblajt, baguiaaman tijb xin ad ranit loj diidz chi golix. ² Dxel gunabdiidx ree xbejnman lojman, rëb reeman:

—Mextr, çchexc zeel ad ranit loj bën guin diidz chi golaman? çPor xtol ree xDadaman ya, o por xtol gajcaman?

³ Badxi' Jesús, rëbaman:

—Najman zian ad por xtoltaman ad por xtol tëet ree xDadaman. Gojlaman zian din chi yayajcaman, guguaa ree bejn xguialrniabee narooob Dios. ⁴ Yan, la'tgaj yu' tiamp, rüjn naguiejn yaguieen ree ni na bën guxhaal naj, din ma yayaaloj tiamp ni achetri zajc gac. ⁵ Abi' la'tgaj za'n loj guidxliuj guie, naj naj bajl rusni bénguidxliuj.

⁶ Chi gulox guneeman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin. ⁷ Abi' rëbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx. ⁸ Dxel bën zojb ree gajxh lod zojbix con ree bën ragbee guial laax rniab carda, rëb reeman:

—çNid xin guinan rbej rniab carda ya?

⁹ Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

¹⁰ Dxel gunabdiidx reeman lojx, rëb reeman:

—çXhieza naag gojc bani lojl?

¹¹ Badxi'xan, rëbix:

—Bën la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

¹² Abi' rëb reeman lojx:

—çConzaman yan?

Zeel rëbix:

—Ad ragbeetan.

Gunabdiidx ree bënfarisew loj xin guin xhienaag guzu-loj rani lojx

¹³ Loj hor zii binë reeman xin bayajc guiaaloj guin loj ree bënfarisew, ¹⁴ din dxej been Jesús bajn persi bayüjnman guiaaloj xin guin, dxej guin raziiladx ree bejn. ¹⁵ Dxel gunabdiidx ree bënfarisew guin lojx xhienaag guzuloj rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

¹⁶ Yu' ree bënfarisew guin rëb:

—Bën bayüjn guiaalojl ad xbejnt Diosan, din ad rajp-taman respekt dxej raziiladx bejn.

Per yu'za reeman rëb:

—çXhienaag güünman milagr guie ree, bal najman bëndol?

Garent garen rëb reeman. ¹⁷ Abi' gunabdiidx reeman loj xin bayajc guin zatijb, rëb reeman:

—çLaadx lüj xhie nal chu naj bën bayüjn guiaalojl?

Badxi'xan rëbix:

—Naj rni guial laaman naj bën rudëë xtiidx Dios loj ree bejn.

¹⁸ Per bën Israel guin ree ad rliladxt reeman, din ad banit lojx abi' yan ma ranin, dxel gurejdx reeman xdadix con xniaax, ¹⁹ abi' gunabdiidx reeman loj reeman, rëb reeman:

—çXin guien naj xi'ndi ya, xin rëbidi ad ranit loj diidz gojlax? Yan, çxhienaag gojc zeel ma ruguiaax?

²⁰ Badxi' reeman laan rëb reeman:

—Dunuyn rayagbee guial du xi'nanan, rayagbee tëen guial diidz chi golix ad ranit lojx. ²¹ Per ad rayagbeetan xhienaag gojc zeel rani lojx, ad rayagbee tëetan chu bayüjn guiaalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.

²² Rëb ree xdadix zian guial rdxeb reeman xguxtis ree bën Israel, din ma baya'n reeman diidx, chutëëz bën guiëb guial Jesús naj Cristo, ad zatiëjbtri reeman chu'-man lën yadoo. ²³ Zianan zeel rëb reeman: “Gol gunabdiidx lojx, ma najx xingol.”

²⁴ Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunujn rayagbee guial bëndol naj bën bayüjn lüj.

²⁵ Badxi'xan rëbix:

—Ad ragbeetan bal bëndolan o ad bëndoltan ya. Ti-jbzi ni ragbeen naj guial ad banit lon, abi' yan ma ruguian.

²⁶ Dxel gunabdiidx reeman lojx stijb, rëb reeman:

—çXhienaag beennëman lüj? çXhienaag beenman persi rani lojl?

²⁷ Badxi'xan rëbix:

—Ma rnin lojdi, abi' lëjt ad rliladxtidi naj. çChexc zeel rëndi ganin zatijb xhienaag beenman? çWen në lëjt rën gac xbejnman ya?

²⁸ Dxel gudilë reeman laax rëb reeman:

—Lüj bal najl xbejnman, sa'n dunujn xbejn Moisejs nayajcan. ²⁹ Din dunujn rayagbee Dios gunee Moisejs, per bën guin ni'quid rayagbeetan ban zaman.

³⁰ Badxi'xan rëbix:

—çXhiechalnin zeel ad ragbeetidi ban zaman! Guiáad naj por laaman ma rani lon. ³¹ Dunuj ree rayagbee chaaw guial ad ridxga't Dios xtiidx ree bëndol, ridxga'man xtiidx ree bën ruzoob xtiidxaman rüjn tëë reeman zi'c rënman. ³² Ad goct wacaagdiajg ree guial chu' bën yayüjn loj bën ad ranit loj diidz gojlaman. ³³ Yan, bal id por Dios zëed bën guin, achetczy nile' nünman.

³⁴ Dxel rëb reeman lojx:

—Lüj gojl con dol, çwed lüj gulüü dunujn?

Abi' babëë reeman laax yagaj.

Bililadx xin bayajc guin Jesús

³⁵ Gogbee Jesús ni guzac xin bayünman, dxe chi badxaagaman laax, rëbaman lojx:

—¿Rililadxil bën guxhaal Dios loj guidxliuj ya?

³⁶ Badxi'xan rëbix:

—Dad, guna chunin, din chililadxan laaman.

³⁷ Dxel rëbaman lojx:

—Ma baguiaal laaman, laaman naj bën caneenël.

³⁸ Abi' bazuxib xin guin lojman, rëbix:

—Rililadxan lüj, Dad.

³⁹ Zianz rëb Jesús:

—Bialan loj guidxliuj guie din gūnan guialguxtis, din por naj yani loj ree bën ad ranit loj, guiáad ree bën rani loj, ad zanit loj reeman.

⁴⁰ Yu' ree bënfarisew za'në laaman. Chi bigueijn reeman rëbaman zian, rëb reeman:

—¿Wen në dunujn ad ranit duloj ya?

⁴¹ Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

Bën rnaij xiil

10 Rëb tõe Jesús:

—Diidxliczi rnin lojdi, bën ad rut niz ro' xgurajl ree xiil, bën ru niz lood ren, laaman naj bëngubaan.

² Per bën ru niz ro' xgurajl reeb, laaman naj bën rnaij laa reeb. ³ Abi' rxhial bën rajp ro' xgurajl reeb persi ru bën rnaij laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin. ⁴ Abi' chi ma brii gra reeb, dxe rniëdaman loj reeb, guiáad laa reeb rnal laaman, guial nünbee reeb cha'man. ⁵ Per ad rnalt reeb tijb bën ad nünbeet reeb, ruxüünl reeb lojman, guial ad nünbeet reeb cha'man.

⁶ Chi gulox gunee Jesús zian, ad bignia't ree bën riga' yagaj xhie rën guiëb ni guneeaman.

Jesús naj zi'c bën rnaij xiil ree zagdxe

⁷ Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. ⁸ Gra ree bën bi't chi gad naj guial naj reeman zi'c bëngubaan, rban reeman rusagzi tõe reeman. Per ree bën naj da bejnan ad bidxga't reeman laa reeman.

⁹ Naj naj ro' port, abi' bën ru ro' port guie zajpaman perdon, dxe ma zile' chu'man yarii tõe man zi'cgajczi tijb xiil abi' zian rdxejl ni rawib.

¹⁰ Bëngubaan ri'tzaman din cwanman, gugüjtaman gunijt tõe man, sa'n naj zialan din gapidi guialnaban, gap tõe di zro' da'tan. ¹¹ Naj naj zi'c tijb bën rnaij xiil ree zagdxe. Abi' bën rnaij xiil ree zagdxe xt xguialnabanman rudëëman por laa reeb. ¹² Per bën rnaij laa reeb por milia, chi ruguiaaman zëed cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman bën rnaij ree xiil, dxe rnaiiaz cuyojt guin laa reeb abi' rtie'chib laa reeb.

¹³ Laaman rbëëladx laa reeb, din por miliazi rnaijman laa reeb abi' achet naladxaman por laa reeb.

¹⁴ 'Naj naj zi'c bën rnaij xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnaban gudëdan por laa reeb. ¹⁶ Ra'p tën stibcwaa ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

¹⁷ 'Da Dadan Dios rënman naj guial naj gajc rudë naj guiëtan par yabanan stijb. ¹⁸ Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

¹⁹ Chi bigueijn ree bën Israel guin ni rëbaman, gojc reeman tio'p lala' stijb. ²⁰ Zien reeman rëb:

—¿Chexc zeel ridxga'di laaman? Awa xindxab yu' luxdooan rajc tõe guijcaman.

²¹ Per yu' reeman rëb:

—Ni'qui tijb bën yu' xindxab luxdoo ad rnieet zian. ¿Wen zajc yaxhal xindxab guiaaloj ree bën ad ranit loj ya?

Jesús con xDadaman Dios naj reeman tijbzi

²² Tiamp nayaag, chi cayün ree bën Israel lanij ni rüjn reeman gazobijz par yadooro' Jerusalén. ²³ Wej Jesús lën yadoo guin. Chi cazaman niz ro' curdur ni rniee reeman xcurdur Salomón. ²⁴ Dxel biyaw ree bën Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

²⁵ Badxi' Jesús rëbaman:

—Ma rnin lojdi, per lëjt ad rililadxtidi naj. Abi' ree ni rünan con xguialrniabee da Dadan Dios, laa reen rulüü chu najn. ²⁶ Per ad rililadxtidi, guial ad najtidi da bejnan. ²⁷ Bën naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj. ²⁸ Naj rudë guialnaban tiblayaa loj reeman, ad yu't dxe nit reeman. Abi' achut zajc chiquied laa reeman lon. ²⁹ Din da Dadan, bën banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. ³⁰ Da Dadan con naj, nayajcan tijbzi.

³¹ Dxel cwa' ree bën Israel guin guiaj din gucaaguaiaj reeman Jesús. ³² Per rëbaman loj reeman:

—Por xguialrniabee da Dadan, zien ni zagdxe ma be nan niz lojdi. ¿Con pornin gucaaguaiajdi naj?

³³ Badxi' reeman laan rëb reeman:

—Ad por ree ni zagdxe ni beentilan yacaaguaiajn lüj, yacaaguaiajn lüj guial ad rajptil Dios respekt, din bën-guidxliujzi lüj, abi' rüjn lüj gajc zi'c Dios.

³⁴ Dxel rëb Jesús:

—Loj xleydi rëb: "Naj rni guial lëjt naj dios." ³⁵ Dunuj ree rayagbee guial ad ni rusquieet naj ni ca loj xtiidx Dios. Abi' laaman gulëëla dios bën basa'nnë ree xtiidxaman, bën gojp ree guialrniabee loj ree bën Israel. ³⁶ Yan, bal da Dadan Dios gulëëca naj persi guxhaala-

man naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj? ³⁷ Bal id cayünan zi'c na da Dadan, ad chililadxidi naj. ³⁸ Per bal cayünan zi'c naman, majsi ad zaliladxtidi naj, per gol bililadx guial por laaman zëed ni rünan din gagbeedi guial da Dadan za'në naj, guiáad naj za'në'n laaman.

³⁹ Dxel guyën reeman niniaaz reeman Jesús, per gu-laaman loj reeman.

⁴⁰ Abi' zëman zatiblad ro' guiw Jordán, lod baroobn-
js Waj bejn ree yaloj, yagaj baya'nman. ⁴¹ Abi' zien ree bën bidxin yagaj rëb:

—Walin, majsi achet milagr been Waj, per gra ni guneeman xcwent bën guie naj diidxli.

⁴² Dád zien reeman bililadx Jesús yagaj.

Güjt Lazr

11 Guyu tijb bënragxuu, brii lajman Lazr. Laaman con re bizanman Li con Mart, naj ladx reeman Betania. ² Abi' Li bizan Lazr, laam baroob perfum guia' Jesús abi' bacwiidximin con guidxguijquim. ³ Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

⁴ Chi biguiejn Jesús zian, rëbaman:

—Gualguijdx guin ad zëedtan par gugüjtan, zëedan din gac guguaa bejn xguialrniabee Dios në par guguaa reeman xguialrniabee Xi'n Dios.

⁵ Majsi rën da't Jesús Mart con Li në Lazr, ⁶ per chi cwa'man ruson ragxuu Lazr, sta goglaaman zatio'p dx-ej lod za'man. ⁷ Dxel rëbaman loj ree xbejnman:

—Yo' ree niz Judea zatijb.

⁸ Abi' rëb reeman lojman:

—Mextr, ad wayajct xchej guyën ree bën zojb niz ni nucaaguiaj reeman lüj. ¿Abi' chel ni zatijb ya?

⁹ Dxel rëb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie. ¹⁰ Per bën rza guxhin, yu' ni rirejl guia'-man, din achet bajl guin rajpaman.

¹¹ Rëb tëe Jesús loj reeman:

—Ma naga'yëjs dux miw ree Lazr, per chicwëenan laax.

¹² Dxel rëb ree xbejnman:

—Dad, bal naayëjsix, rën guiëban yayajquix.

¹³ Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix. ¹⁴ Dxel bagojn Jesús laa reeman, rëbaman:

—Ma güjt Lazr. ¹⁵ Rabaan por lëjt guial ad guzutan ni din chililadxidi naj. Yan, yo' ree yugnaj reex.

¹⁶ Dxel Tumajs, bën rníee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

Jesús naj bën rusban bejn runee tëeman gualnaban

¹⁷ Chi bidxin Jesús Betania, ma gojc tajp dxej bigu-
ie'ch Lazr. ¹⁸ Betania guin raya'n nan gajxh Jerusalén,
zi'ct choon kilometro. ¹⁹ Abi' zien ree bën Israel bignaj

Mart con Li din yagu' reeman luxdoo reem guial güjt bizan reem. ²⁰ Chi gogbee Mart ma zëed Jesús gajxh,
briim bigchaaglojm laaman, guiáad Li baya'nm lënü.

²¹ Dxel rëb Mart loj Jesús:

—Dad, bal nizujl guie, ad ziant niëjt da zanan. ²² Per naj ragbee guial ni'qui yan zunee Dios ni guiniabil loj-man.

²³ Dxel rëb Jesús:

—Naj rni yaban bizanl.

²⁴ Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

²⁵ Abi' rëb Jesús:

—Naj naj bën rusban ree bengüt rudë tëen gualna-
ban loj ree bejn. Bën chililadx naj, majsi guiëtaman,
per zajpaman gualnaban loj Dios. ²⁶ Guiáad gra bën
naban rliladx tëe naj, zajpaman gualnaban loj Dios.
¿Rliladxil ni canin lüj ya?

²⁷ Dxel rëbim lojman:

—Rliladxanan Dad. Rliladxan lüj naj Cristo, Xi'n Dios,
bën naj gui't loj guidxliuj.

Biin Jesús ro' xbaa Lazr

²⁸ Chi gulox rëb Mart zian, dxel bignee xbëlim Li,
rëbim ralan:

—Ma bi't Jesús, abi' caneeman lüj.

²⁹ Biguiejnzi Li zian, laa bisugajquim bigchaaglojm
Jesús. ³⁰ Abi' Jesús gadzaman chu' luguedx guin, sta
za'man lod bigchaagloj Mart laaman. ³¹ Guiáad ree
bën Israel zojbne Li ragu' reeman luxdoo, chi
baguaa reeman cari da't bisum zëm, binal reeman
laam. Gunaladx reeman ro' xbaa Lazr ziguaanm.

³² Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

³³ Chi baguaaman roon Li con ree bën Israel nal
laam, dád gognaa luxdooan guyu naya tëëman.

³⁴ Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

³⁵ Dxel biinman. ³⁶ Abi' rëb ree bën Israel guin:

—Gol baguaa nial dád guyënman laax.

³⁷ Per yu' reeman rëb:

—Bën guinan baxhal guaaloj tijb bën ad ranit loj.
Yan, ¿niche niajc nünman ya'n chitëe niëjt Lazr?

Basban Jesús Lazr

³⁸ Dád guyu naya luxdoo Jesús stijb, chi gubigaman
ro' xbaa Lazr. Najn tijb guiajbiliaa, nada'cw tijb guiaj
ro'n. ³⁹ Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni
gütim.

⁴⁰ Badxi' Jesúsán rëbaman:

—¿Nid rnin ya, bal rliladxil, guguaal xguialrniabee
Dios?

⁴¹ Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëë lüj guial ma bacaagdiajguil ni rnin.

⁴² Naj ragbeechaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

⁴³ Chi gulox rëbaman zian, dxel guridxa'man rëbaman:

—iLazr, barii yagaj!

⁴⁴ Dxel barii Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguiajx.

Baya'n reeman diidx xhienaag guiniaaz Jesús

(Mt. 26:1-5; Mr. 14:1-2; Lc. 22:1-2)

⁴⁵ Dád zien ree bën binal Li bililadx Jesús, guial baguiaa reeman milagr beenman. ⁴⁶ Per yu' reeman bicojn bënfarisew ree ni been Jesús. ⁴⁷ Dxel bënfarisew ree nê ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayüjn xin guin? ⁴⁸ Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree nê dux nacion ree.

⁴⁹ Per loj reeman yu' bën la Caifás, bixhioz zojbloj rniabee loj ijszii, rëbaman loj reeman:

—¿Nid ragbeedi ya, ⁵⁰ nid rignia' tëëdi ya, zagdx nê guiet tijbzi bejn por gra bën Israel, luar nit dux nacion ree?

⁵¹ Per Caifás guin ad ni naladxtzaman rëbaman. Guial najman bixhioz zojbloj rniabee loj ijszii, zeel badëed Dios ni guneeaman, guial guiet Jesús por gra ree bën Israel. ⁵² Abi' ad por laatzi reeman, par gac reeman tijbzi con gra ree xbejn Dios, bën riga' ree guidib guidxliuj. ⁵³ Zeel diidx dxejzii baya'n reeman diidx gugüjt reeman Jesús.

⁵⁴ Zianan zeel ad contzi rulüülojtraman loj ree bën Israel, bazaman yagaj ziaman guiedx la Efraín, najn gajxh yujbidx, yagaj guzunë ree xbejnman.

⁵⁵ Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c nê xcostumbr reeman par gac reeman naya loj Dios chi gad pascw gal. ⁵⁶ Dxel raguuil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿Zi'taman lanij ya o ad zi'ttaman?

⁵⁷ Bënfarisew ree con ree bixhioz rniabee, gunabee reeman bal chutëëz bën ragbee ban za' Jesús, gugojnman din chile' guiniaaz reeman laaman.

Baroob Li perfum guia' Jesús

(Mt. 26:6-13; Mr. 14:3-9)

12 Za xho'p dxej riaadx gal pascw, chi we Jesús Betania, lod zoj Lazr, xin basbanman. ² Ni been reeman tijb guialraw par xche ni gudawnë reeman Jesús. Mart gule'c guialraw guin, guiáad Lazr naj tijb bën gurenë laa reeman xan mex. ³ Dxel cwa' Li cost

garol lijtr perfum ni lasajc wayëjx, najcchaawnën ganax nardo, baroobimin guia' Jesús abi' bacwiidxnë guidxguijquimin. Guidibczi lënü guin baree nejxh.

⁴ Dxel Judas Iscariote, xin naj tijb ree xbejn Jesús, xin bayü laaman, rëbix:

⁵ —¿Chexc ad gudo't perfum guin? Zagdxeli nido'n zi'ct rüjn tijb bejn gan tib iiz, din nüjnan yudar bënprob ree.

⁶ Ad guial yu'tix xgab bënprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëë reeman rgu'chaawix. ⁷ Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan. ⁸ Din bënprob guin ree zianczi za'në reeman lëjt, per naj ad ziantczi gazunë'n lëjt.

Baya'n reeman diidx gugüjt reeman Lazr

⁹ Bën guixiuj bën Israel gogbee za' Jesús Betania, abi' wej reeman yagaj, ad par guguaatzi reeman Jesús, nê par guguaa reeman Lazr, xin basbanman. ¹⁰ Zeel baya'n ree bixhioz rniabee diidx guial nê Lazr gugüjt reeman. ¹¹ Din por laax dád zien ree bejn cayrii loj reeman, abi' caliladx reeman Jesús.

Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

¹² Chi bareguiaa, zien da't ree bën zë lanij pascw Jerusalén gogbee guidxin Jesús yagaj, ¹³ dxel cwa' reeman zijn, brii reeman bigchaagloj reeman laaman, rbidxa' reeman rëb reeman:

—iBenza'c bendxoon naj Dios! iNüjnle'man Bën guxhaalaman! iNüjnle'man bën naj rey Israel!

¹⁴ Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

¹⁵ Bën Sión, ad rdxebidi.

Gol baguiaa, laa xreydi zëed, dxiibaman tijb burdoo.

¹⁶ Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷ Bën guzu ree con Jesús chi guredxaman Lazr din yariix lën baa, basban tëëman laax loj ree bengüt, rusnuu rü reeman diidx loj ree bejn ni baguiaa reeman.

¹⁸ Zeel zien ree bejn brii bigchaagloj laaman, guial gogbee reeman milagr beenman. ¹⁹ Dxel rëb loj lasa' ree bënfarisew:

—Gol baguiaa nial graczi bejn zinal laax, achetri zajc yaguieen ree.

Yu' ree bën grieg raguuil Jesús

²⁰ Loj gra ree bën we lanij bignajchi' reeman Dios Jerusalén, no'ch bëlzi ree bën grieg, ²¹ gubig reeman loj Felip, bën za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

²² Abi' wej Felip biguiedxaman loj Andrejs, dxei wej grop reeman bicojn reeman Jesús. ²³ Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman. ²⁴ Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcx-hiejn. ²⁵ Bén ru mazri xgab naabzi por guialnaban yu' loj guidxliuj guie, yu' dxei gunijtaman laan, per bén ru mazri xgab güünman zi'c rën Dios, xhietëez sacaman, zajpaman guialnaban tiblayaa con laaman. ²⁶ Bal chu rën güün ni rënan guidnalaman naj, lod gazun, nëgaj-caman su. Bén güün ni rënan, guiën da Dadan laaman.

Rugojn Jesús guial guiëtaman

²⁷ Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan. ²⁸ Dad, balüü xguialrniabeel.

Dxel biguien cha' bejn xanyabaa rëbaman:

—¡Ma balü da guialrniabeen, per gulünan stijb!

²⁹ Riguiejn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjan gunee laaman.

³⁰ Dxel rëb Jesús:

—Ad por najtan biguien cha' bejn, por lëjtan. ³¹ Ma bidxin dxei gac guialguxtis loj guidxliuj, yan yarii Bén rniabee lojn. ³² Per chi guilies reeman naj ya loj guidxliuj guie, dxei gui't graloj bejn lon.

³³ Zian basignia'man xhienaag guiëtaman. ³⁴ Badxi' ree Bén guinan rëb reeman:

—Dunujn rayagbee rëb loj ley, Cristo guiban tiblayaa. ¿Chexc zeel nal, rayal guilies reeman Bén zëed xanyabaa? ¿Chunin naj Bén zëed xanyabaa?

³⁵ Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din Bén rza loj xay, ad ragbeetaman ban cheman. ³⁶ Gol bililadx bajl guie, la'tgaj za'nëdan, din gaquidi xbejnan.

Chi gulox gunee Jesús zian, dxei baquie'chlojman loj reeman.

Ad bililadxt ree bejn Jesús

³⁷ Majsi been Jesús zien da't milagr baguiaa reeman, ad bililadxt reeman. ³⁸ Zian gojc cumplid ni bacaa Isaías Bén badëë xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xguialrniabeeman?

³⁹ Zianan zeel ad gojct nililadx reeman, din në ze bacaa Isaías:

⁴⁰ Dios basiaaw guiaal loj reeman,
bascajy tëëman xquiarguij reeman,
chitëë guguaa reeman chignia' tëë reeman,
chitëë yadxi' loj reeman lon, abi' ad zayüntan laa reeman.

⁴¹ Rëb Isaías zian guial baguiaaman xbiani Jesús, zeel baza'taman laaman.

⁴² Per ni'czi zian, dád zien ree Bén zojbloj bililadx Jesús. Per ad rëbt reeman loj ree bejn zian, guial rdxei reeman yabëë ree Bénfarisew laa reeman lod ricaagdi-ajg reeman xtiidx Dios, ⁴³ din mazri rën reeman guiën ree bejn laa reeman, guial guiën Dios laa reeman.

Rniee Jesús zi'c rniabee xDadaman

⁴⁴ Gunee Jesús rejs rëbaman:

—Bén rililadx naj, ad najtzan rililadxaman, në da Dadan Bén guxhaal naj. ⁴⁵ Bén ruguaa naj, në Bén guxhaal naj ruguaaman. ⁴⁶ Naj naj bajl, bialan loj guidxliuj guie, chitëë yaya'n ree Bén rililadx naj loj xay. ⁴⁷ Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol. ⁴⁸ Bén ad rënt naj ad rucaagdiajg tëëtan da diidxan, mal yu' ni gudëd laaman casti: diidx ni rën, laan gudëd laaman casti chi guidxin dxei. ⁴⁹ Din ad ni rbëguictan rnien. Da Dadan, Bén guxhaal naj rniabee ni ganen ni gulü tëën, ⁵⁰ zeel ragbeen, ni rniabee da Dadan runee guialnaban tiblayaa. Zianan zeel ni rnin rulünan zi'c rniabeeman.

Gudiib Jesús guia' ree xbejnman

13 Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguiaj loj xDadaman. Zianczi guyën ree xbejnman, Bén riga' ree loj guidxliuj, rënman laa reeman goctëëz. ² Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree Bén gugüjt laaman. Ragbee Jesús guial badëëd xDadaman gra guialrniabee lojman, laa tëëman guxhaal laaman, zeel yaguiajman lod za'man. La'tgaj cayaw reeman, bisuman xan mex, gulëëman tijb lajd najcwaman luya, dxei cwa'man tijb tuay guxhii xizaman. ⁵ Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tëëman laan con tuay naxii xizaman. ⁶ Chi bayal quiibaman guia' Simón, Bén rniee reeman Bëd, rëbaman loj Jesús:

—Dad, ¿luj quiib guia'n ya?

⁷ Badxi'man laan rëbaman:

—Ad rignia'til ni cayünan yan, per qui chignia'rilan.

⁸ Zeel rëb Bëd lojman:

—Ad zatiëëbtan quiibil guia'n.

Abi' rëb Jesús:

—Bal id zaguiiban guia'l, ad zile'tri gaquil da bejnan.

⁹ Zeel rëb Bëd lojman:

—Dad, ad bal guia'zan quiibil, gudiib në yan con guican.

¹⁰ Badxi'man laan rëbaman:

Bén goznejz guia'zaman riaadx chëd, din guidibaman naya. Abi' lëjt ma nayadi, majsi ad gratidi.

¹¹ Ma ragbeeman chu yayü laaman, zeel rëbaman: “Ad gratidi naya.”

¹² Chi gulox gudiibaman guia' reeman, bayajcw xabaman, gurejman xan mex guin zatijb, dxei rëbaman:

—¿Bignia'di ni benan ya? ¹³ Rnieedi naj Mextr në Dad, waliqidi najn. ¹⁴ Bal najn Mextr në Dad, gudiiban guia'di, ziangajc quib guia' lasa'di. ¹⁵ Ma balün lëjt, din güündi zi'c benan. ¹⁶ Diidxiczi ganin, achut mojs naj mazri guial loj bën rniabee laaman, achut bën ri't naj mazri guial loj bën rxhiaal laaman. ¹⁷ Bal rignia'di nine güün tēēdan, yabaanē Dios lëjt.

¹⁸ Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: "Bën rawnē'n tijbzi, bayejcaman contr naj." ¹⁹ Ma rugojnan lëjt din gagbeedi chi gac zian, din chililadxidi chu najn. ²⁰ Diidxiczi ganin, bën rucaagdiajg ni rëb bën rxhialan, najn rucaagdiajgaman, guiáad bën rucaagdiajg da diidxan, xtiidx bën guxhaal najn rucaagdiajgaman.

Bagojn Jesús chu yayü laaman (Mt. 26:20-25; Mr. 14:17-21; Lc. 22:21-23)

²¹ Chi gulox gunee Jesús zian, dád guyunayaman, dxei rëbaman loj reeman zagdex:

—Diidxiczi ganin, tijb lëjt yayü naj loj ree bën gugüjt naj.

²² Dxei guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. ²³ Tijb bën guyen da'taman zobj cwē'man, hor zii chi cayaw reeman xche, ²⁴ dxei been Bēd sen lojman din guiniabdiidxaman chunin ruza't Jesús. ²⁵ Zeel mazri gubigaman cwē' Jesús gunabdiidxaman, rëbaman: —Dad, ¿chunin?

²⁶ Badxi' Jesúsán rëbaman:

—Gugajdxan ta'n guiadxtil, din loj xin gudēdan, laaxan yayü naj.

Dxei bagajdxaman ta'n guiadxtil badēēman laan loj Judas, xi'n Simón Iscariote. ²⁷ Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

²⁸ Per achutczzi ree bën zobj xan mex guin bignia' chexc zeel rëbaman zian. ²⁹ Guial ca' Judas bols ni yu' milia, zeel naladx garol reeman rëb Jesús lojx din chisix ni gaw reeman lanij guin o gudēēdix ta'nan loj ree bën rzagdiaj ya. ³⁰ Chi ma gudawix guiadxtil guin, dxei briix, ma guxhin.

Gunabee Jesús tijb nicüb

³¹ Chi ma brii Judas, rëb Jesús loj ree xbejnman:

—Yan guien xguialrniabee Bën guxhaal Dios din gagbee ree bejn xhienaag naj guialrniabee gudēē Dios lojman. ³² Din bal gulüü Bën guxhaal Dios xguialrniabee Dios, ziangajc gulüü Dios xguialrniabeeman, zeel ma gudēēdaman laan. ³³ Xi'n, ad zien dxejtri gazunē'n lëjt, yaguilidi naj, per zi'cgajc rēn loj ree bejn, ziangajc ganin lojdi yan: Ad zajct chedi lod gan. ³⁴ Ganin tijb nicüb ganabeen: Gol guyen lasa'di zi'c rēnan lëjt. ³⁵ Bal guien lasa'di, zian gagbee gra bejn guial najdi da bejnan.

Guiēb Bēd ad nünbeetaman Jesús

(Mt. 26:31-35; Mr. 14:27-31; Lc. 22:31-34)

³⁶ Gunabdiidx Bēd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxei guidnalil naj.

³⁷ Zeel rëb Bēd:

—Dad, ¿chexc zeel ad zajct guidnaalan lüj yan? Xt zajc guiētan por lüj.

³⁸ Badxi' Jesúsán rëbaman:

—¿Walil ya rēnl guiētil por naj? Diidxiczi ganin, chi gad guid cwidxa', mal rēbil choon volt, ad nünbeetil naj.

Jesús naj nejz guidxinnē bejn loj Dios

¹⁴ Rëb tēē Jesús:

—Ad rudi xgab. Gol bililadx Dios, gol bililadx tēē naj. ² Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. ³ Chi ma bēnchaawan luar guin, dxei yaguialan guidgaxin lëjt din sudi lod gazun. ⁴ Ma nünbeedi nejz zē lod gan.

⁵ Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

⁶ Badxi'man laan rëbaman:

—Naj naj nejz, najn diidxli, naj tēēn guialnaban. Tijbzi naj zajc chinē' bejn ree loj da Dadan. ⁷ Bal nünbeedi naj, në da Dadan güünbeedi. Per ma nünbeedi laaman diidz yan, din ma baguiaadi laaman.

⁸ Dxei rëb Felip:

—Dad, banee mod majs yaguiaazan bën naj xDadil.

⁹ Badxi'man laan rëbaman:

—Felip, ma gojc xchej za'nē'n lëjt. ¿Nid wayünbeel naj ya? Din bën ruguiaa naj, da Dadanan ruguiaaman. ¿Chexc zeel nal gunen mod guguiaa da Dadan? ¹⁰ ¿Nid rliiladxil ya, naj za'nē' da Dadan, guiáad laaman za'nē naj? Ni rnin lojdi, ad rbēguictanan. Da Dadan, bën nabannē'n, laaman rüjn dxiin guin. ¹¹ Gol bililadx naj za'nē' da Dadan, guiáad laaman za'nē naj. Balgui majs ni rünzan gol bililadx. ¹² Diidxiczi ganin: Bën rliiladx naj, nēgajcaman güün ni rünan, güünman ni mazri narroob, din naj yaya' lod za' da Dadan. ¹³ Graczi ni guiniabidi lojman por naj, günnan din gulün xguialrniabeeman. ¹⁴ Günan xhietēēz ni guiniabidi.

Guixhiaal Jesús xSprijtaman

¹⁵ Bal rēndi naj, gucaagdiajguidi ni balün. ¹⁶ Din guiē loj da Dadan guixhiaalaman Sprijt sunē lëjt, ¹⁷ Sprijt gulüü diidxli, din zianczi sunēman lëjt. Bën ad rliiladxt ree Dios ad zajct tia' reeman Sprijt guin, din ad ruguiaat reeman ad nünbee tēēt reeman laaman. Per lëjt nünbee laaman, din sunēman lëjt yaya'n tēēman luxdoodi tiblayaa. ¹⁸ Ad zusa'ntan xtijbidi, yaguialan stijb guidganan lëjt. ¹⁹ Sta'nz riaadx ad zuguiatri ree

bénguidxliuj naj, per lèjt guguaadi naj, guibandi din nabanen. ²⁰ Dxej zii ree, gagbeedi za'nè' da Dadan, lèjt za'nè' naj, guiáad naj za'nè'n lèjt zianczi. ²¹ Bén rucaag-diajg ni rniabeen rijn tèëman laan, walicaman rënman naj. Guiën da Dadan bén rën naj, nè naj guiën laaman din güünbeeman naj.

²² Gunabdiidx Judas (ad bén bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

²³ Badxi' Jesúsán rëbaman:

—Bén guiën naj guzoobaman da diidxan, guiën da Dadan laaman, guiáad naj guidnè' da Dadan din yabajnnè'n laaman. ²⁴ Bén ad zënt naj ad zuzoobtaman da diidxan, din diidx cucaagdiajguidi yan ad da diidxtanan, xtiidx da Dadanan bén guxhaal naj.

²⁵ 'Canin lojdi gra nine, la'tgaj za'nè'n lèjt. ²⁶ Per xSprijt Dios, bén sunè lèjt zianczi, bén guixhiaal da Dadan por naj, graczi gulüüman lèjt din gusaaladxidi ni canin.

²⁷ 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliujn, ad bal ru nayadi ad rdxebe tèëdi. ²⁸ Ma rnin lojdi, yaya'n, dxei yagualan zatijb. Bal walidi rëndi naj, chu' luxdoodi zagdxé, guial gagbeedi yaya' loj da Dadan, din mazri zobjlojman guial lon. ²⁹ Ma rugojnan lèjt, din chi gac zian, chililadxidi.

³⁰ 'Ad zro'tri ganenè'n lèjt, din ma zëed xin rniabee guidxliuj, majsi ad nèt naj rniabeex. ³¹ Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

Rën Jesús yadxu'nè' reeman zianczi

15 Basnuu rëb Jesús:

—Naj naj zi'c yag rtia ni nejxh zagdxé, guiáad da Dadan naj zi'c bén rxübin laan. ² Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. ³ Lèjt ma nayadi, guial basia diidx rnin lèjt. ⁴ Gol gubajnnè naj zi'c nabannè'n lèjt. Ad zajct tia xidx yag, bal id najnèn yag guin tijbzi. Ziangajc lèjt ad zajct güündi ni rën Dios bal id za'nèdi naj.

⁵ 'Naj naj zi'c yag rtia ni nejxh, guiáad lèjt naj zi'c xidxan. Bén sunè naj zianczi nuchajgaman naj, guiáad naj nuchagan laaman, zeel rijnman ni rën Dios. Din bal ichu naj, achet zajc güündi. ⁶ Bén ad zazujnèt naj guizëëbaman zi'c yagbidx ruto'p reeman, din che'can. Rëb tèë Jesús:

⁷ —Bal za'nèdi naj tijbzi ruzoob tèëdi da diidxan, gol gunab ni rëntzidi, din tia'dan. ⁸ Bal güündi ni rën da Dadan, gaquidi quijb da bejnan, din guza't ree bejn laaman zagdxé. ⁹ Rënan lèjt zi'c rën da Dadan naj, gol basaaladx rënan lèjt. ¹⁰ Bal guzoobidi da diidxan, gusaaladxidi rënan lèjt, zi'cgajc ruzoban xtiidx da Dadan, ragbeen rënman naj.

¹¹ 'Rnin lojdi zian din chu' luxdoodi zagdxé zi'c yu' luxdon zagdxé, zagdxé da't chu' luxdoodi. ¹² Gol guyën lasa'di zi'c rënan lèjt, laan rniabeen güündi. ¹³ Achut rën xmiw mazri guial loj bén rëjt por laa reeman. ¹⁴ Lèjt

naj da miwan bal güündi ni rënan. ¹⁵ Ad zanetran lèjt mojs, din mojs ad ragbeetaman xhie rijn bén rniabee laaman. Ganen lèjt miw, din balün lèjt graczi ni na da Dadan lon. ¹⁶ Ad lèjtt gule naj, naj gule lèjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeaman graczi ni guiniabidi por naj. ¹⁷ Rniabeen: Guiën lasa'di.

Ralen ree bejn Jesús con ree xbejnman

¹⁸ Rëb tèë Jesús:

—Bal ralen ree bénguidxliuj lèjt, gol basaaladx, yaloj naj balen reeman. ¹⁹ Bal niajquidi bénguidxliuj, niën reeman lèjt zi'c rën lasa' reeman. Per naj gule lèjt loj reeman, zeel ralen reeman guial ad najtidi bénguidxliuj. ²⁰ Gol basaaladx ni rnin: "Achut mojs naj mazri guial loj bén rniabee laaman." Bal basagzi reeman naj, ziangajc gusagzi reeman lèjt, bal bazoob reeman da diidxan, ziangajc guzoob reeman xtiidxidi. ²¹ Graczi nine güünnè reeman lèjt por naj, din ad nünbeet reeman bén guxhaal naj.

²² 'Achut xtol reeman niu, bal idan nial ninienè'n laa reeman, per yan yu' xtol reeman. ²³ Bén ralen naj, nè-gajc da Dadan ralenman. ²⁴ Achut xtol reeman niu, bal idan nün ree ni benan loj reeman ni achutcz wayün, per ma baguiaa reeman laa reen, majsi zian ralen gajc reeman naj nè da Dadan. ²⁵ Per rajc zian din gac cumplid ni ca loj xley reeman, rëban: "Achut rünan ralen reeman naj."

²⁶ 'Per chi gui't Sprijt gaxhalan din sunëman lèjt gulüü tèëman diidxli, Sprijt zëed loj da Dadan, laaman gü da diidxan. ²⁷ Nègajc lèjt gü laan, din diidz yaloj za'nèdi naj.

16 'Rnin zian, din ad zabëjzt chililadxidi naj. ² Yabëë reeman lèjt lod ricaagdiajg reeman xtiidx Dios, zadxin dxej, chutëëz bén gugüjt lèjt naladx reeman Dios cayün reeman wen. ³ Güün reeman zian din ad nünbeet reeman naj ni'qui da Dadan. ⁴ Per ma rnin lèjt, din chi guidxin dxej guin gusaaladxidi guial ma bagojnan lèjt.

Ni rijn xSprijt Dios

'Ad rnitan lojdi zian diidz yaloj, din naj guzunè' lèjt. ⁵ Per yan yaya'n loj bén guxhaal naj. Achutczidi rniabdiidx ban gan, ⁶ aal yu'nayadi guial canin zian. ⁷ Per diidxiczi rnin: zagdxé najn yaya'n. Din bal idan yaya', ad zi'tt xSprijt Dios sunè lèjt, per bal yaya'n, naj gaxhal laaman. ⁸ Chi gui'taman, laaman gulüü ree bénguidxliuj ni naj dol, ni naj ni zagdxé, nè xguialguxtis Dios. ⁹ Gagbee reeman yu' xtol reeman, guial ad rililadxt reeman naj. ¹⁰ Ni zagdxé guin naj guial yaya' loj da Dadan din ad zuguaatrudi naj. ¹¹ Guiáad Dios ma been xguialguxtisaman con xindxab rniabee guidxliuj.

¹² 'Yu'ri ni rënan ganin, per dád zien gacan par lèjt. ¹³ Chi gui't Sprijt gulüü lèjt diidxli, din ad züt xtiidx gajcaman, guinieeman graczi ni guienman, laaman gulüü lèjt ni gac. ¹⁴ Guza'taman naj zagdxé, din naj gudëd ni gulüüman lèjt. ¹⁵ Graczi ni rajp da Dadan naj par naj,

zeel rnin, Sprijt guin tia' ni gudëdan din gulüüman laan lëjt.

Guguiaa ree xbejn Jesús laaman zatijb

¹⁶ Ma guidxin dxej ad zuguaatriddi naj, per ad zajct xchej, guguiaadi naj stijb.

¹⁷ Chi rëb Jesús zian, dxei guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zuguaatri reeman, per ad zajct xchej, yaguiaa reeman stijb, din yaguiaj loj xDadaman? ¹⁸ ¿Chexc zeel naman: “Ad zajct xchej”? Ad rayignia't ree ni caneeman.

¹⁹ Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatriddi naj, per ad zajct xchej, guguiaadi naj stijb. ¿Ni nen canabdiidxidi ya? ²⁰ Diidxli ganin, goondi chu' tõe luxdoodi naya, guiaad ree bénguidxliuj yabaa reeman. Per majsi chu' luxdoodi naya, guidxin dxej yabaadi. ²¹ Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxei rayanladxaman tarbajw guin, ru luxdoodi zagdx, guial ma gojl xi'nman. ²² Ziangajc lëjt cadëdidi tarbajw yan, per chi guguijan lëjt zatijb, chu' luxdoodi zagdx, achutczij zajc yabëe laan luxdoodi.

²³ Dxei achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman.

²⁴ Guiaad yan achet wanabidi por naj, gol gunaban din tia'dan, din chu' luxdoodi zagdx tiblyaa.

Yaguiaj Jesús lod guzaman

²⁵ Rëb tõe Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdx xcwent da Dadan.

²⁶ Dxej zii ree guiniabidi loj da Dadan por naj, ad rüjnt nagueijn ganaaban por lëjt lojman, ²⁷ din rënman lëjt, rënman lëjt guial rëndi naj riladx tõe di guial laaman guxhaal naj. ²⁸ Briin lod za' da Dadan persi bialan loj guidxliuj guie, yan gusa'n laan din yaya'n lojman.

²⁹ Dxei rëb ree xbejnman:

—Yanri ma cusignia'l zagdx. ³⁰ Rayagbeen rajquil graczi, ad rüjnt nagueijn chu guiniabdiidx lojl. Zianan zeel raliduladxan guxhaal Dios lüj.

³¹ Badxi' Jesús laan rëbaman:

—¿Ma riladxidi yan ya? ³² Gol gogbee, ma bidxin hor yare'chidi, tijb gajdi yaguiaj lidx, gusa'ndi da xtijban. Per ad za't da xtijban, da Dadan za'në naj. ³³ Rnin gra nine din cwedi zagdx guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

Gurejdx gunab Jesús xDadaman por ree xbejnman

17 Chi gulox rëb Jesús zian loj ree xbejnman, dxei baguiaaman xanyabaa rëbaman:

—Dad, ma bidxin hor, balüü da guialrniabeen din gulün xguialrniabeel. ² Baneel guialrniabee lon din ganabeen gra bejn gudëd tõe guialnaban tiblyaa loj

gra bën baneel. ³ Guiban reeman tiblyaa bal güünbee reeman lüj, tijbzi lüj naj quijb Dios, güünbee tõe reeman najn guxhaalil.

⁴ Naj bazat lüj zagdx loj guidxliuj; yan ma gulox benan ni nal. ⁵ Yan, Dad, yaguialan lojl, din yaneel guialrniabee ca'n gocli, diidz chi gad guidxliuj gacchaaw.

⁶ Rëb tõe Jesús:

—Bën guel loj guidxliuj baneel lon, ma balün laa reeman chu lüj. Goc reeman xbejn, per baneel laa reeman lon, ma bazoob reeman xtiidxil. ⁷ Yan ma gogbee reeman guial gra ni benan gra tõe ni balün naj xieenl. ⁸ Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tõe reeman lüj guxhaal naj.

⁹ Rbedx rniaban lüj por laa reeman, guial naj reeman xbejn baneel tõe laa reeman lon, ad rbedx rniabtan por ree bénguidxliuj. ¹⁰ Gra ni ca'n naj xieenl, guiaad gra ni ca'l naj da xieenan, ma rguien da guialrniabeen por ree bën baneel.

¹¹ Ad zaturtan loj guidxliuj, per laa reeman suri reeman guie, guiaad naj yazaan din yaguialan lod za'l. Dad, lüj naj bën naya nali, gunaj reeman con gra guialrniabee ca'l ni baneel tõe lon, din gac reeman tijbzi zi'c nayajc. ¹² Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëeb, tijbzi xin ma naj diidz bizëeb, din gac cumplid ni ca loj xtiidxil.

¹³ Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdx, zi'c yu' luxdon zagdx. ¹⁴ Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. ¹⁵ Ad rniabtan yabëel laa reeman loj guidxliuj, rënan guinal laa reeman, chitëe güün reeman ni mal. ¹⁶ Ad najt reeman bénguidxliuj, zi'cgajc naj. ¹⁷ Basia reeman con xtiidxil, din laan naj ni diidxli. ¹⁸ Zi'c guxhaalil naj loj ree bénguidxliuj, ziangajc rixhial ree da bejnan loj reeman. ¹⁹ Por laa reeman rudëd da guialnaban din gac reeman xbejn diidxliczi.

²⁰ Basnuu Jesús, rëbaman:

—Ad por laatzi reeman rbedx rniaban lüj, në por ree bën chililadx chi gucaagdiajg reeman ni guinee reeman. ²¹ Rniaban lojl din guchajg lasa' reeman din yayajcnë' reeman tijbzi, Dad, zi'c za'në naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj. ²² Badëdan guialrniabee baneel loj reeman, din gac reeman tijbzi zi'c nayajc, ²³ naj za'në' laa reeman, guiaad lüj za'në'l naj. Zeel gac reeman tijbzi din gagbee ree bejn, lüj guxhaal naj rën tõe laa reeman zi'c rën lüj.

²⁴ Dad, lüj baneel laa reeman lon, zeel rënan su reeman lod gazun din guguiaa reeman biani baneel lon, din guyën naj diidz chi gad guidxliuj gacchaaw. ²⁵ Dad, lüj rüjn guialguxtis zagdx. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. ²⁶ Balün laa reeman chu najl, gulüran laa reeman mazri, din gagbee reeman rën laa reeman zi'c rën naj, gazunë' tõe laa reeman.

Bayü Judas Jesús

(Mt. 26:47-56; Mr. 14:43-50; Lc. 22:47-53)

18 Chi gulox gunee Jesús zian, dxel briinē ree xbejnman, zē reeman stiblad ro' guiiw la Cedrón, bidxin reeman lod yu' ree yag. ² Nē Judas, xin yayü laaman, nünbee yagaj, guial zien volt binēman laa reeman ni. ³ Zeel bixhinnēx tibcwaa ree suldad nē ree bēn rajp ro' yadoo, guxhaal quijb ree bixhioz laa reeman nē ree bēnfarisew, ca' reeman bajl rusni ree, nē ree espad con ree lans. ⁴ Per ma ragbee Jesús gra ni gac, briiman gunabdiidxaman loj reeman, rēbaman:

—¿Chu raguilidi?

⁵ Badxi' reeman laan rēb reeman:

—Jesús bēn Nazaret.

Abi' rēbaman loj reeman:

—Najn.

Judas xin bayü laaman bixhinnē laa reeman. ⁶ Chi rēbaman loj reeman: “Najn”, dxel baguiadruxan reeman bixhioz reeman luyuj. ⁷ Gunabdiidxaman zatijb rēbaman:

—¿Chu raguilidi?

Rēb reeman:

—Jesús bēn Nazaret.

⁸ Zeel rēbaman:

—Ma rnin, najn. Bal naj raguilidi, gol baslaa ree bēn guie yaguij reeman.

⁹ Zian gojc cumplid ni rēb loj xDadaman: “Achut ree bēn baneel lon bizēb.” ¹⁰ Dxel gulēē Bēd espad, gutü'-man guidiajg ladbee xin la Malco, najx xmojs quijb bixhioz zobjloj. ¹¹ Dxel rēb Jesús loj Bēd:

—Bagu'chaaw espad zii. Bal rēn da Dadan gazaagdi-ajñ zian, gaza'canan.

Biniaaz Jesús

(Mt. 26:57-58; Mr. 14:53-54; Lc. 22:54)

¹² Suldad guin ree con xin rniabee laa reex con ree bēn rajp ro' yadoo gunaaz reeman Jesús, guxhii reeman laaman. ¹³ Dxel binē reeman laaman yaloj lidx bēn la Anás, din laaman naj xdadsuegr Caifás quijb bixhioz zobjloj loj ijz zii. ¹⁴ Laagajcaman rēb loj gabilt, mazri zagdxē guiet tijbzi bejn por gra ree bēn Israel.

Rēb Bēd ad najtaman xbejn Jesús

(Mt. 26:69-70; Mr. 14:66-68; Lc. 22:55-57)

¹⁵ Tio'p ree xbejn Jesús binal laaman. Tijbaman la Simón, bēn rniee reeman Bēd, stijbaman naj bēn nünbee quijb bixhioz zobjloj, zeel guyunēman Jesús lēnū guin, ¹⁶ guiaad Bēd baya'nman lule'. Zeel barii bēn nünbee bēn rniabee ree bixhioz, guneenēman biin rajp ro' port guin, persi guyu Bēd lēnū. ¹⁷ Gunabdiidxim lojman rēbim:

—¿Nid lūjn naj tijb xbejn bēn guin ya?

Badxi'man laan rēbaman:

—Ad najtan.

¹⁸ Per guial dād nayaag, zeel bēn naj ree mojs con ree bēn rajp ro' yadoo nabe'c reeman guij rucha' reeman. Nēgajc Bēd cucha'nē reeman rudēj guin.

Gunabdiidx Anás loj Jesús

(Mt. 26:59-66; Mr. 14:55-64; Lc. 22:66-71)

¹⁹ Guzuloj bēn la Anás canabdiidxaman loj Jesús xcwent ree xbejnman nē xcwent ni rulüüman. ²⁰ Zeel rēb Jesús:

—Gunen loj gra ree bejn. Zianczi balün lod rucaagdi-ajg ree xtiidx Dios nē lēn dux yadooro' ree, lod rado'p dugra ree. Achet ni gunen ralan. ²¹ ¿Chexc zeel rniabdiidxil lon? Gunabdiidx loj ree bēn bacaagdiajg ni rēn, laa reeman na xhie gunen, laa reeman ragbee.

²² Chi rēbaman zian, tijb bēn rajp ro' yadoo guin wēēz ro'man, rēbaman:

—¿Zian yadxi'l xtiidx bēn rniabee guin ya?

²³ Badxi' Jesús laan rēbaman:

—Bal xhie ni mal rēn, guna xhienin. Per bal gunen zagdxē, ¿chexc zeel rguinl naj?

²⁴ Dxel guidib naxiiman guxhaal Anás laaman loj Caifás, bēn naj quijb bixhioz zobjloj.

Rēb Bēd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

²⁵ Per Bēd sta za'man cucha'man rudēj guin. Abi' gunabdiidx reeman lojman, rēb reeman:

—¿Nid nē lūj naj tijb ree xbejn bēn guin ya?

Badxi' Bēd laan rēbaman:

—A'n, ad xbejntaman naj.

²⁶ Dxel tijb xmojs bixhioz zobjloj guin, bēn naj lasa' bēn gutü' Bēd guidiajg, rēbaman loj Bēd:

—¿Nid lūjn baguian ya za'nēl laaman guia' ree yag olivos?

²⁷ Rēb Bēd stijb guial ad nünbeetaman Jesús, loj hor zii gajc guridxa' tijb guid.

Binē reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Chi bani luyuj, bazanē reeman Jesús lidx Caifás, zinē reeman laaman lēn xpalas gobernador Pilato. Per ree bēn Israel guin ad guyut reeman lēn palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw. ²⁹ Zeel brii Pilato persi guneenēman laa reeman, rēbaman:

—¿Xhie been xin guie zeel zidnēdi laax guie?

³⁰ Badxi' reeman laan rēb reeman:

—Bal najman benza'c, ad ziant nudnē'n laaman lojl.

³¹ Dxel rēb Pilato:

—Gol bignēx, gol been guialguxtis zi'c naj xleydi.

Abi' rēb reeman:

—Per ad naca'tan guialrniabee yanabeen guiet bejn.

³² Zian gojc cumplid xtiidx Jesús chi bagojnman xhienaag guietaman. ³³ Bayu Pilato lēn palas guin, dxel gurejdxaman Jesús, gunabdiidxaman lojman rēbaman:

—¿Lūj naj xrey ree bēn Israel ya?

³⁴ Badxi' Jesús rēbaman:

—¿Lūjcz rniabdiidx lon ya o yu' ree ben ren na lojl zian?

³⁵ Badxi' Pilato laan, rëbaman:

—¿Wen bën Israel naj ya? Bén ladx gajc reel con ree bixhioz rniabee bidnë lüj lon. ¿Xhie beenl?

³⁶ Badxi' Jesúsán rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan bën nidijl ree chitëë niniaaz ree ben Israel naj. Per yan ad lojt guidxliuj guie za da guialrniabeen.

³⁷ Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bën zinal ni diidxli rucaagdiajg reeman ni rnien.

³⁸ Dxel rëb Pilato:

—¿Xhiezani naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bën Israel ree stijb, rëbaman:

—Achet xguialquia xin guin radxejlan. ³⁹ Per lëjt, xcostumbridi naj guial loj lanij pascw laa tijb bën yu' ladxguiib. Yan, ¿rëndi ya guslaan xreydi?

⁴⁰ Dxel gurixdiaj ree bën Israel guin, rëb reeman:

—¡Ad laataman guslaal! ¡Zagdxeli baslaa Barrabás! Abi'za Barrabás guin bëngubaanan.

19 Dxel gunabee Pilato gudijn ree suldad Jesús.

² Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. ³ Dxel gubig reeman lojman, rëbgaj reeman:

—¡Guibanri xrey ree bën Israel!

Dxel rëëzgaj reeman lojman.

⁴ Brii Pilato stijb, abi' rëbaman loj ree bën Israel guin:

—Gol baguiaa, gabën laax din gagbeedi, achet xguialquiax radxejlan.

⁵ Dxel brii Jesús, yu' coron guiëjch guin guijcaman, najcw tëëman lajd xnia guin. Abi' rëb Pilato:

—Laax guie.

⁶ Dxel bixhioz rniabee ree në ree bën rajp ro' yadooro' Jerusalén, chi baguiaa reeman laaman, guzu-loj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtolix radxejlan.

⁷ Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

⁸ Chi biguienman ni rëb reeman, mazri bidxebaman.

⁹ Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. ¹⁰ Zeel rëb Pilato:

—¿Nid zadxi'l ni rnien ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

¹¹ Dxel rëb Jesús:

—Achetczi guialrniabee nitia'l bal id Dios nune laan. Zianan zeel mazri zien xtol bën bidnë naj guie yu' guial lojl.

¹² Diizd hor zii gajc raguiil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëëz bën rajc rey rzuj contr César!

¹³ Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj. ¹⁴ Chi guixiez gal lanij pascw, cost garol dxej rëb Pilato loj ree bën Israel:

—¡Laa xreydi guie!

¹⁵ Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶ Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷ Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. ¹⁸ Ni bacaa reex laaman loj crüjz con zatio'p ree bejn, tijb gaj reeman ca cwë'man. ¹⁹ Gunabee Pilato cwa lejtr guijc crüjz guin, rëban: "Jesús bën Nazaret, xrey ree bën Israel." ²⁰ Dád zien ree bën Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. ²¹ Rëb ree bixhioz rniabee ree bixhioz loj Pilato:

—Ad rucaal: "Xrey ree bën Israel", bacaa: "Bën rëb naj xrey ree bën Israel."

²² Badxi' Pilato laan rëbaman:

—Ni ma bacan yaya'nan zian.

²³ Chi gulox bacaa ree suldad guin Jesús loj crüjz, bacaa' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadi-ibtan, najcchaaw diizd yëjnan xt guia'n, najn tijbzi lajd.

²⁴ Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: "Bala' reeman da xaban, gudxiyt tëë reeman suert guijcan." Zeel been ree xinsuldad guin zian.

²⁵ Gajxh cwë' crüjz ca Jesús za' xniaaman con xbël xniaaman con Li xbëngunaa Cleofas con Li bën gunee reeman Magdalena. ²⁶ Chi baguiaa Jesús xniaaman, za' tijb ree xbejnman cwë'man, bën rën da'taman, rëb loj xniaaman:

—Na, laa xi'nl yagaj.

²⁷ Dxel rëb loj xbejnman:

—Laa xniaal yagaj.

Diizd dxej zii bignëman xniaa Jesús lidxaman.

Güjt Jesús

(Mt. 27:45-56; Mr. 15:33-41; Lc. 23:44-49)

²⁸ Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

²⁹ Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxeel badxig reexan ro'man. ³⁰ Chi ma gu'man laan, dxeel rëbaman:

—Ma gojc gran cumplid.

Dxel basajb lojman luyuj, güjtaman.

Guliiz tijb suldad guib cwë'lën Jesús

³¹ Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüjz dxej raziladx reeman, din dád rajp reeman dxej guin respekt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüjz din guiët reeman yalet tëë reex laa reeman.

³² Zeel wej reex. Yaloj gudi'ch reex xdxijt bën ca cwë' Jesús, dxeel gudi'ch reex xdxijt bën ca stiblad cwë'man.

³³ Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

³⁴ Per tijb suldad guin guxhal ladaman con guib ca'x, dxeel briin rejn con nijs. ³⁵ Bën rü diidx guie baguiaaman, zeel ragbeeman najn diidxli, rüman laan din në lëjt chililadx. ³⁶ Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.”

³⁷ Stiblaht rëb: “Guguaiaa reeman bën guxhálnë reeman guib lad.”

Biguie'ch Jesús

(Mt. 27:57-61; Mr. 15:42-47; Lc. 23:50-56)

³⁸ Chi gulox gojc zian, wej Xiëb, bën zëëd guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bën la Xiëb bililadx Jesús, per ralanzi, guial bidxebaman bejn ree. Badëëd Pilato diidxbee, zeel wej Xiëb bigxiiman xcuerp Jesús. ³⁹ Në Nicodemo wej, bën bigneenë Jesús tijb guxhin, bidxinnëman cost gajlbichii quil ni la mirra, no'chan aloe, rureen nejxh. ⁴⁰ Bagajdxnë reeman laan lajd batüüb reeman laaman, zi'c rüjn ree bën Israel chi ruquie'ch reeman bengüt. ⁴¹ Lod cwa Jesús loj crüjz naga' tijb guidxliuj lod yu' ree yag. Yagaj naj tijb baa cüb lod achutczu waguie'ch. ⁴² Yagaj gudixh reeman xcuerpaman, guial najn gajxh, guial ma suloj tëë dxej raziladx reeman.

Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

20 Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. ² Dxel ruxüünman wejman lod za' Simón Bëd con zatijb xbejn Jesús, bën rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

³ Abi' brii Bëd con bën guin, zë reeman ro' baa guin.

⁴ Grop reeman ruxüün zë reeman. Per bën guin mazri ruxüünman guial loj Bëd, abi' yaloj laaman bidxin ro' baa guin. ⁵ Dxel gudixlojman baguiaaman vend bidüüb Jesús, per ad guyutaman. ⁶ Dxelri bidxin Simón Bëd, abi' guyuman lën baa guin. Nëgajcaman baguiaa vend guin ⁷ Baguiaa tëëman lajd bidüüb guijc Jesús, nadüüban naga'n lood ren, ad naga'tan tijbzi con vend guin. ⁸ Dxel guyu bën bidxin ro' baa guin yaloj, baguiaaman ni goc, zianz bililadxaman, ⁹ guial gocli ad bignia't reeman ni ca loj xtiidx Dios guial yaban Jesús loj ree bengüt. ¹⁰ Dxel zia ree xbejn Jesús lidx reeman.

Balüüloj Jesús loj María Magdalena

(Mr. 16:9-11)

¹¹ Per Li baya'nman ro' baa guin cayoonman. La'tgaj cayoonman gudixlojman lën baa guin, ¹² abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman, zatijbaman lod go't guia'man. ¹³ Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴ Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. ¹⁵ Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguiliil?

Gunaladx Li, bën rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'n laaman din chigxin laaman.

¹⁶ Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo: ¡Rabuni! —rën guiëban Mextr.

¹⁷ Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bën naj gajc xDadidi, loj da Diosan bën naj gajc xDiosidi.

¹⁸ Dxel wej María Magdalena bicojnman xbejn ree Dad Jesús guial baguiaaman laaman, bagojn tëëman laa reeman gra ni rëbaman lojman.

Balüüloj Jesús loj ree xbejnman

(Mt. 28:16-20; Mr. 16:14-18; Lc. 24:36-49)

¹⁹ Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁰ Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa ree-

man baguiaa reeman Dad Jesús. ²¹ Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

²² Dxel balüjbaman guijc reeman, rëbaman:

—Gol gubajnnë xSprijt Dios. ²³ Bén güündi perdon xtol, chiquied xtol reeman, guiáad bén ad züjntidi perdon xtol, yaya'nnë xtol reeman.

Baguiaa Tumajs Jesús

²⁴ Tumajs, bén rníee reeman Cwajch, achut laaman za' chi balüüloj Jesús loj ree xbejnman. ²⁵ Chi rëb reeman loj Tumajs:

—Ma baguiaa Dad Jesús.

Dxel rëbaman:

—Bal id zuguan yaaman lod wëëz clav, abi' bal id zagu' da bacwënan lod wëëz clav guin, bal id zagu' tëë yan cwë'lënman lod bidxeelguijdx, ad zaliladxtan.

²⁶ Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁷ Dxel rëbaman loj Tumajs:

—Badxe' xbacwënl guie, baguiaa ree yan, banee yaal guie badxe'n cwë' lënan. Ad runawëëgril, bililadx.

²⁸ Dxel rëb Tumajs lojman:

—iDa Dadan, da Diosan!

²⁹ Abi' rëb Jesús lojman:

—Rliladxil guial ma baguiaa naj. Xiquilbaa ree bén rliladx, majs ad waguiaa reeman naj.

Chexc zeel cwa gui'ch guie

³⁰ Zienri ree milagr been Jesús loj ree xbejnman, ni ad cwat ree loj gui'ch guie. ³¹ Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

Balüüloj Jesús loj ree xbejnman ro' nijs

21 Chi gudëd gojc zian, balüüloj Jesús loj ree xbejnman zatijb, ro' nijs naj gajxh guiedx Tiberias. Ze balüülojman: ² Chi nadxag lasa' ree Simón Bëd con Tumajs Bén rníee reeman Cwajch, në Natanael Bén za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús, ³ dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxoo.

Abi' wë'p reeman loj barcw zë reeman, per guxhin zii achutczii bëjl gunaaz reeman. ⁴ Chi ma cayreguiaa, bidxin Jesús ro' nijs guin, per ad bayünbeet reeman laaman. ⁵ Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutczii.

⁶ Abi' rëb Jesús loj reeman:

—Gol bazaal xguijxhidi xladbee barcw guin din guini-aazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. ⁷ Dxel xbejn Jesús, Bén rën da'taman, rëbaman loj Bëd:

—iDad Jesúsán!

Biguiejnzi Simón Bëd zian, laa got gajc xabaman ni gulëëman, abi' gutiajsaman lojnijs guin. ⁸ Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. ⁹ Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj.

¹⁰ Dxel rëb Jesús loj reeman:

—Gol tanë tio'p choon bëjl gunaaz nejzidi.

¹¹ Dxel wë'p Bëd loj barcw guin, guxoobyujman guijxh guin guidxan bëjl naroob ree, xt ro' nijs guin. Tibgayuu tú'pchiibichoon bëjl yu' lojn. Abi' majsí zienb, per ad goxya'tan. ¹² Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bénan, guial ragbee reeman Dad Jesúsán. ¹³ Dxel gubigaman cwa'man guiadxtil badëëman loj reeman, ziangajc beenman con bëjl guin. ¹⁴ Ni ne bayon volt balüüloj Jesús loj ree xbejnman chi babanman loj ree bengüt.

Guneenë Jesús Bëd

¹⁵ Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rënł naj mazri guial loj ree Bén guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiildoon.

¹⁶ Abi' rëb Jesús zatijb:

—Simón, xi'n Waj, ¿walil ya rënł naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

¹⁷ Bayon volt gunabdiidx Jesús rëbaman:

—Simón, xi'n Waj, ¿rënł naj ya?

Dád gyunaya Bëd, guial ma gojc choon volt gunabdiidx Jesús bal rënman laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. ¹⁸ Diidxliczi ganin, chi goquil xinguiag, rajcw xabil persi rejł lod rënł. Per chi ma najł bengol, gusli xu'quil din guscajcw ben ren xabil din chinë reeman lüj lod ad rënłil chel.

¹⁹ Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

Ni ne bacaa xbejn Jesús bén guyën da'taman

²⁰ Chi badxi' loj Béd, baguiaaman laa bén rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tëëman loj Jesús rëbaman: "Dad, ¿chu yayü lüj?" ²¹ Chi baguiaa Béd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

²² Badxi' Jesúsán rëbaman:

—Bal rënan guibanx xt yaguialan, ¿xhie güünl? Lüj tanal naj.

²³ Zianan zeel bire'ch diidx loj ree xbejnman guial ad zëjtt Bén guin. Per ad ziantan rëb Jesús, rëbaman: "Bal rënan guibanx xt yaguialan, ¿xhie güünl?"

²⁴ Bén guin gajcan rü diidx xcwent ree nine, laa tëëman bacaa laan, rayagbee tëë ree rüman diidxli. ²⁵ Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni niajc.

Ni been ree apóstoles

1 Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman ²xt chi ziaman xanyabaa. Chi gadaman yaguiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. ³Chi mal guzagdiaj da'taman loj xguial-güjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xguialrniabee Dios.

⁴Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. ⁵Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c guialrirobnis par lējt.

Zia Jesús xanyabaa

⁶Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül guialrniabee loj ree bēn Israel ya?

⁷Badxi' Jesúsán rēbaman:

—Ad lējt it rayal gagbee xhie dxejn o xhie horan gac zian. Tijbzi da Dadan ragbee laan din laaman ca' guialrniabee. ⁸Per chi ma nabannēdi xSprijt Dios, tia'di guialrniabee. Dxel griidi chiguiedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

⁹Gulox guneeaman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman.

¹⁰La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman, ¹¹abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguiaad stijb, zi'cgajc baguiaadi ziaman.

¹²Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén. ¹³Chi badxin reeman, wē'p reeman lēnū ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob. ¹⁴Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bēngunaa ren.

Gulej reeman bēn baya'n xluar Judas

¹⁵Lēn ree dxej zii bado'p ree bēn rliladx Jesús, naj reeman cost tibgayuu gajl bejn, dxel guzuli Bēd galay reeman, rēbaman loj reeman:

¹⁶—Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bēn gu-naaz laaman, ¹⁷gojquix tijb dux compniaran, nē laax been lasa' dxiin raguieenan. ¹⁸Per con milia ni gudix reeman laax por ni mal beenx, bio' guidxliuj lod gu-didya'x, bazuj guijquix, goxya'x abi' brii gra xziix. ¹⁹Chi gogbee gra ree bēn Jerusalén ni goc, gunee reeman guidxliuj zii Acéldama, rēn guiēban guidxliuj rejn.

²⁰Din rēb loj libr la Salmos:

Yaya'n dējch lidxix,
achutcziri cwe lēnan.

Rēb tēē lojn:

Yayu ben ren guia'x.

²¹'Zeel loj gra ree bēn za'nē dunuj ree guidib tiamp ni guzunē Jesús dunuj ree, ²²diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn guial walican babanman loj ree bengüt.

²³Dxel gulej reeman tio'p reeman: tijb bēn la Xiēb (rniee reeman laaman Barsabás, rniee tēē reeman laaman Justo), gulej tēē reeman bēn la Matías. ²⁴Dxel gurejdx gunab reeman Dios, rēb reeman:

—Dad, lüj nünbee luxdoo gra ree bejn. Balüü chu loj grop reeman gulejl ²⁵din gacaman apóstol luar Judas, din banijtix delant lojl por dol ni beenx abi' ziax luar ni rayalix.

²⁶Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

Biguiajt xSprijt Dios diizd xanyabaa

2 Chi bidxin dxej gojl lanij la Pentecostés, gra ree bēn rliladx Jesucrist bado'p tijbzi luar. ²Dxejlczi gojc naquie' xanyabaa zi'c bidoxh xt bayu bi lēnū lod riga' reeman, ³abi' gulentie zi'c bajl dobēz ree, biguiajt reen guijc tijb gaj reeman. ⁴Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

⁵Lēn ree dxej zii za' zien ree bēn Israel Jerusalén, baza reeman gra ladczi din cwedx guiniab reeman Dios. ⁶Chi biguiejn reeman cayajc naquie', bado'p ree-

man persi biquiaa reeman. Dxel chi biguiejn reeman rniee gra ree bén riladx Jesús xtiidx tijb gaj reeman, ad badxejlt xgab nūjn reeman. ⁷ Dád badxa loj reeman xt ni'quid badxejlt xhie nūjn reeman, abi' gunabdiidx loj lasa' reeman rēb reeman:

—¿Nid bén Galilea gra ree bén canee guin ya?

⁸ ¿Chexc zeel raguiejn ree rniee reeman dux tiidx ree?

⁹ Du loj ree no'ch ree bén zēēd guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, ¹⁰ bén zēēd tēē ree guiedx riga' ree niz Frigia, Panfilia, Egipto, nē ree guiedx nulen Libia ni riga' ree gajxh Cirene, nē ree bén zēēd Rom, yu' ree-man gojl Israel per naban reeman Rom, yu' tēē ree-man naj quijb ben Rom per riladx reeman ni riladx ree bén Israel. ¹¹ Nē ree bén zēēd niz Creta nētēē ree bén zēēd guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza-'cdxoon rūjn Dios!

¹² Graczi reeman badxa da't loj xt ni'quid badxejlt xgab nūjn reeman, abi' guzuloj canabdiidx loj lasa' reeman rēb reeman:

—¿Xhie rēn guiēb gra ni guie?

¹³ Per garol reeman baze' laa reeman, rēb reeman:

—Rē' reeman.

Ni rēb Bēd loj ree bejn

¹⁴ Dxel guzuli Bēd con zachibtib ree apóstoles guin, guneeman rejs rēbaman:

—Lējt bén Judea nē graczi ree bén zojb Jerusalén, gol bacaagdiajg gol bignia' tēē ni ganin. ¹⁵ Ad rē't ree bén guin zi'c naladxidi, din qui gojlri raca gaa rsil. ¹⁶ Guie cayajc cumplid ni gunee bén brii laj Joel, bén badēē xtiidx Dios loj ree bejn, chi rēbaman:

¹⁷ Na Dios,

guidxin dxej gaxhal da Sprijtan luxdoo gra ree bejn, abi' xi'ndi xinguaaw con biingunaa gudēēd reex da diidxan,

zien ree ni gulūūloj loj ree xinguiag, guiáad ree bengol zien ree ni guinie'xchaal reeman.

¹⁸ Dxej zii ree gaxhal da Sprijtan luxdoo ree bén rūjn da dxiinan,

xinguaaw ree nē ree béngunaa, abi' gudēēd reeman da diidxan.

¹⁹ Gulūn sen ree xanyabaa ni yadxa lojdi, guiáad loj guidxliuj gulūn sen ree zi'c rejn nē bajl nētēē go'xh.

²⁰ Guicajy loj gubijdx, guiáad bēēw yayajcan zi'c rejn. Chi ma gojc zian, dxel guidxin quijb dxej guin, dxej za'cdxoon gui't Dios bén rniabee, dxej guiguien guidib xbianiman.

²¹ Abi' graczi ree bén cwedx guiniab laaman gūūnman laa reeman perdon.

²² Rēb tēē Bēd loj reeman:

—Yan, gol bacaagdiajg ni ganin lējt bén Israel: Lējt ragbee guial Jesús bén Nazaret najman bén guxhaal Dios, been tēēman milagr ree nē ree ni radxa loj ree bejn zi'c sen din gagbeedi guial Dios guxhaal laaman. ²³ Diizd gocli mal nūjn Dios xgab guial zian gūūnnēdi

Jesús, gunaazidi laaman bayüdi laaman loj ree ben-mal, din gugüjt reeman laaman loj crūjz. ²⁴ Per basban Dios laaman stijb, babēēman laaman loj guialgüjt, din ad gojct nutēē guialgüjt guin laaman. ²⁵ Chi gunee rey Davi xcwent Jesús, rēbaman:

Zianczi baguian dux Dad ree Dios za'nēman naj.

Za'man da ladbeen, achetczi zajc guchejb naj.

²⁶ Zeel yu' luxdon nix, ruzat tēēn Dios zagdx.

majsi guiētan ad rdxebtan,

²⁷ din ad zusa'ntil naj lēn baa,

ad zatiējbtil xhin xcuerp xi'nl bén naya nali.

²⁸ Balūūl naj nejz runee guialnaban,

chu' tēē luxdon zagdx guial guibannēl naj.

²⁹ Basnuu gunee Bēd, rēbaman:

—Ganin loj gradi compniar, diidxliczi dux bēngulal ree Davi güjtaman biguie'ch tēēman, abi' laa xbaaman sta raguiaa ree yan. ³⁰ Per gojcaman bén badēē xtiidx Dios loj ree bejn, abi' gogbeeman been Dios promejs guial loj xdiaaman grii Cristo bén nabee. ³¹ Rulūū ma cuguiaaman gra ni gac, rēbaman guial yaban Cristo loj ree bengüt, ad zaya'ntaman lēn baa ad zaxin tēēt xcuerpaman. ³² Yan ma basban Dios Jesús, dugran nayajc testiw guial walican babanman. ³³ Zia tēēman xanyabaa zisobaman xladbee Dios, persi badēē xSprijt Dios lojman zi'c ma rēbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi cagueijn tēēdi. ³⁴ Ad Davitan zia xanyabaa, din laagaj-caman rēb:

Rēb dux Dad ree Dios loj bén rniabee naj:

“Gurej da ladbeen,

³⁵ xt gabecan xin rdxe'ch ree lūj guia'l.”

³⁶ Gradi bén Israel gol gogbee guial Jesús bén bacaadi loj crūjz, Dios bacaabee laaman din gacaman Dad, bén nabee dunuj ree.

Bachajg zien ree bejn bén riladx ree Jesús

³⁷ Chi biguiejn ree bén riga' yagaj ni rēb Bēd, dád guyu naya luxdoo reeman. Abi' gunabdiidx reeman lojman nē loj los demazri ree apóstoles guin, rēb ree-man:

—Dad, gol guna, ¿xhie rayal yagueienan?

³⁸ Dxel rēb Bēd loj reeman:

—Gol bayagbee xtolidi, gol badxi' tēē lojdi loj Dios, gol guobnijs por xguialrniabee Jesucrist din gac xtolidi perdon, zian chu' xSprijtaman luxdoodi. ³⁹ Din promejs guin naj par lējt nē par ree xi'ndi nē par gra ree bén riga' zijt, par gra ree bén cwe Dios par laaman.

⁴⁰ Con ree diidx guie nē mazri ree diidx ren guneenē Bēd laa reeman, rēbaman:

—¡Gol bariica loj ree bén rūjn ni mal!

⁴¹ Zian gojc, graczi bén bazoob diidx ni rēbaman guobnijs. Dxej zii gajc bachajg cost choon mil bejn bén riladx ree Jesús. ⁴² Graczi reeman binal ni balūū ree xi apóstoles Jesús laa reeman, gubajnnē lasa' ree-man zagdx, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist gūūn reeman.

Ze gubajn ree b́en bililadx Jesús yaloj

⁴³ Graczi ree bejn radxa da't loj milagr nē los demazri ree ni been ree apóstoles guin. ⁴⁴ Graczi ree b́en bililadx Jesucrist gubajnnē lasa' zagdx, rguis tēē ni rajp reeman loj lasa' reeman. ⁴⁵ Ruto' xguidxliuj reeman nē gra ni rajp reeman, persi rguis reeman milia guin loj lasa' reeman zi'ctzi naj ni riaadx tijb gaj reeman. ⁴⁶ Guixie guixie rado'p reeman lēn yadooro' Jerusalén, dxei raguij reeman lidx xcompniar reeman rtaw reeman, dád nix yu' luxdoo reeman rēn tēē lasa' reeman, ⁴⁷ ruza't reeman Dios zagdx, guíaad gra bejn guyēn laa reeman. Guixie guixie ragnē Dios din gacxhiey mazri b́en rililadx Jesucrist, persi gojc xtol reeman perdon.

Bayajc tijb b́en ad rajct rza

3 Tijb dxej zē ree Béd con Waj lēn yadooro' Jerusalén raca choon wadxe, hor zii naj hor ni rbejdx rniab reeman Dios. ² Ro' xport yadoo guin zojb tijb b́en ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree b́en ru lēn yadoo guin. ³ Chi baguiaaman Béd con Waj ma chu' reeman lēn yadoo guin, gunabaman carda loj reeman. ⁴ Baguiaa reeman lojman, dxei rēb Béd lojman:

—Baguiaa du lojn.

⁵ Chi biguejnman rēb Béd zian, dxei baguiaaman loj reeman, naladxaman milia nudēd reeman lojman.

⁶ Per rēb Béd:

—Ad ra'ptan plajt ni'qui or par gunen lojl, per ni zajc gūnan por lūj gūnanan: Por xguialrniabee Jesucrist b́en Nazaret, guzuli, guza.

⁷ Dxei gunaazaman yaaman ladbee, bazuliman laaman. Loj hor zii gajc guyu ree guia'man gojl, ⁸ abi' gutiajsaman, guzuliman guzuloj cazaman. Dxei guyunēman laa reeman lēn yadoo guin, cazaman, catiajsaman cuza't tēēman Dios zagdx. ⁹ Graczi ree b́en cuguaa laaman cazaman cuza't tēēman Dios zagdx, ¹⁰ dád badxa loj reeman bidxeb tēē reeman guial gojc zian guial nūnbee reeman b́en guin, ragbee tēē reeman laaman rbej ro' xport yadoo guin ni la Port Za'cdxoon, rniabaman carda.

Gunee Béd loj ree bejn lod la xcurdur Salomón

¹¹ Ad riro'nladxt b́en bayajc guin Béd con Waj. Dád badxa loj ree bejn, abi' baxūn reeman wej reeman lod la xcurdur Salomón lod za' ree Béd con Waj. ¹² Chi baguiaa Béd zian, rēbaman loj reeman:

—B́en Israel, ¿chexc zeel radxa lojdi ni goc? Ad naladxidi por dunujn rza b́en guie guial naca'n guialrniabee o guial nayajcan naya delant loj Dios ya. ¹³ XDios dux b́engulal ree Abraham, Isaac nē Jacob, laaman badēē guialrniabee loj Jesús, b́en bayūdi loj guxtis. Abi' chi guyēn Pilato nuslaaman laaman, ad cwējbtidi.

¹⁴ Luar niniabidi nuslaa Pilato b́en naya nali, b́en rūjn zi'c rayal, gunabidi baslaaman tijb xin bagūjt bejn.

¹⁵ Zian bagūjtidi b́en runee guialnaban. Per basban Dios laaman stijb, abi' dunujn nayajc testiw guial babanman. ¹⁶ B́en guie, b́en ruguiaadi nūnbee tēēdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguiaa graczi.

¹⁷ Ganin lējt compniar, ragbeen guial lējt con ree b́en rniabee lējt ni'quid gogbeetidi xhienin beendi chi bagūjtidi Jesús. ¹⁸ Per zian been Dios persi gojc cumplid ni rēbaman loj ree b́en badēē xtiidxaman loj ree bejn diizd gocli guial sagdiaj Cristo. ¹⁹ Zeel gol bayagbee xtolidi gol badxi' tēē lojdi loj Dios din gūnman xtolidi perdon. Dxei yayaalyuj luxdoodi, ²⁰ guixhiaal tēēman Jesús stijb, b́en naj Cristo diizd gocli par lējt, ²¹ majsi yan rayalri suman xanyabaa, xt ma bazuxnejz Dios gra, zi'c rēbaman loj ree b́en badēē xtiidxaman loj ree bejn diizd gocli, b́en gubajn ree naya delant lojman. ²² Abi' rēb Moisejs loj ree dux b́engulal ree: "Loj xdiaadi cwēē Dios tijb b́en gudēē xtiidxaman loj ree bejn zi'c naj, gol bazoob xtiidxaman graczi ni naman lojdi, ²³ din graczi ree b́en ad zuzoobt xtiidxaman nit reeman, ad zajc tēētri reeman cwent zi'c xbejn Dios."

²⁴ "Gra ree b́en badēēd xtiidx Dios loj ree bejn, diizd Samuel con los demazri ree b́en badēē xtiidx Dios diizd gulal, mal bagojn reeman ni cayajc ree lēn ree dxej guie. ²⁵ Lējt naj xdiaa reeman, lojdi gac cumplid ni cwēb Dios loj ree dux b́engulal ree chi rēbaman loj Abraham: "Por xdiaal gūnle'n gra ree b́enguidxliuj."

²⁶ Abi' chi basban Dios xi'nman Jesucrist, yaloj lojdi guxhaalaman laaman din gūnle'man lējt din yabēēcaman gradi loj ni mal rūjndi.

Bazuj reeman Béd con Waj loj ree guxtis

4 Sta canee ree Béd con Waj loj ree bejn, chi bidxin ree xbixhioz ree b́en Israel nē suldad rniabee suldad rniay ree ro' yadooro' Jerusalén, nētēē ree b́ensaducew. ² Dád ralen reeman guial culūū ree Béd con Waj bejn ree, rēb reeman guial yaban ree bejn loj ree bengūt, din laan ma baguiaa reeman chi baban Jesucrist. ³ Zeel gunaaz reeman laa reeman, per guial ma gudxe, zeel badxe' reeman laa reeman ladxguiib la't-gaj rareguiaa. ⁴ Per dád zien ree b́en bacaagdiajg ni rēb ree Béd con Waj bililadx xtiidx Dios, gojc reeman cost gaay mil xinguaaw xcwentqui ree b́engunaa.

⁵ Chi bareguiaa, guxtis Jerusalén nē ree bengol nē ree mextr rulūū ley, bado'p reeman loj ciuda guin. ⁶ Nē Anás bidxin yagaj, b́en naj bixhioz mazri zojbloj rniabee graczi ree bixhioz, bidxin tēē bixhioz la Caifás nē Waj nē Lejandr, nētēē gra ree b́en naj lasa' ree bixhioz rniabee guin. ⁷ Gunabee reeman bica' reeman Béd con Waj, abi' bazuj reeman laa reeman galay lod riga' reeman, dxei gunabdiidx reeman loj reeman, rēb reeman: —¿Chu banee diidxbee o chu por rūjndi ni guin?

⁸ Per guial yu' xSprijt Dios luxdoo Béd dád gognēman laaman, zeel rēbaman:

—Gol bacaagdiajg ni ganin lējt bengol nē lējt guxtis, ⁹ rniabdiidxidi dunujn xhienaag baguieenan b́engogxu guin yudar, xhie tēē naag gojc zeel bayajcaman.

¹⁰ Yanan lojdi din gagbeedi gagbee tëë gra bën Israel xhienaag bayajc bën za' lojdi. Bayajcaman por xguialrniabee Jesucrist bën Nazaret, bën bacaadi loj crüjz abi' basban Dios laaman stijb. ¹¹ Beennëdi laaman zi'c rüjn ree bën rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnë yu guin. ¹² Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din gūnman dunuj ree perdon.

¹³ Chi baguiaa ree guxtis guin ad rdxebt ree Bëd con Waj guial rniee reeman, abi' gogbee reeman ad bën basiidt ree mazran achu tëët naj reeman, badxa loj reeman bayünbee tëë reeman laa reeman guial bën binal ree Jesús. ¹⁴ Abi' yagaj gajc za' bën bayajc guin, zeel ad bile'tri xhie niëjb reeman contr laa reeman. ¹⁵ Dxel gunabee ree guxtis guin barii ree Bëd con Waj din yaya'n laaz reeman din gū reeman diidx. ¹⁶ Rëb reeman:

—¿Xhienaag yaguieennë' ree xin guin ree? Graczi ree bën Jerusalén ma ragbee milagr been reex. Abi' ad zajc yarexuu ree. ¹⁷ Per chitëë guire'ch xtiidx Jesús, yachejb reex din diidx yan achutcziri loj guza't reex laax.

¹⁸ Dxel gurejdx reeman laa reeman gunabee reeman chitëë churi loj guza't reeman Jesús, ad gulüü tëëri reeman xtiidxaman. ¹⁹ Per badxi' Bëd con Waj laan, rëb reeman:

—Lëjt gajc gol been xgab: ¿Zagdxë naj yazooban xtiidxidi luar yazooban xtiidx Dios ya? ²⁰ Per ad zajc yacwëëz yaguie'chan gra ni baguiaa baguiejn tëën.

²¹ Dxel bachejb ree guxtis guin laa reeman stijb, dxel-ri baslaa reeman laa reeman zia reeman guial ad badxejlt xhienaag nudëëd reeman laa reeman casti, din graczi ree bejn ruza't Dios zagdxë por ni goc.

²² Nadëd tiuu ijz yu' bën bayajc guin.

Rbejdx ree bën rliladx Jesús Dios

²³ Chi baslaa ree guxtis guin Bëd con Waj, baguiaj reeman lod riga' xcompniar reeman bën rliladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. ²⁴ Chi gulox bacaag-diajg reeman diidx ni be reeman, graczi reeman guzu- loj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëë nijsdoo con gra ni yu' loj reen. ²⁵ Por xSprijt tëël gunee rey Davi diidx guie ree, chi rëbaman: ¿Chexc zeel ridxe'chnë ree bënguidxliuj Dios?

¿Chexc zeel rüjn reeman xgab ni ad rüjnt wen?

²⁶ Bado'p ree rey në gra ree guxtis

din su reeman contr dux Dad ree Dios në contr Cristo.

²⁷ 'Abi' zian ma gojc, Herodes con Poncio Pilato con ree bën Israel nëtëë ree bën ad najt bën Israel, badxa- jg lasa' reeman luguiedx guie persi guzuj reeman con- tr xi'nl Jesús, bën naya nali, bën bacaabeel. ²⁸ Zian go- jc, been reeman zi'c ma beenl xgab diidx gocli. ²⁹ Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin

guialrdxëb, ³⁰ në con xguialrniabeel yasiajcan bënragx- uu ree, yaguieen tëën milagr ree por xguialrniabee xi'nl Jesús, bën naya nali.

³¹ Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios lux- doo gra reeman, abi' guzuloj catie'ch reeman xtiidx Dios sin guialrdxëb.

Ragnë lasa' ree bën rliladx Jesús

³² Graczi ree bën rliladx Jesucrist bidxajg gubajn ree- man, rüjn reeman tijbzi xgab, ni'qui tijb reeman ad rëbt guial xieenzi reeman naj ni rajp reeman, din najn par gra reeman. ³³ Gognë Dios apóstoles guin ree per- si basnuu be reeman diidxli guial baban Dad Jesús loj ree bengüt. Dád beenle' Dios laa reeman. ³⁴ Ni'czi tijb reeman ad biaadxt xhienin, din graczi ree bën rajp guidxliuj o bën rajp yu ya ruto' reeman laan, abi' milia guin ³⁵ rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. ³⁶ Loj reeman no'ch tijb bën brii laj Xiëb, najman xdiaa bën brii laj Leví, zëëdaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban Bën ragu' luxdoo ree bejn zagdxë. ³⁷ Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

Dol ni been ree Ananías con Safira

5 Per guyu stijb bën brii laj Ananías, xbéngunaa- man brii laj Safira. Bato' tijb xguidxliuj reeman, ² per baya'nnë xbéngunaaman diidx persi baya'nnë- man ta'n milia guin. Sta'nan badëëman loj ree após- toles guin, rëbaman laan naj gran. ³ Abi' rëb Bëd loj- man:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnë ta'n milia ni bato' xguidxliujl? ⁴ ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balablaxil beenl zian? Loj Diosan nuyënl nusquieel, ad lojt bejnan.

⁵ Chi biguiejn Ananías ni rëbaman, bialbaman abi' güjtaman. Graczi ree bën gogbee ni guzacaman dád bidxëb reeman. ⁶ Dxel bibig bëlzi ree xinguiag, batüüb reex laaman lajd persi biquie'ch reex laaman.

⁷ Chi gudëd cost choon hor, dxel bidxin xbéngunaa Ananías, ad ragbeetaman ni goc. ⁸ Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

⁹ Dxel rëb Bëd lojman:

—¿Chexc zeel baya'ndi diidx persi nuyëndi nusquiee- di xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

¹⁰ Loj hor zii gajc bialb Safira lod za' Bëd, abi' güjta- man. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë'

lacheelaman. ¹¹ Graczi ree bén rliadx Jesucrist në gra ree bén gogbee ni goc, dád bidxeb reeman.

Zien ree milagr been ree apóstoles

¹² Zien ree milagr naroob been ree apóstoles guin loj ree bejn. Graczi ree bén rliadx Jesucrist radxajg lasa' ro' curdur lod rniee reeman xcurdur Salomón. ¹³ Zagdx ruza't ree bén luguiedx guin laa reeman, per ad rayaxt reeman guchajg reeman laa reeman. ¹⁴ Abi' guixie guixie cayajcxhiey ree bén rliadx Dad Jesús, zi'c xinguaaw zi'c béngunaa. ¹⁵ Xt rbëë reeman bénragxuu ree lunejz, rguijxh reeman laa reeman loj ree loon në loj ree da, din chi téd Béd, majsi xbalazaman téd guijc reeman. ¹⁶ Në ree bén zobj guiedx riga' ree gajxh Jerusalén, zien reeman bidxin Jerusalén, bidxinnë reeman bénragxuu ree në ree bén yu' xindxab luxdoo, abi' graczi reeman bayajc.

Gunaaz ree guxtis Béd con Waj

¹⁷ Bixhioz mazri zobjloj rniabee graczi ree bixhioz në ree bénsaducew za'në laaman, guyu guialnadédloj luxdoo reeman, ¹⁸ abi' gunabee reeman biniaaz ree apóstoles guin persi badxe' reeman laa reeman ladxguib. ¹⁹ Per guxhin zii tijb xi anjl Dios guxhal ro' ree xport ladxguib guin, abi' babëëman laa reeman, rëbaman:

²⁰ —Gol chej lèn yadooro', gol biguiedx loj ree bejn xhie naag gap reeman guialnaban tiblyaa con Dios.

²¹ Chi biguiejn reeman ni rëb anjl guin, bareguiaal rsildoo wej reeman lèn yadoo guin, guzuloj culüü reeman bejn ree xtiidx Dios.

Guiáad bixhioz zobjloj guin con ree bén za'në laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lèn ladxguib guin. ²² Per chi bidxin reex ro' ladxguib guin, achutri ree apóstoles guin ree yu'. Dxel bicojn reex guxtis guin ree, ²³ rëb reex:

—Chi badxinan, baguiaan nayaaw ro' ladxguib guin zagdx, laa ree suldad rajp ro' ladxguib guin za', per chi baxhalan, achutci yu' lënan.

²⁴ Dxel bixhioz zobjloj guin con suldad rniabee ree suldad rnij ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, zban xt guin chigdiblagaa ree ni guie?

²⁵ Loj hor zii gajc bidxin tijb xin rëb loj reeman:

—Laa ree bén badxe'di ladxguib yu' lèn yadoo culüü reeman bejn ree.

²⁶ Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguaiaj ree bejn laa reex.

²⁷ Chi bidxinnë reex laa reeman, bayü reex laa reeman loj guxtis. Dxel rëb bixhioz zobjloj guin loj reeman:

²⁸ —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bén Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

²⁹ Abi' badxi' Bédan në gra ree apóstoles guin, rëb reeman:

—Rayaal yazooban xtiidx Dios luar yazooban xtiidx ree bénguidxliuj. ³⁰ XDios dux béngulal ree basban Jesús, bén bacaadi loj crüzj. ³¹ Abi' nünj Dios laaman bén zobjloj, nabe'caman laaman xladbeeman, laaman naj bén rniabee rabëë tëëman bejn ree loj xtol reeman, abi' zian guxhalaman nejz par ree bén Israel din cwëëladx xtol reeman yadxi' tëë loj reeman loj Dios din güünman laa reeman perdon. ³² Dunujn në xSprijt Dios bén rudëëman loj ree bén ruzoob xtiidxaman, rayagbeen guial gra ree ni guin naj diidxli.

³³ Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman. ³⁴ Per loj ree guxtis guin no'ch tijb bënfarisew laman Gamaliel, najman mextr rulüü ley abi' graczi ree bejn rajp laaman respekt. Guzuliman abi' gunabeeman barii ree apóstoles guin xchu tibrajt. ³⁵ Dxel rëbaman loj ree guxtis guin:

—Bén Israel, gol been xgab xhienin güünnëdi bén guin ree. ³⁶ Gol basaaladx, guyu tijb xin bii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx. ³⁷ Abi' tëë lèn ree dxej gunabee gobiarn biab ree bejn, guyu tijb xin bii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén binal laax bire'ch. ³⁸ Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rünj reeman, zadxin dxej loxan. ³⁹ Per bal por Dios cayünj reeman ni guin ree, ad zajct gutëëdi loj ni cayünj reeman. Gol gojp cudad ad niad chi gagbeedi contr Diosan za'di.

⁴⁰ Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman. ⁴¹ Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. ⁴² Abi' ad rucwëëzt rulüü reeman rniee tëë reeman xtiidx Jesús, gra dxejczii rulüü reeman lèn yadooro' Jerusalén nëtëë lidx lidx ree bejn.

Bibee gajdx ree bén güün yudar

6 Lèn ree dxej zii chi canuu cayajcxhiey ree bén rliadx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczii chi rië's ni raw ree béngunaa bizëjb, ta'ndoon rtia' ree bén rniee diidx grieg guial loj ree bén rniee diidx hebreo.

² Dxel guidxibtio'p ree apóstoles guin bato'p reeman graczi ree bén rliadx Jesucrist, abi' rëb reeman:

—Ad zagdxet naj guial yacwëëz yalüün xtiidx Dios par yadi'san ni gaw ree bejn. ³ Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayaal, bén yu' xSprijt Dios luxdoo, bén yu' tëë ree xquiargueijn, din yazuj reeman

güün reeman dxiin guin. ⁴ Guiáad dunujn yasnuu yarejdx yanaaban Dios, yalüü tēen xtiidxaman.

⁵ Graczi reeman cwējb ni rēb reeman, abi' gulej reeman bēn la Esteban, laaman rililadx Jesucrist guidib luxdooan, rniabee tēē xSprijt Dios luxdooan guidiblagaa. Gulej tēē reeman Felip, Prócoro, Nicanor, Timón, Parmenas nē Nicolás bēn zēēd Antioquía, nēman bililadx ni rililadx ree bēn Israel chi gadaman chililadx Jesucrist. ⁶ Dxel binē reeman laa reeman loj ree apóstoles guin, persi gurejdx gunab reeman Dios por laa reeman badxiib tēē yaa reeman guijc reeman.

⁷ Canuu care'ch xtiidx Dios, abi' Jerusalén cayajcxhieje ree bēn rililadx Jesucrist, nē zien ree bixhioz Israel bililadx laaman.

Biniaaz Esteban

⁸ Dád gognē Dios Esteban badēē tēēman guialrniabee persi rjünman zien loj milagr delant loj ree bejn. ⁹ Abi' bēlzi ree bēn yadoo ni la Libertados nē ree bēn Cirene con ree bēn Alejandría con ree bēn niz Cilicia nētēē ree bēn zēēd niz Asia, guzuloj cadildiidxnē reeman Esteban, ¹⁰ per ad gojct nadxi' reeman xtiidxaman guial cayagnē xSprijt Dios laaman. ¹¹ Dxel gudijx reeman bēlzi ree bejn din guiēb reeman, bacaagdiajg reeman rniee Esteban contr Dios nē contr Moisejs. ¹² Zian been reeman persi bidxe'ch ree bēn luguiedx guin, nē ree bengol nē ree mextr rulüü ley. Dxel gunaaz reeman Esteban, binē reeman laaman loj guxtis. ¹³ Gudiil tēē reeman bēn basquiee ree persi rēb reeman loj ree guxtis guin:

—Ad rucwēēzt rnieeguijdx xin guie xley Moisejs nē xyadoo Dios. ¹⁴ Dunujn ma bacaagdiajg rēbix guial Jesús xin Nazaret guse'nx dux yadooro' ree, guchaa tēēx costumbr basa'n Moisejs du loj ree.

¹⁵ Abi' guxtis guin ree nē gra ree bēn riga' yagaj, chi baguiaa reeman loj Esteban, baguiaa reeman najn zi'c tijb loj anjl.

Ni rēb Esteban loj ree guxtis

7 Dxel bixhioz mazri zojbloj rniabee graczi ree bixhioz, gunabdiidxaman loj Esteban, rēbaman:

—¿Walin ya rēbil zian?

² Badxi' Esteban laan, rēbaman:

—Dad guxtis, nē lējt compniar, gol bacaagdiajg ni ganin. Dios bēn yu' xanyabaa balüüloj loj dux bēngulal ree Abraham, chi gureman niz Mesopotamia chi gadaman chisob guiedx Harán. ³ Abi' rēb Dios lojman: "Basa'n ladxil nē gra ree lasa'l, wej loj yuj ni gulün lüj." ⁴ Dxel brii Abraham ladx ree bēn Caldea bisobaman Harán. Chi güt xDadaman, dxel bidnē Dios Abraham loj guidxliuj guie lod nadxu' ree yan. ⁵ Per chi bi't Abraham guie, achetdzi guidxliuj badēēd Dios lojman, ni'czi tibda'nan ad badēētaman. Per beenman promejs loj Abraham guial gudēēman guidxliuj guie lojman, dxel chi guiētaman tia' ree xdiaaman laan, majsi chi rēb Dios zian, ad wayut xi'n Abraham. ⁶ Rēb tēē Dios lojman guial xdiaaman chisob zi'c ree benzit nacion ren,

lod gugüjn da't reeman laa reeman dxiin gusagzi tēē reeman laa reeman loj tajp gayuu ijz. ⁷ Per rēb tēē Dios lojman: "Gudēdan gra ree bēn gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal." ⁸ Chi guneenē Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennē Isaac xi'nman Jacob, ziangajc beennē Jacob guidxiptio'p ree xi'nman, bēn goc ree dux bēngulal ree.

⁹ 'Bēn goc ree dux bēngulal ree gudēdloj reeman Xiēb bēn naj bijch reeman, abi' bato' reeman laaman loj ree bēn zē Egipto, per ad guro'nladxt Dios laaman, ¹⁰ gognēman laaman loj ni guzagdiajman badēē tēēman xquiarguejnman, gognē tēēman laaman persi bi'ajb rey guin laaman zagdx, abi' beenman laaman gobernador Egipto, bazuj tēēman laaman din nabeeman gra ni rajp rey guin.

¹¹ 'Chi guyu gubijn guidibczi Egipto nē niz Canaán, dxel guzagdiaj da't ree dux bēngulal ree guial achet ni gaw reeman. ¹² Per chi gogbee Jacob guial yu' trigo Egipto, guxhaal ree xi'nman bēn naj dux bēngulal ree, dxel wej reeman Egipto. ¹³ Chi barojp volt wej reeman, rēb Xiēb guial laaman naj bijch reeman, dxel gogbee rey Egipto xhie diaa zēēdaman. ¹⁴ Dxel rēb Xiēb loj ree bijchaman din chigxii reeman xDadaman nē gra ree lasa'man din chisob reeman Egipto. Gojc reeman gayojnchiin bejn. ¹⁵ Zianan zeel bisob Jacob Egipto, ni gütaman ni gajc güt ree xi'nman, dux bēngulal ree. ¹⁶ Gojc xchej dxel bignē reeman xdxijt ree dux bēngulal ree guiedx Siquem, persi biguie'ch reen lēn baa guzii Abraham loj ree xi'n Hamor.

¹⁷ 'Chi ma zidyob tiamp gac ni rēb Dios loj Abraham, zien ree bēn Israel ma gojcxhieje Egipto. ¹⁸ Abi' guzuloj gunabee rey ren Egipto, bēn ad beenbeet Xiēb. ¹⁹ Rey zii basagzi bēn du ladx ree, gunabeeman chigsēēb reeman xindo niguiaaw golnejz ree din guiēt reex.

²⁰ Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bēēw. ²¹ Chi bidxin dxej bigsa'n reeman laax lod bigsēēb reeman laax, xi'n gajc rey guin baca' laax, persi baslaaman laax zi'c xi'nman.

²² Basiid Moisejs gra ni rajc ree bēn Egipto, abi' lasajc ni guneex ni been tēēx.

²³ 'Chi guyu Moisejs tiuu ijz, bidyajb guijcaman bignaj lasa' bēn Israelaman. ²⁴ Abi' chi baguiaaman caguin tijb bēn Egipto tijb bēn Israel, balajman laaman, bagüjtaman bēn Egipto guin. ²⁵ Naladx Moisejs niagbee ree bēn Israel guial por laaman yabēē Dios laa reeman loj ree bēn Egipto, per ad gogbeet reeman. ²⁶ Chi bareguiaa, bidxaagloj Moisejs tio'p ree bēn Israel caga'p reeman, abi' guyēnman nabe'cdxeman laa reeman, rēbaman: "¿Chexc zeel rdilidi? Awa bēn Israel naj gropidi." ²⁷ Abi' bēn caguin bēn zatijb guin bacadxaaman Moisejs, rēbaman: "¿Chu bazuj lüj din nabeel dunujn, din na tēēl ni rayal yaguieenan? ²⁸ ¿Wen rēnl ya gugüjtil naj zi'c bagüjtil bēn Egipto ni nieey?" ²⁹ Chi biguiejn Moisejs ni rēb bēn guin, baxüünman wejman

niz Madián. Ni gureman zi'c benzit, abi' cwa'man béguna, zianz guyu tio'p ree xi'ngaanman.

³⁰ 'Chi gudëd tiuu ijz, dxei balüüloj tijb xi anjl Dios loj Moisejs loj xbañl tijb yag ni cayazbañl lod naj yujbidx, gajxh guia' la Sinaí. ³¹ Dád badxa loj Moisejs guial baguiaaman bajl guin. Abi' chi bibigaman din guguaaman laan mazri zagdx, biguiejnman cha' Dios rëbaman lojman: ³² "Naj naj xDios xbéngulal reel, Abraham, Isaac në Jacob." Dxel guzulolj canij Moisejs guial bidxbaman, ad bayaxtaman nuguaaman bajl guin. ³³ Dxel rëb Dios lojman: "Gulëë xgurëchil, din nagle' lod za'l. ³⁴ Naj cuguia xhienaag cazagdiaj ree da bejnan Egipto, riguejnman roon reeman zeel biguia'tan din yabën laa reeman. Yan, guda din gaxhalan lüj Egipto."

³⁵ 'Abi' majsi ad guyënt ree bën Israel nuzoob reeman xtiidx Moisejs yaloj, rëb reeman lojman: "¿Chu bazuj lüj din nabeel dunujn na tēēl ni yaguieenan?" Per por anjl balüüloj loj bajl guin, badëēd Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c. ³⁶ Moisejs guin naj bën babëē dux bégulal ree Egipto, been tēēman milagr ree niz Egipto, në niz ro' ni nijsdoo ni la Nijs Xnia, në loj yujbidx lod guzu reeman tiuu ijz. ³⁷ Laagajc tēēman rëb loj ree bën Israel: "Loj gajquidi cwe Dios tijb bën gudëēd xtiidxaman loj ree bejn zi'c guleman naj. Gol bazoob xtiidxaman." ³⁸ Dxel chi guzunë Moisejs dux bégulal ree niz loj yujbidx, laaman naj bën guneenë xi anjl Dios ruguia' la Sinaí, persi badëēman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ 'Per dux bégulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczí reeman nayejc reeman Egipto. ⁴⁰ Dxel rëb reeman loj Aarón: "Been dios ree, din ned reeman du loj ree, din ad rayagbeet ree gonczí Moisejs bën babëē dunuj ree Egipto." ⁴¹ Dxel been reeman tijb go'ndobëz din gaquib xdios reeman. Bagüjt reeman be ree persi badëēd reeman laa reeb zi'c gon loj ni been reeman, been reeman lanij guial babaanë reeman ni been gajc reeman. ⁴² Dxel guro'nldax Dios laa reeman, baslaaman guyën reeman gubijdx con bëw con bajl yu' ree xanyabaa. Din zian ca loj xtiidx Dios ni bacaa ree bën badëēd xtiidxaman loj ree bejn, lod rëb: Bën Israel, loj tiuu ijz ni guzudi loj yujbidx, ¿wen bagüjtidi be ree ya din guneedi laa reeb lon zi'c gon?

⁴³ Per mazri guyëndi xdxandi Moloc biaa tēēdi lidxan, në xbañl dxan Refán, dxan been gajquidi din guzuxibi-di loj reen.

Zeel gaxhalan lëjt mazri zijt guial Babilonia.

⁴⁴ 'Abi' chi guzu ree dux bégulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman. ⁴⁵ Chi güt Moisejs, baya'nnë ree dux bégulal ree yadoo guin. Chi baya'n Josué xluar Moisejs, dxel bidnë ree-

man yadoo guin chi gudil reeman guijc guidxliuj con ree bën ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzulolj gunabee rey Davi. ⁴⁶ Guyën Dios rey Davi, abi' laaman guyënman nünman tijb yadoo par Dios, bën naj dux Dios ree nayajc ree bën Israel. ⁴⁷ Per rey Salomón naj bën been laan, ⁴⁸ majsi Dios bën yu' xanyabaa ad rbejtaman lën yadoo ni rünj ree bejn, zi'c rëb bën badëēd xtiidx Dios loj ree bejn diidx gocli, chi rëbaman:

⁴⁹ Xanyabaa naj lod zooban par ganabeen, guiaad loj guidxliuj naj lod ruzu guia'n.

¿Xhienaag gac yu güündi par naj?

¿O xhienaag naj lod yaziiladxan?

¿Id naj ben graczi ree ni guie ya?, rëb Dios.

⁵¹ 'Per lëjt —rëb Esteban —dád nadidi, ad rëntidi gu-zoobidi xtiidx Dios, ad rën tēēdidi chignia'di, zianczí za'-di contr xSprijt Dios, zi'cgajc been ree xbéngulalidi.

⁵² ¿Chu bën badëēd xtiidx Dios loj ree bejn ad been-naat ree xbéngulalidi? Xt bagüjt reeman bën badëēd ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tēēdi güjtaman. ⁵³ Majsi cwa'di xley Dios loj ree xi anjlamán, per ad rünjtidi zi'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman. ⁵⁵ Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tēēman Jesús za'man xladbee Dios. ⁵⁶ Dxel rëb Esteban:

—¡Gol baguiaa! Ruguián naxal xanyabaa, ruguia tēēn Bën guxhaal Dios za'man xladbee Dios.

⁵⁷ Per chi biguiejn reeman zian, bata'cw guidiajg reeman, dxel gurixdiaj reeman zignaaz reeman Esteban, ⁵⁸ babëē reeman laaman loj ciuda guin, bicüjt reeman laaman con guiaj, guiaad xab reeman basa'nsii reeman loj xinguiag la Saulo persi canajxan. ⁵⁹ La'tgaj cu-caaguaiaj reeman Esteban, rëbaman:

—Dad Jesús, baca' da sprijtan.

⁶⁰ Dxel bazuxibaman guridxa'man rejs, rëbaman:

—Dad Jesús, ad güüncwentil dol cayünj ree bën guin yan.

Naabczi gulox rëbaman zian, laa güt gajcaman.

Guzunal Saulo bën rliladx ree Jesucrist

8 Baya'n Saulo conform guial bagüjt reeman Esteban. Abi' dxej zii gajc guzulolj rzunal reeman bën Jerusalén ree bën rliladx ree Jesucrist, dxel bire'ch reeman guidib niz Judea në niz Samaria, bën najzi ree apóstoles baya'n. ² Guyu bëlzi ree xinza'c, laa reex biquie'ch Esteban, abi' dád biin reex guijcaman. ³ Guiaad Saulo rzunalaman bën rliladx ree Jesucrist, ruman yu yu din cwëë naguejnman laa reeman, zi'c xinguaaw zi'c béguna, persi rgu'man laa reeman ladxguuib.

Bacaagdiajg ree b́en Samaria xtiidx Dios

⁴ Per b́en brii ree Jerusalén, lod zétzi reeman rtie'ch reeman xtiidx Dios. ⁵ Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. ⁶ Dád zien ree bejn rdo'p, graczi reeman rucaagdiajg chaaw ni rēb Felip, ruguiaa tēē reeman milagr ree ni rŭjnman. ⁷ Zien ree b́en nējt tib lajt xcuerp bayŭjn Felip, nē ree b́en ad rzat zagdx, bayŭjn tēēman b́en yu' ree xindxab luxdoo abi' rbixdiaj reex rarii reex.

⁸ Zianan zeel babaa da't ree b́en luguiedx zii.

⁹ Per luguiedx zii guyu tijb b́en brii laj Simón, diizd gocli rŭjnman guialbidxaa persi rusqueeman b́en Samaria ree, rŭjnman b́en lasajc. ¹⁰ Graczi reeman rucaagdiajg chaaw ni rēbaman, diizd mazri ree xinguiag xt mazri ree bengol, abi' rēb reeman:

—Naroob naj xguialrniabee Dios ni rajp b́en guie.

¹¹ Bidxga' reeman laaman guial ma gojc xchej cusqueeman laa reeman con guialbidxaa ni rŭjnman.

¹² Per chi bililadx reeman ni rēb Felip xcwent xguialrniabee Dios nē xcwent Jesucrist, zi'c ree xinguiagw zi'c ree b́engunaa gurobnijs reeman. ¹³ Xt nē Simón bililadx gurobnijs tēēman, abi' ad riro'nladxtaman Felip radxa tēē lojman graloj ree milagr ruguiaaman rŭjn Felip.

¹⁴ Chi gogbee ree apóstoles riga' Jerusalén guial ma bililadx ree b́en Samaria xtiidx Dios, dxel guxhaal reeman Béd con Waj ni. ¹⁵ Chi bidxin reeman, gurejdx gunab reeman Dios por ree b́en Samaria b́en ma rliladx ree xtiidx Dios din chu' xSprijt Dios luxdoo reeman, ¹⁶ din ni'qui tijb reeman ad wayut Sprijt guin luxdoo, gurobnijsi reeman por Dad Jesús. ¹⁷ Dxel guxhoob yaa ree Béd con Waj guijc reeman, abi' guyu xSprijt Dios luxdoo reeman.

¹⁸ Chi baguiaa Simón cayu xSprijt Dios luxdoo ree b́en guin guial caxhoob yaa ree apóstoles guin guijc reeman, dxel guyēnman nudēēman milia loj reeman, ¹⁹ rēbaman:

—Nē lon gol banee guialrniabee guin din chi gaxhob yan chutēēz guijc b́enan, nē luxdooan chu' xSprijt Dios.

²⁰ Dxel badxi' Béd xtiidxaman rēbaman:

—Nitol con guidib xmilial, din rŭjnl xgab guial zajc siil guialrniabee razaladx Dios. ²¹ Ad rayalt ad zajc tēēt gŭŭnl zi'c raguieenan, din ni'quid zinalt xnejz Dios. ²² Bayŭjn xgab por ni mal beenl, gurejdx gunab tēē Dios, rupent gŭŭnman lŭj perdon por ree xixgabmalil, ²³ din ragbeen ganax guialralen yu' luxdool, abi' dol guin naj ni rniabee lŭj.

²⁴ Dxel badxi' Simón xtiidxaman, rēbaman:

—Gol gurejdx gunab Dios por naj, chitēē gaza'can ni'qui tijb ni ma nadi.

²⁵ Chi gulox gunee ree apóstoles guin xtiidx Dios loj ree b́en guin, dxel badxin reeman Jerusalén, abi' graczi ree guiedx riga' niz Samaria lod gudēd reeman gutie'ch reeman xtiidxza'c Jesucrist.

Felip con b́en Etiopía

²⁶ Chi ma gudēd gojc zian, gunee tijb xi anjl Dios Felip rēbaman:

—Wej niz sur nejz ni zē Jerusalén xt lod la Gaza, niz lod naj ganax yujbidx.

²⁷ Dxel brii Felip zēman. Runejz guin banaazaman tijb b́en Etiopía, najman b́en zojbloj guial laaman rgu'chaaw xmilia Candace, b́en naj reina Etiopía. Wejman Jerusalén bignajchi'man Dios, ²⁸ abi' ma bayunejzaman zia ladxaman, zojb lēn xcarrejt zagdxeman, roolaman loj gui'ch ni bacaa Isaías, b́en badēēd xtiidx Dios loj ree bejn. ²⁹ Dxel rēb xSprijt Dios loj Felip:

—Bibig gajxh cwē' carrejt guin.

³⁰ Chi bibigaman, bigujejnman cayool b́en guin loj gui'ch bacaa Isaías. Dxel gunabdiidxaman lojman rēbaman:

—Dad, ¿rignia'l ni cayoolil ya?

³¹ Badxi' b́en guinan rēbaman:

—¿Xoza chignia'nan? Awa achut gusignia' naj.

Dxel rēbaman loj Felip din chē'paman loj carrejt guin, cweman cwē'man.

³² Loj xtiidx Dios lod cayool b́en guin rēban:

Zi'c rinē reeman tijb xiil, binē reeman laaman lod gugŭjt reeman laaman.

Abi' achet rēbaman,

zi'c tijb xiil ma za' loj ree b́en gugaj guidxladib.

³³ Chi beennē reeman laaman zi'ctzi rēn reeman, achut been guialguxtis por laaman.

Yan achut guza't xdiaaman, din ma bisŭd reeman laaman loj guidxliuj.

³⁴ Rēb b́en guin loj Felip:

—Guna sii, ¿chu xcwent rnīee b́en bacaa diidx guie ree? ¿Xcwent gajcaman ya o xcwent ben renan?

³⁵ Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman.

³⁶ Abi' chi gudēd reeman lod yu' nijs, dxel rēb b́en guin loj Felip:

—Guie yu' nijs. ¿Nid zajc garobnijsan guie ya?

³⁷ Zeel rēb Felip lojman:

—Bal rliladxil guidib luxdool, zajcan.

Badxi' b́en guinan rēbaman:

—Rliladxan guial Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. ³⁹ Chi barii reeman lojnijs guin, loj hor zii gajc gunidloj Felip binē xSprijt Dios laaman, abi' ad baguiaatri b́en guin laaman, per dád rabaaman zinal xnejzaman. ⁴⁰ Chi gogbee Felip, ma za'man xt guiedx Azoto, dxel zēman guiedx guiedx zigtie'chaman xtiidxza'c Jesucrist xt bidxinman Cesarea.

Bililadx Saulo Dad Jesucrist

(Hch. 22:6-16; 26:12-18)

9 Guíaad Saulo ad rucwēēzt rdxe'chaman b́en rliladx ree Jesucrist, rēbaman gugŭjtaman laa reeman. Zeel wejman bigneenēman bixhioz mazri zojbloj

rniabee graczi ree bixhioz, ² din gac tijb gui'ch din gac cheman lën ree yadoo Damasco chigdiilaman bën rliadx ree Jesucrist, zi'c ree xinguaaw zi'c ree bengu-naa, din chignëman laa reeman ladxguib Jerusalén. ³ Per chi ma cadxinman gajxh guiedx Damasco, dxejl-czi bñi tijb guij xanyabaa balaan bacha' lod zëman. ⁴ Abi' bireeyujman, chi naga'man luyuj guin bigueijn-man cha' bën rëb:

—Saulo, Saulo, ¿chexc zeel rzunalil naj?

⁵ Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguil xguialnaal zi'c rüjn tijb go'n rudxegua' loj yag ni rulaagnë reeman laab.

⁶ Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal günl.

⁷ Abi' ree bën në Saulo dád bidxeb reeman guial bigueijn reeman cha' bejn, per achutczu baguiaa ree-man. ⁸ Chi bixcheman luyuj guin, baxhal lojman, ad rajctri ruguiaaman. Dxel gunaaz reeman yaaman bignë reeman laaman Damasco. ⁹ Ni guzuman choon dxej, ad rajct ruguiaaman, achetczu rawaman ache tëetczu rë'man.

¹⁰ Damasco gure tijb bën rliadx Dad Jesucrist, bñi laj-man Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

¹¹ Dxel rëb Jesucrist lojman:

—Bisu, wej call ni la nali. Chi guidxinl lidx Judas, gun-abdiidx por tijb xin zëed Tarso, lax Saulo. Din laax cabejdx canab naj, ¹² abi' zi'c rulüü cane'xhchaalix, baguiaax guyu tijb bën la Ananías guxhoob yaaman guijquix persi baguiaax stijb.

¹³ Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bën rliadx ree lüj Jerusalén. ¹⁴ Yan zëedix guie con xguialrniabee ree bixhioz rniabee ree bixhioz, din guiniaazix gra ree bën rliadx lüj.

¹⁵ Dxel rëb Jesucrist lojman:

—Wej, din naj gule laax din chiguiex da diidxan loj ree bën ad najt bën Israel, në loj ree rey, con nëgajc loj ree bën Israel. ¹⁶ Guiën lojx guial sagdiaj da'tix guial najx da bejnan.

¹⁷ Dxel zë Ananías lënü lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bën balüüloj lojl runejz lod zëedil, laaman guxhaal naj din yaguaal, chu' tëë xSprijt Dios luxdool.

¹⁸ Loj hor gajc zi'c rulüü yu' xhie biquied guiaalajman abi' baguiaaman stijb. Dxel guzuliman gurobnijisaman, ¹⁹ gudaw tëëman persi bayuman gojl. Dxel guzujman Damasco tio'p choon dxej con ree bën rliadx Jesucrist.

Gunee Saulo xtiidx Dios Damasco

²⁰ Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios. ²¹ Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliadx ree Jesucrist Jerusalén ya? ¿Nid laagajcaman zëed guie ya, din guiniaazaman bën rliadx ree Jesucrist chignë tëëman laa reeman loj ree bixhioz rniabee ree bixhioz?

²² Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

Baxüün Saulo guiedx Damasco

²³ Ad xchejt gojc, baya'n ree bën Israel diidx din nugüjt reeman Saulo, ²⁴ per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman. ²⁵ Per ree bën rliadx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchajga-man bën rliadx ree Jesucrist, per graczi reeman bidxeb laaman guial ad rliadxt reeman nëman ma rliadx Jesucrist. ²⁷ Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenë tëëman laaman chi zëman Damasco, bagojn tëëman guial Damasco gunee Saulo xtiidx Jesucrist sin guialrdxeb. ²⁸ Zian baya'n Saulo Jerusalén abi' nayuman laa reeman. ²⁹ Ad rdxebtaman ruza'taman Dad Jesús, abi' xt gudijldiidxnëman bën Israel rniee ree diidx grieg, per guyën reeman nugüjt reeman laaman. ³⁰ Chi gogbee ree bën rliadx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel babedxe luxdoo ree bën rliadx Jesucrist, bën zojb ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tëë reeman xtiidxaman, abi' cayagnë xSprijt Dios cayajcxhie reeman.

Bayajc Eneas

³² Chi biza Bëd bitixlojman bën rliadx ree Jesucrist, dxel wej gajcaman bitixlojman bën rliadx ree Jesucrist guiedx Lida. ³³ Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax. ³⁴ Abi' rëb Bëd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. ³⁵ Chi baguiaa gra ree bën zojb guiedx Lida në ree bën zojb niz Sarón guial ma bayajc Eneas, dxel në reeman bililadx Jesucrist.

Baban Dorcas

³⁶ Loj tiamp zii guyu tijb búngunaa rliladx Jesucrist luguiedx Joep, laman Tabita, diidx grieg laman Dorcas. Laaman been ni za'c ree, been tēēman yudar bēnprob ree. ³⁷ Lēn ree dxej zii gogxuu Dorcas abi' gūjtaman. Chi gulox bagajz reeman laaman, dxel bitixh reeman laaman lēnū ladya. ³⁸ Abi' gajxh guiedx Joep raya'n guiedx Lida lod za' Bēd. Chi gogbee ree bēn rliladx Jesucrist guial za'man ni, guxhaal reeman tio'p ree xin-guiaaw bisajc reex Bēd liaadx, rēb reex:

—Been wen yo' ree Joep yan gajczi.

³⁹ Laa zinē gajcaman laa reex. Chi bidxinman, binē reeman laaman lēnū lod naga' xcuerp Dorcas. Ni riga' zien ree búngunaa bizējb roon reeman, abi' bibig reeman loj Bēd culūū reeman gra lajd ni been Dorcas chi sta nabanman. ⁴⁰ Dxel gunabee Bēd barii gra reeman, abi' bazuxibaman gurejdx gunabaman Dios. Dxel baguiaaman bengūt guin, rēbaman:

—iTabita, bixche!

Laa guxhal gajc lojman. Chi baguiaaman Bēd, gureli-man, ⁴¹ dxel gunaaz Bēd yaaman persi guzuliman. Abi' gurejdxaman bēn rliladx ree Jesucrist con ree bēn bizējb guin, persi baguiaa reeman guial ma baban Dorcas. ⁴² Guidibczi guiedx Joep gogbee reeman ni goc, abi' zien da't reeman bililadx Jesucrist por zian. ⁴³ Guiaad Bēd baya'nman mazri dxej luguiedx guin, lidx Simón bēn rŭjnchaaw guid.

Wej Bēd lidx Cornel

10 Luguiedx Cesarea gurej tijb bēn brii laj Cornel. Laaman goc suldad gunabee tibcwaa ree suldad brii laj Italiano. ² Gojcaman benza'c, laaman nē gra ree bēn zojb lidxaman guyēn reeman Dios, abi' dād beenman yudar bēn Israel ree, bēn nāj ree bēnprob, nē zianczi rbejdx rniabaman Dios. ³ Tijb dxej cost raca choon wadxē, guzajcaman zi'c rulūū cane'xhchaalaman. Zagdxeczi baguiaaman guyu tijb xi anjl Dios lēnū lod za'man, abi' rēb anjl guin lojman:

—iCornel!

⁴ Baguiaaman loj anjl guin, abi' dād bidxebaman, rēbaman:

—iXhienin, Dad?

Abi' rēb anjl guin:

—Ma biguiejn Dios xtiidxil ma baguiaa tēēman xhienaag rŭjnl yudar bēnprob ree. ⁵ Guxhaal ree bēn che luguiedx Joep din chica' reeman Simón, bēn la gajc Bēd. ⁶ Zojbaman lidx tijb bēn la gajc Simón, bēn rŭjnchaaw guid, bēn zojb gajxh ro' nijsdoo. Bēd guin na ni rayal gūñl.

⁷ Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rliladx tēēman Dios. ⁸ Gulox beman diidx loj reeman ni guzacamā, dxel guxhaalaman laa reeman Joep.

⁹ Chi bareguiaa, la'tgaj cadxin reeman gajxh Joep, cost garol dxej wē'p Bēd guijc yu lod zojbaman din cwedx guiniabaman Dios. ¹⁰ Dād gulaanman, guyēn-

man niajwaman, per la'tgaj cayŭjn reeman ni gawaman guzajcaman zi'c rulūū cane'xhchaalaman.

¹¹ Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan. ¹² Loj lajd guin yu' gra loj ree be yu' tajp guia', nē ree bēēl, nētēē ree be rzuju. ¹³ Dxel biguiejnman cha' bēn rēb:

—Bēd, bisu, bagŭjt be gawil.

¹⁴ Per badxi' Bēd laan rēbaman:

—Yajqui, Dad. Ad wayawtczan nidxuudx ni ad rayalt gaw bejn.

¹⁵ Abi' rēb cha' bēn guin zatijb:

—Ni ma basia Dios ad rnieelan nidxuudx.

¹⁶ Choon volt gojc zian, dxel bayē'p lajd guin xanyabaa stijb. ¹⁷ La'tgaj cayŭjn Bēd xgab xhie rēn guiēb ni baguiaaman, loj hor zii gajc bidxin ree bēn guxhaal Cornel rulidx Simón, guial ma gunabdiidx reeman banguin nāj lidxaman. ¹⁸ Chi bidxin reeman, gunabdiidx reeman bal ni zojb Simón bēn la gajc Bēd.

¹⁹ Guiaad Bēd sta cayŭjnman xgab ni baguiaaman, chi rēb xSprijt Dios lojman:

—Laa choon ree xinguaaw raguuil lŭj. ²⁰ Bisu, biguiajt binē reex, ad chu' luxdool tio'p, din nāj guxhal laa re-ex.

²¹ Dxel baguiajt Bēd lod za' ree bēn guxhaal Cornel, abi' rēbaman loj reeman:

—Naj nāj bēn raguilidi, ŷchexquiza zeel raguilidi naj?

²² Dxel badxi' reeman laan rēb reeman:

—Guxhaal bēn la Cornel dunujn, bēn rniabee tibcwaa ree suldad, najman benza'c, rdxebaman Dios, abi' graczi ree bēn Israel rēn laaman. Tijb xi anjl Dios rēb lojman, guial rayal guixhiaalaman dunujn yudca'n lŭj din yo' ree lidxaman, din gucaagdiajgaman ni rayal guiēbil.

²³ Dxel badxe' Bēd laa reeman lēnū, ni gudēd reeman guiaal. Chi bareguiaa, binēman laa reeman. Nē bēlzi ree bēn zojb Joep bēn rliladx ree Jesucrist binē laaman.

²⁴ Chi bareguiaa bidxin reeman Cesarea lod zojb Cornel. Abi' bato'p Cornel gra ree lasa'man nē ree xmiwaman, din cwēz reeman guidxin reeman. ²⁵ Chi bidxin Bēd lidx Cornel, laa brii gajc Cornel bigchaaglojman laaman, dxel bazuxibaman loj Bēd persi gojpaman laaman respejt. ²⁶ Per bazuli Bēd laaman, rēbaman:

—Guzuli, din lasa' bejn gajcan lŭj.

²⁷ La'tgaj cadxin reeman ruyu guin cayŭ reeman diidx. Abi' chi guyu reeman, baguiaa Bēd zien da't ree bejn riga' ni. ²⁸ Dxel rēb Bēd loj reeman:

—Ma qui ragbeedi xhienaag nāj xley ree bēn Israel, guial ad zajct go'ch reeman loj ree bēn ad najt bēn Israel o chu' reeman lidx reeman. Per ma balūū Dios naj guial achutczi rayal ganen bendxuudx, bēn nabixhladx. ²⁹ Zeel chi bidca' reeman naj, laa bial gajcan achet guijc badxiban. Yan rēnan gagbeen, ŷchexquiza zeel gurejdxidi naj?

³⁰ Badxi' Cornelan rēbaman:

—Ma gojc tajp dxej cost hor guie gajc, chi zoob lidxan, raca choon wadxē, cabedx canaaban Dios, loj hor

zii balüüloj tijb bejn lon najcwaman lajd nayni. ³¹ Abi' naman lon: "Cornel, ma biguiejn Dios xtiidxil, yu'guijc tēēman xhienaag rüjn yudar bēnprob ree. ³² Zeel guxhaal ree xin che luguiedx la Jope din chica' reex Simón, bēn la gajc Bēd. Zojbaman lidx tijb bēn la gajc Simón, bēn rüjnchaaw guid, bēn zojb gajxh ro'nijsdoo. Bēd guin na ni rayal güünl." ³³ Zianan zeel laa guxhal gajcan xin bidgadiil ree lüj. Zagdxe beenl bi'til. Abi' yan dugraczan nadxu' delant loj Dios yu' xanyabaa, din ya-caagdiajgan gra ni gunabee Dios lüj nal du lojn.

Ni gunee Bēd lidx Cornel

³⁴ Dxel guzuloj canee Bēd, rēbaman:

—Ma ragbeen yan guial tiblojzi ruguiaa Dios bejn.

³⁵ Din Dios, chutēēz bēnguidxliuj ridxga' laaman rüjn tēēman zi'c rayal, nēgajc Dios ridxga' laaman. ³⁶ Dios ma gunee bēn Israel ree, ma bagojnman guial por Jesucrist rabadxe luxdoo bejn, bēn naj Dad par gra ree bēnguidxliuj. ³⁷ Lējt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnis. ³⁸ Ragbee tēēdi guial ma badēē Dios xSprijtaman con xguialrniabeeman loj Jesús bēn Nazaret, abi' bizaman biguieenman ni zagdxe, bayünman gra ree bēn cazagdiaj por xindxab. Gojc beenman zian guial za'nē Dios laaman. ³⁹ Abi' dunujn baguiaa gra ni been Jesús guidib niz Judea, nē niz Jerusalén. Dxelri bagüjt reeman laaman, bacaa reeman laaman loj crüz. ⁴⁰ Per Dios basban laaman ni bayon dxej, abi' cwējb Dios bidgalüülojman du lojn. ⁴¹ Ad balüülojman loj gra ree bejn, tijbzi du lojn nayajcan bēn gule Dios diizd yaloj din yaguaan graczi ni beenman. Abi' dunujn badaawnē' laaman badü'nē' tēēn laaman chi babanman stijb. ⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadēēd gra ree bejn cwent loj Dios, zi'c ree bēn naban zi'c ree bēn ma güjt. ⁴³ Nētēē diizd gocli graczi ree bēn badēēd xtiidx Dios loj ree bejn, gunee reeman xcwent Jesús, rēb reeman guial graczi ree bēn chililadx laaman, gac xtol reeman perdon.

Guyu xSprijt Dios luxdoo ree bēn ad najt bēn Israel

⁴⁴ Sta canee Bēd, chi guyu xSprijt Dios luxdoo gra ree bēn cucaagdiajg ni cayēbaman. ⁴⁵ Dxel bēn Israel rililadx ree Jesucrist, bēn binē ree Bēd, dād badxa loj reeman guial nē ree bēn ad najt ree bēn Israel guyu xSprijt Dios luxdoo, ⁴⁶ guial rigujen reeman ma rniee ree bēn guin graloj ree diidx, abi' ruza't reeman Dios zagdxe. ⁴⁷ Dxel rēb Bēd loj reeman:

—¿Chu zajc gudxoon tiobnijs ree bēn guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Bēd din sunēman laa reeman za tio'p choon dxej mazri.

Guyu xSprijt Dios luxdoo ree bēn ad najt bēn Israel

11 Bēn naj ree xi apóstoles Jesús con ree bēn Judea, bēn rililadx ree laaman, gogbee reeman guial nē ree bēn ad najt bēn Israel bililadx xtiidx Dios.

² Abi' chi badxin Bēd Jerusalén, bēn Israel ma rililadx ree Jesucrist, bēn sta zinal ree ley, gudilē reeman Bēd.

³ Rēb reeman lojman:

—¿Chexc zeel bichu'l lidx ree bēn ad najt bēn Israel abi' gudawnēl laa reeman?

⁴ Dxel guzuloj cayü Bēd diidx diizd guia'xchej xhien-aag gojc zeel wejman lidx ree bēn guin abi' rēbaman loj reeman:

⁵ —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguiajtan diizd xanyabaa xt lod za'n. ⁶ Chi baguian zagdxe xhie yu' loj lajd guin, baguian bedoxh ree nē ree be yu' tajp guia' nē ree bēēl con ree be rzuj. ⁷ Dxel biguiejnan cha' bejn, naman: "Bēd, guzuli, bagüjt be gawil." ⁸ Per badxi'nān rēn: "Yajqui, Dad, din ad goctczi wayawan nidxuudx, ni ad rayalt gaw bejn." ⁹ Abi' guneeaman diizd xanyabaa stijb, naman: "Ni ma basia Dios, ad rnieelan nidxuudx."

¹⁰ Choon volt gojc zian, dxel bayē'p gra ni guin xanyabaa. ¹¹ Loj hor zii gajc bi't choon ree xinguiiaaw lod guren, zēēd reex diizd Cesarea, cayguil reex naj.

¹² Abi' na xSprijt Dios lon guial chinē'n laa reex, ad chu' luxdon tio'p. Nē guixo'p ree bēn guie bēn naj dux compniar ree binē'n. Abi' dugraczan badxu' lidx bēn guin. ¹³ Dxel beman diidx du lojn xhienaag balüüloj tijb xi anjl Dios lojman lidxaman, rēb anjl guin lojman:

"Guxhaal ree bēn che luguiedx Jope din chica' reeman Simón, bēn la gajc Bēd, ¹⁴ laaman na xhienaag gac ree xtolil perdon, con gra ree bēn zojb lidxil." ¹⁵ Chi guzuloj canenē'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. ¹⁶ Dxel basaal-adxan xtiidx Dad Jesucrist chi naman: "Walican ba-roobnijs Waj con nijs, per lējt chu' xSprijt Dios luxdoo-di." ¹⁷ Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

¹⁸ Chi biguiejn ree bēn guin ni rēb Bēd, dxel achetri rēb reeman lojman abi' baza't reeman Dios zagdxe, rēb reeman:

—¿Ma rayagbee ree yan guial nē ree bēn ad najt bēn Israel ma balüü Dios guial rayal yayün xgab por xtol reeman yadxi' tēē loj reeman lojman din gap reeman guialnaban tiblayaa delant lojman!

Bililadx ree bēn Antioquía Jesucrist

¹⁹ Chi mal bagüjt ree bejn Esteban, dxel guzuloj rzu-nal reeman bēn rililadx ree Jesucrist persi bire'ch gra ree bēn rililadx guin niz Fenicia, niz Chipre nē Antioquía. Abi' gutie'ch reeman xtiidxza'c Jesucrist, per ganaxzi loj ree bēn Israel. ²⁰ Per loj reeman no'ch bēlzi ree bēn Chipre nē ree bēn Cirene. Laa reeman we

luguiedx Antioquía abi' gutie'ch reeman xtiidx Dad Jesucrist loj ree bén ad najt bén Israel. ²¹ Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

²² Chi gogbee ree bén Jerusalén rliladx Jesucrist ni goc, guxhaal reeman Bernabé xt guiedx Antioquía. ²³ Chi bidxinman ni, dád babaaman chi baguiaaman xhienaag cayagnë Dios bén guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. ²⁴ Benza'c gojc Bernabé, dád gognë xSprijt Dios laaman abi' bililadxman Jesucrist con guidib luxdooman. Zeel dád zien ree bejn bililadx Jesucrist.

²⁵ Dxelri wej Bernabé guiedx Tarso bigdiilaman Saulo. ²⁶ Chi badxejlaman laaman, dxel binëman laaman xt Antioquía. Ni guzunë reeman bén rliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëëljaj reeman bén rliladx ree Jesucrist, cristian.

²⁷ Lën ree dxej zii bëlzi ree bén badëë xtiidx Dios loj ree bejn, guza Jerusalén wej reeman Antioquía. ²⁸ Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. ²⁹ Abi' ree bén rliladx Jesucrist luguiedx Antioquía, baya'n reeman diidx din guido'p reeman zi'tctzi ni galguzuj gudëëd tijb gaj reeman, din gagnë lasa' reeman, bén rliladx ree Jesucrist, bén zobj ree niz Judea. ³⁰ Abi' zian been reeman. Dxel guxhaalnë reeman laan Saulo con Bernabé din gudëëd reeman laan loj ree bén rniabee ree bén rliladx Jesucrist niz Judea.

Guyu Bëd ladxguib

12 Lën ree dxej zii guzuloj rey Herodes cusagziman bëlzi ree bén rliladx Jesucrist. ² Abi' gunabeeman bagüjt reeman Jacob bijch Waj, con espad. ³ Chi baguiaaman bayuladx ree bén Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't levadur. ⁴ Chi gunaaz reeman Bëd, badxe' reeman laaman ladxguib abi' gunabee rey Herodes tajp cwaa ree suldad din guinia reeman ro' ladxguib guin, tib cwaa gaj reeman naj tajp suldad. Din beenman xgab nuzujman Bëd loj ree bén guiedx guin chi nidëd pascw. ⁵ Zian guyu Bëd ladxguib, gojp da't reeman laaman. Per gra ree bén rliladx Jesucrist ad rucwëëzt rbejdx rniab reeman Dios por laaman.

Babëë Dios Bëd ladxguib

⁶ Guxhin zii gajc chi yareguiaal cwëë Herodes Bëd loj ree bén guiedx guin, naga'yëjs Bëd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguib guin. ⁷ Dxejcz bidxin tijb xi anjl Dios abi' basni tijb guij lën ladxguib guin, dxel baqui' anjl guin cwë'lën Bëd persi bacwëëman laaman, rëbaman lojman:

—iCari bixche!

Loj hor zii gajc biajb ree caden naxii yaa Bëd, ⁸ abi' rëb anjl guin lojman:

—Guxhiidxi'ch lën balëë tëë xgurëchil.

Chi ma been Bëd zian dxel rëb anjl guin:

—iGojt xcajpil, tanal naj!

⁹ Laa barii gajc Bëd nalaman anjl guin, per ad ragbeetaman bal diidxli naj ni cayün anjl guin, gunal- adxaman cane'xhchaalzaman. ¹⁰ Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguiib ni rarii runejz guin, dxel xtijbzan bixal abi' barii reeman. Abi' chi bidxin reeman tijb xquin, yagaj basa'n anjl guin Bëd. ¹¹ Dxel gogbee Bëd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nünne ree bén Israel naj.

¹² Chi bayagbee Bëd ni guzacaman, dxel baguijman lidx Li, xniaa Waj, bén la gajc Marcw, lod riga' zien ree bejn cabejdx canab reeman Dios. ¹³ Chi gulajw Bëd ro' port, dxel bii tijb biin la Rode ziquiaam chunin. ¹⁴ Per chi bayünbeem cha' Bëd, dád babaam, dxel luar nixhialim ro' port guin, baxüünm bicojnm guial za' Bëd ro' port guin. ¹⁵ Abi' rëb reeman lojman:

—iRajc guijquil!

Per za'dxi'chczim guial waliqui ni rëbim. Dxel rëb reeman lojman:

—Ad laataman, wed xi anjlaman.

¹⁶ Per Bëd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. ¹⁷ Abi' been Bëd sen loj reeman din yacwëëz ro' reeman, dxel beman diidx xhienaag babëë Dios laaman ladxguib. Abi' rëbaman loj reeman:

—Gol be ni guie loj Jacob në loj gra ree bén rliladx Jesucrist.

Dxelri briiman yagaj zëman lood ren.

¹⁸ Chi bareguiaal, ad radxejlt xhie güün ree suldad guin guial ad ragbeet reeman xhienaag barii Bëd ladxguib guin. ¹⁹ Dxel gunabee Herodes chigdiil reeman Bëd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel bii Herodes Judea abi' bisobaman luguiedx Cesarea.

Güjt rey Herodes

²⁰ Balen Herodes bén Tiro në ree bén Sidón, per baya'n ree bén guin diidx din chigneenë reeman laaman. Chi been reeman gan guneenë reeman bén bii laj Blasto zagdx, tijb Bén naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëëd ni raw reeman. ²¹ Bazuj Herodes xhie dxej guinieenëman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guneenëman laa reeman. ²² Dxel guzuloj gurixdiaj ree Bén guin, rëb reeman:

—iAd bejntan canee, tijb diosan!

²³ Loj hor zii gajc badëe tijb xi anjl Dios tijb guialguijdx loj Herodes. Gudaw bizog laaman abi' gũjtaman guial bayuladxaman baza't ree bejn laaman zagdx lu-ar nuza't reeman Dios zagdx.

²⁴ Per xtiidx Dios care'chzi care'chan gra ladczi abi' gra ladczi cayajcxhiey ree bën rliladx laaman.

²⁵ Chi ma badëed ree Bernabé con Saulo ni guxhaal ree bën Antioquía, dxel baza reeman Jerusalén, binë reeman Waj, bën la gajc Marcw.

Guzuloj Bernabé con Saulo bigtie'ch reeman xtiidx Dios

13 Loj ree bën rliladx Jesucrist, bën zojb ree Antioquía, no'ch ree bën rudëed xtiidx Dios loj ree bejn nē ree bën rulüü xtiidxaman. La reeman Bernabé, Simón bën rníee reeman Benya's, Lucio bën Cirene, Saulo con Manaén bën guni'snē Herodes tijbzi, bën gunabee Galilea. ² Tijb dxej chi naba'n reeman, la'tgaj cabejdx canab reeman cuza't tēē reeman Dios zagdx, rēb xSprijt Dios loj reeman:

—Gol bacaabee Bernabé nē Saulo din güün reeman dxiin rēnan güün reeman.

³ Chi gulox guba'n reeman gurejdx tēē reeman Dios, dxel guxhoob yaa reeman guiyc Bernabé con Saulo din gagnē Dios laa reeman abi' bazaadiidxnē reeman laa reeman.

Bernabé con Saulo wej reeman Chipre

⁴ XSprijt Dios nāj bën guxhaal Bernabé con Saulo, zē reeman Seleucia, ni guyu reeman loj barcw, zē reeman yuj la Chipre, ni riga' loj nijsdoo. ⁵ Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lēn ree xyadoo ree bën Israel. Nē Waj binē reeman din güünman laa reeman yudar. ⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bën Israel laman Barjesús, rajcaman guialbidxaa, rusquieeman bejn ree, rēbaman guial laaman nāj bën rudëed xtiidx Dios loj ree bejn. ⁷ Barjesús guin rníeenēman Sergio Paulo zagdx, bën nāj gobernador Chipre, rignia' da'taman. Gurejdx gobernador guin Bernabé con Saulo guial rēnman gucaagdiajgaman xtiidx Dios. ⁸ Per bēnbidxaa guin (con diidx grieg laman Elimas) guyēnman nudxonman guial nililadx Sergio Paulo xtiidx Dios. ⁹ Abi' Saulo, bën la gajc Pab, rniabee xSprijt Dios luxdooman guidiblagaa, baguiaadxiichaman loj bēnbidxaa guin, ¹⁰ rēbaman:

—¡Xi'n xindxab lūj, ganax rusquieel, ganax niguijdx rūjnl, ad rēntczil ni zagdx! ¿Xt goc gudëel mod chinal ree bejn xnejz nali Dios? ¹¹ Yan gudëed Dios lūj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaman, dxel raguillaman chu guiniaaz yaaman guial ad rajctri ruguaaman. ¹² Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

Bidxin Pab con Bernabé niz Pisidia

¹³ Chi ma gudëd gojc zian, guyu Pab con ree xcompniaraman loj barcw luguiedx Pafos abi' zē reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén. ¹⁴ Dxel barii reeman guiedx Perge, zē reeman luguiedx Antioquía ni riga' niz Pisidia. Abi' dxej raziiladx ree bën Israel, guyu reeman lēn xyadoo ree bën Israel zianz gurej reeman. ¹⁵ Dxel chi gulox biil bën biil tib lajt loj libr bacaa Moisejs nē loj libr bacaa ree bën badëe xtiidx Dios loj ree bejn, gunee ree bën rniabee lēn yadoo guin, rēb reeman loj Pab con Bernabé:

—Bal xhie guiëbidi loj ree bën riga' guie din gudëedi consejw loj reeman, zajc guiëbidan yan.

¹⁶ Dxel guzuli Pab, beenman sen loj reeman din yacwëez ro' reeman, dxel rēbaman:

—Bën Israel, nē gra ree bën rdxeb Dios, gol bacaagdiajg: ¹⁷ Dux Dios ree, nayajc ree bën Israel, gulejman dux bēngulal ree abi' laaman been persi gojcxhiey reeman, chi sta zojb reeman zi'c benzit niz Egipto. Dxel con xguialrniabeeman babëeman laa reeman Egipto. ¹⁸ Abi' baslejnguicaman laa reeman loj tiuu ijz ni guzu reeman niz lod nāj ganax yujbidx, ¹⁹ baniyt tēēman gajdx ree nacion ni gure Canaán persi badëeman guidxliuj guin ree loj dux bēngulal ree. ²⁰ Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bën badëed xtiidx Dios loj ree bejn gojc xjuejs bigra reeman. ²¹ Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bën zēed loj xdiaa Benjamín persi gunabeeman laa reeman tiuu ijz. ²² Chi bisüd Dios rey Saúl, dxel bazujman rey Davi. Abi' rēbaman: “Ma baguian guial Davi xi'n Isaí, nabanx zi'c rēnan, güün tēēx cumplid da diidxan guial güünx gra zi'c rēnan.” ²³ Abi' yan zi'c gajczi rēb Dios, loj gajc xdiaa rey Davi, bñi Jesús bën guxhaalaman din yabëeman bën Israel ree loj dol. ²⁴ Chi gad Jesús gui't, Waj bën baroobnijs bejn ree, bagojnman gra ree bën Israel guial rayal yayüjn reeman xgab por xtol reeman tiobnijs tēē reeman. ²⁵ Chi ma zidyob yadiblagaa xguialnaban Waj, dxel rēbaman: “Ad najtan bën naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

²⁶ Yan, dugra ree nayajc ree xdiaa Abraham nē gra los demazri ree bën rdxeb Dios, par dunuj ree nāj xtiidxaman ni rugojn reeman dunuj ree, xhienaag rabëe Jesucrist dunuj ree loj dol. ²⁷ Per ree bën Jerusalén con ree gxuxtis reeman ad bayagbeet reeman Jesús. Ad gogbee tēēt reeman xhie rēn guiëb xtiidx Dios ni bacaa ree bën badëed ree xtiidxaman loj ree bejn, ni rool reeman lēn yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. ²⁸ Abi' majsi achetctzi xtol Jesús guyu, per ni'czi zian rēb gajc reeman loj Pilato guial nabeeman guiëtan. ²⁹ Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman. ³⁰ Per Dios basban laaman,

³¹ dxei loj zien dxei balüülojman loj ree bën binë laaman chi briiman niz Galilea zëman Jerusalén, abi' yan laa reeman naj bën rniee por laaman loj ree bejn.

³² Zeel caygojnan lëjt diidxa'c guin ree, guial promise been Dios loj ree dux bëngulal ree, ³³ ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: "Lüj naj da xi'nan abi' diidz yan ma rajpil guialrniabee zi'cgajc naj."

³⁴ Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: "Naj günle' lëjt zi'c benan promise loj Davi." ³⁵ Abi' rëb tõe stib lajt loj xtiidxaman: "Ad zatiëjbtill xhin xcuerp xi'nl, bën naya nali." ³⁶ Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxei güjtaman, biguie'chaman abi' guxin xcuerpaman. ³⁷ Per xcuerp Jesús bën basban Dios, ad guxintan. ³⁸ Zeel caygojnan lëjt compniar din gagbeedi guial por laaman ma yu' perdon par dux tol ree. ³⁹ Graczi bën rililadx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs. ⁴⁰ Zeel gol gojp cudad chitëë saquidi zi'c bacaa ree bën badëë xtiidx Dios loj ree bejn, lod rëb:

⁴¹ Gol bacaagdiajg, lëjt bën ruze' ree da diidxan, gol badxalojdi gol gunidloj tõe.

Din loj ree dxei nabandi gün reen ni xt ni'quid zaliladxtidi, majs chu na laa reen lojdi.

⁴² Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxei raziiladx ree bejn chiguieman mazri diidx loj reeman xcwent ni beman dxei zii. ⁴³ Chi barii ree bën guin lën yado guin, zien da't reeman binal Pab con Bernabé, zi'c ree bën Israel zi'c ree bën ad najt bën Israel, bën rën ree Dios zi'cgajc ree bën Israel. Abi' rëb Pab con Bernabé loj reeman din sudxi'ch reeman loj nejz zagdex guredx Dios laa reeman guial rënman laa reeman.

⁴⁴ Chi biddxin dxei ni raziiladx ree bejn, gra bën luguiedx guin bado'p din gucaagdiajg reeman xtiidx Dios. ⁴⁵ Per chi baguiaa ree bën Israel zien da't ree bejn riga' yagaj, dxei guyu guialnadëdloj luxdoo reeman abi' guzulox caneeguidx reeman canee tõe reeman diidxguidx loj Pab. ⁴⁶ Dxei sin guialrdxeb badxi' Paban con Bernabé loj reeman, rëb reeman:

—Yaloj lëjt rayal yagojnan xtiidxa'c Dios, lëjt najdi bën Israel, per yan ad rëntidi gucaagdiajguidi laan, dxei lëjt gajc culüü guial ad zajct yayalidi guialnaban tiblaxaa con Dios. Yan ma yugtie'chan diidxa'c guin ree loj ree bën ad najt bën Israel. ⁴⁷ Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion, din chel guidibchicniaa loj guidxliuj chicojnl xhienaag gac ree bejn perdon.

⁴⁸ Chi biguiejn ree bën ad najt bën Israel zian, dxei babaa reeman, guzulox rëb reeman guial zagdex naj

xtiidx Dios, abi' graczi bën ma naj yayal guialnaban tiblaxaa con Dios, bililadx reeman xtiidxaman.

⁴⁹ Zianan zeel bire'ch xtiidxa'c Dios guidib niz ni. ⁵⁰ Per ree bën Israel batiaalguiiw reeman bëngunaa rej ree laydoo zianczi naj tõe reeman bën zobjloj luguiedx zii, në ree xinguiaw naj gajc xin zobjloj, din sunal reeman Pab con Bernabé xt yabëë reeman laa reeman ni.

⁵¹ Dxei Pab con Bernabé gudxiip guxyuj guia' reeman zi'c tijb sen guial ad bazooft ree bën guin diidx, dxei zë reeman Iconio. ⁵² Per ree bën bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

Biddxin Pab con Bernabé Iconio

14 Luguiedx Iconio, Pab con Bernabé guyu reeman lën xyadoo ree bën Israel. Abi' zi'c balüü reeman xtiidxa'c Jesucrist, zien da't reeman bililadx, zi'c ree bën Israel zi'c ree bën ad najt bën Israel. ² Per ree bën Israel ad bililadxt batiaalguiiw reeman bën ad najt ree bën Israel persi guzulox been reeman xgab mal por ree bën rililadx Jesucrist. ³ Per ni'czi zian, xchej da't guzulox ree apóstoles guin ni, abi' sin guialrdxeb gunee reeman xtiidx Dios guial rililadx reeman Jesucrist, laaman badëëd guialrniabee loj reeman persi been reeman zien da't ree milagr në mazri ree ni ren, persi balüü Jesucrist guial diidxli naj ni rëb reeman xcwent Dios. ⁴ Per ree bën luguiedx zii gojc reeman tio'p lala', garol reeman guzunë ree bën Israel zagarol reeman guzunë apóstoles guin ree. ⁵ Dxei zi'c ree bën Israel zi'c ree bën ad najt bën Israel, baya'n reeman diidx con ree guxtis din tilë reeman Pab con Bernabé gucaaguij tõe reeman laa reeman. ⁶ Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, në gra ree guiedx riga' niz ni, ⁷ gunee reeman xtiidxa'c Jesucrist.

Bacaaguij reeman Pab Listra

⁸ Luguiedx Listra guyu tijb xinguiaw ad rajct rza, ad guzatciz guial naxin guia'x diidz chi golix abi' zobjix ⁹ cucaagdiajguix ni rëb Pab. Chi baguiaa Pab laax, gogbeeman guial rililadxix par yayajquix. ¹⁰ Abi' gunee reeman rejs, rëbaman:

—jBisu, guzuli zagdex!

Loj hor zii gajc gutiajs xin guin, guzulix abi' guzulox cazax. ¹¹ Chi baguiaa ree bejn ni been Pab, guzulox canee reeman rejs diidx Licaonia, rëb reeman:

—Dios naj ree zi'c bejn ma biguijlt lod nadxu' ree.

¹² Abi' rëb reeman guial Bernabé naj dios Júpiter, guiad Pab naj dios Mercurio guial laaman naj bën rniee loj reeman. ¹³ Abi' ro' guiedx guin niz lod ru bejn naj xyadoo Júpiter, dxei bixhioz yu' lën yadoo guin binëman go'n ree con ree guiaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman. ¹⁴ Per chi gogbee Pab con Bernabé zian, gudixya' xab reeman, guzëëb reeman lad ree bën guin, rbixdiaj reeman rëb reeman:

¹⁵ —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetctzi lasajc reen. Mejorli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen. ¹⁶ Tiamp gulal Dios baslaa been ree bejn ni guyëntzi reeman. ¹⁷ Per ni'czi zian, zianczi balüüman chu najman por ree ni zagdxë ni rüjnman. Din laaman naj bën razaladx guial con guialnaza'c abi' razaladxman ni radaaw ree din chu' du luxdoo ree zagdxë. ¹⁸ Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

¹⁹ Per bëlzi ree bën Israel zojb Antioquía në Iconio, chi bidxin reeman luguiedx Litra been reeman gan batiaalguiiw reeman bën luguiedx guin ree. Dxel bacaaguiaw reeman Pab abi' gunaladx reeman ma güjta-man abi' guxoobyuj reeman laaman, babëë reeman laaman luguiedx guin. ²⁰ Per chi bido'p ree bën rliladx Jesucrist gadëd lod naga'man, dxel bixcheman, bayu-man luguiedx guin stijb. Chi bareguiaa briinëman Bernabé zë reeman luguiedx Derbe.

²¹ Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Litra në Iconio nëtëë Antioquía. ²² Luguiedx zii ree badxe' reeman luxdoo ree bën rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. ²³ Abi' tëë loj tijb gaj ree guiedx guin bacaabee reeman bengol nabee ree loj ree bën rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴ Chi baza ree Pab con Bernabé niz Pisidia, bidxin reeman niz Panfilia. ²⁵ Abi' gunee reeman xtiidx Dios luguiedx Perge, dxel zë reeman guiedx Atalia. ²⁶ Ni guyu reeman loj barcw zë reeman Antioquía, luguiedx lod basa'n ree los demazri ree bën rliladx Jesucrist laa reeman con Dios din gagnëman Pab con Bernabé din gutie'ch reeman xtiidxaman. Abi' dxiin guin naj ni ma baloox reeman. ²⁷ Dxel chi bidxin reeman Antioquía, bato'p reeman bën rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bën ad najt bën Israel Jesucrist. ²⁸ Ni guzu Pab con Bernabé xchej, guzunë reeman bën Antioquía rliladx ree Jesucrist.

Guyu gabilt Jerusalén

15 Lën ree dxej zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman per-

don. ² Dxel Pab con Bernabé dád zro' gudijldiidx reeman con ree bën guin. Dxel bacaabee ree bën rliladx Jesús Pab në Bernabé, në ree ben ren din che reeman Jerusalén chigdeenë reeman apóstoles guin ree, con ree bengol rniabee loj ree bën rliladx Jesucrist din guguaa reeman xhienaag güün reeman xcwent sen guin.

³ Abi' badxe'nejz ree bën Antioquía rliladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bën rliladx ree Jesucrist, bën zojb ree niz ni guial ma rliladx ree bën ad najt ree bën Israel xtiidx Dios. Abi' graczi bën ma rliladx Jesucrist niz ni, dád babaa reeman chi bigueijn reeman zian.

⁴ Chi bidxin Pab con Bernabé Jerusalén, dxel baca' ree bën rliladx Jesucrist laa reeman, con ree apóstoles, con ree bengol rniabee loj ree bën rliladx Jesucrist. Abi' be ree Pab diidx con Bernabé gra ni been Dios con laa reeman. ⁵ Per yu' ree bënfarisew ma rliladx Jesucrist, guzuli reeman abi' rëb reeman:

—Bën ad najt ree bën Israel abi' ma rliladx reeman Jesucrist, rüjn naguieijn chu' reeman sen ru ree bën Israel, gagbee tëë reeman guial ryal chinal reeman xley Moisejs.

⁶ Dxel bado'p ree xi apóstoles Jesús con ree bengol rniabee loj ree bën rliladx Jesucrist din guidoon xhien-aag güün reeman. ⁷ Guial tant canee reeman por zian, dxel guzuli Bëd, rëbaman loj reeman:

—Gradi compniar raliduladx ree Jesucrist, lëjt ragbee guial diizd gocli gulej Dios naj lojdi din chignen xtiidxza'c Jesucrist loj ree bën ad najt bën Israel din chililadx reeman laaman. ⁸ Abi' Dios bën nünbee luxdoo graczi ree bejn, balüüman guial naj reeman xbejnman guial ma badëëd xSprijtaman loj reeman zi'cgajc baneeman du loj ree. ⁹ Zi'c ruguaa Dios dunuj ree ziangajc ruguaaman laa reeman, din zi'c basiaman du luxdoo ree ziangajc basiaman luxdoo reeman guial ma rliladx reeman Jesucrist. ¹⁰ Yan, ¿chexc zeel ad ridxga'tidi ni ma been Dios abi'za rniabeedi chinal ree bën rliladx Jesucrist ley ni ni'qui dunuj ree ni'qui dux bëngulal ree ad gojct naguieen ree zi'c rniabee ley guin?

¹¹ Dunuj ree rayagbee guial por ni zagdxë ni been Dad Jesucrist, been Dios dux tol ree pardon zi'cgajc laa reeman.

¹² Dxel bacwëëz ro' gra reeman abi' bacaagdiajg reeman ni cayü ree Bernabé con Pab, xcwent gra ree xmi-lagr Dios ni been reeman loj ree bën ad najt bën Israel. ¹³ Chi gulox gunee reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg: ¹⁴ Simón Bëd be diidx duloj ree xhienaag guzuloj gulej Dios bën ad najt ree bën Israel din gac reeman xbejnman. ¹⁵ Gra ni ma gojc naj zi'c ni bacaa ree bën badëë xtiidx Dios loj ree bejn loj xtiidxaman lod rëb:

¹⁶ Chi ma gojc zian, yayünxhiey ree da bejnan mazri zi'c goc chi naban Davi, gacxhiey reeman por ree bën sta naban,

zi'c guban ree bejn xtiamp Davi
 abi' por laa reeman yayajcxhiey ree da bejnan.
¹⁷ Din yaguil ree los demazri ree bejn guial guiën ree-
 man naj,
 gra ree bén nacion ren, yaguil guial guiën reeman
 naj,
 bén ma gule reen din gac reeman da bejnan,
 bén guiguiejn ree guza't ree bejn naj.
¹⁸ Zian na Dios, bén cugojn bejn ree gra ree nine diizd
 tiamp gulal.
¹⁹ Zeel naladxan ad rayalt chu güün naguiejn bén ad
 najt ree bén Israel par chinal reeman ley, laa reeman
 guial ma basa'n xcostumbr reeman par chinal reeman
 xnejz Dios. ²⁰ Yan con yaxhaal ree tijb gui'ch loj reeman
 guial ad rayalt gaw reeman ni ragle' loj ni naj xdios
 reeman, ad rayal tëët sunë reeman ben ren bén ad na-
 jt lacheel reeman, ad rayalt gaw reeman bëel rberejn
 ni'qui rejn. ²¹ Zian yaguie'ch ree loj reeman, din diizd
 tiamp gulal tijb gaj guiedx yu' bén rulüü laa reeman
 xhie rën guiëb xley Moisejs ni rool reeman lën ree
 yadoo dxej raziiladx ree bejn.
²² Dxel apóstoles guin ree con ree bengol rniabee loj
 ree bén riladx Jesucrist, con los demazri ree bén
 riladx Jesucrist, rëb reeman gucaabee reeman bén
 guixhiaalnë reeman Pab con Bernabé din che reeman
 Antioquía. Abi' bacaabee reeman Judas, bén la gajc
 Barsabás, në Silas, laa reeman rajp guialrniabee loj ree
 bén riladx Jesucrist. ²³ Abi' guxhaalnë reeman laa ree-
 man tijb gui'ch ni rëb:
 "Dunujn nayajcan xi apóstoles Jesús, con ree bengol
 rniabee loj ree bén riladx laaman, në los demazri ree
 bén riladx laaman. Ragajpdiozan lëjt bén ad najt ree
 bén Israel, per nayajc ree compniar raliduladx ree Je-
 sucrist, lëjt zojbidi Antioquía, në los demazri ree bén
 zojb ree niz Siria nëtëë niz Cilicia. ²⁴ Ma bayagbeen
 guial yu' ree bén duladxan brii sin dux tiidxbeen, abi'
 cagu'nawëëg reeman lëjt con xtiidx reeman persi ad
 radxejlt xhie güündi guial na reeman lojdi rayal chu'di
 sen ni ru ree bén Israel güün tëëdi zi'c rniabee xley
 Moisejs, per ad dunujtan baxhaal laa reeman. ²⁵ Zeel
 bado'pan abi' raguie'chan guial zagdxë naj yacaabee
 bëlzi dux compniaran din guidganaj reeman lëjt, guid-
 në tëë reeman tio'p dux compniaran, Bernabé con
 Pab, bén rayën da'tan. ²⁶ Zien ree ni guijdx cujaagloj
 reeman guial cayüjn reeman sirv loj Dad Jesucrist.
²⁷ Dxel cayxhaalnë'n laa reeman Judas con Silas, laa
 reeman na lojdi gra con quijb xtiidx reeman. ²⁸ Abi' zi'c
 naj xgab bazaladx xSprijt Dios du lojn, dxel achetri
 naguiejn rüjn yanabeen lëjt ni güündi, ni rayalzi
 cu'guijquidi naj guial, ²⁹ ad gawidi xbëel ree be ni rbe'c
 ree bejn loj ni naj xdios reeman, ad gaw tëëdi bëel
 rberejn, ni'qui rejn, ad sunëdi ben ren bén ad najt
 lacheelidi. Bal gapidi cudad ad züjntidi gra ree nine,
 zagdxëqui güündi. Gagnë Dios lëjt."
³⁰ Zian gojcan, gui'ch guin naj ni guxhaalnë reeman
 guidap ree bén guin par luguiedx Antioquía. Ni bato'p
 reeman bén riladx ree Jesucrist abi' bayü reeman
 gui'ch guin loj reeman. ³¹ Chi biil reeman laan, dád nix

guyu luxdoo reeman por ree diidx zagdxë ni zëed lojn.
³² Abi' Judas con Silas guial nëgajc reeman rajp quiar-
 guiejn par gudëed reeman xtiidx Dios, dxel zien naj ni
 guneenë reeman bén riladx ree Jesucrist, bagu' ree-
 man luxdoo reeman con xtiidx reeman. ³³ Chi ma
 gudëd zien dxej za' ree Judas con Silas ni, bazaadi-
 idxnë ree bén riladx Jesucrist laa reeman din yaguiaj
 reeman lod za' ree bén guxhaal laa reeman, rëb ree-
 man loj reeman: "Chignë Dios lëjt zagdxë." ³⁴ Per Silas
 beenman xgab baya'nman ni mazri. ³⁵ Abi' Pab con
 Bernabé baya'n reeman Antioquía mazri, laa reeman
 con ree ben ren basnuu balüü reeman gutie'ch tëë
 reeman xtiidxza'c Jesucrist loj ree bejn ni.

Ni barojp volt brii Pab biglümüan xtiidx Dios guiedx ren ree

³⁶ Chi gudëd tio'p choon dxej, dxel rëb Pab loj Bern-
 abé:

—Yo' stijb yugnaj dux compniar ree bén riladx ree
 Jesucrist, graczi ree luguiedx lod ma bugtie'ch xtiidx
 Dios, din yuquiaa xhienaag za' reeman.

³⁷ Bernabé guyën ninë reeman Waj, bén la gajc Mar-
 cw. ³⁸ Per Pab ad cwëjbt ninë reeman laaman, din chi
 we reeman niz Panfilia guro'nladxaman laa reeman,
 ad binëtraman laa reeman. ³⁹ Abi' ni'qui tijbaman
 ni'qui zatijbaman ad baya'nt conform, zianz gula' lasa'
 reeman. Dxel binë Bernabé Marcw, guyu reeman loj
 barcw zë reeman yuj la Chipre ni riga' loj nijsdoo, ⁴⁰ dx-
 el gulej Pab Silas din chinëman laaman abi' rëb los de-
 mazri ree bén riladx Jesucrist loj reeman guial chinë
 Dios laa reeman zagdxë. ⁴¹ Zianz gudëd reeman niz
 Siria në niz Cilicia, ragu' reeman luxdoo ree bén riladx
 Jesucrist niz ni.

Bine ree Pab con Silas Timoteo

16 Chi bidxin Pab con Silas guiedx Derbe në
 guiedx Litra abi' Litra bidxaagloj reeman tijb
 bén riladx Jesucrist, laman Timoteo, xniaaman naj bén
 Israel, nëman riladx Jesucrist guiáad xdadaman naj
 bén grieg. ² Graczi ree bén riladx Jesucrist, bén zojb
 ree guiedx Litra në Iconio ruza't laaman zagdxë. ³ Dx-
 el rëb Pab chinëman Timoteo, per yaloj badxe'man
 laaman sen ni ru ree bén Israel, chitëë xhie guiëb ree
 bén Israel riga' niz ni, din gra reeman ragbee guial naj
 xDadaman bén grieg. ⁴ Graczi ree guiedx ni gudëd ree-
 man bagojn reeman bén riladx ree Jesucrist ni rayal
 güün reeman zi'c ma rëb ree apóstoles, con ree ben-
 gol rniabee loj ree bén riladx laaman Jerusalén.
⁵ Zianan zeel guzudxi'ch ree bén niz ni loj guialriladx
 reeman Jesucrist, abi' guixie guixie gojcxhiey mazri ree
 bén riladx laaman.

Balüüloj tijb bén Macedonia loj Pab

⁶ Chi ma gojc zian ad baslaat xSprijt Jesús nignee ree-
 man xtiidx Dios niz Asia. Dxel gudëdzinejz reeman niz
 Frigia në niz Galacia ⁷ abi' bidxin reeman niz Misia. Ni
 been reeman xgab niej reeman niz Bitinia, per ad

cwëjb gajct xSprijt Dios niej reeman niz ni. ⁸ Dxelri gudëdzinejz reeman niz Misia, bidxin reeman guiedx Troas. ⁹ Yagaj, guxhinzii guzajc Pab zi'c rulüü cane'x-hchaalaman. Baguiaaman tijb xinguaaw zëed niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

¹⁰ Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bën cabejdx dunujn niz ni par yatie'chan xtiidxa'c Jesucrist.

Bidxin ree Pab con Silas Filipos

¹¹ Badxu'n loj barcw luguiedx Troas abi' bio'n naliduu Samotracia. Chi bareguiaa badxinan guiedx Neápolis.

¹² Yagaj badxoon bio'n Filipos, guiedx mazri zobbloj niz Macedonia, per Rom rniabee guiedx zii, ni badxu'n bëlzi ree dxej. ¹³ Abi' tijb dxej raziiladx ree bejn, bariin luguiedx guin bio'n tijb ruguiwro', lod rayagbeen rado'p ree bën Israel par cwedx reeman Dios. Abi' badxu'n baneen xtiidxa'c Jesucrist loj ree bëgunaa bado'p yagaj. ¹⁴ Tijb ree bëgunaa guin la Lidia, najman bën Tiatura, ruto'man lajd zagdx ni culor murad. Diidxli rdxebaman Dios abi' cucaagdiajgaman. Dios guxhal xquiarguejnman din gucaagdiajgaman zagdx gra ni rëb Pab. ¹⁵ Abi' gurobnijsaman con gra xfamilaman. Dxel gunabaman favor du lojn, naman:

—Bal walidi riladxidi guial ma riladxan Jesucrist, gol baya'n lidxan.

Dxel beenman naguiejn baya'n lidxaman.

¹⁶ Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoo, abi' por xguialrniabee xindxab guin rnieeya'm guíaad ree bën guzii laam dád zro' milia rüjn reeman gan por dxiin guin. ¹⁷ Dxel bidnalim Pab con dunujn, rbidxa'm rëbim:

—Bën guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

¹⁸ Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdoo:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoo.

¹⁹ Per chi gogbee ree bën guzii laam guial ad zajctri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis. ²⁰ Chi bayü reeman laa reeman loj ree guxtis guin, rëb reeman:

—Xin Israel guie ree rbëe reex wadijl du ladx ree, ²¹ abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

²² Dxel wajs gra ree bën guin contr laa reeman, abi' gunabee ree guxtis guin gulëe xab Pab con Silas din quin reeman laa reeman con var. ²³ Chi gulox gudijn da't reeman laa reeman, dxel bilu' reeman laa reeman ladxguib abi' gunabee reeman bën rajp ro' ladxguib guin din gapdxi'chaman laa reeman. ²⁴ Chi biguiejn bën rajp ro' ladxguib guin zian, dxel bilu'man laa ree-

man xt lën cuart bigra yu' lën ladxguib guin, guxhi-iman guia' reeman loj tabl naal con caden.

²⁵ Per garol guiaal, la'tgaj cabejdx canab Pab con Silas Dios, cayool tëe reeman cant par laaman, dxel cucaagdiajg los demazri ree bën yu' ladxguib guin.

²⁶ Dxel tijbzi golp guzuloj xudoxh, niz ni niz guie rurlia xcimiant ladxguib guin. Loj hor zii gajc bixal gra ree xportan abi' baxiec ree caden naxii gra ree bën yu' lënan. ²⁷ Chi baban bën rajp ro' ladxguib guin abi' baguiaaman zøjbyal gra ree xportan, gulëe xi espadaman din nugjrt laagajcaman guial gunaladxaman gra ree bën yu' ladxguib guin ma baxüün. ²⁸ Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

²⁹ Laa gunab gajc bën guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas. ³⁰ Dxel babëeman laa reeman, gunab-diidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

³¹ Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

³² Abi' be reeman xtiidx Dios lojman con loj gra ree bën zob lidxaman. ³³ Zianz guxhin zii gajc gudiibaman lod nadxeelgujdx reeman, dxel gurobnijsaman con gra xfamilaman. ³⁴ Abi' bignëman laa reeman lidxaman, dxel badëeman ni gudaw reeman. Guíaad laaman dád nix yu' luxdoo con gra xfamilaman Guial ma riladx reeman Dios.

³⁵ Chi bareguiaa, guxhaal ree guxtis guin suldad ree persi biguiedx reeman loj bën rajp ro' ladxguib guin guial guslaaman Pab con Silas. ³⁶ Abi' rëb bën rajp ro' ladxguib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

³⁷ Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bën guiedx, ni'quid baneet reeman mod nadëëdan cwent loj reeman con badxe' reeman dunujn ladxguib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëe reeman dunujn.

³⁸ Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. ³⁹ Dxel wej reeman bignab reeman perdon loj Pab con Silas babëe tëe reeman laa reeman, rëb reeman loj reeman din yaza reeman luguiedx guin. ⁴⁰ Chi barii reeman ladxguib, wej reeman lidx Lidia. Zianz chi gulox guneenë reeman los demazri ree bën riladx ree Jesucrist din chu' luxdoo reeman sudxi'ch reeman loj ni riladx reeman, dxel baza reeman.

Bidxin ree Pab con Silas Tesalónica

17 Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bën Israel. ² Abi' zi'c

goc xcostumbr Pab, wejman lèn yadoo guin, choon dx-ej raziiladx ree bejn. Wejman bigneenëman laa ree-man xtiidx Dios. ³ Bagojnman balüü tēëman laa ree-man loj xtiidx Dios lod rēb guial naj sagdiaj Cristo, abi' chi ma güjtaman yabanman stijb. Rēbaman loj ree-man:

—Jesús ruzat gajcan lojdi, laagajcaman naj Cristo din yabēëman dunuj ree loj dol.

⁴ Yu' ree bēn Israel guin bililadx abi' bachajg reeman Pab con Silas. Nē zien ree bēn grieg rēn Dios bililadx, nētēē zien ree bēngunaa zobjloj bililadx Jesús. ⁵ Per ree bēn Israel ad bililadxt Jesucrist, gudēdloj reeman abi' bato'p reeman benmal ziza ree lunejz persi gulēē reeman wadijl luguiedx guin, abi' guyu reeman lidx Jasón, raguuil reeman Pab con Silas din cwēē reeman laa reeman guzuj reeman laa reeman loj ree bēn guiedx guin. ⁶ Per guial ad badxejlt reeman laa ree-man yagaj, dxei guxoobyuj reeman Jasón nē ree ben ren bēn riladx Jesucrist, binē reeman laa reeman loj guxtis, rbixdiaj reeman, rēb reeman:

—Tio'p ree xin cabēē wadijl guidib guidxliuj, ma bi't reex guie, ⁷ abi' lidx Jasón zobj reex. Laa reex con gra ree bēn nuchajg laa reex, ad cayūjnt reex zi'c rniabee xley rey César, din rēb reex guial yu' zatijb rey la Jesús.

⁸ Chi biguiejn ree guxtis guin zian con ree bejn, gra loj xgab been reeman. ⁹ Per Jasón con los demazri ree bēn guyu ladxguib guin gudijx reeman loj ree guxtis guin, dxei baslaa reeman laa reeman.

Bidxin Pab con Silas Berea

¹⁰ Guxhinzii gajc, guxhaal ree bēn riladx Jesucrist Pab con Silas luguiedx Berea. Chi bidxin reeman ni, wej reeman lèn xyadoo ree bēn Israel. ¹¹ Mazri benza'c naj ree bēn Israel guin guial loj ree bēn Israel zobj Tesalónica. Con gan bacaagdiajg reeman ni rēb Pab. Abi' guixie guixie rusiid reeman xtiidx Dios, din gag-bee reeman waliqui ni rēb Pab ya. ¹² Zeel dād zien ree-man bililadx Jesucrist, nētēē zien bēn grieg bililadx laa-man zi'c ree xinguaaw zi'c ree bēngunaa zobjloj niz ni. ¹³ Chi gogbee ree bēn Israel zobj Tesalónica guial catie'ch Pab xtiidx Dios luguiedx Berea, dxei wej ree-man ni bigtiaalguiiw reeman bejn ree din guidxe'ch reeman Pab. ¹⁴ Per ree bēn riladx Jesucrist ad goglaat reeman, laa guxhaal gajc reeman Pab niz ro' nijsdoo. Guíaad Silas con Timoteo baya'n reeman mazri Berea. ¹⁵ Abi' ree bēn biglu'nejz Pab, xt Atenas binē reeman laaman. Chi baza reeman ni, bignē reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶ La'tgaj cabēz Pab guidxin Silas con Timoteo luguiedx Atenas, gyunayaman guial baguíaaman zien da't ni rajp ree bejn niz ni zi'c dios. ¹⁷ Zeel wejman lèn xyadoo ree bēn Israel bigneenëman laa reeman nē los demazri ree bēn rēn Dios zi'c ree bēn Israel, guixie guixie rniēenëman chutēēz bēn rdxaglojman niz galay guiedx guin. ¹⁸ Guneenē tēëman garol ree bēn

zinal ni balüü bēn brii laj epicureo, nē za garol ree bēn estoicos. Abi' yu' reeman rēb:

—¿Xhienin rniee xin guin zeel rniee da'tix?

Yu' tēē reeman rēb:

—Rulüü xtiidx dios ren ree bēn ad naguieenbeet ree catie'chix.

Rēb reeman zian guial caneenē Pab laa reeman xti-idxa'c Jesucrist nē xcwent guial babanman stijb. ¹⁹ Dxei binē reeman Pab tijb luar la Areópago, lod rado'p reeman. Abi' gunabdiidx reeman lojman, rēb reeman:

—¿Zajc nal ya xhie ree nicüb guin zidgalüül niz guie? ²⁰ Din rül diidx du lojn ni ad rayagbeetan, zeel rayēnan yayagbeen xhie rēn guiēban.

²¹ Graczi ree bēn Atenas, con los demazri ree benzit zobj ni, zianczi za' reeman zian. Ruladx reeman tēd reeman dxei, gucaagdiajg reeman o gü reeman ni naj ree nicüb.

²² Dxei guzuli Pab galay reeman lod la Areópago, rēbaman:

—Bēn Atenas, por graczi ni ma baguian, ma gog-been guial dād zien ree xdiosidi. ²³ Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rēb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xti-idxaman naj ni zidguien lojdi.

²⁴ “Dios guin been guidxliuj con graczi ni yu' lojn, laa-man rniabee xanyabaa nē loj guidxliuj. Ad za'taman lèn yadoo ni rüjn ree bejn. ²⁵ Ad riaadx tēëtaman chu güün xhienin par laaman, din laaman naj bēn razaladx bi nabajnnē' ree, laaman razaladx guialnaban duloj ree nē ree ni rayaadx ree.

²⁶ “Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tēē cwe reeman. ²⁷ Din yaguuil reeman Dios majsí zi'c chi rgan bejn chi raguilaman xhienin, zian güün reeman din yadxejla-man. Majsí diidxliczi ad zijtt za'man par gra bejn. ²⁸ Din por Dios nabajn ree, por laaman raniib ree radxoo tēē ree, por laaman nadxu' ree loj guidxliuj. Zi'c rēb tēē ree xbénrignia'di, chi rēb reeman: “Dunuj ree nayajc xi'n Dios.” ²⁹ Zeel bal nayajc ree xi'n Dios, ad rayalt yaguieen ree xgab guial Dios najnē or, o plajt, o guiaj ya zi'c naj ni rüjn ree bejn zi'c naj xixgab reeman.

³⁰ Tiamp gulal cwējb Dios been ree bejn zi'c naladx ree-man guial achetci ragbee reeman, per yan gra ladczi canabeeman gra ree bejn din yayüjn reeman xgab por xtol reeman. ³¹ Din Dios ma gulej tijb dxei ni yadēēd ree bejn cwent lojman, dxei ni güün xguialguxtisaman. Ma gulej tēëman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

³² Chi biguiejn reeman rēb Pab guial baban Jesucrist loj ree bengüt, yu' reeman baze' laaman, yu' tēē ree-man rēb:

—¡Zatijb dxei yasnuu yacaagdiajgan ni canal!

³³ Dxei baza Pab lod za' reeman. ³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bēn zobjloj lèn Areópago laman

Dionisio, në stijb bəngunaa la Dámaris në ree ben ren.

Bidxin Pab Corinto

18 Dxel brii Pab Atenas zəman Corinto. ²Yagaj bidxaaglojman tijb bən Ponto laman Aquila, zëə-daman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bən Israel Rom. Dxel wej Pab bitixlojman laa reeman. ³Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnəman laa reeman persi been reeman dxiin guin. ⁴Abi' beegaj dxej raziiiladx ree bən Israel, rej Pab rigneeman xtiidx Dios lən xyadoo ree bən Israel, zi'c ree bən naj ree bən Israel zi'c ree bən ad najt bən Israel raguillaman mod din chililadx reeman ni rəbaman.

⁵Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeaman loj ree bejn, balüü tēəman bən Israel ree guial Jesús naj Cristo bən cabəz reeman. ⁶Per guzuloj bidxe'ch reeman Pab abi' gunee reeman diidxguijdx contr laaman. Dxel gudxiip xabaman zi'c tijb sen guial ad ruzoobt reeman diidx, abi' rəbaman loj reeman:

—Ləjt gajc rajp dol guial guizēəbidi delant loj Dios, ad najt ra'p dol. Diizd yan chiguien xtiidx Dios loj ree bən ad najt bən Israel.

⁷Dxel bariiman lən yadoo guin wejman lidx bən la Justo, rən bən zii Dios, gajxh gajc yadoo guin naj lidxaman. ⁸Abi' Crispo, tijb bən rniabee lən xyadoo ree bən Israel, bililadxaman Dad Jesucrist con gra xfamilaman. Nə zien ree bən Corinto bililadx chi bigueijn reeman xtiidx Jesucrist abi' gurobnijs reeman. ⁹Tijb guxhin balüüloj Dios loj Pab, rəbaman lojman:

—Ad rdxebil, basnuu gunee da diidxan, ad gucwēəzil, ¹⁰naj za'nə' lüj, achutczzi zajc güün lüj xhienin, din luguiedx guie zien da't bejn naj par naj.

¹¹Zianan zeel baya'n Pab Corinto tibijz garol, balüüman bən guin ree xtiidx Dios.

¹²Per chi goc Galión gobernador Acaya, bən Israel ree bachajg lasa' reeman persi gunaaz reeman Pab binə reeman laaman loj gobernador guin, ¹³rəb reeman loj gobernador guin:

—Xin guie ziza cayüjnx gan bejn ree guial guiən reeman Dios zi'c tijb mod ni ad najt loj ley.

¹⁴Ma niniee Pab, chi gunee Galión rəbaman loj ree bən Israel guin:

—Bal niajcan tijb falt o tijb guialquia narooob beenman zeel zidnədi laaman, züncwentan ləjt. ¹⁵Per najn por ree diidx nə por laj ree bejn nētēə por xleydi, zeel ləjt gajc gol gunaj xhienaag güündi, ad rəntan gūnan guialguxtis xcwent ree ni guin.

¹⁶Abi' laa babēə gajcaman laa reeman roylay guin.

¹⁷Dxel yagaj gajc gunaaz gra reeman Sóstenes, bən rniabee lən xyadoo ree bən Israel abi' gudijn reeman laaman, per ni'quid beencwentt gobernador guin laa reeman.

Badxin Pab Antioquía

¹⁸Zienri ree dxej baya'n Pab Corinto. Dxel bazaadiidx nəman los demazri ree bən rliladx Jesucrist, abi' bazanəman Priscila con Aquila, guyu reeman loj barcw zə reeman niz Siria. Per chi gad reeman grii Cencrea bagaj guijc Pab, por tijb promeys ni beenman. ¹⁹Chi bidxin reeman Éfeso, ni basa'n Pab Priscila con Aquila, abi' wejman lən xyadoo ree bən Israel zojb ree ni, bigneenəman bən Israel rado'p ree lən yadoo guin. ²⁰Abi' guyən reeman niaglaa Pab ni mazri, per ad cwējbtaman. ²¹Rəbaman loj reeman:

—Ma yaya'n, bal gagnə Dios naj, guidganan ləjt stijb.

Dxel guyuman loj barcw bazaman Éfeso. ²²Chi bidxinman Cesarea, dxel wejman Jerusalén bicajpdiozaman bən rliladx ree Jesucrist, dxelri zəman Antioquía.

²³Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia nə niz Frigia, ragu'man luxdoo gra ree bən rliladx Jesucrist.

Gutie'ch Apolos xtiidx Dios Éfeso

²⁴Tiamp zii bidxin tijb bən Israel luguiedx Éfeso, laman Apolos, gojlaman Alejandría. Dád radxejlaman diidx par guinieeman abi' dád rajcaman xtiidx Dios.

²⁵Basiidaman xtiidx Dios, dxel con gan balüüman bejn ree, zagdxə tēə rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. ²⁶Abi' Apolos, sin guialrdxeb guzuloj caneeman xtiidx Dios loj ree bən Israel lən xyadoo reeman, zianz chi bigueijn Priscila con Aquila ni rəbaman, dxel bignə reeman laaman lidx reeman. Ni balüü reeman laaman persi basnuu basiidaman mazri xtiidx Dios. ²⁷Chi been Apolos xgab cheman niz Acaya, gra ree bən rliladx Jesucrist bən za'nə laaman, badxe' reeman luxdooan din cheman, abi' guxhaal reeman tijb gui'ch loj ree bən rliladx Jesucrist bən zojb ree niz Acaya din yaca' reeman laaman zagdxə chi guidxinman niz ni. Chi bidxinman niz Acaya dád beenman yudar bən ma rliladx ree Jesucrist guial gognə Dios laa reeman. ²⁸Din delant loj gra ree bejn rəbaman guial ad laat zə ree bən Israel, abi' achutczzi gojc nadxi' xtiidxaman guial graczi ni rəbaman naj diidxli, balüü tēəman loj xtiidx Dios gra luar lod rəb guial Jesús naj Cristo bən guləjz reeman.

Bidxin Pab Éfeso

19 La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bəlzi ree bən rliladx Jesucrist. ²Abi' gunabdiidxaman loj reeman rəbaman:

—¿Guyu xSprijt Dios luxdoodi ya chi bililadxidi?

Badxi' reeman laan rəb reeman:

—Ni'quid wagueijntan guial yu' xSprijt Dios.

³Dxel rəb Pab loj reeman:

—¿Xhieza naag gurobnijsidi?

Badxi' reeman laan rəb reeman:

—Barobnijsan zi'c balüü Waj bejn ree.

⁴ Dxel rëb Pab loj reeman:

—Walican baroobnijs Waj bejn, bën bayüjn ree xgab por xtol reeman. Per rëbaman guial rayal chililadx reeman bën zëed xijchaman abi' laaman naj Jesús, bën naj gajc Cristo.

⁵ Chi biguiejn reeman zian, dxel gurobnijs reeman por Dad Jesús. ⁶ Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëed reeman xtiidx Dios loj ree bejn. ⁷ Loj gra reeman naj cost chiptio'p xinguaaw.

⁸ Choon bëew wej Pab lën xyadoo ree bën Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman naguiejn din güünman gan chililadx reeman xhienaag naj xguialrniabee Dios. ⁹ Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bën ma rililadx Jesucrist, binëman laa reeman lën tijb xzcuel bën la Tiranno. Ni balüüman laa reeman guixie guixie, ¹⁰ loj tio'p ijz beenman zian. Abi' graczi ree bën zojb niz Asia, zi'c ree bën Israel zi'c ree bën ad najt bën Israel, bacaagdiajg reeman xtiidx Dad Jesucrist. ¹¹ Abi' por xguialrniabee Dios been Pab milagr naroob ree, ¹² xt ree xbay Pab në ree lajd rtia lojman zi'c lantar rignë reeman loj ree bën-ragxuu, abi' rayajc reeman guialguijdx ni rajc reeman, rarii tää ree xindxab yu' luxdoo reeman.

¹³ Per guyu bëlzi ree bën Israel ziza rabëë reeman xindxab luxdoo ree bejn, abi' guyën reeman nünne reeman dxiin laj Dad Jesucrist dxel rëb reeman loj ree xindxab guin:

—iPor Jesús bën ruza't Pab, rniabeen lëjt, gol barii!

¹⁴ Zian naj ni been gajdx ree xi'ngaan tijb bën Israel la Esceva, bën goc tijb bixhioz rniabee ree bixhioz.

¹⁵ Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tää chunin naj Pab, per lëjt ni'quid nünbeetan lëjt.

¹⁶ Abi' bën yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lënu guin, ziladzi reeman nadxeel-guijdx tää reeman. ¹⁷ Graczi ree bën zojb Éfeso, zi'c ree bën Israel zi'c ree bën ad najt bën Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

¹⁸ Në zien ree bën rililadx Jesucrist bidxin abi' delant loj gra ree bejn baneero' reeman gra ni mal ma been reeman. ¹⁹ Nëtëë zien ree bën been guialbidxaa bidxinnë xlibr reeman abi' baze'c reeman laa reen delant loj gra ree bejn. Chi babëë reeman cwent plac lasajc ree libr guin dxel cost tü'pchii mil milia plajt lasajc reen. ²⁰ Abi' zian bire'ch xtiidx Jesucrist biguien tää xguialrniabeeman.

²¹ Chi ma gudëd gojc zian, been Pab xgab cheman niz Macedonia në niz Acaya xt yadxinman Jerusalén. Rëb tääman guial chi ma wejman Jerusalén dxelri che-

man në Rom. ²² Abi' guxhaalaman tio'p bën rüjn laa-man yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³ Lën ree dxej zii been ree bën Éfeso nadxeb por xtiidx Jesús. ²⁴ Din Demetrio, bën rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bën rüjn-nëman dxiin. ²⁵ Dxel bato'paman laa reeman con ree ben ren bën rüjn gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee guial loj dxiin guie raguieen ree gan milia ro'. ²⁶ Per yan lëjt ruguiaa riguijdx täädi, Pab ziza cayëbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, në guidib niz Asia. ²⁷ Dxel nadxeb yasëëb dux chiin ree, abi' ad tijbtizi dux chiin ree, në xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bën rën ree bejn guidib niz Asia në guidib loj guidxliuj.

²⁸ Chi biguiejn reeman zian, bidxe'ch reeman abi' gurixdiaj reeman rëb reeman:

—iBën zojbloj naj Diana, xdios ree bën Éfeso!

²⁹ Abi' gurixdiaj ree bën guiedx guin wajs reeman, gunaaz reeman tio'p ree bën Macedonia, Gayo në Aristarco, bën rzanë ree Pab. Dxel guxoobyuj reeman laa reeman, binë reeman laa reeman lod rajc xgabilt ree bën guiedx. ³⁰ Guyën Pab niuman yagaj din ninieenëman bejn ree, per ad cwëjbt ree xcompniaraman, bën ma rililadx ree Jesucrist. ³¹ Nëtëë loj ree guxtis Asia guin no'ch bëlzi ree xmiw Pab, laa reeman guxhaal ruson lojman guial mejorli ad chu'man ni. ³² Zianz gurixdiaj ree bën guin rëb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. ³³ Dxel galay ben zien guin babëë ree bën Israel tijb xcompniar reeman bën la Lejandr din guinieenëman bën guin ree. Dxel beenman sen loj ree bën guin din yacwëëz ro' reeman din guinieeman por ree bën Israel delant loj ree bën guiedx guin. ³⁴ Per chi gogbee reeman guial najman bën Israel, tiblazujzi gurixdiaj reeman cost tio'p hor, rëb reeman:

—iBën zojbloj naj Diana, xdios ree bën Éfeso!

³⁵ Dxel chi been squiarban luguiedx guin gan bacwëëz ro' reeman, dxel rëbaman:

—Bën Éfeso, gra bënguidxliuj ragbee guial luguiedx guie zianczi rnaij ree bejn xyadoo dios Diana abi' rën tää ree bejn dios Diana biajb xanyabaa. ³⁶ Lëjt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab. ³⁷ Din bën bidnëdi achet ni mal been reeman yadoo guin, ad wanee tää reeman diidxguijdx dux dios ree. ³⁸ Bal Demetrio con ree xcompniaraman bën rüjnnëman dxiin rajp reeman wadij con ree ben ren, laa roylay naj, laa ree guxtis yu', ni che reeman chitawquia reeman. ³⁹ Per bal xhieri mazri rëndi, chi gac xgabilt bën guiedx dxel gacan

reglad. ⁴⁰ Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniab-diidx reeman duloj ree xcwent ree ni cayajc?

⁴¹ Chi gulox rëbaman zian, dxel bare'ch reeman.

Wej Pab Macedonia në Grecia

20 Chi babedxe ree bën Éfeso, gurejdx Pab bën rliadx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. ² Bitixlojman bën rliadx ree Jesucrist guidib niz ni, dád bagu'man luxdoo reeman con xti-idxaman, dxelri bidxinman Grecia ³ lod guzuman choon bëëw. Ma niuman loj barcw din niejman Siria, chi gogbeeman guial nuyën ree bën Israel nünj reeman laaman xhienin. Dxel mejorli beenman xgab bayejcaman niz Macedonia. ⁴ Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nëtëë Gayo, bën Derbe, con Timoteo, në Tíquico con Trófimo, bën niz Asia ree. ⁵ Gra reeman guned abi' gulëjz reeman Pab con naj Lujc guiedx Troas. ⁶ Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta canenëman bejn ree, ⁸ guiáad lënü ladya lod rado'pan dád zien ree guij re'c. ⁹ Tijb xinguiag zobj ro' ventan lax Eutico. Guial xchej da't guneenë Pab laa reeman, dxel xt garej gunaaz bacaal xin guin, abi' gudidya'x di-izd yu bayon guin xt luyuj, ma güjtix chi bales reeman laax. ¹⁰ Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

¹¹ Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman.

¹² Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

Wej Pab Mileto

¹³ Dxel dunujn badxu'n loj barcw baneedan bio'n par luguiedx Asón, lod baya'n nan diidx yaca'n Pab, din beenman xgab niej guia'man ni. ¹⁴ Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. ¹⁵ Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. ¹⁶ Been Pab xgab ad zejtan Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxnë Pab bejn ree Mileto

¹⁷ Chi nadxu'n Mileto, gunabee Pab bi't ree bën rniabee loj ree bën rliadx Jesucrist, bën zobj ree Éfeso.

¹⁸ Chi bidxin reeman dxel rëbaman loj reeman:

—Diizd dxej yaloj ni bialan niz Asia xt yan, lëjt ragbee xhienaag cayünan. ¹⁹ Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudëëdan por ni rën ree bën Israel güünnë reeman naj. ²⁰ Per majsi zian ad bacwëëzt rnin lojdi ni naj ni zagdxe par lëjt, tant delant loj ree bejn në lidixidi balün lëjt. ²¹ Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tëë loj reeman loj Dios chililadx tëë reeman Dad Jesucrist. ²² Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. ²³ Tijbzi ni ragbeen naj guial guidib lod ran rugojn xSprijt Dios naj guial ladxguib në zro' da't guialzi naj ni cabëz naj. ²⁴ Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tëen mandad ni banee Dad Jesús naj guial gatiechan xtiidza'caman xhienaag rën Dios dunuj ree.

²⁵ Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatridi naj. ²⁶ Zeel ganin lojdi yan guial ad achetri dol ra'pan bal id nabandi xnejz. ²⁷ Din ma bagojnan lëjt gra xhien-aag naj xixgab Dios achetcki baquiechan. ²⁸ Yan, gol gojp lëjt gajc, gol gojp tëë ree bën rliadx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejman ma gudiixaman por xtol reeman. ²⁹ Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliadx ree Jesucrist. ³⁰ Loj gajquidi grii ree bën gulüü ganax ni rusquiee, din güün reeman gan güüncwent ree bën rliadx Jesucrist xtiidx reeman luar güüncwent reeman xtiidx Dios. ³¹ Zeel gol guzujsin, gol gojp cudad, gol basaalex, loj choon ijz ad bacwëëzt gunenë'n lëjt xt ronan banen lëjt consejw.

³² Yan, compniar raliduladx ree Jesucrist, gusa'n nan lëjt con Dios con xtiidza'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi gunee tëëman lojdi ni ma rëbaman gudëëdaman loj ree bën ma naj xbejnman. ³³ Achut xmilia achu tëët xab rzëëbladxan. ³⁴ Lëjt ragbee zagdxe guial con quijb yan benan dxiin persi gudawnë'n bën guzu ree con naj. ³⁵ Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaalex xtiidx Dad Jesús chi rëbaman: "Mazri nix yu' luxdoo bën razaladx guial loj bën rtia'."

³⁶ Chi gulox rëb Pab zian, dxel bazuxibaman gurejdx gunabaman Dios con gra reeman. ³⁷ Gra reeman biin, gudiidx reeman Pab abi' gudaw reeman laaman xid. ³⁸ Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

Wej Pab Jerusalén

21 Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nēgajcan riga' loj nijsdoo, abi' ni badxoon bio'n guiedx Pátara. ² Ni badxaa-glojn tijb barcw ni ma che niz Fenicia zianz badxu'n lojn. ³ Chi zio'n dxe dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxe badxu'n luguiedx guin. ⁴ Ni badxaa-glojn bēn rliadx ree Jesucrist abi' badxu'nēn laa reeman gajdx dxej. Bēn guin ree por xSprijt Dios rēb reeman loj Pab guial ad bal cheman Jerusalén. ⁵ Per chi baza' gajdx dxej guin, dxe badxoon luguiedx guin, dxe gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. ⁶ Dxe bazaadiidxnēn laa reeman abi' badxē'pan loj barcw guiáad laa reeman zia lidx reeman.

⁷ Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēen bugneenēn bēn zobj ree ni, bēn rliadx ree Jesucrist abi' baya'nan con laa reeman tib dxej. ⁸ Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bēn rtie'ch xtiidx Jesucrist. Felip guin naj tijb ree bēn gajdx cwabee din qui's reeman ni rayal tia' ree bēnprob abi' baya'nan lidxaman. ⁹ Yu' tajp xi'ndxa'paman biinxtijb ree abi' laa reem rudēēd xtiidx Dios loj ree bejn. ¹⁰ Ma gojc zien dxe nadxu'n lidx Felip, chi bi't tijb bēn la Agabo nēgajcaman rudēēd xtiidx Dios loj ree bejn, zēēdaman niz Judea. ¹¹ Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bēn Israel bēn naj xcinch ni guie, abi' yayü reeman laaman loj ree bēn ad najt bēn Israel.

¹² Chi baguiejnan zian, dunujn con ree bēn rliadx Jesucrist luguiedx guin baguieenan nagueijn loj Pab ad cheman Jerusalén. ¹³ Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiētan Jerusalén por Dad Jesús.

¹⁴ Chi bayagbeen guial ad zaguieentan gan yadxoonan laaman chitēē cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

¹⁵ Chi gudēd ree dxej guin dxe baguieenan purvinid bio'n Jerusalén. ¹⁶ Bunēn bēlzi ree bēn Cesarea rliadx ree Jesucrist, laa reeman binē dunujn lod baya'nan lidx tijb bēn Chipre, ma gojc xchej rliadxaman Jesucrist, laman Mnasón.

Bignaj Pab Jacob

¹⁷ Abi' ree bēn Jerusalén rliadx Jesucrist dād nix guyu luxdoo reeman baca' reeman dunujn. ¹⁸ Chi bareguiaal bunēn Pab bugnajn Jacob, ni riga' gra ree bēn rniabee loj ree bēn rliadx Jesucrist. ¹⁹ Chi gulox bagajpdiozan

laa reeman, dxe bagojn Pab laa reeman tijb gaj ni beenman por xguialrniabee Dios delant loj ree bēn ad najt bēn Israel. ²⁰ Chi biguiejn reeman zian, baza't reeman Dios zagdx, zianz rēb reeman loj Pab:

—Lūj ragbee guial entr loj ree bēn Israel zien da't reeman ma bililadx Jesucrist, abi' gra reeman rēb guial rūjn nagueijn güün bejn zi'c rniabee xley Moisejs.

²¹ Ma biguiejn tēē reeman guial lūj culūū bēn Israel ree, bēn ad zobjt ree loj nacion Israel guial ad zūjncwentt reeman xley Moisejs, rēb tēē loj reeman guial ad rūjnt nagueijn chu' xi'n reeman sen ru ree bēn Israel ad zinal tēēt reeman dux costumbr ree.

²² Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til. ²³ Zeel meyorli güünl ze: Yu' tajp ree xin no'ch du lojn xin rayal ree güün cumplid ni cwēb reex loj Dios. ²⁴ Binē reex, gol been zi'c rēb loj ley din gaquidi naya, gudijx tēē por laa reex din gac ya guijc reex. Zian gagbee gra bejn guial rūjnquil zi'c rniabee ley, guial ad wali tēēt ni biguiejn reeman xcwentil. ²⁵ Abi' por ree bēn ad najt bēn Israel, bēn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tēē reeman rejn ni'qui bēēl rberejn, ad sunē tēē reeman ben ren bēn ad najt lacheel reeman.

Gunaaz ree bēn Israel Pab

²⁶ Dxe binē Pab guidap ree bēn guin, abi' chi bareguiaal been reeman zi'c rniabee ley par gac reeman naya. Dxe guyu reeman lēn yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinē tijb gaj reeman tijb be guiēt zi'c tijb gon par Dios.

²⁷ Chi ma yayaaloj gajdx dxej ni naj güün reeman zi'c rniabee ley, yu' ree bēn Israel zēēd niz Asia, baguiaa reeman Pab lēn yadooro' Jerusalén abi' gurixdiaj reeman wajs reeman, gunaaz reeman laaman, ²⁸ rēb reeman:

—¡Bēn Israel, gol been yudar! Xin guie naj xin ziza gra lad caneeguijdxix bēn Israel ree nē dux yadoo ree, rēb tēēx loj ree bejn guial ad güün reeman zi'c rniabee dux ley ree. Abi' ad tijbtzi laan, nē ma badxe'x bēn ad najt ree bēn Israel lēn dux yadoo ree ni naj ni nada par dunuj ree ma beenx laan zi'c tijb luar ad rūjnt sirv.

²⁹ Rēb reeman zian guial baguiaa reeman Pab zizaman ni con tijb bēn Éfeso bēn la Tróximo, zeel gunaladx reeman binē Pab laaman lēn yadooro' Jerusalén.

³⁰ Dxe been reeman nadxeb guidib luguiedx guin, ruxūūn ree bejn bidxin reeman. Abi' gunaaz reeman Pab, guxoobyuj reeman laaman babēē reeman laaman lēn yadoo guin laa basiaaw gajc reeman port guin ree. ³¹ Za mer nugūjt reeman laaman, chi bidxin rusion guin loj suldad rniabee ree suldad guial gra ree bēn Jerusalén cayūjn nadxeb. ³² Laa bato'p gajc suldad rniabee guin xsuldadix nē za tio'p choon ree suldad rniabee, baxūūn reex wej reex lod riga' ree bēn guin. Chi baguiaa ree bēn guin bidxin suldad rniabee guin

con ree xsuldadix, dxel bacwëez gudijn reeman Pab.
³³ Dxel gubig sultad rniabee guin, gunaazix Pab gunabeex guxhii reex laaman con tio'p cadén. Abi' gunabdiidix chu laaman xhie tëë beenman. ³⁴ Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree sultad. ³⁵ Chi bidxin reex loj ree scliar lod yu' ree sultad guin, gulejn reex Pab guial dád nadoxh rüjn ree bën zien nal laa reex, ³⁶ abi' gra reeman rbixdiaj, rëb reeman:

—¡Gol bagüjtix!

Gunee Pab loj ree bejn

³⁷ Chi ma chu'në reex Pab lod yu' ree sultad guin, gunabdiidixaman loj sultad rniabee guin, rëbaman:

—¿Zajc ganenë'n lüj ya?

Badxi' sultad guinan rëbix:

—¿Rajc rnieel diidx grieg ya? ³⁸ ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bën bagüjt ree bejn?

³⁹ Dxel rëb Pab lojx:

—Bën Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganenë'n bën guie ree.

⁴⁰ Dxel cwëjb sultad guin, abi' guzuli Pab loj ree scliar guin beenman sen loj ree bën guin con yaaman din yacwëez ro' reeman. Chi bacwëez reeman, dxel guneenëman laa reeman diidx hebreo, rëbaman:

22 —Lëjt bengol në los demazridi, gol bacaagdiajg ni ganin por naj.

² Chi bigueijn reeman caneenëman laa reeman diidx hebreo, mazri bacwëez reeman. Abi' basnuuman rëbaman loj reeman:

³ —Bën Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bën gulal ree. Guiáad naj guidib luxdon benan xgab güünan sirv Dios zi'cgajc lëjt yan. ⁴ Dxel guzunaalan bën rliladx ree Jesucrist, xt bagüjtan laa reeman abi' zi'c ree bengu-naa zi'c ree xinguaaw gunaazan badxe'n ladxguiib. ⁵ Bixhioz mazri zobjloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bën Israel ree, bën zobj ree luguiedx Damasco din chile' yaguilan bën rliladx ree Jesucrist luguiedx guin, ganaaz tëën laa reeman guidnë'n laa reeman Jerusalén din täd reeman casti.

Be Pab diidx xhienaag bililadxaman Jesucrist

(Hch. 9:1-19; 26:12-18)

⁶ Per chi za'n lunejz par Damasco, chi ma cadxinan ni cost garol dxej, dxejczii brii tijb guij xanyabaa balaan bacha' guidibczii lod cazaan, ⁷ abi' breeyujn. Dxel bigueijnan cha' bën na: "Saulo, Saulo, ¿chexquiza zeel rzunalil naj?" ⁸ Abi' gunabdiidixan rën: "¿Chu lüj Dad?" badxi'man laan naman: "Naj naj Jesús, bën Nazaret, bën rzunalil." ⁹ Bën zinë' reen baguiaa reeman bacha' guin abi' bidxeb reeman, per ad bignia't reeman ni na

cha' bën gunee naj. ¹⁰ Dxel gunabdiidixan rën: "¿Xhie rayal günan Dad?" Abi' na Dad Jesucrist lon: "Bixche, basnuu xnejzil wej Damasco. Ni na reeman gra ni rayal güünl." ¹¹ Abi' guial bascajy bacha' guin lon, dxel bën zinë' reen gunaaz reeman yan, binë reeman naj luguiedx Damasco.

¹² Ni zobj tijb bën la Ananías, rüjnman cumplid gra zi'c rniabee xley Moisejs. Abi' gra ree bën Israel zobj luguiedx Damasco nünbee laaman guial nabanman xnejz. ¹³ Ananías guin bidganaj naj, chi bi'taman naman lon: "Saulo, ma zajc yaguiaa stijb." Loj hor guin gajc baguian stijb abi' baguian laaman. ¹⁴ Dxel naman lon: "XDios dux bégulal ree ma bacaabee lüj din gagbeel xhie rënman güünl, abi' guguiaa Jesucrist guien tëël cha'man, bën rüjn zi'c rayal. ¹⁵ Din chigneeel xtiidixaman loj gra ree béguidxliuj, gü tëël diidx loj reeman ni baguiaa ni bigueijn tëël. ¹⁶ Yan, ad rbëzil mazri, guzuli gurobnijs tëë gurejdx gaj Dad Jesucrist din chisüdaman xtolil."

Be Pab diidx xhienaag wejman loj ree bën ad najt bën Israel

¹⁷ Chi baguialan Jerusalén, wan lën yadooro' persi guredx gunaaban Dios, abi' guza'can zi'c rulüü cane'x-hchalan. ¹⁸ Baguian Dad Jesús naman: "Baquiejn. Cari barii Jerusalén, din ad züjncwentt reeman ni guiëbil por naj." ¹⁹ Abi' rën lojman: "Dad, laa reeman ragbee guial naj wa gra lën ree yadoo gunaazan bën rliladx ree lüj, badxe'n laa reeman ladxguiib gudin tëën laa reeman. ²⁰ Në chi bagüjt reeman Esteban, bën gunee xtiidxil, laagajc naj za' ni rën zagdx naj guiëtaman abi' xt gunan xab ree bën bagüjt laaman." ²¹ Per na Dad Jesús lon: "Wej, naj gaxhal lüj zijt loj ree bën ad najt bën Israel."

Badxe' reeman Pab lod yu' ree sultad

²² Xt quintzi naga' loj bacaagdiajg reeman ni rëb Pab dxel guzuloj gurixdiaj reeman rëb reeman:

—¡Ad rayalt guiban xin guin! ¡Gol bagüjtix!

²³ Abi' guial cabixdiajz cabixdiaj reeman, ruzaal xab reeman niz ladia ruzaal tëë reeman yuj niz ladia. ²⁴ Dxel gunabee sultad rniabee guin cu' reeman Pab lod yu' ree sultad abi' gunabeex qui'n reex laaman din ya-neero'man chexc zeel rbixdiaj ree bën guin zian contr laaman. ²⁵ Per chi guxhii reex Pab din quin reex laaman, rëbaman loj tijb ree sultad rniabee za' ni:

—¿Zajc quindi tijb bën Rom ya, chi gadidi gagbee xhie beenman?

²⁶ Chi bigueijn sultad rniabee guin zian, dxel bicojnx sultad rniabee ree sultad guin, rëbix lojx:

—Gojp cudad ni güünnë'l xin guin, din xin Roman.

²⁷ Dxel wej sultad rniabee guin lod za' Pab, abi' gunabdiidix lojman rëbix:

—¿Walin ya xin Rom lüj?

Badxi' Paban rëbaman:

—Walican.

²⁸ Abi' rëb sultad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diisd goolan najn bén Rom.

²⁹ Chi biguiejn ree suldad niguin Pab, guial bén Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

³⁰ Chi bareguiaa, guyën suldad rniabee guin niag-beechaawix chexc zeel za' ree bén Israel contr Pab. Abi' baxhiequix Pab, dxeel gunabeex bado'p ree bixhioz rniabee ree bixhioz në ree guxtis. Abi' babëëx Pab bazujx laaman loj gra reeman.

23 Baguiaa Pab loj ree guxtis guin, abi' rëbaman:

—Compniar Israel, loj guidib ni nabanan xt yan, achet naladxan delant loj Dios din naj ragbee xhienaag nabanan.

² Dxeel Ananías, bixhioz mazri zojbloj rniabee graczi ree bixhioz, gunabeeman bén za' ree gajxh cwë' Pab din ca'p reeman ro'man. ³ Per badxi' Paban rëbaman loj bixhioz guin:

—Ziangajc ca'p Dios ro'l, bén rusquiee! ¿Id zojbil yagaj ya par güünl guialguxtis zi'c rniabee ley? Abi' ¿chexquiza zeel rüjn zi'c ad rniabeet ley, rniabeel ca'p reeman ro'n?

⁴ Abi' ree bén za' yagaj rëb reeman lojman:

—¿Zian rusaglojl xbxhioz zojbloj Dios ya?

⁵ Dxeel rëb Pab:

—Gol been perdon, ad gogbeetan guial laaman naj bixhioz mazri zojbloj. Din loj xtiidx Dios rëb: "Ad gusa-glojl bén rniabee ladxil."

⁶ Chi gogbee Pab guial garol reeman naj bénsaducew za garol reeman naj bénfarisew, dxeel gunee-man rejs rëbaman:

—Naj naj bénfarisew, xi'n bénfarisew naj. Abi' guial rliladxan yaban ree bengüt zeel za' ree bejn contr naj.

⁷ Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'. ⁸ Din bénsaducew ree ad rliladxt reeman guial yaban ree bengüt, ad rliladxt tëët reeman guial yu' ree anjl në ree sprijt, per ree bénfarisew rliladxt reeman gra ree ni guin. ⁹ Abi' been reeman naquie' yagaj. Dxeel guzuli bëlzi ree bénfarisew naj mextr rulüü ley, rëb reeman:

—Achet ni mal wayüjn bén guie. Wed tijb sprijt o tijb anjl gunee laaman, gol gojp cudad ad niad contr Diosan nadxu' ree.

¹⁰ Chi baguiaa suldad rniabee guin mazri cadildiidx reeman, dxeel bidxebix nuroox reeman Pab. Abi' gunabeex bi't ree suldad din yabëë reex laaman galay ree bén guin, chinë tëë reex laaman lod yu' ree suldad stijb.

¹¹ Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

¹² Chi bareguiaa, garol ree bén Israel baya'n reeman diidx din gugüjt reeman Pab, rëb tëë reeman guial achet gaw reeman achet tëët guië' reeman xt gugüjt reeman laaman. ¹³ Nadëd tiuu naj ree bén rëb zian.

¹⁴ Abi' wej reeman bigneenë reeman bixhioz ree bén rniabee ree bixhioz në ree x bengol ree bén Israel, rëb reeman loj reeman:

—Dunujn ma raguie'ch guial achetdzi yadaawan xt chi ma bagüjtan Pab. ¹⁵ Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

¹⁶ Per xi'ngaan bizan Pab biguiejnx guial cayëb reeman zian, dxeel wejx lod yu' ree suldad bicojnx Pab.

¹⁷ Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

¹⁸ Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din guneex tijb ruson lojl.

¹⁹ Abi' suldad rniabee guin gunaazix yaa xin guin, binëx laax tiblad, gunabdiidx lojx rëbix:

—¿Xhie rënl nal lon?

²⁰ Abi' rëb xin guin lojx:

—Bén Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeechaaw reeman xhienaag naj xcwentaman. ²¹ Per ad bal chililadxil laa reeman, din nadëd tiuu naj ree bén cwëz laaman guquie'chloj reeman lunejz, abi' ma rëb reeman guial achet gaw reeman ache tëët guië' reeman xt gugüjt reeman laaman. Yan za'sin reeman cabëz reeman ni guiëbil.

²² Dxeel rëb suldad guin loj xin guin:

—Baguiaj. Achu loj guiëbil ni ma nal lon.

Guxhaal reeman Pab loj gobernador Félix

²³ Dxeel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', në za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin. ²⁴ Abi' gunabee tëëx güün reex porvinid way cwib Pab, rëbix loj reex guial guinia reex Pab din guidxinman zagdx loj gobernador Félix. ²⁵ Abi' guxhaalnëx laa reex tijb gui'ch ni rëb:

²⁶ "Naj Claudio Lisias, rugajpdiozan lüj gobernador Félix, lüj guial najl bén zojbloj. ²⁷ Bén Israel ree gunaaz xin guie ma nugüjt reeman laax. Per chi gogbeen guial xin Roman, dxeel wan con ree da suldad buglëen laax loj reeman. ²⁸ Abi' guial rënan gagbeen xhie rüjnx zeel rdxë'ch reeman laax, dxeel bazun laax loj ree gux-

tis Israel. ²⁹ Dxel gogbeen guial por xcwent xley ree-man zeel rdxe'ch reeman laax, per ad najtan ni rayal guiëtix ni'qui guial chu'x ladxguiib. ³⁰ Nê guial ma gogbeen guial xixgab ree bën Israel naj gugÿjt reeman laax, zeel cayxhalan laax lojl. Abi' ma rën loj ree bën rdxe'ch laax guial con lÿj gÿün reeman reglad ni rajp reeman contr laax. Laanan rugojnan lÿj."

³¹ Been ree suldad guin zi'c gunabee suldad rniabee guin abi' guxhin binë reex Pab luguiedx Antípatris.

³² Chi bareguiaal suldad zë ree guia' bayejc reex lod yu' ree suldad, guiáad ree suldad dxiib way zinë reex laaman luguiedx Cesarea. ³³ Chi bidxin reex Cesarea, badëed reex gui'ch guin loj gobernador guin, bayü tēē reex Pab lojman. ³⁴ Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zëedaman, ³⁵ dxel rëbaman lojman:

—Chi gui't ree bën za' ree contr lÿj, dxel gucagdiagan ni nal.

Abi' gunabeeman gap reex Pab lën xpalas Herodes.

Ni gunee Pab loj gobernador Félix

24 Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel nê tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. ² Chi bidxinnë reex Pab, guzuloj Tértulo caneeman contr laaman, rëbaman loj gobernador guin:

—Quixtëē lÿj dad gobernador, por lÿj nadxu'dxen, nê por xguialrajquil zien ree ni rÿjn sirv cayajc du ladxan. ³ Gra ladczi za' ree bejn conform por gra ni cayÿjnl dad gobernador Félix, lÿj naj bën zobjloj, quixtëēczi lÿj. ⁴ Per chitëē gÿnlaan lÿj mazri, rniaaban lojl din gucaagdiajguil ni yanan lojl tibrajtooczi. ⁵ Dunujn bayagbeen xin guie naj zi'c tijb guialguijdx loj ree bën Israel, guidibczi guidxliuj zizax rustijlix laa reeman abi' laax rniabee loj tib cwaa ree bën rniee reeman nazaren. ⁶ Abi' guyën tēēx nÿjnx dux yadooro'n zi'c tijb luar ad rÿjnt sirv, zeel banaazan laax bayënan nagueenan guialguxtis zi'c naj dux leyan. ⁷ Per laa bi't gajc suldad Lisias con ree xsuldadix, babëëxuu reex laax du lojn. ⁸ Abi' rëb suldad rniabee guin guial lojl gui't ree bën rbe'c xguialquia Pab, yan lÿj gajc zajc guiniabdiidx lojx din gagbeel zagdxe guial walican ni ranan xcwentix.

⁹ Abi' ree bën Israel za' ni rëb reeman guial waliqui gra ni guin. ¹⁰ Dxel been gobernador guin sen loj Pab din guinieeman, abi' rëb Pab:

—Guial ragbeen diizd gocli rniabeel nacion Israel, zeel ad yu'nawëëgtan yadxi'n ni rudxiib reeman guican. ¹¹ Abi' lÿj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios. ¹² Abi' achut banaaznë reeman naj cadildiidxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. ¹³ Bën guie ree ad zajct na reeman lojl guial ni diidxli naj ni rudxiib reeman guican. ¹⁴ Per ni naj diidxli naj guial rliladxan Jesucrist, nejzcüb guin naj

ni zinaalan, cayünan sirv loj xDios dux bëngulalan, abi' na ree bën guie guial ad xnejzt Diosan, per cayünan zian guial rliladxan gra ni zëed loj ley nê ni bacaa ree bën badëed xtiidx Dios loj ree bejn. ¹⁵ Abi' zi'cgajc rliladx ree bën guie Dios, ziangajc rliladxan laaman guial yaban ree bengüt stijb, zi'c ree bën goc benza'c nê ree bën goc benmal. ¹⁶ Zeel rÿnan nagueijn gabajnan zagdxe chitëē xhie ganaladxan delant loj Dios ni'qui delant loj ree bejn.

¹⁷ 'Ma gojc zien ijz nariin, xt yan baye'c ladxan bidganë'n ni baxhaal ree bejn par ree bënprob, bidganë' tēēn gon ni rayal gudëdan loj Dios. ¹⁸ Laan naj ni cayünan lën yadooro' Jerusalén chi bi't ree bën Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tēētan wadijl. ¹⁹ Yan, bën gunaaz ree naj, laa reeman naj bën rayal su guie din na reeman xhie rÿnan xhie pornin rdxe'ch reeman naj. ²⁰ O balguiza, bën za' ree guie na reeman xhie da dolan badxejl reeman chi guzun loj gra ree guxtis Israel. ²¹ Tijbzi ni benan chi za'n galay reeman gurixdiajn rën: "Guial rliladxan yaban ree bengüt, zeel za' ree bejn contr naj yan."

²² Chi bigueijn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj ree-man:

—Chi gui't suldad Lisias, dxel gagbeen zagdxe xhien-aag naj xcwentidi.

²³ Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex gÿünman ni rënman ad gudxoon tēē reex chignaj ree xmiwaman laaman.

²⁴ Chi goc tio'p choon dxej, bidxin gobernador Félix stijb con lacheelaman Drusila, laaman naj bën Israel. Dxel gunabee gobernador guin bidxin Pab, abi' bacagdiajg reeman ni rëbaman xcwent guialrliladx bejn Jesucrist. ²⁵ Per chi guzuloj cayëbaman guial rayal guiban ree bejn xnejz, gucwëēz tēē xixgab mal reeman, guial guidxin tēē dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguij. Ganetan lÿj chi chu'n luar stijb.

²⁶ Per Félix nê milian rbëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman. ²⁷ Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bën Israel, zeel basa'nman Pab ladxguiib.

Gunee Pab loj Festo

25 Chi goc choon dxej ni bidxin Festo Cesarea par chu'man guial gobernador, dxel wejman Jerusalén. ² Yagaj, bixhioz rniabee ree bixhioz con ree bën Israel mazri zobjloj, wej reeman lojman bile'c reeman xguialquia Pab, ³ abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugÿjt reeman Pab runejz. ⁴ Per badxi' Festo xtiidx reeman rëbaman guial Cesarea

nayaaw Pab guiáad laaman nayob yaguijman ni,
⁵ abi' rëbaman loj reeman:

—Bén rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhila-man lod rniabeeman, abi' gunabeeman chica' reex Pab. ⁷ Chi bidxinnë reex laaman, bén Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. ⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree bén Israel, ni'qui yadooro' Jerusalén, ni'qui rey César.

⁹ Per Festo guyënman naya'nman zagdxex loj ree bén Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Luj ragbee zagdxex guial achet ni mal wayünan bén Israel ree. ¹¹ Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

¹² Dxel chi gulox guneenë Festo bén naj ree xbejnman, bén rëb ree ni rayal gac, rëbaman loj Pab:

—Luj na tädil loj rey César, yan lojman tädil.

Za' Pab loj rey Agripa

¹³ Chi gudëd tio'p choon dxej, rey Agripa con xbén-gunaaman Berenice bidxin reeman Cesarea bitixloj reeman gobernador Festo. ¹⁴ Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib. ¹⁵ Chi wan Jerusalén, bixhioz rniabee ree bixhioz con ree bén rniabee loj ree bén Israel gule'c reeman xguialquix, gunab reeman ganabeen guiëtix. ¹⁶ Per naj rën loj reeman guial guxtis Rom ree ad najt xcustumbr reeman nabee reeman guiët tijb bejn chi gadaman su loj ree bén cabe'c xguialquiaman din guiëbaman walin ya o ad walitan ni rudxiib reeman guijcaman. ¹⁷ Zeel chi bi't ree bén Israel guin guie, achet guial niaglaan, bareguiaal gajc gure loj da yagxhilaan, abi' gunabeen bidnë reex xin guin. ¹⁸ Per ree bén bi't gule'c xguialquix, achet ni nadxeb na reeman zi'c gunaladxan ninia reeman por laax. ¹⁹ Tijbzi xguialquix ni gule'c reeman naj por xcustumbr reeman në por tijb bén la Jesús, bén ma güjt, per Pab rëb naban Jesús guin.

²⁰ Abi' guial ad ragbeetan xhie gūnan por zian, dxel gunabdiidxan loj Pab bal rënch chex Jerusalén din gac reglad ni guin ree ni. ²¹ Per laax gunab täd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

²³ Chi bareguiaal, däd zagdxex ca' xab rey Agripa con Berenice bidxin reeman con ree bén rniabee suldad con los demazri ree bén zobjloj luguiedx guin, bidxin reeman guyu reeman lënü lod gucaagdiajg reeman ni guiëb Pab. Dxel gunabee Festo bica' reex Pab. ²⁴ Abi' rëb Festo:

—Rey Agripa në los demazridi dad za'nëdi dunujn guie. Bén ruguiaadi guie, gra bén Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix. ²⁵ Naj, achet xfaltix radxejlan guial rayal guiëtix. Guiáad laax gunab täd loj César Augusto lod gac reglad xcwentix, abi' ma benan xgab yaxhalan laax. ²⁶ Per ad radxejltan ni gucan por laax loj gui'ch ni gaxhalan loj rey César, bén rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. ²⁷ Din naj rulüü ad xnejzt naj yaxhalan tijb bén yu' ladxguiib loj rey César abi' ad zëtan xhie beenman.

Ni guneex Pab loj rey Agripa

26 Dxel rëb rey Agripa loj Pab:

—Ma zajc guinieel por luj.

Abi' gules yaa Pab guzulox rëbaman:

² —Däd nix yu' luxdon guial bile' za'n lojl yan rey Agripa, par ganen lojl yadxi' tēen gra ni rudxiib ree bén Israel guican. ³ Din luj ragbee zagdxex gra xcustumbr ree bén Israel, në conin rüjn persi rdildiidx reeman. Zeel rniaaban lojl gapil pasens gucaagdiajguil ni ganin.

Zi'c guban Pab gocli

⁴ Gra ree bén Israel ragbee xhienaag gubajnan con laa reeman zi'c ladxan zi'c Jerusalén, diizd xindoon.

⁵ Ragbee tēë reeman abi' zajc na reeman laan bal rën reeman, guial diizd xindoon najn bënfarisew, abi' ree bënfarisew naj bén mazri zinal xley ree bén Israel.

⁶ Abi' yan za'n guie, badëëd reeman naj loj ree guxtis guial rliladxan yasban Dios bengüt ree zi'c beenman promeys loj ree dux bēngulal ree. ⁷ Gra guidxiptio'p cwa' ree bén Israel cabëz dxej gūn Dios zian, zeel rën reeman laaman rüjn tēë reeman sirv lojman dxej guiaal. Abi' yan guial rliladxan laan zeel rbe'c ree bén Israel da guialquian, rey Agripa. ⁸ ¿O naladxidi ya nawëëg yasban Dios bengüt ree?

Be Pab diidx xhienaag guzunalaman bén rliladx ree Jesucrist

⁹ Guia'xchej benan xgab rayal gūnan xhienin bén rliladx ree Jesús, bén Nazaret, ¹⁰ abi' zian benan Jerusalén. Con xtiidx ree bixhioz rniabee ree bixhioz, zien ree bén rliladx Jesucrist badxe'n ladxguiib. Abi' chi rugüjt reeman laa reeman, në naj rë guiëtri reeman.

¹¹ Zien volt benan laa reeman xhienin din gūnan naguiejn gusa'n reeman guialrliladx reeman Jesucrist.

Zian benan lèn gra ree yadoo, abi' guial tant rdxé'chan laa reeman dxei guzunaalan laa reeman xt luguiedx ren ree.

Be Pab diidx stijb xhienaag bililadxaman Jesucrist
(Hch. 9:1-19; 22:6-16)

¹² 'Abi' par zian za'n Damasco, con quijb xtiidx ree bixhioz rniabee ree bixhioz. ¹³ Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bèn zinè'n. ¹⁴ Abi' dugraczan bareeyuj, dxei biguejnan cha' bèn gunee naj con diidx hebreo, naman: "Saulo, Saulo, ¿chexc zeel rzunalil naj? Lüj gajc rguil xguialnaal zi'c go'n rudxegua' loj yag ru-laagnè reeman laab." ¹⁵ Dxei rën: "¿Chu lüj Dad?" Badxi' i'man laan naman: "Naj naj Jesús bèn rzunalil. ¹⁶ Per bixche, guzuli, din balülon loj par güünl naj sirv gü tēēl diidx ni baguiaal yan nē ni gulün lojl. ¹⁷ Naj gaxhal lüj loj ree bèn Israel nē loj ree bèn ad najt bèn Israel, abi' naj gagnè lüj chitēē xhie güün reeman lüj. ¹⁸ Gaxhalan lüj loj reeman din guixhialil loj reeman gusa'n reeman nejz mal, chinal reeman nejz zagdxé. Ad tiēbri reeman nabee xindxab laa reeman, chinal tēē reeman xnejz Dios. Abi' chililadx reeman naj din gac xtol reeman perdon yayal tēē reeman ni rayal gra ree xbejn Dios, bèn ma naya ree delant lojman."

Bazoob Pab diidx ni balüüloj lojman

¹⁹ 'Zian gojc, rey Agripa, bazoban diidx benan ni na Jesucrist lon chi gunee man naj diidx xanyabaa. ²⁰ Yaloj luguiedx Damasco gutiechan xtiidxaman, dxei Jerusalén nē guidib niz Judea nē loj ree bèn ad najt bèn Israel. Rën loj reeman din yayüjn reeman xgab por xtol reeman, yadxi' loj reeman loj Dios güün tēē reeman ni rayal güün reeman din guiguien guial ma bidxaa mod naban reeman. ²¹ Abi' por zian, gunaaz ree bèn Israel naj lèn yadooro' Jerusalén, guyen reeman nugüjt reeman naj. ²² Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bèn zobjloj zi'c ree bèn ad zobjlojt. Abi' gra ni rën loj reeman naj ganax ni bacaa ree bèn badēē xtiidx Dios loj ree bejn nē ni bacaa Moisejs xhienaag naj ni gac, ²³ guial Cristo naj guial tēdaman guialzi, guiēta-man. Per chi ma güjtaman yaloj laaman naj bèn yaban loj ree bengüt, abi' gugojnman bèn Israel ree nē ree bèn ad najt bèn Israel xhienaag gap reeman perdon.

Nuyèn Pab nililadx Agripa Jesucrist

²⁴ Chi cayēb Pab zian, dxei gudidxa' Festo rēbaman: —¡Rajcguijquil Pab! guial tant rusiidil ma rajc guijquil. ²⁵ Per badxi' Pab laan rēbaman: —Ad guictan rajc, gobernador Festo. Ni canin najn xnejz nē diidxli. ²⁶ Laa rey Agripa za' guie, laaman rag-bee ni canin, zeel sin guialrdxé canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan.

²⁷ ¿Rililadxil ni rēb ree bèn badēēd xtiidx Dios loj ree bejn ya, rey Agripa? Naj ragbee guial rililadxil.

²⁸ Dxei badxi' rey Agripa laan rēbaman: —Sta'nczi nūjnl naj gan nililadxan Jesús.

²⁹ Abi' rēb Pab:

—Majsi sta'nz o majsi ryaadxri, na Dios guial ad ti-jbtzi lüj, nē gra ree bèn cucaagdiajg ni canin yan, guidxin dxei chililadxidi Jesús zi'c naj, majsi ad nēt ree caden guie.

³⁰ Dxei bisu rey Agripa con gobernador Festo con Berenice nē gra ree bèn zobjnē laa reeman ni. ³¹ Chi bariica reeman tiblax guzuloj cayünē lasa' reeman diidx, rēb reeman:

—Achet wayüjn xin guie ni rayal guiētix, o chu'x ladxguib.

³² Dxei rēb rey Agripa loj Festo:

—Zile' naslaa reex, balidix niniab tēdix loj rey César.

Baxhaal reeman Pab Rom

27 Chi rēb reeman ma yaxhaal reeman dunujn Italia, dxei bayü reeman Pab con sta'n ree bèn yu' ladxguib loj tijb suldad rniabee la Julio, laax rniabee tib cwaa ree suldad la Augusto. ² Abi' Cesarea badxu'n loj tijb xbarcw ree bèn Adramitio, barcw ni ma grii chen guiedx riga' ree niz Asia. Nē Aristarco bunē'n, bèn Tesalónica, guiedx riga' niz Macedonia. ³ Chi bareguiaal, badxinan Sidón, lod goc Julio xinza'c da't con Pab, cwējbix bitixloj ree xmiw Pab luguiedx guin abi' badēēd reeman ni ryaadxaman. ⁴ Chi badxoon Sidón badiaawan Chipre yuj riga' loj nijsdoo, basa'-nanan dux ladruvejsan chitēē yachaaglojn zro' bi, din niz du lojn rliaj bi guin. ⁵ Badüüdan loj nijsdoo gajxh Cilicia nē Panfilia abi' badxinan Mira, tijb guiedx nulen Licia.

⁶ Ni bidxaagloj suldad rniabee guin tijb barcw Alejan-dría ni che Italia, zianz nax yadxu'n lojn. ⁷ Loj zien dxei bio'n chaawladx, con guidib tarbajw badxinan niz lod la Gnido. Abi' guial sta' rliaj bi niz du lojn, dxei zagdxeli badüüdan niz Salmón, badiaawan lod la Creta yuj riga' loj nijsdoo. ⁸ Gadēd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹ Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, ¹⁰ rēbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt nē dunuj ree nadxeb yayējt ree.

¹¹ Per suldad rniabee guin mazri beencwentix bèn rusa barcw guin nē bèn naj xbarcw laan, guial loj ni rēb Pab. ¹² Abi' guial ad zagdxé tēēt naj yagaj par yadüüdan tiamp nayaag, dxei mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tēēt bi, ni yadüüdan tiamp nayaag.

Gubi' tijb bidoxh loj nijsdoo

¹³ Dxel guzuloj cabi' tijb bi chaawladx ni zëed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. ¹⁴ Per ad wayajct xchej zio'n chi birii tijb bidoxh la Euroclidón loj nijs guin. ¹⁵ Abi' guzuloj bi guin culadxaan barcw guin. Nê guial niz du lojn zëed bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan. ¹⁶ Dxel badüüdan xijch tijb yujdobëz la Clau-da riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. ¹⁷ Dxel chi gulox balë'pan canu guin loj barcw guin, batiejl reeman duu lad barcw guin chitëe yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxaa bi guin laan. ¹⁸ Chi bareguiaa, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. ¹⁹ Ni bayon dxej, cwa' ree-man gra ree ni rüjnnë barcw guin dxiin bazaar reeman loj nijs guin. ²⁰ Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueientri du luxdoon yalaan loj nijs guin.

²¹ Abi' guial ma gojc zien dxej ni achetci wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëet nasëeb ree. ²² Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n. ²³ Din Dios rniabee naj, bën cayünan sirv guxhaal tijb xi anjlaman balüüloj lon yan guiaa. ²⁴ Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëed loj barcw guie ad zuslaat Dios guiët reeman.” ²⁵ Zeel yan dad, gol badxe' luxdoodi zagdx, din naj riladxaan Dios, ragbee tëen zagdx guial gac zi'c na anjl guin lon. ²⁶ Per gag barcw guie niz ro' tijb yuj riga' loj nijsdoo.

²⁷ Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaa gogbee reeman guial zamer yadxinan loj yuj. ²⁸ Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit. ²⁹ Abi' bidxeb reeman laro' barcw guin guiaj ree, dxel niz xijch barcw guin bazaar reeman tajp ganch guib loj nijs guin din chile' sudxe barcw guin, abi' ma rën nejzdoo reeman yareguiaa. ³⁰ Bën nulen ree barcw guin, been reeman bën sta cuzaal ree ganch guib guin loj nijs guin niz loj barcw guin, naabzi par calet reeman canu chu' reeman par guxüün reeman. ³¹ Per bagojn Pab suldad rniabee con ree xsuldadix, rëbaman loj reex:

—Bal id ree bën guin yaya'n loj barcw guie, ad zalaa-tridi.

³² Dxel batüüg ree suldad guin ni naxii canu guin persi zinë nijs canu guin. ³³ Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëet wayawidi. ³⁴ Naj rni lëjt, gol gudaw din guibandi, din gradi ni'qui tijb guidxguijquidi ad zusëëbtidi.

³⁵ Chi rëb Pab zian, cwa'man tijb guiadxtil, abi' badëëman quixtëe loj Dios niz loj gra reeman, dxel gu-la'man guiadxtil guin guzuloj cayawaman. ³⁶ Dxel bayu luxdoo gra reeman, guzuloj nëgajc laa reeman cayaw. ³⁷ Tio'pgayuu gayojnchiibixho'p nayajc dugran zio'pan loj barcw guin. ³⁸ Chi gulox gudaw reeman xt bixien-ladx reeman, dxel bazaar reeman trigo loj nijs guin persi bacha barcw guin.

Bize'n barcw loj nijsdoo

³⁹ Chi bareguiaa, bën nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadëd ro'n, abi' been reeman xgab badxig reeman barcw guin yagaj. ⁴⁰ Dxel batüüg reeman ni naxiinë ree ganch guib guin ni rüjn yudar par sudxe barcw guin loj nijs, basa'n ree-man ganch guin ree loj nijs guin, abi' baxhieci reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. ⁴¹ Per wëëztiejn loj üx zien lod bigagan. Niz guijcan wëëz lën üx abi' ni'quid rniibtan, guiáad niz xan guin guzuloj cayze'nan con gojl rliaj nijs guin ladan. ⁴² Dxel nuyën ree suldad guin nugüjt reex bën prejs guin ree, chitëe nixoobnijs reeman abi' nuxüün reeman. ⁴³ Per suldad rniabee guin ad cwëjbtix njajc zian guial ad rëntix niëjt Pab, dxel gunabeex guial bën rajc rxoobnijs ree, yaloj laa reeman chu' loj nijs guin güün reeman nagueijn yarii reeman ro' nijs guin. ⁴⁴ Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

Bidxin Pab Malta

28 Chi gulox barii dugran lon nijs guin, dxel bayag-been yuj lod badxinan lan Malta riga'n galay nijs. ² Bën naj ree bën ni, dád benza'c gojc reeman con dunujn. Been reeman tijb bajl guial nayaag nëtëe guial cayal guia, abi' na reeman du lojn din yubiigan cwë' bajl guin. ³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëel lën yag guin por xi xliaa bajl guin, abi' gudawya'b yaa Pab nalbëztib yaaman. ⁴ Chi baguiaa ree bën Malta guin nalbëz bëel guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

⁵ Per gudxijp yaa Pab abi' biajb bëel guin loj bajl guin, guiáad laaman achet gocaman. ⁶ Gra reeman cabëz saaguuj yaaman, o dxejlczi yabaman guiëtaman. Per chi gojc xchej, chi baguiaa reeman achet gocaman,

bachaa xixgab reeman abi' guzuloj rëb reeman guial tijb dios najman.

⁷ Gajxh lod badxu'n naga' ree xguidxliuj tijb bën zobjloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tēē gojcaman con dunujn. ⁸ Nadxel naga' xdadaman, ragxuuman, yu'man xliaa rajc tēēman yobrejñ. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. ⁹ Chi gogbee ree bēnragxuuzobj ni ni goc, bi't reeman lod za' Pab persi bayūjnman laa reeman. ¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, banee reeman gra ni rayaadxan lunejz.

Bidxin Pab Rom

¹¹ Choon bēēw badxu'n loj yuj zii, dxelri badxu'n loj tijb barcw Alejandría, ni bitēd ni tiamp nayaag. Niz lucwaj barcw guin ca tio'p ree dxan bēn la ree Cástor nē Pólux. ¹² Dxel badxinan tijb guiedx la Siracusa, yagaj badxu'n choon dxej. ¹³ Abi' yagaj badxoon bio'n gadēd ro' nijsdoo xt badxinan guiedx la Regio. Chi bareguiaa, chi badxoon yagaj, brii tijb bi lad sur dxel ni barojp dxej badxinan luguiedx la Puteoli. ¹⁴ Yagaj badxaagan tio'p choon ree bēn naj ree bēn ni nē reeman riladx Jesucrist, dxel na reeman du lojn yaya'n-nē'n laa reeman abi' baya'nnē'n laa reeman toxman. Zian gojc, dxelri zio'n Rom. ¹⁵ Guíáad ree dux compniaran bēn riladx ree Jesucrist, bēn zobj ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio nē luguiedx la Tres Tabernas. Chi baguiaa Pab laa reeman, babaaman abi' badēēman quixtēē loj Dios. ¹⁶ Chi badxinan Rom, dxel bayū suldad rniabee guin bēn prejs guin ree loj tijb ree suldad rniabee ni. Per cwējb reeman gurej Pab stijb yu ren lod gojp tijb suldad laaman.

Gunee Pab xtiidx Jesucrist Rom

¹⁷ Chi goc choon dxej badxinan Rom, gurejdx Pab bēn Israel zobjloj ree ni. Chi badxajg lasa' reeman, dxel rēbaman loj reeman:

—Compniar Israel, achet wayūnan contr ree bēn Israel ni'qui contr xcostumbr ree dux bēngulal ree. Guíáad laa reeman gunaaz reeman naj Jerusalén, bayū reeman naj loj ree guxtis Rom. ¹⁸ Abi' ree bēn Rom guin chi gulox badēdan cwent loj reeman, dxel nuyēn reeman nuslaa reeman naj, guial gogbee reeman

achet benan par guiētan. ¹⁹ Per ree bēn Israel guin badxoon reeman abi' zagdxeli gunaaban gadēēdan loj rey César, per ad guial ra'ptan xhienin contr ree bēn Israel. ²⁰ Zeel guredxan lējt, din guidganajdi naj din ganin lojdi guial por ni riladxan guial yaban ree bengūt zi'cgajc riladx gra ree du lasa' bēn Israel ree, zeel naxiin con ree caden guie.

²¹ Dxel rēb reeman lojman:

—Dunujn ni'qui tijb xtiidx ree bēn Judea ad waca'tan lod na reeman xcwentil, nē ni'qui tijb bēn duladx ree bēn raza ree Judea achet wana reeman du lojn contr lūj. ²² Per rayēnan yaguejñan xhienaag naj xixgabil, din dunujn rayagbee guial gra ladczi rniee reeman contr religion cūb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zobj Pab. Abi' diizd rsil xt wadx guneenēman laa reeman xhienaag naj xguialrniabee Dios. Beenman naguejñ chililadx reeman Jesús, baza't tēēman lod rniee xcwent Jesús loj xlibr ley Moisejs nē ni bacaa ree bēn badēē xtiidx Dios loj ree bejn. ²⁴ Yu' reeman bililadx ni rēb Pab, per yu' reeman ad bililadxt. ²⁵ Abi' guial ad rdxagt gū reeman diidx, guzuloj bare'ch reeman. Dxel rēb Pab loj reeman:

—Waliqui ni rēb Isaías bēn badēēd xtiidx Dios loj ree dux bēngulal ree guial rēb xSprijt Dios:

²⁶ Wej, gūjdx loj ree bēn guin:

Majsi riguejñ reeman, per achetdzi chignia' reeman, abi' majsi ruguiaa reeman, per rulūū ad ruguiaat reeman.

²⁷ Din been luxdoo reeman gojl,

abi' rūjn reeman zi'c rulūū ad ruguiaat reeman, ad riguejñ tēēt reeman, chitēē guguiaa reeman,

abi' guien reeman chignia' tēē reeman.

Din ad rēnt reeman gui't reeman con naj,

abi' gūnan laa reeman perdon.

²⁸ Zeel gol gogbee guial diizd yan, loj ree bēn ad najt bēn Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹ Chi gulox rēb Pab zian, dxel zia ree bēn Israel guin, cadildiidxnē lasa' reeman.

³⁰ Tio'p ijz gurej Pab ni, yu lod gudixaman. Ni rnieenēman gra ree bēn rtixloj laaman. ³¹ Sin guialrdxeb rēbaman loj reeman xhienaag naj xguialrniabee Dios, abi' gunee man xtiidx Dad Jesucrist loj reeman sin guial chu nudxoon.

Gui'ch par ree bén Rom

Rxhial San Pabl xtiidx Dios

1 Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bén badëë xtiidx Dios loj ree bejn, ³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdi-aa rey Davi zaman. ⁴ Per por xSprijt Dios laaman naj Xi'n Dios guial babanman loj ree bengüt, abi' guidibla-gaa rajpaman guialrniabee. ⁵ Abi' par yaza't reeman, zeel bacaabeeman naj din gacan apóstol din guidibla-gaa guidxliuj chu' bén chililadx laaman, bén guzoob tëë xtiidxaman. ⁶ Abi' në lëjt ma nayab loj ree bén gule Dios din gaquidi xbejn Jesucrist.

⁷ Zeel caxhalan gui'ch guie lojdi bén rën ree Dios, bén zojb ree Rom, lëjt ma gulej Dios din gaquidi xbejman. Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëë loj Dios por gradi, guial guidibczi ruza't reeman lëjt xhienaag rililadixidi Jesucrist. ⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaaban laaman por lëjt. ¹⁰ Ad rucwëëz tëët rbedx rniaaban Dios din guneeman mod guidganan lëjt, zi'c naj da xgaban diizd gocli. ¹¹ Din yu'czan gan guidganan lëjt din günan lëjt yudar con xtiidx Dios din sudxi'chidi lojn. ¹² Din güün tëëdi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, rënan gagbeedi guial zien volti da't ma benan xgab guidganan lëjt, din gacxhiey ree bén chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lëjt. ¹⁴ Par naj naladxan da cwentan naj guial gulün chutëëz benan xtiidx Dios, bal najman bén ciuda o najman bén guiedxdoo ya, bal rignia'man o ad rignia'taman. ¹⁵ Zeel rënnejzdoon guidganan lëjt din gatiechan xtiidx Dios Rom.

Xguialrniabee xtiidxza'c Dios

¹⁶ Ad ratunë'tan xtiidxza'c Jesucrist. Din por diidxza'c guin ree zëed xguialrniabee Dios, din gra ree bén chililadx laan laa reeman loj dol, zi'c ree bén Israel zi'c

ree bén ad najt bén Israel. ¹⁷ Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bén naban zi'c rën Dios, guidib tiamp ni nabanman rililadxaman laaman."

Dol ni rajp bejn

¹⁸ Dunuj ree rayagbee guial diizd xanyabaa zëed xcastiro' Dios par ree bén ad ridxga't laaman, bén ad rüjnt ree zi'c rayal, abi' zi'c naban reeman ruquie'ch reeman xtiidxli Dios. ¹⁹ Din ragbeechaaw reeman guial yu' Dios, abi' laagajcaman balüü bejn ree guial yu'caman. ²⁰ Majsi ad rugiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa tëëman naj Dios. Zeel ad za-jct xhie gudxiib bejn guijc guial achet ragbeeman xcwent Dios. ²¹ Din majsi yu' ree bejn ragbee guial yu' Dios, per ad rajpt reeman laaman respekt zi'c rayal, ad rudëë tëët reeman quixtëë lojman, aal xgab ren ree rüjn reeman ni ad rüjnt sirv abi' gaz ragdxa reeman. ²² Rëb reeman guial rajc da't reeman abi' mazri na tont reeman. ²³ Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëël.

²⁴ Zeel ma gulëëladx Dios laa reeman loj xixgab mal reeman, abi' rüjn reeman ni natu ree con ree ben ren. ²⁵ Luar chinal reeman xdiidxli Dios, zinal reeman ni rusquiee ree. Abi' rën reeman rajp tëë reeman respekt ni been Dios, luar guiën reeman laaman guial beenman laa reen, abi' laaman rayal gap ree bejn respekt zianczi. Amén.

²⁶ Zeel gulëëladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. ²⁷ Ziangajc zien ree xinguaaw ad nabantri xnejz, rën gajc lasa' xinguaaw reex, xinguaaw con xinguaaw rüjn reex ni dxuudx, ni natu. Abi' laagajc reex rguuil xcasti reex.

²⁸ Abi' guial ad ridxga't reeman Dios, zeel gulëëladx Dios laa reeman loj xixgab mal reeman, din güün reeman ganax ni ad rayalt güün reeman. ²⁹ Ganax ni ad rayalt güün reeman rüjn reeman, za'në reeman xinguaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee reeman bejn, ganaxczi ni mal

yu'guijc reeman abi' rbëë reeman xtiidxguijdx bejn.
³⁰ Rnieeguijdx tëë reeman bejn, ralen reeman Dios, ad rajpt reeman bejn respekt, rlies xvalor gajc reeman, rüjn reeman benro'. Abi' rbëëguijc reeman ni mal ree, ad ruzoob tëët xtiidx xdad xniaa reeman. ³¹ Dád nad reeman, ad rüjnt cumplid xtiidx reeman, ad rënt lasa' reeman, ad raya tëët lasa' reeman. ³² Ragbeecheaaw reeman rëb Dios guial chi guiët ree bejn, dxe gra ree bén rüjn gra ree ni guin yayal casti. Per majsi zian, rus-nuu gajc rüjn reeman ni mal guin ree abi' xt rabaa reeman chi rüjn ree ben ren zian.

Xguialguxtis Dios

2 Zeel chutëëz lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjn zi'cgajc rüjn reeman. ² Per dunuj ree rayagbee guial Dios rüjn guialguxtis zi'c rayal, chi rudëëdaman casti bén rüjn ree ni mal guin. ³ Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. ⁴ Ad rëntil guialnaza'c Dios con lüj, ad rëntil guial rdaanman lüj rajp tëëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjn xgab por xtolil. ⁵ Per guial dád nadil, ad rëntil yajejquil loj Dios, zeel lüj gajc cayüjnxhie xtolil par dxej ni gudëëd Dios casti, dxej ni güünman guialguxtis zi'c rayal. ⁶ Par gudëëman ni rayal tijbgaj bejn bal gonin beenman. ⁷ Gudëëdaman guialnaban tiblayaa loj ree bén ad radxagt rüjn nagueijn guiban zagdx guial rüjn reeman nagueijn yayal reeman guialnaza'c yu' xanyabaa, rüjn tëë reeman nagueijn yaya'n reeman zagdx loj Dios din gap reeman cuerp ni ad yu't dxej nit. ⁸ Per ree bén ad ruzoobt diidx, rdxe'ch Dios laa reeman abi' gudëëdaman laa reeman casti, din luar chinal reeman xtiidxliman, zinal reeman nejz mal. ⁹ Gra ree bén zinal nejz mal, naya sac reeman sagdiaj reeman, yaloj ree bén Israel dxe bén ad najt ree bén Israel. ¹⁰ Guiáad ree bén zë loj nejz zagdx, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bén Israel dxe ben ad najt ree bén Israel.

¹¹ Din Dios tiblojzi rüjnman guialguxtis con gra bejn. ¹² Gra ree bén cayüjn dol sin guial ad nünbeet reeman ley badëëd Dios loj Moisejs, tëd reeman casti sin ley guin. Guiáad ree bén cayüjn dol majsi ragbee reeman ley guin, laa reeman tëd casti zi'c rniabee ley guin. ¹³ Din ad guial guientzi bejn ley guin ma nayaman loj Dios, bén rüjn ree zi'c rniabee ley guin laa reeman naj bén naya loj Dios. ¹⁴ Per chi ad najt bejn bén Israel, abi' cayüjnman ni zagdx sin guial güünbeeman ley guin, dxe ma cayüjnman zi'c rniabee ley guin majsi ad nünbeetaman laan, guialzi nünbeeman conin naj ni zagdx con tëë nin naj ni mal, abi' guijc gajc reeman zëëd xley reeman. ¹⁵ Din zi'c naban reeman, rguien guial guijc reeman zëëd conin rayal güün reeman con tëë nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdx o chi ma been reeman ni mal. ¹⁶ Zian gac chi

güün Dios guialguxtis por gra ree ni naguei'ch ni rüjn béguidxliuj. Abi' zi'c culün bejn ree guidibcz, laaman güün guialguxtis por Jesucrist.

Bén Israel ree në xley Moisejs

¹⁷ Yan, lüj guial najl bén Israel yu'guijquil guial rajquil ley badëë Dios loj Moisejs, abi' rüjnl nabë guial najl xbejn Dios, ¹⁸ rëbil guial ragbeel xhienaag rën Dios guibanl, abi' por xleyaman ragbeel conin naj zagdx güünl. ¹⁹ Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios, ²⁰ naladxil zile' gulüül bén ad rajt ree në ree bén rajc ta'nzi, guial por ley guin ragbeel gra, ragbee tëël conin naj diidxli. ²¹ Per zi'c nabanl, zchexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', zchexquiza zeel rbanl? ²² Rëbil guial ad laat sunë bejn bén ad najt lacheelaman, abi' lüj, zchexquiza zeel rüjnl zian? Rëb tëël guial rdxe'chil ni naladx bejn naj dios, abi', zchexquiza zeel rbanl lën yadoo lod yu' ree Dios guin? ²³ Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin. ²⁴ Ze'cli rëb loj xtiidx Dios: "Bén ad najt ree bén Israel rniee reeman Dios diidxguijdx por lëjt."

²⁵ Diidxli rüjnqui sirv guial ru xcuerp bejn sen ni ru ree bén Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. ²⁶ Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxe ma nayabaman zi'c tijb bén yu' sen, majsi ad yu'taman sen guin. ²⁷ Bén rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin. ²⁸ Din ad guial rajlt bejn loj nacion Israel, ad guial yu' tëëtaman sen ni ru ree bén Israel ma najman bén Israel loj Dios, ²⁹ bén wali naj bén Israel loj Dios, guidib luxdoo zinalaman xnejz Dios, ad por guial yu'taman sen ru ree bén Israel, ad por xcostumbr tëët reeman, por guial naban reeman con xSprijt Dios. Abi' bén naban zian, Dios rlies xvaloraman sa'n ad béguidxliujt.

3 Zeel zanadi lon xhieci gan naj bejn bén Israel o xhieci gan chu'man sen ru ree bén Israel. ² Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëëd Dios xtiidxaman. ³ Yan ad nalaxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman. ⁴ Din laaman ad yu't dxej guchaa xtiidxaman, majsi gra béguidxliuj naj bén rusquiee, per Dios ad nëtaman rusquiee, zi'c rëb tiblajt loj xtiidxaman lod rëb:

Gra bejn güünbee lüj guial rüjn cumplid xtiidxil, abi' achet zajc gudxiib reeman guijsquil.

⁵ (Per yu' bejn rüjn xgab) guial bal por dol ni cayguieen ree rulüü guial benza'c naj Dios, zchexquiza zeel najman benmal rudëëdaman bejn casti? ⁶ Per naj rni lojdi guial ad najt Dios benmal, din bal najman benmal xoxa güün xguialguxtisaman con béguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rün judar xtiidxli Dios din gap bejn laaman mazri respekt, dxe ad zajctri guiëb Dios naj bejn bëndol. ⁸ Abi' mazri ma yaguien ree ni mal din guit' ni zagdxe, zi'c rëb ree bejn culün bejn ree, per Dios gudëd casti bën rëb ree zian.

Graczi bejn ma been dol

⁹ Zeel zi'c ma rnin por ree bén Israel, në por ree bén ad najt bén Israel, abi' ma ragbeedi guial ad zajct guiëbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree bëndol. ¹⁰ Zi'c ca tibljat loj xtiidx Dios lod rëb:

Achutczu naj benza'c,
per ni'qui tijb bejn.

¹¹ Achutczu rignia'.

Achutczu raguill Dios.

¹² Gra reeman ma basa'n xnejz Dios.

Gra reeman ma zinal nejz mal.

Achutczu cayün ni zagdxe,
per ni'czi tijb bejn.

¹³ Zi'cgajczu tijb baa ni zobjyal,
zian ganax ni dxuudx ririi ro' reeman.

Ganax diidx rusquiee rnnee reeman.

Abi' xtiidx reeman naj zi'c xvenen bëel.

¹⁴ Ganax diidx mal ririi ro' reeman,
diidxguijdx ni rünnaa lasa' reeman.

¹⁵ Za'sin reeman din gugüjt reeman bejn.

¹⁶ Bantëez guin zë reeman, rün reeman ni dxuudx ree.

Abi' rusagzi reeman bejn ree.

¹⁷ Ad nünbee tët reeman xhienaag naj guialrbajn bejn zagdxe.

¹⁸ Ad yu'guijct reeman guial rayal guidxeb reeman Dios.

¹⁹ Dunuj ree rayagbee guial gra ni zëd loj xley Dios, naj par ree bén zinal ley guin, chitëe chu guiëb guial achut ragbee xhienin naj dol, laan naj par gagbee bejn guial najman bëndol loj Dios. ²⁰ Din ad guial günt bejn gra ni rniabee ley guin ma nayaman loj Dios, ley guin rulüü din gagbee bejn guial najman bëndol.

Por guialrliladx ma naya bejn loj Dios

²¹ Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguientzi ree zi'c rniabee ley guin, por ley guin në por ni bacaa ree bén badëe xtiidx Dios loj ree bejn. ²² Rayagbee ree guial rün Dios bejn cwent zi'c bën ad yu't xtol por guialrliladxaman Jesucrist, din par Dios tiblojzi naj bejn. ²³ Din gra bejn ma been dol, achutczu naya niz loj Dios. ²⁴ Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bën gudix por dux tol ree chi gütaman loj crüz. ²⁵ Dios guxhaal Jesucrist, din por xrejman chu' perdon par benguixliuj. Abi' perdon guin naj par ree bén rliladx Jesucrist. Zian rguen guial graczi rün Dios xnejz, abi' bal guia'xchej ad beent

xguialguxtisaman por dol ni been ree bejn, laan naj por pacens ni rajpaman con bejn, ²⁶ guial ma ragbeeman goc güün xguialguxtisaman. Zian rusnuu rulüüman guial graczi rünman xnejz, zeel rünman perdon xtol ree bén rliladx Jesucrist.

²⁷ Yan, xhienaag yaguien ree nabë? Achet yaguiennë' ree nabë, din ad guial yaguien ree ley guin cumplid ma nayajc ree perdon, yayajc ree perdon por guial yaliduladx ree Jesucrist. ²⁸ Zeel rayagbee chaaw ree guial Dios rün perdon xtol ree bejn guial rliladx reeman Jesucrist, ad guial rün bejn naguejn güünman gra ni rniabee ley guin.

²⁹ Wen xDiosi ree bén Israel naj Dios ya, ad nët ree bën ad najt bén Israel naj xDios laaman ya? Naj rni lojdi guial Dios naj par gra bejn, ³⁰ din tijbzi Dios yu', laaman rün perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel.

³¹ Ad naladixidi cayguieen ree ley guin tiblad guial raliduladx ree Jesucrist, din ad ziantan, guial raliduladx ree laaman rguen guial nadxu'guicj ree ley guin.

Xguialrliladx Abraham

4 Yan, xhie zajc yaguie'ch ree xcwent dux bégulal ree Abraham? ² Bal niyab Abraham zi'c tijb bën gad güün dol por ree ni beenman, guyu mod nünman nabë loj ree bejn, per ad lojt Dios. ³ Din rëb loj xtiidx Dios: "Guial bililadx Abraham Dios, zeel been Dios laaman cwent zi'c tijb bën ad beent dol." ⁴ Chi rün bejn dxiin, milia ni rajxaman ad ni razaladxt reeman, rtia'-man laan por dxiin ni rünman. ⁵ Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëdan guial rliladx bejn Jesucrist, zeel rün Dios bejn cwent zi'c bën ad yu't xtol. ⁶ Zi'c gunee rey Davi guial xiquilbaa ree bën been Dios cwent sin dol sin guial güün reeman xhienin par yayal reeman perdon guin. ⁷ Rëbaman:

Xiquilbaa ree bën been Dios perdon xtol,
bën ma badxi'caman xtol.

⁸ Xiquilbaa ree bën ma been Dios cwent sin dol.

⁹ Ad gunee Davi diidx guie ree naabzi par bën yu' ree sen ni ru ree bén Israel, gunee man diidx guin ree par gra ree bejn. Din zi'c ma raguie'ch ree, Dios been Abraham cwent zi'c bën ad yu't xtol guial bililadxaman laaman. ¹⁰ Abi' chi biyabaman zi'c bën ad yu't xtol, ni'qui gadaman chu' sen ni ru ree bén Israel, chi gad Abraham chu' sen guin mal nün Dios laaman cwent zi'c bën ad yu't xtol. ¹¹ Chi biabaman zi'c bën ad yu't xtol, dxe guyuman sen guin din sen guin naj guial ma nün Dios laaman cwent zi'c bën ad yu't xtol guial bililadxaman laaman. Zeel naj Abraham dad par ree bén rliladx Dios, majsi ad yu't reeman sen ni ru ree bén Israel, per por guialrliladx guin nün Dios laa ree man cwent zi'c bën ad yu't xtol. ¹² Naj tëe Abraham dad par ree bén majsi yu' sen guin per rliladx reeman zi'c bililadx Abraham Dios diidx chi gadaman chu' sen guin.

Promejs ni been Dios loj Abraham

¹³ Chi been Dios promejs loj Abraham në loj ree xdi-aaman, guial gudëedaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb Bén ad yu't xtol. ¹⁴ Yan bal ganaxzi ree Bén zinal ley guin tia' ni gudëe Dios, achet cwent naj guialrliladx ree bejn laaman, ache tëët cwent naj promejs ni been Dios loj Abraham. ¹⁵ Din ley guin najn par castizi, per lod ad yu't ley, ad yu't mod chu guiëb guial ad cayüjnt bejn ley guin cumplid.

¹⁶ Zeel chi been Dios promejs loj Abraham guial gudëedaman ni rëbaman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree Bén zinalt ley guin naj promejs guin, nëgajc par ree Bén rililadx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. ¹⁷ Zi'c ca loj xtiidx Dios lod rëbaman loj Abraham: "Lüj gac dad par zien ree bénguidxliuj." Zian naj promejs ni been Dios loj Abraham, Dios Bén rusban ree bengüt abi' rnieeman xcwent ree ni gad chu' loj guidxliuj guie zi'c rulüü ma yu' reen.

¹⁸ Majsi ragbeechaaw Abraham guial ad zajctaman famil, per chi rëb Dios lojman zian, bililadxaman ni rëb Dios, bililadxaman guial gac gra ni rëbaman lojman. Zianan zeel najman dad par gra ree Bén rililadx Dios zi'cgajc laaman. Zi'c rëb Dios lojman, chi rëbaman: "Zian gaquil famil, dád famil narooob gaquil." ¹⁹ Cost tibgayuu ijz ma yu' Abraham nadxel, ragbeeman guial ma naj reeman bengol në xbéngunaaman Sara guial chu' xi'n reeman, per ad guyunawëëgtaman, bililadxaman ni rëb Dios lojman. ²⁰ Ad yu't dxej ad bililadxtaman ni rëb Dios. Diidxli bililadxaman laaman abi' rudëëman quixtëe lojman, ²¹ din guidiblagaa bililadxaman guial rajp Dios guialrniabee güünman zi'c ma rëbaman. ²² Zeel been Dios cwent Abraham zi'c tijb Bén ad yu't xtol.

²³ Abi' lod rëb guial been Dios laaman cwent zi'c Bén ad yu't xtol guial bililadxaman laaman, ad tijbtzi Abraham ruza't yagaj, ²⁴ nëgajc dunuj ree din ma raliduladx ree Dios. Abi' në dunuj ree ma nünman cwent zi'c Bén ad yu't xtol, Dios Bén basban Dad Jesucrist loj guialgüjt, ²⁵ Dad Jesucrist Bén güjt por dux tol ree, dxej babanman abi' por laaman ma naya ree loj Dios.

Chi ma naya bejn loj Dios

5 Ma nün Dios dunuj ree cwent zi'c Bén ad yu't xtol guial raliduladx ree laaman, zeel ma nadxu' ree zagdx con laaman por xguialgüjt Dad Jesucrist. ² Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëëz ree yayal ree xanyabaa lod za'man. ³ Abi' ad ziantzi, në guial yu' du luxdoo ree zagdx con guialrzagdiaj ni radüüd ree,

din rayagbee ree por guialrzagdiaj guin yasiid ree yaya'p ree pasens. ⁴ Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. ⁵ Ni ralëëz ree por Dios, ad zasa'nx-tutan dunuj ree, din rayagbee ree guial rën da'taman dunuj ree por xSprijtaman Bén ma baneeman duloj ree.

⁶ Gocli babajn ree ad bile't nagueien ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree bëndol.

⁷ Dunuj ree rayagbee guial nawëëg naj chu' Bén tiëb guiët por zatijb bejn. Ni'czi por tijb Bén naban xnejz, o wed yu' Bén tiëb guiët por tijb benza'c da't. ⁸ Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree bëndol. ⁹ Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. ¹⁰ Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, Bén guxhal nejz par loj Dios. ¹¹ Abi' ad laatzan, në guial yu' du luxdoo ree nix radëëd ree quixtëe loj Dios por Dad Jesucrist, din por laaman ma nadxu' ree zagdx con Dios.

Adán në Cristo

¹² Por tijb xinguaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol. ¹³ Diizd chi gad ley ni badëëd Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol. ¹⁴ Per majsi zian, bidxinczi dxej ni güjt reeman, diizd xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb Bén naj gui't.

¹⁵ Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, në ni mazri zagdx par zien ree bejn. ¹⁶ Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. ¹⁷ Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree Bén rililadx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

¹⁸ Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdx ni been Jesucrist ma zajc gap ree bejn perdon në guialnaban loj Dios. ¹⁹ Din por tijb Bén ad bazoobt diidx gra bejn naj bëndol. Per ziangajc por tijb Bén bazoob diidx ma zajc gap bejn perdon loj Dios.

²⁰ Abi' Dios badëë ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon.

²¹ Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijct ree guial rën Dios dunuj ree, din guial rënman dunuj ree nünman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

Ma bayëjt ree par dol per nabajnnë' ree Jesucrist

6 Ad naladixidi canin lojdi guial yaguieen ree dol mazri din guien Dios dunuj ree mazri. ² Din ad ziantan, ma bayëjt ree par dol ad rayaltri yaguieen ree dol. ³ Din gol bignia' guial chi barobnijs ree por Jesucrist, laan naj zi'c rulüü guial në dunuj ree ma bayëjt con laaman. ⁴ Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

⁵ Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree. ⁶ Din dunuj ree rayagbee guial chi güt Jesucrist loj crüzj, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree. ⁷ Din bën ma güjt por dol, ad rniabeetri dol guin laaman. ⁸ Abi' guial güjt Jesucrist por dux tol ree, zeel ma bayëjt ree par dol guin, yabajn tää ree con laaman. ⁹ Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman. ¹⁰ Con ti-voltizi güjt Jesucrist por xtol ree bejn, yan ma nabanman par Dios. ¹¹ Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

¹² Zeel la'tgaj nabandi loj guidxliuj guie ad tiëbidi nabee dol lëjt, ad tiëb täädi güün ree xgabdXuudx lëjt gan. ¹³ Ad cwëëladx lëjt gajc loj dol par güündi ni mal, zagdxeli gol cwëjb nabee Dios lëjt, zi'c tijb bën ma güjt, abi' yabandi par laaman. Gol cwëjb nabeeman lëjt par güündi ni zagdx. ¹⁴ Zian ad zanabeetri dol lëjt, per ad por guial yu'guijctidi ni rëb ley ad güündi, ad zanabeetri dol guin lëjt por guial zinalidi guial rën Dios lëjt.

Ma gulaa ree loj dol

¹⁵ Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. ¹⁶ Lëjt ragbee bal yu' chu rniabee dunuj ree, yazoob ree xtiidx bën rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon. ¹⁷ Per quixtää Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. ¹⁸ Abi' yan guial ad rniabeetri dol lëjt, ma nabandi din güündi zi'c rën Dios. ¹⁹ (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni

dxuudx ree në graloj ree ni mal, ziangajc yan guidibla-gaa gol cwëjb nabee Dios lëjt din gac güündi ni zagdx guiban täädi zi'c rënman.

²⁰ Chi gunabee dol lëjt ni'quid guyutidi xgab nibajndi zi'c rën Dios. ²¹ Per, xhieza gan beendi por ni mal ni beendi nadxel, ni mal ni ratunëdi yan guial ma ragbeedi por laan zëëd xcasti Dios? ²² Per yan guial ad rniabeetri dol lëjt ma zinalidi xnejz Dios, abi' laan naj ni zagdx din por zian ma zajc guibandi zi'c rën Dios gap täädi guialnaban tiblyaa con laaman. ²³ Din ni rün bejn gan por dol laan naj casti, per ni razaladx Dios naj guialnaban tiblyaa par ree bën ma naj tijbzi con dux Dad ree Jesucrist.

Ni naj zi'c gualruxhliaa

7 Compniar raliduladx ree Jesucrist, lëjt ragbee xhienaa naj tijb ley. Ley guin naj ni rniabee bejn la'tgaj nabanman. ² Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren. ³ Zeel bal naban lacheelaman abi' guchajgaman ben ren, dolan cayünman. Per bal ma güjt lacheelaman dxel achet ley gudxoon guial guxhliaanëman ben ren ad cayün täätan dol.

⁴ Ziangajcan lëjt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bën baban zatijb, abi' zian ma zajc yaguieen ree zi'c rën Dios yaguieen ree. ⁵ Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. ⁶ Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tää mod ni nabajn ree, ma zajc yaguieen ree zi'c rën Dios por xSprijtaman bën nabajnnë' ree, ad guial nadxu'guijct ree ley guin.

Ley con dol

⁷ Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee täätan guial dol naj gualrzëëbladx, bal id rëb loj ley guin: "Ad sëëbladxil." ⁸ Per chi gogbeen guial ni mal naj gualrzëëbladx, mazri gojcxhiejd da dolan por gra ni guzëëbladxan. Bal id yu' ley, ad zagbeet bejn xhienin naj dol. ⁹ Chi gadan günbee ley guin, par naj zagdx nabanman. Per chi benbeen ley guin, gogbeen guial cayünan dol abi' por dol guin rayalan casti. ¹⁰ Bi't ley guin din gagbee bejn xhienaa guibanman, per par naj bi'tzan par gudëëdan naj casti. ¹¹ Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

¹² Zeel ad ni malt naj ley guin din loj Dios zëëdan abi' gra ni zëëd loj ley guin loj Dios zëëdan, abi' zagdx xnejz tää naj ni rëb loj ley guin. ¹³ Ad ley guint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

¹⁴ Dunuj ree rayagbee guial por Dios zëed ley guin, per guial najn bénguidxliuj zeel zianczi rŭjn dol guin naj gan. ¹⁵ Ad rignia'tan xhienin rajcan, din ad rŭntan ni rēnan, aal ni ad rēntan rŭnan. ¹⁶ Abi' chi rŭnan ni ad rēntan gŭnan, zian ragbeen guial ni zagdxequi naj ley guin, din por ley guin ragbeen xhienin cayŭnan. ¹⁷ Zeel ad najtczi rŭn guial rŭnan ni ad rēntan, rŭnan laan guial najn bēndol, abi' zianczi rŭjn dol guin naj gan. ¹⁸ Din guial najn bénguidxliuj, ragbeen guial ni'czi ta'n ad najtan benza'c, majsi rēnan gŭnan ganax ni zagdx, per ad rajctan. ¹⁹ Ad rŭntan ganax ni zagdx ni rēnan gŭnan, aal ganax ni mal rŭnan ni ad rēntan gŭnan. ²⁰ Yan bal rŭnan ni ad rēntan gŭnan, ad najtczi rŭn par gŭnan laan, rŭnan laan guial najn bēndol abi' zianczi rŭjn dol naj gan.

²¹ Ragbeen guial majsi rēnan gŭnan ganax ni zagdx, per laa za' gajc dol guin par gŭnan naj gan. ²² Dád ruladxan gra zi'c rniabee Dios gŭnan, ²³ per yu' ni rudxoon gŭnan laan, abi' ni rudxoon guin naj dol, guial stanaban dol guin luxdon abi' zianczi rŭjn naj gan.

²⁴ ¡Prob naj! ¿Chu zajc yabëe naj loj casti rayalan por dol ni rŭnan guial naj naj bénguidxliuj? ²⁵ Per quixtëe Dios guial por dux Dad ree Jesucrist ma gulaan loj casti guin. Diidxliczi da xgaban naj guial gŭnan ganax ni rniabee Dios, per guial najn bénguidxliuj zeel zianczi rŭjn dol guin naj gan.

Guialnaban runee xSprijt Dios

8 Gra ree bén riladx Jesucrist ad rayaltri reeman xcasti Dios, bén ad nabantri ree zi'ctzi rēn reeman, laa reeman ma rŭjn reeman naguiejn naban reeman zi'c rniabee xSprijt Dios. ² Din por xguialrniabee xSprijt Dios, bén runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal tēetri ree xcasti Dios. ³ Guial nayajc ree bénguidxliuj ad bile't nŭjn ley dunuj ree yudar, ley ni badëed Dios loj Moisejs. Per yan ma been Dios ni ad bile't nŭjn ley guin. Laaman guxhaal Xi'n loj guidxliuj zi'cgajczi tijb bénguidxliuj persi gŭjtaman por dux tol ree chitëe nabeeri dol dunuj ree. ⁴ Laaman been zian, din yaguieen ree zi'c rēnman zi'cgajc tijb bén cayŭjn zi'c rniabee ley guial ad nabantri ree zi'ctzi rayēn ree, ma nabajn ree zi'c rniabee xSprijt Dios.

⁵ Bén naban ree zi'ctzi naj xixgab reeman, mazri yu'guijc reeman gŭn reeman zi'ctzi rēn reeman. Per ree bén naban zi'c rniabee xSprijt Dios, mazri yu'guijc reeman gŭn reeman zi'c rniabee Sprijt guin. ⁶ Guial yu'guijc bejn gŭnman zi'ctzi naj xixgabaman zeel zëed casti. Per bén yu'guijc gŭn zi'c rniabee xSprijt Dios, zajpaman guialnaban con Dios yabe'cdx tēe Dios luxdooman. ⁷ Bén yu'guijc ree guiban zi'ctzi naj xixgab reeman, rdxe'ch Dios laa reeman din ad rēnt reeman guzoob reeman xtiidxaman ad rile' tēet gŭn reeman zi'c rēnman. ⁸ Zeel bén naban ree zi'ctzi naj xixgab reeman, ad ruladxt Dios ni rŭjn reeman.

⁹ Per lëjt ad nabantridi zi'ctzi naj xixgabidi, ma nabanidi zi'c rniabee xSprijt Dios, bal wali ma nabannëdi xSprijt Dios. Din bén ad nabannët xSprijt Dios, ad naj-

taman xbejn Cristo. ¹⁰ Per bal ma nabannëdi Cristo, rēn guiëban guial ma gŭjtidi par dol, ma nabannëdi xSprijt Dios din ma nŭjn Dios lëjt cwent sin dol. ¹¹ Abi' bal ma nabannëdi xSprijt Dios, bén basban Jesucrist loj ree bengüt. Majsi guiëtidi per zasban Dios lëjt din tia'-di zatijb guialnaban por xSprijt Dios bén nabannëdi.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. ¹³ Din bal nabanidi zi'ctzi naj xixgabidi, dxe' yayalidi casti, per bal por xSprijt Dios bén nabannëdi ma basa'ndi dol tiblax dxe' ma gapidi guialnaban tiblax con Dios.

¹⁴ Gra ree bén rtiëjb rniabee xSprijt Dios laa reeman, laa reeman naj xi'n Dios. ¹⁵ Din ad nabannët reeman xSprijt Dios par guidxeb reeman, zi'c rdxe' tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: "¡Dad!" ¹⁶ Din xSprijt Dios rusni dunuj ree persi rayagbee ree guial ma nayajc ree xi'n Dios. ¹⁷ Abi' guial nayajc ree xi'n Dios dxe' ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

¹⁸ Ma benan xgab guial achet lasajc guialrzagdiaj ni caydüd ree yan guial loj guialnaza'c ni yaca' ree xanyabaa. ¹⁹ Abi' xt gra ree ni badxe' Dios loj guidxliuj, ma rēn nejzdoo reen guidxin dxej guiguieen chu ree nin naj xi'n Dios. ²⁰ Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin ²¹ yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. ²² Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiaj zi'c rzagdiaj tijb béngunaa chi ma gal xi'nman. ²³ Abi' ad tijbtizi guidxliuj guin cazajc zian, nëgajc dunuj ree guial nabajnnë' ree xSprijt Dios zi'c tijb sen por ni guneee Dios duloj ree. Abi' cayzaagdiaj ree la'tgaj caylëjz ree guidxin dxej ni guiguieen guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb. ²⁴ Dunuj ree rayagbee guial gac zian, laan naj ni ralëjz ree guialraliduladx ree ma nayajc ree perdon. Lëjt ragbee bal ni ralëjz ree ma gojcan, ad zalëeztri reen din ad zajctri cwëz bejn ni ma gojc. ²⁵ Per bal gad ni caylëjz ree gac, ad rayalt yadxag ree yalëez ree gacan.

²⁶ Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rile't yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiarguiejn ree, dxe' laaman rbejdx rniab Dios por dunuj ree. ²⁷ Abi' Dios, bén nŭnbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rēn Dios.

Achet zajc gŭn dunuj ree gan

²⁸ Dunuj ree rayagbee guial gra ni cayza'c ree loj guidxliuj guie naj ni gŭn sirv par dunuj ree guial rayēn ree Dios, dunuj ree guial bazoob ree xtiidxaman par yaguieen ree zi'c rēnman. ²⁹ Abi' diidz guialxchej

ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bén nabee loj gra ree bén naj Xi'n Dios. ³⁰ Gra ree bén ragbee Dios guial chililadx reeman laaman, rbejdxaman laa reeman din gac reeman xbejnman, rüjnman laa reeman cwent sin dol abi' rudëëman xanyabaa loj reeman lod zobjaman.

³¹ Yan, guial ma rayagbee ree gra ree ni guie, achet güünan chutëëz güün xcontr dunuj ree, dunuj ree rayagbee guial Dios gagnë dunuj ree. ³² Ad gurexuut Dios nudëë Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, zdiidxgui ree ni ren ree nid zuneeman duloj ree ya? ³³ zChu zajc cwe'c dux guialquia ree nayajc ree bén ma gulej Dios? Din Dios ma nün dunuj ree cwent sin dol. ³⁴ Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. ³⁵ Zi'c rën Cristo dunuj ree, achut zajc yala' dunuj ree con laaman. Ni'qui por guialyu'naya, o por guialzi, o por ni rüjn bejn dunuj ree, o por guialrli-aan, o por guial ryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman. ³⁶ Zi'c rëb loj xtiidx Dios:

Guial nayajcan xbejnl, zianczi nadxu'n loj guialgüjt.

Rüjnnë reeman dunujn zi'c ree xiil ma naj guiët.

³⁷ Per ni'qui tijb ni guin ad züjnt dunuj ree gan guial ragnë Cristo dunuj ree, bén rën dunuj ree. ³⁸ Ragbee chaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëëd gac, ³⁹ o ni zëëd xanyabaa, o lën liuj, ni'qui tijb ni been Dios, achet czi achut tëët zajc chiquied guialrën Dios dunuj ree por dux Dad ree Jesucrist.

Dios gulej bén Israel ree

9 Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, ² guial guixie guixie dád yu'naya luxdoon, xt ni'quid radxelj xhie günan. ³ Balzianclaa majsi ad zayaltan perdon, majsi güün Cristo naj tiblad, per bal zian chile' günan yudar bén ladx reen chitëë yayal reeman casti. ⁴ Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëënin güün reeman, badëë tëë xleyaman loj reeman. Rëbaman loj reeman xhienaag guiën reeman laaman, been tëëman promejs loj reeman. ⁵ Zëëd reeman loj xdiaa ree bén been ree sirv loj Dios gulal, loj gajc ree bén zëëd Cristo chi bi'taman loj guidxliuj, laaman naj bén nagle' zianczi rajp tëëman guialrniabee loj gra ni yu'. Amén.

⁶ Ad canitan guial ad züjntri Dios xpromejsaman cumplid, ni canin naj guial ad grat ree bén Israel naj xbejn Dios. ⁷ Ad guial zëëdt reeman loj xdiaa Abraham din gac reeman xdiaaman, din rëb Dios loj Abraham: "Diizd xi'nl Isaac suloj xdiaal." ⁸ Laan rulüü dunuj ree

guial ad por guial najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham guial rililadx reeman xtiidx Dios zi'c Abraham. ⁹ Din Abraham bililadxaman Dios chi rëb Dios lojman: "Zatib ijz tiamp guie gajc guialan abi' dxej zii ree ma ca' Sar tijb xindobëz."

¹⁰ Abi' ad laatzan. Grop ree xi'n Rebeca gojc xdad reex Isaac, bén goc dux bégulal ree, ¹¹ per chi gad reex gal, chi ad wayüjn tëët reex ni zagdx ni'qui ni mal, rëb Dios loj Rebeca: "Xin yaloj guin laax güün sirv loj xinguag guin." Zi'c rëb loj xtiidx Dios lod rëb: "Guyënan Jacob, per bidxe'chan Esaú." Zian rguien guial ma ragbee Dios chu rbeman ad por ni rüjnt bejn, laaman ma ragbee chu rucaabeeman.

¹⁴ Yan, zpor zian yaguie'ch ree ya, ad rüjnt xguialgux-tis Dios zi'c rayal? jPer ad ziantan! ¹⁵ Din Dios rëb loj Moisejs: "Yayan bén rënan yayan abi' bén rayal ree casti, bal rënan ad zudëëdtan laa reeman casti." ¹⁶ Zeel ad zile't yaya Dios bejn por xixgabzaman o por ni rüjnman, laaman mal ragbee chu rënan yayaman. ¹⁷ Loj xtiidx Dios rëb guial rëbaman loj rey Egipto: "Naj ben lüj rey din guiguien da guialrniabeen din güünbee gra béguidxliuj naj." ¹⁸ Zeel rnin lojdi guial ma ragbee Dios chu yayaman chu tëë güünman luxdoo gojl.

¹⁹ Per wed por zian nadi: "Bal zianan, zchexquiza zeel rdxe'ch Dios guial nayajc ree zi'c nayajc ree awa ad zajc yadxoön ree zi'c naj xixgabaman?" ²⁰ Per, zchu naj béguidxliuj din guinieeman Dios zian? Wen zajc guiëb tijb guiajs loj bén been laan ya: "zChexc zeel been! naj zian?" ²¹ zNid bén rüjn guiajs guin rüjnnë bajn guin zi'ctzi rënman ya? Laaman ruguiaa xhie güünneëman bajn guin, bal güünman guiajs güün dxiin guixie guixie o güünman guiajs güün dxiin dxej zobjlojzi ree.

²² Yan, ziangajc Dios ma ragbeeman chu rayal casti, abi' xt zajc laa nudëëd gajcaman casti din guiguien xguialrniabeeman. Per gudaanman gojp tëëman pacens bén ad ruzoobt ree diidx, bén rayal ree nit.

²³ Gudaanman laa reeman din guiguien guial laaman guinia xhienaag güünman, guial laaman naj bén ca' guialrniabee abi' bayaman bén ragbeeman diizd guial'xchej guial yayal reeman xanyabaa. ²⁴ Abi' laa reeman naj dunuj ree bén ma gurejdx Dios, loj ree bén Israel në loj ree bén ad najt bén Israel. ²⁵ Zi'c ca loj libr ni bacaa Oseas bén badëë xtiidx Dios loj ree bejn, lod rëb:

Bén ad najt ree da bejnan, guiën loj reeman guial naj reeman da bejnan, abi' ree bén ad yu't bén rën laa reeman, naj guiën laa reeman.

²⁶ Abi' lod rëb Dios loj ree bejn: "Ad da bejntan lëjt".

Yagaj gac reeman xbejnman, laaman guial najman bén naban.

²⁷ Guiáad Isaías bén badëë xtiidx Dios loj ree bejn, rëbaman por ree bén Israel: "Majsi zien da't naj ree bén Israel zi'c üx riga' ro' nijsdoo, per ta'nz naj ree bén laa loj casti, ²⁸ din Dios nayob güün cumplid xtiidxaman loj guidxliuj guie zi'c ma rëbaman." ²⁹ Abi' diizd gocli rëb Isaías loj ree bejn:

Bal nitiëjb dux Dad ree Dios
bén rajp gra gualrniabee
ninijt gra ree dux bégulal ree,
diizd gocli mal gunijt dux diaa ree
zi'c gunit ree bén Sodoma në ree bén Gomorra.

Bén ad najt ree bén Israel ma naj reeman perdon loj Dios

³⁰ Yan, ¿xhie yaguie'ch ree? Bén ad najt ree bén Israel ni'quid guyut reeman xgab xhienaag gac reeman perdon loj Dios, per yan ma naj reeman perdon gual rililadx reeman Jesucrist. ³¹ Abi' ree bén Israel majsi dád been reeman nagueijn guiban reeman zi'c rniabee ley din gac reeman perdon loj Dios, per ad gojctan. ³² ¿Chexc zeel ad bile't niajc reeman perdon zian? Gual mazri been reeman nagueijn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb "guiaj ni rliadx guia' bejn" ³³ zi'c ca loj xtiidx Dios lod rëb:

Ma gulen tijb bejn luguiedx Sión, bén gac zi'c tijb guiaj

ni ladx guia' ree bejn abi' gusajban laa reeman.
Abi' bén chililadx laaman ad yu't dxej yaya'nxtuman.

10 Compniar raliduladx ree Jesucrist, ni rënan rni-aab tëën loj Dios naj gual gac ree bén Israel perdon. ² Din naj ragbee gual dád cayün reeman nagueijn cayün reeman sirv loj Dios, per diidxli ad rignia't reeman zagdx xhienaag rën Dios güün reeman. ³ Din ad rtiëjbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon. ⁴ Din por Jesucrist bayaaloj zi'c rniabee ley güün bejn, yan bén rililadx ree laaman, ma naya reeman loj Dios.

⁵ Bén rën gac naya loj Dios gual zinalaman ley, rëb Moisejs gual bén güün zi'c tal rëb ley, zajpaman gualnaban la'tgaj cayünman zi'c rniabee ley guin.

⁶ Per gual rajc bejn naya loj Dios por gual rililadxaman Jesucrist, naj gual ad züjntaman xgab: "¿Chuczi zajc chë'p xanyabaa?" (Din rën guiëban gual ad rililadxtaman, abi' rënman guguaaman guiat Cristo loj guidxliuj.) ⁷ Ad guiëb tëëman: "¿Chu zajc che lod za' ree bengüt?" (Din rën guiëban gual ad rililadxtaman, abi' rënman guguaaman yaban Cristo loj ree bengüt.)

⁸ Per loj xtiidx Dios rëb: "Gajxh za' xtiidx Dios con lüj, ryaadxzi güünl xgab guiëb tëël bal chililadxil laan." Din gualrililadx ni ratie'ch ree naj ze. ⁹ Bal yaneero'l gual Jesús naj Dad par lüj abi' guidib luxdool chililadxil gual basban Dios laaman loj ree bengüt, dxei ma najl perdon. ¹⁰ Din chi chililadx bejn Jesucrist con guidib luxdoolman, diizd loj hor zii ma najman cwent sin dol. Abi' chi yaneero'man gual Jesucrist naj Dad par laaman, dxei ma najman perdon.

¹¹ Abi' loj xtiidx Dios rëb: "Gra ree bén chililadx laaman ad yu't dxej yaya'nxtu reeman." ¹² Laan rën guiëb gual loj Dios tiblojzi naj bejn, achet güünan chutëëz najman, bal najman bén Israel o ad najtaman bén Is-

rael. Din tijbzi Dios naj Dad par dugra ree, abi' dád benza'can con gra ree bén rbejdx rniab laaman. ¹³ Din loj xtiidx Dios rëb: "Gra bén yanab perdon loj Dios, gacaman perdon." ¹⁴ Per, ¿xhieza naag cwedx guiniab reeman laaman awa ad waliladxt reeman laaman? ¿Abi' xhieza naag chililadx reeman laaman awa ad wa-caagdiajgt reeman xcwentaman? ¿Xhienaag guiguiejn reeman xcwentaman awa achut bén guinee xtiidxaman loj reeman? ¹⁵ ¿Xhienaag chu' bén guitie'ch xtiidxaman awa achut guixhiaal laa reeman? Loj xtiidx Dios rëb: "¿Ni za'cdxoon naj chi rdxin bén zinë rusion za-gdxe!"

¹⁶ Per ad grat bejn ridxga' xtiidxza'c Dios. Zi'c rëb Isaías: "Dad, ¿chu ma rililadx ni ranen por lüj?" ¹⁷ Zeel gualrililadx zëëd por ni rigueijn bejn, abi' ni rigueijn bejn naj xtiidxza'c Jesucrist.

¹⁸ ¿Wen nid waguiejn ree bejn laan ya? ¿Per naj rni gual ma bacaagdiajg reeman laan! Din loj xtiidx Dios rëb:

Guidib guidxliuj ma bire'ch xtiidx Dios
abi' xt luar bigra lod nagueie'ch ma bigueijn reeman xtiidxaman.

¹⁹ Yan rünan xgab: ¿Wen id rignia' ree bén Israel xtiidx Dios ya? Per diizd guia'xchej bacaa Moisejs ni rëb Dios por laa reeman chi rëbaman:

Naj gün din tédlojdi por ni günan
con ree bén ad najt bén Israel.

Në por ni günan con laa reeman,
majsi ad ragbeet reeman, abi' zadxe'chidi.

²⁰ Abi' sin gualrdxeb bacaa Isaías ni rëb Dios por ree bén Israel, chi rëbaman:

Bén naj ree bén Israel, majsi ad baguiilt reeman naj,
per badxejl reeman naj.

Abi' ma balülön loj reeman,
majsi ad gunabdiidxt reeman por naj.

²¹ Bacaa tëë Isaías ni rëb Dios por ree bén Israel, chi rëbaman: "Dëchej za'n rbedxan bejn ree abi' ad rënt reeman guzoob reeman diidx al rusagloj reeman naj."

Xixgab Dios

11 Ad canitan lojdi gual ma gulëëladx Dios bén Israel ree, din ad ziantan. Lëjt ragbee gual bén Israel naj abi' loj xdiaa Abraham zialan, gual zialan loj xdiaa Benjamín. ² Diizd guia'xchej, gulej Dios bén Israel ree din gac reeman xbejnman, zeel ad rbëëladxtaman laa reeman. ¿Nid rusaaladxidi tiblajt loj xtiidx Dios ya lod zëëd chi gule'c Elías bén badëë xtiidx Dios loj ree bejn xgualquia ree bén Israel loj Dios? Chi rëbaman: ³ "Dad, ma bagüjt reeman gra ree bén badëë xtiidxil loj ree bejn ma bachijl tëë reeman xialtar reel, najzi baya'n abi' nëgajc naj rën reeman gugüjt reeman." ⁴ Per badxi' Dios xtiidxaman rëbaman: "Ma gulëëcan gajdx mil bejn par naj, bén ad wazuxibtczi ree loj dios la Baal." ⁵ Yan ziangajc yu' ta'n bén Israel, por gual rayaman laa reeman gulejman laa reeman par laa reeman, ad por ni cayüjnt reeman, din bal nibejman

laa reeman por ni cayünj reeman dxel ad por guial ray-atraman laa reeman.

⁷ Zian gojc, bén Israel bén gule Dios, badxejl reeman laaman guial rliladx reeman laaman. Per ree bén Israel ren gad reeman yadxejl laaman, din raguill reeman laaman zi'c naladx reeman, ad raguillt reeman laaman zi'c rënman zeel beenman luxdoo reeman gojl, ⁸ zi'c rëb loj xtiidx Dios lod rëb: "Basiaaw Dios xquiargueijn reeman, abi' naj reeman zian xt yandxej, majsi ruguiaa reeman per rulüü ad ruguiaat reeman, abi' majsi rigueijn reeman per rulüü ad rigueijnt reeman." ⁹ Rëb tëë Davi:

Xguialraw zagdx reeman con gra xguialnaza'c reeman

laan gusquiee laa reeman guial zëqui reeman zagdx.

Laan gusquiee laa reeman din tëd reeman casti ni rayal reeman.

¹⁰ Yaya'n reeman zi'c tijb bén ad ruguiaat, abi' sac reeman zi'c tijb bén ca bëw xijch.

Gac ree bén ad najt bén Israel perdon

¹¹ Ad canitan lojdi por guial ad rtiëjbt ree bén Israel güün reeman zi'c rën Dios zeel ma gunijt reeman loj Dios, din ad ziantan. Guzajc reeman zian din chu' mod gac ree bén ad najt ree bén Israel perdon, din chile' sëëbladx ree bén Israel gap reeman perdon guin.

¹² Yan bal guial ad bazoobt ree bén Israel diidx, beenan sirv par din yayal los demazri ree bénguidxliuj xguialnaza'c Dios, bén ad najt ree bén Israel. Yan, žrjündi xgab ya xhienaag güünle' Dios bejn ree chi tiëb ree bén Israel güün reeman zi'c rën Dios?

¹³ Yu' ni rënan ganin lëjt bén ad najt ree bén Israel, lëjt ragbee guial Dios guxhaal naj din gün xtiidxaman lojdi abi' dád cayünan nagueijn günan zi'c rayal. ¹⁴ Rënan guial ree bén ladx reen bén Israel ree sëëbladx zi'c rjündi din güün reeman zian din chile' gac reeman perdon. ¹⁵ Walican guial chi ad bazoobt ree bén Israel xtiidx Dios, guyu mod gojc los demazri ree bejn perdon. jPer xi nix chi chililadx reeman xtiidx Dios! Laan naj zi'c chi yaban tijb bengüt zatijb. ¹⁶ Abi' zi'c chi beenle' Dios bén Israel ree gulal laan naj tijb sen guial güünle'man los demazri ree bén Israel, ziangajc bal güünle' Dios xliuj tijb yag guidib yag guin ma nagle'.

¹⁷ Bén Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lüj guial ad najtil bén Israel najl zi'c tijb xidx yag olivo ni yu' dajn ni rguiid lod biru' xidx yag olivo guin, zeel rajpil guialnaban por xliuj yag guin. ¹⁸ Zeel ad naladxil guial mazri zagdx najl guial loj yag oliv ni rnin naj ree bén Israel. Per bal rjündi xgab zian, basaaladx guial ad lüjt cudëë guialnaban loj xliuj yag guin, xliuj yag guin cunee guialnaban lojl.

¹⁹ Wed zanal: "Walican, per gurug xidx yag olivo guin persi guyu'n xluaran din gacan tijbzi con yag olivo guin." ²⁰ Waliquil, per xidx yag olivo ni canin naj ree bén Israel, gurug reen guial ad bililadxt reen abi' lüj guyul xluar reen guial rliladxil. Zeel ad rjündi nabë, za-

gdxeli gojp cudad. ²¹ Din bal bén Israel ni canin naj ree xidx yag guin, ad bayat Dios laa reeman, ziangajc zajc saquil. ²² Gogbee guial benza'c naj Dios, per ziangajc diidxli rjündi xguialguxtisaman. Ma been xguialguxtisaman con ree bén ad bazoobt xtiidxaman, abi' ma beenman ni zagdx con lüj. Per rayal guibanl zi'c rënman, bal id zjündi zian zjündi xguialguxtisaman con lüj. ²³ Abi' bal yayejc ree bén Israel con Dios, abi' chililadx reeman perdon ni zëëd por laaman, zjündi laa reeman cwent con los demazri ree bén Israel rliladx. Din laaman rajp guialrniabee par yayjündi laa reeman tijbzi con los demazri ree bén Israel. ²⁴ Din lüj guial ad najtil bén Israel, lüj guial canin najl zi'c tijb yag olivo ni yu' dajn, zile' niajqul tijbzi con yag olivo zagdx ni rnin naj ree bén Israel, jdiixgui ree bén Israel ni ad ruzoobt ree xtiidx Dios, nid zayajc reeman tijbzi ya con los demazri ree bén Israel bal guzoob reeman xtiidx Dios!

Gac ree bén Israel perdon

²⁵ Compniar raliduladx ree Jesucrist, yu' ni ad ragbeetidi abi' rënan gagbeedan, chitëë güündi nabë. Bén Israel rjündi ree nad par guzoob reeman xtiidx Dios, caya-jc zian xt chi ma bayaaloj bililadx ree bén ad najt ree bén Israel, bén ma naj ree par chililadx xtiidx Dios.

²⁶ Chi ma gojc zian, dxel graczi ree bén Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguedx Siön za bén gagnë ree bén zëëd loj xdiaa Jacob.

Din yariica reeman loj nejz mal zinal reeman.

²⁷ Dxel gac cumplid da diidxan,

Zi'c ma rën loj reeman guial günan perdon xtol reeman.

²⁸ Per yan guial dád nad ree bén Israel par chililadx reeman xtiidxza'c Jesucrist, zian yu' mod persi rliladxi-di guial ad najtidi bén Israel. Abi' majsi zian, rën gajc Dios laa reeman zi'c beenman promejs loj ree xbéngulal reeman. ²⁹ Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëëladx tëëtaman bén ma gulejman par laaman.

³⁰ Gocli ad binaltidi xnejz Dios, per yan por ree bén Israel ad ruzoobt xtiidx Dios, ma balüüman lëjt guial rayaman lëjt. ³¹ Abi' bal yan ad ruzoobt ree bén Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman. ³² Cwëjb Dios guial zi'c ree bén Israel në ree bén ad najt bén Israel ad zuzoobt reeman xtiidxaman, din gac yayaman gra reeman tiblojzi.

³³ jDád zro' naj xguialrignia' Dios, në xguialrajcaman con xguialnaza'caman! Achut zajc gagbeechaaw xhien-aag naj xixgab Dios o ni cayjündi. ³⁴ Zi'c ca loj xtiidxaman lod rëb: "jChu zajc gagbeechaaw xhienaag naj xixgab dux Dad ree Dios? jChu mazri rajc din guiëb lojman xhienaag güünman? ³⁵ jO chu ma badëë xhienin lojman din cwëzaman quixaman laaman?"

³⁶ Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

Guialnaban cüb

12 Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lëjt loj Dios zi'c tijb gon ni ma nagle' ni yayuladx tēēman, din guibandi zi'c rēnman, abi' zian guiēndi laaman. ² Ad guibanridi zi'c naban los demazri ree bén yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rēn Dios guibandi. Zian gagbeedi conin naj zagdxe, conin ruladxaman, con tēēnin naj xnejz.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt gūūn nabē guial mazri lasajquidi loj ree bejn. Zagdxeli gol been xgab por lëjt zi'c rayal, segun naj quiargueijn ni banee Dios loj tijbgajdi. ⁴ Din zi'c xcuerp bejn zien la' najn, per ad tijbtzi ni rüjnan. ⁵ Zian-gajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiargueijn ni baca' ree, zi'c naj ni guyēn Dios baneeman dunuj ree. Zeel bal ma baneeman quiargueijn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. ⁷ O bal baneeman quiargueijn par yaguieen ree sirv ben ren ree, rayal yaguieen reen zi'c rayal. Bén cwa' quiargueijn par gulüūman bejn ree xtiidx Dios, rayal gulüūman bejn ree. ⁸ O bén cwa' quiargueijn par gudēēman consejw loj ree bejn, rayal gudēēman consejw. Guiáad bén cwa' quiargueijn par yazaladxaman xhienin loj ree bejn, rayal yazaladxaman con guidib luxdoodman. Abi' bén cwa' quiargueijn par nabeeman, rayal gapaman cudad nabeeman zi'c rayal, o bén cwa' quiargueijn par gūūnman yudar bén cazagdiaj ree, rayal chu' luxdoodman zagdxe gūūnman laa reeman yudar.

Ni rayal gūūn ree bén riladx Jesús

⁹ Gol guyēn lasa'di con guidib luxdoodi, gol basa'n ree ni mal tiblax, gol binal ni zagdxe. ¹⁰ Gol guyēn gra ree bejn zi'c tijb bijchidi, ad rüjn lëjt gajc benro', gol gojp respekt lasa'di.

¹¹ Ad gaquidi bén ploj par gūūndi ni rayal gūūndi, con guidib luxdoodi gol been sirv loj Dios.

¹² Gol badxe' luxdoodi zagdxe por ni cabēzidi tia'di, gol gudaan tēē loj ni rzagdiajdi, ad gucwēēz cwedx guiniabidi Dios.

¹³ Chi xhie ryaadx xcompniaridi, bén riladx ree Jesucrist, gol been reeman yudar. Gol gojc benza'c con ree bén ri't lidixidi.

¹⁴ Gol gurejdx Dios por ree bén rzunal lëjt par gūūn reeman lëjt ni mal, ad guzaalidi diidxmal guiic reeman, gol gurejdx Dios guial gagnēman laa reeman.

¹⁵ Gol badxe' luxdoodi nix con ree bén yu' luxdoo nix, per con ree bén yu' luxdoo naya, gol been naguieijn din gagbee reeman guial za'quidi con laa reeman.

¹⁶ Gol gubajn zagdxe con ree lasa'di, ad gūūndi nabē, gol gojc bén naxanlax. Ad nalaxidi mazri rajquidi guial loj ree ben ren.

¹⁷ Ad gūūndi ni mal bén rüjn lëjt ni mal, gol been naguieijn gūūndi ni zagdxe loj gra ree bejn. ¹⁸ Gol been naguieijn da't din cwenēdi bejn ree zagdxe. ¹⁹ Compniar raliduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'n loj Dios, laaman gūūn xguialguxtis, zi'c rēb loj xtiidxaman, lod rēb: "Naj naj bén rayal gūūn xguialguxtis, gudē tēēn ni rayal bejn. Zian rēb dux Dad ree Dios." ²⁰ Rēb tēēman: "Bal rliaan bén rdxē'ch lüj, badēēd ni gawaman, o bal re'caman nijs, badēēd ni guiē'man, zian guguaal yatuman." ²¹ Ad bal tiēbil gūūn ni mal lüj gan, been ni zagdxe din gūūnl ni mal guin gan.

Rayal yaya'p ree guxtis respekt

13 Gra bejn rayal gucaagdiajg xtiidx gobiarn nē xtiidx gra ree guxtis. Din por Dios yu' ree gobiarn nē gra ree guxtis, por laaman zēēd guialrniabee ni rajp reeman. ² Zeel bén ad ruzoobt xtiidx ree bén rniabee guin, rēn guiēban guial ad rēnt reeman gūūn reeman zi'c rniabee Dios. Abi' ree bén rüjn zian laagajc reeman rguil xcasti, ³ din bén rajp ree guialrniabee ad za't reeman par guchejb reeman bén rüjn ree ni zagdxe, za' reeman par guchejb reeman bén rüjn ree ni mal. Yan bal rēnl guibanl guial ad zadxebtil bén ca' ree guialrniabee, gubajn zagdxe din yaya'nl zagdxe loj reeman. ⁴ Din laa reeman cayūjn reeman sirv loj Dios din yalaj reeman lüj. Per bal cayūjnl ni mal, zadxebil bén ca' ree guialrniabee, din ad ca' xlia'tzi reeman guialrniabee guin, laa reeman cayūjn sirv loj Dios din gudēēd reeman casti bén rüjn ree ni mal. ⁵ Zeel rayal guzoobidi xtiidx ree bén ca' ree guialrniabee, ad gūūndi zian naabzi par ad zayaltidi casti, gol been zian guial ragbeedi zian rayal gūūndi. ⁶ Gol gudijx tēē impuest, din gusnuu nabee ree bén ca' ree guialrniabee, din laan naj mandad bayal reeman par gūūn reeman sirv loj Dios.

⁷ Zeel gol badēēd ni rayal gudēēdidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bén rayal guzoobidi xtiidx, gol gojp respekt bén rayal respekt. ⁸ Gol been naguieijn gol baguijx ni ralidi loj ree bejn, abi' ad rayalt gucwēēz guiēndi bejn ree. Din bén rēn bejn ree, ma cayūjnman cumplid gra ni rniabee xley Dios.

⁹ Xmandamient Dios rēban: "Ad sunēl bén ren bén ad najt lacheelil, ad gugūjtil bejn, ad cwanl, ad sēēbladxil ni rajp ben ren", per mandamient guie ree, con ree xmandamient ren Dios rajc cumplid con tijb mandamient rēb: "Guyēn ben ren ree zi'c rēn lüj gajc."

¹⁰ Din bén rēn bejn ree ad zajct gūūnman laa reeman ni mal guial rēnman laa reeman. Zeel con guial rēn lasa' bejn rayaaloj rüjnman gra ni rēb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatē'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman. ¹² Mazri caydop tiamp guin,

abi' mazri cabig dxej gui'taman, zeel rayal yasa'n ree ni riné dunuj ree loj nejz mal, abi' yaguieen ree nagueijn yaguieen ree ganax ni zagdxé din yunaal ree nejz zagdxé. ¹³ Rayal yabajn ree zagdxé zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt suné bejn ben ren bén ad najt lacheelaman, o guial gapaman graloj vijs, o guialrdil o guialrdédloj. ¹⁴ Gol basa'n lèjt gajc loj dux Dad ree Jesucrist, ad rayalt guibandi zi'ctzi rèndi.

Ad gusa'nxtudi bén qui rliladxri xtiidx Dios

14 Zagdxé gol guineené bén qui rliladxri Jesucrist ad gusa'nxtudi laaman guial mazri rajquidi guial lojman. ² Din yu' ree bén rliladx Jesucrist naladx ree-man zajc gaw reeman xhietëéz nin, per yu' ree bén qui rliladxri naladx reeman guial zagdxeli naj ad zajwt ree-man bëél. ³ Bén rüjn xgab guial zajc gawaman xhietëéz nin, ad rayalt güünman tiblax bén naladx yu' ni ad zajc gaw bejn. Guiáad bén rüjn xgab guial yu' ni ad zajc gaw bejn, ad rayalt guze'man bén naladx zajc gaw bejn xhietëéz nin. Din niz loj Dios tiblojzi ma naj reeman xbejnman. ⁴ Zeel, ¿chu naj bejn din guze' xcompniaraman bén rliladx Jesucrist por niguinzi ree? Diosqui ragbee bal cayünman ni zagdxé o cayünman ni mal. Abi' bal ad wayignia'taman xhienaag güünman, dxelex dux Dad ree Jesucrist rajp guialrniabee par gagnëman laaman güünman zi'c rayal.

⁵ Ziangajc yu' ree dux compniar ree bén raliduladxné' ree Jesucrist naladx reeman guial yu' dxej zobjloj, yu'za ree bén naladx guial tiblojzi naj gra dxej, per achet güünan, tijbgaj bejn con ni naladxaman naj zagdxé par laaman. ⁶ Din bén rüjn xgab guial yu' dxej zobjloj, rüjnman zian persi rënman Dios. Guiáad bén naladx guial tiblojzi naj gra dxej, rüjnman zian persi rënman Dios. Abi' bén raw graloj, rawaman guial yu'guijcaman guial por Dios zëëdan abi' rudëëman quixtëë lojman. Guiáad bén naladx guial yu' ni ad zajc gaw bejn, rüjnman zian guial naladxaman zian cayajpaman Dios respejt abi' rudëëman quixtëë lojman.

⁷ Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree. ⁸ Bal nabajn ree por dux Dad ree Jesucrist par laa tëëman nabajn ree. Abi' bal yayëjt ree por laaman par laa tëëman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree. ⁹ Din par zian güjtaman abi' babanman, din gacaman Dad loj ree bén naban në loj ree bén ma güjt.

¹⁰ ¿Chexquiza din guze' lasa'l bén rliladx Jesucrist o güün lasa'l tiblax ya? Awa dugra ree rayal yadxu' loj Dios din yadëëd ree cwent lojman. ¹¹ Zi'c ca loj xtiidxaman lod rëb:

Naj naj Dios naban,
abi' diidxli rnin lojdi guial gra ree bejn guzuxib lon.
Abi' gra ree bejn guiëb guial naj naj Dios.

¹² Abi' tijbgaj dunuj ree rayal yadëëd ree cwent loj Dios, per por dunuj gajc ree.

Ad gusajbidi bejn loj dol

¹³ Zeel ad rayalt yaneeguijdx du lasa' ree bén rliladx ree Jesucrist, zagdxeli yaguieen ree nagueijn yaya'p ree cudad chitëë por dunuj ree güün reeman dol.

¹⁴ Naj najn xbejn Jesús, ragbeen guial ad dolt naj gaw bejn xhietëëznin. Per par bén naladx guial ad zajc gawaman xhietëëznin, par laaman dolan cayünman bal gawaman xhietëëznin. ¹⁵ Yan bal por ni rawil naladx tijb xcompniaril bén rliladx Jesucrist guial dolan cayünl, abi' bal id ridxga'l laaman rën guiëban guial ad rëntil laaman. Gojp cudad chitëë por ni rawzil güün xcompniaril dol, din nëgajc por laaman güjt Jesucrist loj crüz. ¹⁶ Ad güünl tijb ni guinieeguijdx ree xcompniaril lüj, majsi lüj ragbee guial ad ni malt naj ni cayünl. ¹⁷ Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tëë luxdoo man nix por xSprijt Dios. ¹⁸ Abi' bén naban zian guial zinalaman Jesucrist, cayünman zi'c rën Dios, zi'c ruladx tëë bejn.

¹⁹ Zeel rayal yaguieen ree nagueijn yabajnné' du lasa' ree zagdxé yabedxe tëë du luxdoo ree, din yasnuu yayagbee ree xhienaag yunaal ree xnejz Dios. ²⁰ Gol gojp cudad chitëë por ni rawzidi gunijitidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayünl. ²¹ Zeel zagdxeli naj guial ad zajwt il bëél ad zë' tëët il vin o xhie stijb nin bal por laan güün xcompniaril dol. ²² Majsi lüj ragbee guial achet güünan gaw bejn xhietëëznin, per zagdxeli lüjzi con Dios. Naj rni guial, ¿xiquilbaa bén ad yu'nawëëgt luxdoo rawaman xhietëëznin! ²³ Per bén yu'nawëëgt luxdoo par gawaman xhienin, abi' gawaman laan laagajcaman ma cayün dol guial ad cayawtraman guidib ladxaman. Bal naladx bejn ad laa naj ni cayünman, dxelex laagajcaman cayün dol.

Royal yaguieen ree ni naladx bejn naj zagdxé

15 Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bén ad wazudxi'cht loj guialrliladx Jesucrist luar yaguieen ree ni rayentzi ree, ² dugra ree rayal yaguieen ree nagueijn din chu' luxdoo dux compniar ree zagdxé con dunuj ree. Abi' rayal yaguieen ree ni naladx reeman naj zagdxé, din chile' gusnuu güünbee reeman xnejz Dios. ³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl." ⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëëd pacens në guialragnë chitëë yalenyá' ree yalëjz ree ni ralëjz ree yaca' ree. ⁵ Dios, bén razaladx pacens në guialragnë chitëë yalenyá' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. ⁶ Din tiblojzi guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bén ad najt bén Israel.

⁷ Zeel, zi'c baca' Jesucrist lèjt par gaquidi xbejnman, ziangajc gol guneenè ree xcompniaridi zagdxé, bén rliidx ree laaman par guiliesidi xvalor Dios. ⁸ Gol basaaladx guial bi't Cristo loj guidxliuj par gulüüman bén Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rüjnqui Dios cumplid xtiidxaman. ⁹ Bi't tée Cristo loj guidxliuj din por laaman, bén ad najt ree bén Israel guilies reeman xvalor Dios guial rayaman laa reeman, zi'c ca loj xtiidxaman lod rëb:

Xt loj ree bén ad najt bén Israel guzatan lüj guial najl benza'c.

Gol téeen cant ree par lüj.

¹⁰ Ziangajc rëb zatiblaht loj xtiidx Dios:

Lèjt bén ad najt ree bén Israel,
gol babaa zi'c rabaa ree bén Israel.

¹¹ Zatiblaht loj xtiidx Dios rëb:

Gra ree bén ad najt bén Israel.

Në los demazri ree bejn, gol gules xvalor Dios.

¹² Rëb tée Isaiás:

Loj xdiaa Isai, grii tijb bén nabee bénguidxliuj ree, xt ree bén ad najt bén Israel, chililadx laaman.

¹³ Dios bén ragnè dunuj ree ralëjz ree ni caylëjz ree, laaman yagu' luxdoodi zagdxé yabe'cdxé téeëman luxdoodi guial rliidxidi laaman, din cwëz da'tidi ni guneeman por xSprijt Dios.

¹⁴ Compniar raliduladx ree Jesucrist, naj rag-beechaaw guial zagdxé nabandi con ree xcompniaridi, ma ragbee téeëdi zagdxé xhienaag chinalidi xnejz Dios, xt rajc rudëëdidi consejw rulüü tée xcompniaridi. ¹⁵ Per majsi zian, tio'p choon laht loj gui'ch guie bacan diidx naa, din yasaaladxidi xhienaag guibandi. Rünan zian por guialrniabee ni ma banee Dios naj, ¹⁶ din günan sirv loj Jesucrist. Din da dxiinan naj gulün bén ad najt ree bén Israel xtiidxza'c Dios din guiban reeman zi'c rën Dios, din gac reeman naya niz lojman por xSprijtaman. ¹⁷ Ra'pan xhie günnë'n nabë, guial ragnë Jesucrist naj por ree dxiin cayünan por Dios. ¹⁸ Per achetctzi zajc guiën bal id zën guial por Cristo cayünan laan, din laaman cayagnë naj persi cayünan yudar bén ad najt ree bén Israel din gac chililadx reeman guzoob tée reeman xtiidx Dios. Yan ma rliidx reeman laaman por ni rën loj reeman në por guial ruguiaa reeman xhien-aag nabanen, ¹⁹ në guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilírico. ²⁰ Din zian naj da xgaban günan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejtntzi reeman xcwent Cristo, ²¹ zi'c ca loj xtiidx Dios lod rëb:

Bén ad waguiejnt ree xcwentaman,

güünbee reeman laaman.

Guiáad ree bén ad wayagbeet xcwentaman,
gagbee reeman laan.

Rüjn Pab xgab cheman Roma

²² Abi' guial wan guidibczi lod ma rnin lojdi, zeel ad wayajct gan guidganen lèjt, majsi zianczi guyënan nidganen lèjt. ²³ Per yan guial ma gulox gutiechan xtiidx Dios guidib niz guie, abi' guial ma gojc zien ijz ni rënan guidganen lèjt, ²⁴ zeel rünan xgab guidganen lèjt chi gan España. Abi' chi gadëëdan guguien lèjt, chi ma gojc tio'p choon dxej yu' luxdooen zagdxé guial za'n con lèjt, dxej ma güündi naj yudar din gan España.

²⁵ Per yan yaloj gan Jerusalén chigsa'n nan tijb yudar par ree dux compniar ree bén rliidx ree Jesucrist. ²⁶ Din bén Macedonia ree con ree bén Acaya bén rliidx gajc ree Jesucrist, been reeman xgab guto'p reeman yudar guin par ree bénprob zojb ree Jerusalén, bén rliidx ree Jesucrist. ²⁷ Abi' por xixgab reeman guixhiaal reeman yudar guin, per zagdxé naj ni cayüjn reeman din mal nuzëëb reeman loj reeman. Din por ree bén Israel bidxin xtiidx Dios loj reeman, dxej yan laa reeman guial ad najt reeman bén Israel, zagdxen guial güün reeman yudar bén Israel ree zi'ctzi gac reeman. ²⁸ Zeel chi ma balooxan dxiin guie, chi ma bayün yudar guin, dxej gan España, abi' chi gadëëdan ladxidi dxej guidganen lèjt. ²⁹ Naj ragbee guial chi guidganen lèjt, zien da't ni guneë Dad Jesucrist par ganin lèjt.

³⁰ Yan por dux Dad ree Jesucrist në guial rën xSprijt Dios dunuj ree, rniaaban lojdi din güündi naj yudar yarejdx yanaab ree Dios por naj. ³¹ Gol gurejdx gunab Dios din gagnëman naj loj ree bén Judea, bén ad rliidx ree Jesucrist, gol gurejdx tée Dios por dux compniar ree bén rliidx ree Jesucrist, bén zojb ree Jerusalén din tiëb reeman tia' reeman yudar ni chigsa'n nan par laa reeman. ³² Dxej bal gagnë Dios ma chu' luxdon zagdxé guidganen lèjt dxej ma zajc yaziiladxan la'tgaj za'n con lèjt. ³³ Dux Dad ree Dios bén rabe'cdxé du luxdoo ree, laaman gagnë gradi. Amén.

Rugajpdioz Pab bejn ree

16 Yan ni gui't Febe ladxidi, béngunaa ni naj dux compniar ree guial raliduladx ree Jesucrist, bén cayüjn tée sirv lën yadoo ni zojb guiedx Cencrea. ² Gol baca'man zagdxé por Dad Jesucrist, zi'c royal yaguieennë' ree dux compniar ree bén rliidx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

³ Gol bagajpdioz Aquila con xbéngunaaman Priscila, bén cayüjn ree naj yudar cayguieenan sirv loj Jesucrist. ⁴ Abi' laa reeman xt guzuj reeman loj guialgüjt por naj, zeel rudën quixtëë loj reeman. Abi' ad najtzi rudë quixtëë loj reeman në ree dux compniar ree bén rliidx ree Jesucrist bén ad najt ree bén Israel rudëë quixtëë loj reeman. ⁵ Gol bagajpdioz ree bén rliidx Jesucrist, bén rado'p ree lidx Priscila con Aquila. Gol bagajpdioz da miwan Epeneto, bén goc bén yaloj bililadx xtiidx Jesucrist niz Acaya. ⁶ Gol bagajpdioz Li, bén ma been da't lèjt yudar. ⁷ Gol bagajpdioz ree bén ladxan Adrónico

con Junias, bén guyu'ně' reen ladxguiib. Abi' ree xi apóstoles Jesús dád rěn reeman laa reeman, abi' yaloj laa reeman bililadx Jesucrist guial lon.

⁸ Gol bagajpdioz Amplias, da miwan bén rěn da'tan guial nayajcan xbejn Jesucrist. ⁹ Gol bagajpdioz Urbano, bén cayüjn naj yudar cayguieenan sirv loj Jesucrist. Gol bagajpdioz tēē da miwan Estaquis. ¹⁰ Gol bagajpdioz Apeles, bén ma balüü guial diidxiczi rililadxaman Jesucrist, gol bagajpdioz tēē xfamil Aristóbulo. ¹¹ Gol bagajpdioz tēē Herodión ben ladxan, ně ree xfamil Narciso, bén ma rililadx Jesucrist. ¹² Gol bagajpdioz Trifena ně Trifosa, bén cayüjn ree sirv loj Jesucrist. Gol bagajpdioz tēē Pérsida, bén naguieenbee ree guial dád cayüjnman sirv loj Jesucrist. ¹³ Gol bagajpdioz Rufo, bén diidxiczi zinal xnejz Dios, gol bagajpdioz tēē xniaaman, bén rēnan zi'c da nan. ¹⁴ Gol bagajpdioz Asíncrito, Flegonte, Hermas, Patrobas, Hermes ně gra ree bén za' con laa reeman, bén ma rililadx ree Jesucrist. ¹⁵ Gol bagajpdioz Filólogo, Julia, ně Nereo con bizanman, ně Olimpás con gra ree bén rililadx Jesucrist bén za' ree con laa reeman.

¹⁶ Gol bagajpdioz lasa'di zi'c rayal. Dux compniar ree bén raliduladx ree Jesucrist bén za' ree guie, rugajpdioz reeman lējt.

¹⁷ Compniar raliduladx ree Jesucrist, rniaaban lojdi din gapidi cudad con ree bén rlia' lasa' ree bejn, bén rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, ¹⁸ din ad lojt Jesucrist cayüjn reeman sirv, rüjn reeman ni rēntzi reeman, abi' con diidxnagüüdx ne con diidxza'c rüjn reeman gan bén ad ragbeetczi ree o bén ad ragbeeza'ct ree xtiidx Dios. ¹⁹ Per lējt, guidibczi ma ragbee ree

bejn guial ruzoobquidi diidx zinalidi xtiidx Dios, dád nix yu' luxdon abi' rēnan susindi par güündi ni zagdxe ad par güüntidi ni mal. ²⁰ Dios, bén rabe'cdxe luxdoo bejn, laaman gagnē lējt nayob chitēē güünri xindxab lējt gan. Dux Dad ree Jesucrist gagnē lējt.

²¹ Rugajpdioz Timoteo lējt, bén cayüjn naj yudar con xchiin Dios ni cayünan, ně ree bén ladxan bén la ree Lucio, Jasón, ně Sosípater, rugajpdioz reeman lējt.

²² Ně Tercio, bén cayüjn gui'ch guie rugajpdioz lējt por dux Dad ree Jesucrist.

²³ Nētēē Gayo rugajpdioz lējt, lidxaman za'n, runee tēē lidxaman rado'p ree dux compniar ree bén rililadx ree Jesucrist. Ně Erasto, bén naj tesorer luguiedx guie ně bén la Cuarto ben rililadx Jesucrist, rugajpdioz reeman lējt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radēēn quixtēē loj Dios din laaman zile' gagnē lējt din gusnuu gagbeedi sudxi'ch tēēdi loj xtiidxza'c Jesucrist, zi'c ma balüün lējt xhienaag din gaquidi perdon. Din zian naj xixgab Dios diizd chi gad guidxliuj gacchaw, xgab ni ad gogbeet ree bejn diizd guia'xchej. ²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bén badēē xtiidx Dios loj ree bejn zi'c gunabee Dios laa reeman, bén naban goctēēz. Abi' guidibczi care'ch xtiidx Dios din chililadx ree bejn Jesucrist guzoob tēē reeman xtiidxaman.

²⁷ ¡Tijbzi Dios, bén rajc gradooczi, rayal yaya'p reeman respejt zianczi por Dad Jesucrist! Amén.

Gui'ch yaloj par ree bén Corinto

Rxhial Pab xtiidx Dios

¹ Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bén riladix Jesucrist. ² Caxhalan gui'ch guie par lëjt najdi bén riladix xtiidx Dios luguiedx Corinto, lëjt guial ma nayadi delant loj Dios por Jesucrist, abi' ma bacaabee Dios lëjt gaquidi xbejnman bacaabee tēēman gra ree bén gra lad bén riladix ree Jesucrist, bén naj Dad par dunuj ree në par laa reeman. ³ Dux Dad ree Dios në Dad Jesucrist güünle' lëjt, yabe'cdxe tēē reeman luxdoodi.

Rudëed Pab quixtëe loj Dios

⁴ Gra dxejczy rudëdan quixtëe loj Dios por lëjt zi'c ma gognëman lëjt guial riladixidi Jesucrist. ⁵ Në guial najdi tijbzi con Jesucrist dád ma gognë Dios lëjt, baneeman lëjt quiarguejn din guinieedi chignia' tēēdi xtiidxaman. ⁶ Zian rguien guial diidxli naj ni ma bigueiejndi por Cristo diizd chi guzuloj bililadixidi laaman. ⁷ Abi' zianczy rajpadi xyudar Dios la'tgaj rbëzidi dxej ni gui't Jesucrist zatijb. ⁸ Abi' Dios gagnë lëjt din sudxi'chidi guidiblagaa loj ni riladixidi laaman, chitëe xhie xtolidi chu' dxej ni gui't dux Dad ree Jesucrist zatijb. ⁹ Din Dios diidxli rüjn xtiidxaman cumplid, abi' laaman naj bén gule lëjt din gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰ Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. ¹¹ Rnini lojdi zian compniar raliduladx ree Jesucrist, din ma gogbeen guial yu' wadijl entr lëjt, zian bagojn ree xfamil Cloé naj. ¹² Guial garent garen rëb ree bejn, yu' reeman rëb: "Naj naj xbejn Pab", yu' tēē reeman rëb: "Naj naj xbejn Apolos", yu' reeman rëb: "Naj naj xbejn Bëd", yu' tēē reeman rëb: "Naj naj xbejn Cristo." ¹³ Per naj rni lojdi guial Cristo tijbzi najman, din ad najt güt loj crüzj por lëjt, ad gurobnijs tēēdi par gaquidi da bejnan. ¹⁴ Quixtëe Dios chi wan ladxidi achut mazri barobnijsan, Crispozi në Gayo. ¹⁵ Chitëe guiëbidi guial gurobnijsidi par gaquidi da bejnan. ¹⁶ Barobnijs tēēn xfamil Estéfanas, per ad rusaaladxtran chu mazri barobnijsan. ¹⁷ Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap gap perdon loj Dios. Ad cane tēētan con diidx ni yadxaloj ree bejn naj luar cu'guijc reeman par xhie güjt Cristo loj crüzj.

Xguialrniabee Dios në xquiarguejnman

¹⁸ Gra ni raguie'ch ree guial por xhie güjt Cristo loj crüzj, achet lasajcan par ree bén zë loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaag naj xguialrniabee Dios. ¹⁹ Abi' loj xtiidx Dios rëb:

Gunijtan xquiarguejn ree bén ni rëb guial rajc da't reeman, abi' guscajyan xquiarguejn ree bén ni rëb guial rignia' da't reeman.

²⁰ Yan, ¿con ree bén rëb guial rajc da't reeman? ¿Con ree mextr rajc ley? ¿Con ree bén rëb guial rajc da't reeman xcwent ree ni yu' loj guidxliuj? Par Dios achet lasajc xquiarguejn bēnguidxliuj. ²¹ Abi' por xquiarguejn Dios ragbeechaawaman guial ad zayünbeet bēnguidxliuj laaman por xquiarguejn reeman, zeel beenman xgab yabëēman bejn loj casti por xtiidxaman ni caylün bejn ree. Abi' ree bén yarii loj casti guin laa reeman naj bén riladix laaman, majsi par ree ben ren achet lasajc ni canin por Cristo.

²² Din bén Israel ree rën reeman guguaa reeman mi-lagr din chililadx reeman, abi' ree bén ad najt bén Israel rën reeman guien reeman ni mazri nawëeg din chililadx reeman. ²³ Per dunujni ni caylün bejn ree naj par xhie güjt Cristo loj crüzj, abi' ree bén Israel rdxe'ch reeman, guíaad par ree bén ad najt bén Israel achet sirv rüjn ni caylün. ²⁴ Per par ree bén ma bacaabee Dios, zi'c ree bén Israel zi'c ree bén ad najt bén Israel, por Cristo rguien xguialrniabee Dios në xquiarguejnman. ²⁵ Din ni rulüü achet lasajc guial ni rüjn Dios, laan naj ni mazri lasajc loj xguialrajc bēnguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bēnguidxliuj. ²⁶ Gol gogbee compniar raliduladx ree Jesucrist guial ta'nzi ree bén riladix laaman naj bén rignia' zi'c naladx ree bēnguidxliuj, ta'nzi ree bén riladix laaman rajp guialrniabee loj guidxliuj guie, abi' ta'nzi ree bén riladix laaman naj ree bén za loj ree famil ni naj bén zojbloj. ²⁷ Abi' Dios gulej ree bén ni naladx ree bejn ad rajcza'ct din yaya'nxtu ree bén rajc da't, gulej tēēman bén ad ca't ree guialrniabee din yaya'nxtu ree bén ca' guialrniabee. ²⁸ Dios gule ree bén ni naladx ree bejn guial achet sirv laa reeman, bén ni naladx ree bejn guial achet lasajc reeman, bén ni achut naj loj guidxliuj guie din chiquiedaman xguialdxaal ree bén naj ree chunin loj guidxliuj guie. ²⁹ Zianan zeel achut zajc güün benro' delant loj Dios. ³⁰ Yan por Dios ma najdi tijbzi con Jesucrist, dxel por

laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tēē ree par laaman abi' ma raya'p ree perdon loj Dios. ³¹ Zianan din gac zi'c rēb loj xtiidx Dios lod rēb: "Bal yu' bén rēn guilies xvalor gajc, luar gūndi zian gol gules xvalor dux Dad ree Jesucrist."

Xtiidx Jesucrist bén cwa loj crūjz

2 Compniar raliduladx ree Jesucrist lējt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawēēg par chignia'di. ² La'tgaj guzun con lējt ad gunetan diidx ren ree lojdi, tijbzi xcwent Jesucrist bén cwa loj crūjz. ³ Abi' chi wan ladxidi zi'c tijb Bén ni ad yu't gojl, rniyczan guial rdxeban bialan lojdi. ⁴ Nē chi gunenē'n lējt, chi gunen xtiidx Dios lojdi, ad gunenē'-tan lējt con ree diidx ni gūnan lējt gan por da diidxan, benan gan rliidxidi Jesucrist por xyudar xSprijt Dios nē xguialrniabeeman. ⁵ Din guiguien guial ni rliidxidi Jesucrist zēēdan por xguialrniabee Dios ad por xguialrajct bēnguidxliuj.

Por xSprijt Dios nūnbee bejn laaman

⁶ Majsi chi ralūūn Bén ni ma rajc ree mazri xtiidx Dios, ralūūn laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree Bén rniabee, guialrajc ni yu' dxej nit. ⁷ Ralūūn laa reeman por guialrajc ni zēēd por Dios, din yanee ree zi'c naj xixgab Dios, xgab ni goc ni nagueie'ch par ree bēnguidxliuj, abi' xgab guin naj guial chililadx reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. ⁸ Laan naj tijb ni ad gogbeet ree Bén rniabee loj guidxliuj guie, din bal niagbee reeman dxe ad nucaat reeman dux Dad ree Jesucrist loj crūjz, Bén ca' guialrniabee. ⁹ Per loj xtiidx Dios rēb:

Achut waguiaa, achu tēēt waguiejn
abi' ni'quid wayūjnt bēnguidxliuj xgab
por ni nugu'chaaw Dios par ree Bén rēn laaman.

¹⁰ Per dunuj ree ma balūū Diosan duloj ree por xSprijt-taman Bén naban con dunuj ree, din xSprijt Dios gran ragbeeman, xt ni mazri nagueie'ch ni zēēd por Dios.

¹¹ Achut ragbee xhie xgab cayūjn tijb bejn. Xsprijt-saman ragbee xhie xgab cayūjnman. Ziangajc xSprijt Dios tijbzi laaman ragbee xhienaag naj xixgab Dios.

¹² Abi' dunuj ree guial ma zunaal ree xnejz Dios, ad nabajnt ree con tijb sprijt ni zēēd loj guidxliuj guie, ma nabajn ree con Sprijt zēēd loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c. ¹³ Abi' laa reen naj ni caylūūn bejn ree, per ad por dux quiarguejntan, xSprijt Dios culūū dunujn xhienaag yanen. Zian ralūūn xcwent Dios Bén ma nabannē xSprijtaman.

¹⁴ Per Bén ad nabannēt xSprijt Dios ad rliidxxtaman ni zēēd ree por Dios ni rulūū xSprijt Dios dunuj ree, din par laaman najn tijb ni ad rūjnt sirv. Zeel ad zajct chignia'man xcwent Dios din con xSprijtzi Dios zajc chigni-

a' bejn ni rēn guiēban. ¹⁵ Per Bén ma nabannē xSprijt Dios por Sprijt guin rignia'man ni naj xcwent Dios, abi' ni'qui tijb ree Bén ad nabannēt xSprijt Dios ad rignia't chexc zeel rignia'man ni guin ree. ¹⁶ Loj xtiidx Dios rēb: "¿Chu ma bignia' xixgab Dios? ¿Chu zajc gulūū Dios ni gūūnman?" Per dunuj ree, naj dux xgab ree zi'c xixgab Cristo.

Compniar rūjn ree sirv loj Dios

3 Compniar raliduladx ree Jesucrist, chi guzun con lējt ad gunenē'-tan lējt zi'c ree Bén ma nabannē xSprijt Dios, gunenē'n lējt zi'c ree Bén ad nabannēt xSprijt Dios, zi'c ree Bén qui guzulojri rliidx Jesucrist. ² Diidx ad nawēēgt ree gunenē'n lējt zi'c rudēē bejn lejch loj tijb xindobēz guial xo gawix ni raw bengol, zian gunenē'n lējt diidx ad nawēēgt ree. Abi' ni'qui yan ad zile't ganenē'n lējt zi'c ree Bén ma rignia' mazri xtiidx Dios. ³ Din sta nabandi zi'c naban gra ree Bén-guidxliuj. Nadēdloj lasa'di rdil tēēdi, zian rguien guial sta nabandi zi'c gra ree bēnguidxliuj Bén ad zinalt ree xnejz Dios. ⁴ Din chi rēbidi: "Naj naj xbejn Pab", o chi rēbidi ya: "Naj naj xbejn Apolos", zian rguien guial sta cayūjndi zi'cgajc chutēēz bēnguidxliuj.

⁵ Per naj rni lējt: ¿Chu naj Pab o chu naj Apolos? Gol gogbee guial nayajczan tio'p ree Bén cayūjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn. ⁶ Yaguie'ch ree guial naj naj zi'c Bén rxūbin abi' Apolos naj Bén rguiil, per por Dios cayagbeedi mazri xtiidxaman zi'c rusni'saman tijb cwaandoo. ⁷ Abi' zi'c Bén rxūbin zi'c Bén caguil mandadzi cayūjn reeman, Diosan naj Bén ni rusni's ni rxūbin reeman. ⁸ Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni baneeman yaguieen tijb gajc dunujn. ⁹ Zeel naj con Apolos nayajcan compniar cayguieenan xmandad Dios.

Yaguie'ch ree lējt naj xguiniaa Dios lod cayguieenan dxiin o lējt naj zi'c tijb yu ni cayūjn Dios. ¹⁰ Abi' naj guial catiechan xtiidxaman najn zi'c tijb albanil Bén ni rajp da't cudad din grii xchiinman zagdex guial ba-caabeeman naj gūnan xcimiant yu guin. Abi' ree Bén ni cusnuu culūū xtiidx Dios, laa reeman naj zi'c Bén cusnuu cayūjn yu guin. Per rayal gap reeman cudad xhienaag cales reeman yu guin, ¹¹ din achut zajc guchaa cimiant ni ma benan, abi' cimiant guin naj guial rliidx Jesucrist. ¹² Abi' ree Bén ni cayguie'ch ree naj ree Bén ni cusnuu cales yu loj cimiant ni cayguie'ch ree naj guialrliidx Jesucrist, bal cayūjn reeman laan con or o con plajt o con ree guiaj zagdex o con yag o con biqui o con balagya'. ¹³ Per chi guidxin dxej ni gūūn Dios xguialguxtisaman, dxe guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gajc bejn. ¹⁴ Abi' bal rūjn sirv ni beenman zi'c tijb Bén ni ruzoob tijb yu ni ad re'ct, zaca'man ni rayalaman por ni beenman. ¹⁵ Per bal che'c ni beenman, sacaman zi'c tijb Bén ni

re'c lidx abi' penz rliaaman loj bajl, din zajcaman perdon per gusëëbaman gra.

¹⁶ Zeel gol gogbee guial lëjt naj zi'c tijb xyadoo Dios guial nabandi con xSprijt Dios. ¹⁷ Abi' bal chu bén guitie'chdojn bén riladx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

¹⁸ Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bénrajc da't. ¹⁹ Din delant loj Dios achet lasajc guialrajc bénguidxliuj, tib lajt loj xtiidxaman rëb: "Ad rudëët Dios mod grii zagdxë ni naj xixgab ree bén naladx guial dád nasin reeman par güün reeman tijb ni ad najt xnejz." ²⁰ Rëb tëë loj xtiidxaman: "Dios ragbee chaaw guial xixgab ree bén rajc da't achet lasajcan." ²¹ Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. ²² Ma nulendi dunujn, naj Pab, Apolos në Bëd. Xieendi naj guidxliuj, guialnaban, guialgüjt, ni yu', në ni qui chu'ri, xieendi naj gra. ²³ Abi' lëjt ma najdi xbejn Cristo abi' Cristo naj Xi'n Dios.

Dxiin ni been ree bén naj ree xi apóstoles Jesús

4 Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni nagueie'ch par bejn. ² Per lëjt ragbee guial tijb mojs naj par güünman gra ni rayal güünman din gap reeman laaman confianz. ³ Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn. ⁴ Din majsi bal naladxan guial achet ni mal wayünan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cayünan. ⁵ Zeel ad rayalt yadxa lojdi chu cayüjn zagdxë o chu ad cayüjnt zagdxë, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

⁶ Compniar raliduladx ree Jesucrist, gra ree ni canin lëjt wen par lëjtän. Abi' Apolos con naj nayajcan tijb ejempl par lëjt, din por dunujn gusiididi ad tédla j guiliesidi xvalor bejn chitëë por zian gusa'ndi trajs stijb bejn. ⁷ Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rulüü ad por Diost rajpidi laan?

⁸ Lëjt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi rey din nanabeen con lëjt! ⁹ Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree bén ad lasajct, zi'c ree benmal ni rayal guialgüjt, abi' radxaloj ree anjl në ree bénguidxliuj dunujn. ¹⁰ Abi' la'tgaj nayajcan zi'c ree bén ad yu't xquiarguiejn par bénguidxliuj guial ratie'chan xtiidxza'c Cristo, lëjt rlies xvaloridi guial rignia' da'tidi guial riladxidi laaman. Dunujn nayajc zi'c bén ad yu't gojl guiáad lëjt naladxidi yu' da'-

tidi gojl abi' rajp ree bejn lëjt respejt guiáad dunujn ad rënt reeman dunujn. ¹¹ Xt yandxej sta cayzaagdiajn por guialrliaan, guial re'c nijs në guial ryaadx du xaban. Zienloj ni rüjnnë ree bejn dunujn, achet du lidxan.

¹² Abi' dád radxagan raguieenan dxiin din guidxel ni yadaawan. Chi ruzaal ree bejn diidxmal du guijcan radxi'nan con diidxza'c, abi' radaanan ni rüjnnëtz i reeman dunujn. ¹³ Abi' chi rnieeguijdx reeman dunujn, raneeza'cnë'n laa reeman. Xt yan nayajcan zi'c tijb guix par bénguidxliuj, nayajcan zi'c tijb ni ad rüjnt sirv par laa reeman. ¹⁴ Ad cucatan gui'ch guie par gusa'ntxun lëjt, cucan laan din gunen lëjt consejw zi'cgajc da xi'n reen guial rënan lëjt. ¹⁵ Din majsi gapidi zi'c chii mil ree bén gusiid lëjt, per najzi naj zi'c tijb Dad par lëjt. Din por naj guzuloj riladxidi Jesucrist chi basidan lëjt xtiidxza'caman. ¹⁶ Zeel rniaaban lojdi din guibandi zi'c naban.

¹⁷ Din par zian rxhialan Timoteo guitixlojman lëjt, bén rënan zi'c da xi'nan laaman diidxli riladxaman Jesucrist. Laaman gusaaladx lëjt xhienaag naban guial riladxan Jesucrist, din zi'c naban náj ni cusidan bén riladx ree Jesucrist gra lod ran. ¹⁸ Yu' ree xcompniaridi naladx guial ad zitixlotran lëjt abi' rlies xvalor reeman guial naban reeman zagdxë. ¹⁹ Per Dios gunee permis din diob guitixlon lëjt dxej gagbeen wali reeman ya naban reeman zi'c rniee reeman o rnieez reeman. ²⁰ Din guial guiban zi'c rniabee Dios ad najtan diidxzi, rayal güün bejn zi'c rniabee Dios con xguialrniabeeman. ²¹ Yan, ¿conin rëndi günan chi guitixlon lëjt, gadilë'n lëjt ya o guiënan lëjt ganenë'n lëjt diidxza'c?

Xhienaag gac con bén rüjn tijb dol

5 Ma bacagdiagan guial tijb lëjt bén riladx ree Jesucrist nabannë xnarojpidi zi'c lacheelidi, ni'quiza ree bén ad nünbeet Dios ad rüjnt lasa' dol guin. ² Abi' lëjt rüjndi benro', luar rüjndi benro' gol guyunaya gol babëë tëë bén guin lojdi. ³ Majsi ad za'tan con lëjt, per rünan xgab por lëjt zi'cgajc rulüü za'n con lëjt, abi' ma benchaawan xgab xhie rayal bén rüjn dol guin. ⁴ Zi'c guialrniabee ni banee Jesucrist naj, naj rni lëjt: "Gol bachajg lasa'di." Dxej gol gunaladx guial za'n con lëjt abi' por xguialrniabee Dad Jesucrist, ⁵ gol been bén guin tiblad, gol basa'nman loj xindxab din gagnaaman o sagdiajman por ni cayüjnman din gacaman perdon dxej ni gui't dux Dad ree Jesucrist.

⁶ Ad nixtan guial rlies xvalorgajquidi abi' rtiëjbidi rajc lasa' ree dol guin. Gol gogbee guial zi'c rüjn levadur cob par guidxtil ziangajc con tijb bén güün dol ma zë gajcan zian con gra ree lasa'di. ⁷ Zeel gol been nagueijn din gaquidi naya zi'c cob harin ni ad yu't levadur guijc. Din zi'c bagüjt ree bejn tijb xiil lanij pascw din yaya xtol reeman, ziangajc dunuj ree por xguialgüjt Jesucrist ma naya ree loj Dios. ⁸ Abi' guial yabaa ree por zian naj guial yabajn ree guidib du luxdoo ree zi'c rayal, zi'c guidxtil ni ad no'cht levadur, luar yabajn ree con ree ni mal në ree dol zi'c babajn ree yaloj.

⁹ Abi' zi'c ma rnin lojdi loj stijb gui'ch ni ma guxhalan lojdi, ad guchajguidi bén naban ree nadxuudx. ¹⁰ Ad canenë'tan lëjt zian por ree bén ad rliladxt Dios, bén naban ree nadxuudx o rzëëbladx reeman ni ruguiaa'tzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie. ¹¹ Bén ni canin lëjt naj ree bén ni rëb naj ree xcompniaridi, bén rliladx ree Jesucrist abi' naban reeman nadxuudx, o rzëëbladx reeman ni ruguiaatzzi reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengui, o bégubaan. Xcompniaridi bén naban ree zian ni'quid rayalt gawnëdi laa reeman. ¹² Ad da cwenttan naj ganen por ree bén ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bén güün guialguxtis con laa reeman, per dux cwent ree naj guial yazuxnejz ree bén naj ree dux compniar ree bén rliladx ree Jesucrist. Zeel gol babëë bén cayüjn dol entr lojdi.

Chi yu' wadijl entr ree bén rliladx Jesucrist

6 Zi'c chi xhie rzajcnë tijb xcompniaridi bén rliladx Jesucrist, ¿chexc zeel rëjdi loj guxtis din yabëëxnezaman ni rzajquidi luar chedi loj ree xcompniaridi bén rliladx ree Jesucrist? ² ¿Id rliladxidi ya guial yu' dxej bén rliladx ree Jesucrist laa reeman naj bén güün xguialguxtis loj ree béguidxliuj? Abi' bal yu' dxej güün xguialguxtis reeman loj béguidxliuj, ¿chexquiza zeel ni ad nawëëgt ni rzajc ree xcompniaridi ad rajt rabëëxnejzidi? ³ ¿Id ragbeedi ya guial xt loj ree xianjl Dios yu' dxej yaya'p ree guialrniabee? Abi' xt mazri zile' yalëëxnejz ree ni cayza'c ree loj guidxliuj guie! ⁴ Zeel zi'c chi xhie rzajcnë lasa'di, ¿chexc zeel zëdi loj ree bén ad najt xbejn Cristo din yabëëxnejz reeman ni rzajquidi? ⁵ Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya? ⁶ Per lëjt luar güündi zian aal rudëëd lasa'di loj ree bén ni ad rliladxt Dios.

⁷ Abi' natun guial gudëëd xcompniaridi loj guxtis guial cadilidi, meyorli gol gudaan ni rüjnnë reeman lëjt. Meyorli tiëbidi cuan reeman xieendi. ⁸ Per luar güündi zian, lëjtlí cayüjn ree ni mal guin con ree xcompniaridi bén rliladx ree Jesucrist. Rtia'di xieen reeman abi' rüjnëdi laa reeman ni ad rayalt güünnëdi laa reeman.

⁹ ¿Id ragbeedi ya guial bén naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bén ni naban ree nadxuudx, në ree bén rën ree ni ad najt ree Dios, në ree bén za'në bén ad najt lacheel reeman, në ree xinguaaw rüjn zi'c bégunaa në ree xin rën lasa' xinguaaw zi'c bégunaa. ¹⁰ Në ree bégubaan, në ree bén rzëëbladx ni ruguiaatzzi reeman, në ree bengui con ree bén rnieeguijdx bejn, në ree bén raguil xhienaag chiquied reeman xieen bejn, ad zut reeman loj xguialrniabee Dios. ¹¹ Yu'di gubajn zian guia'xchej, per yan ma naya-di delant loj Dios, ma najdi par Dios, abi' ma nayabidi

zi'c tijb bén ni ad wayüjnt dol por xguialrniabee Dad Jesucrist në por xSprijt Dios bén ma nabannëdi.

Dux cuerp ree naj par Dios

¹² Walican zajc yaguieen ree zi'ctzi rayën ree, per ad gratan naj zagdx par güün bejn. Zajc güün zi'ctzi rënan, per ad zatiëëbtan xhie nabee naj. ¹³ Yu' ree bejn rëb: "Guialraw naj par lën bejn, abi' lën bejn naj par guialraw." Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bén ad najt lacheelaman. Din dux cuerp ree naj par Dios, abi' laaman rniabee dux cuerp ree. ¹⁴ Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

¹⁵ Gol gogbee guial ma najdi tijbzi con Cristo, guial dux cuerp ree ma naj tibia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb bégunaa dxuudx? ¿Ad rayalt gac zian! ¹⁶ ¿Nid ragbeedi ya guial chi runë bejn tijb bén ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: "Grop reeman ma naj tijbzi." ¹⁷ Per bén ni ma naj tijbzi con dux Dad ree Jesucrist, najman tijbzi con laaman por xSprijt Dios.

¹⁸ Gol gojp da't cudad ad güündi ni dxuudx ree con bén ad najt lacheelidi. Xhietëëz dol ren ad ruxhiintan xcuerp bejn zi'c rxin xcuerpaman chi rüjnman ni dxuudx con bén ad najt lacheelaman. ¹⁹ Din gol gogbee guial lëjt naj xyadoo xSprijt Dios bén ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc. ²⁰ Din par zian gudijx Jesucrist por dunuj ree chi gütaman loj crüjz. Zeel gol beennë xcuerpidi dxiin par güündi Dios bén zobjloj, din laaman naj bén rniabee lëjt.

Consejw xcwent guialruxhliaa

7 Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdx naj guial ad zuxhliaat bejn. ² Per chitëë güün bejn dol con stijb bejn, zagdxen guial tijb gaj xinguaaw chu' lacheel o tijb gaj bégunaa chu' lacheel, ³ din gudëë xinguaaw guin gust lacheelix abi' bégunaa guin gudëëzaman gust lacheelaman. ⁴ Din chi ma baxhliaa tijb bégunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliaa xinguaaw, ad rniabeetri xcuerpix, bégunaa guin ma rniabee laan. ⁵ Zeel xinguaaw në bégunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudëëd ree dxej guin, gol bachajg lasa'di stijb chitëë güün xinxab lëjt gan con ree xixgabidi.

⁶ Ad canitan lojdi guial najczi guxhliaa bejn, per ad ni maltan guial guxhliaadi. ⁷ Da xgaben naj guial xi nix gra ree bejn gac zi'c naj, per tijb gaj bejn ma bazaladx Dios xquiargueijnman guial xhienaag guibanman, bal guxhliaaman o bal id zuxhliaaman.

⁸ Par ree bén xtiyb në par ree béngunaa bizëjb, naj rni guial zagdxeli yaya'n reeman zi'c naj. ⁹ Per bal id zadaan reeman guial ad zuxhliaat reeman, dxel zagdxeli guxhliaa reeman luar gudëed xcuerp reeman casti guial taan reeman.

¹⁰ Guiáad ree bén ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt béngunaa lacheelaman. ¹¹ Per bal tio'n lacheelaman ad rayalt guxhliaanëman xin ren, zagdxeli naj yachajg lasa' reeman stijb. Ziangajc xinguaaw ad najt yala' lacheelix.

¹² Yan, ni ganin ad ni guneeet dux Dad ree Jesucristan, per naj rni lojdi: Bal yu' xinguaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex. ¹³ Ziangajc bal rliladx béngunaa guin abi' lacheelaman ad rliladxt, abi' bal par xinguaaw guin achet güünan, dxel ziangajc ad rayalt yala' reeman. ¹⁴ Din xinguaaw ni ad rliladxt Jesucrist, zünle' Dios laax guial rliladx lacheelix. Guiáad béngunaa ni ad rliladxt Jesucrist zünle' Dios laaman guial rliladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bén ni ad wayüjnt dol. ¹⁵ Per bal xinguaaw o béngunaa ni ad rliladxt Jesucrist rënman yala' lacheelaman guial rliladx lacheelaman Jesucrist, yala'ri reeman. Bén rliladx ad zajct güünman naguiejn guibannë lacheelaman laaman din ad gurejdx Dios dunuj ree par yabajn ree con wadijl. ¹⁶ Din béngunaa guin ad ragbeetaman bal güünman gan chililadx lacheelaman, o bal xinguaaw guin ma rliladx dxel ni'qui laax ad ragbeet bal güünx gan chililadx lacheelix.

¹⁷ Naj rni guial tijbgaj ree bén ni ma rliladx Jesucrist rayal guiban reeman loj guidxliuj guie zi'c ma ba-caabee Dios laa reeman, yaya'n reeman zi'ctzi naj reeman chi guzuloj rliladx reeman Jesucrist. Zianan naj ni cayën loj ree dux compniar ree bén rliladx ree Jesucrist güün reeman. ¹⁸ Bal tijb bejn chi guzuloj rliladxaman Jesucrist mal yu'man sen ni ru ree bén Israel, yaya'nraman zian. O bal id yu'man sen guin chi guzuloj bililadxaman Jesucrist, ad najt chu'man sen guin. ¹⁹ Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios. ²⁰ Zeel gol baya'n zi'c najdi chi guzuloj bililadxidi Jesucrist. ²¹ Bal najl zi'c bén nado' chi guzuloj bililadxil laaman, ad najtan ni chu'l xgab xhienaag güünl. Per bal zile' ad zajctril zi'c bén nado', mazri zagdxé barii loj ni najl zi'c bén nado' guin. ²² Bén ni naj zi'c bén nado' chi guzuloj bililadxaman Cristo ma najman zi'cgajc bén ni ad najt zi'c bén nado' par güünman sirv loj Cristo. Abi' bén ni ad najt zi'c bén nado' chi guzuloj bililadxaman Cristo, dxel Cristo ma rniabee laaman. ²³ Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bénguidxliuj lëjt con ree ni rusquiee. ²⁴ Zeel rnin lojdi compniar raliduladx ree Jesucrist, gol baya'n zi'c najdi chi guzuloj bililadxidi Jesucrist.

²⁵ Yan lëjt bén ad waxhliaat ree, dux Dad ree Jesucrist achet rëbaman por zian. Per naj zajc gunen lëjt conse-

jw xhienaag güündi, abi' da xgaban naj guial zaliladxi-di ni ganin lojdi din guial raya Dios naj bacaabeeman naj cayünan mandad ni cayünan. ²⁶ Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi. ²⁷ Bén ni ma baxhliaa ad najt gusa'n lacheelaman. Guiáad bén ni ad waxhliaat ad rayalt güünman naguiejn guxhliaaman. ²⁸ Per bal rüjnl xgab guxhliaal, ad dolt naj guxhliaal. Ziangajc ree bi-inxdüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bén ruxhliaa, abi' laan ad rëntan saquidi.

²⁹ Ni rënan gagbeedi naj guial ma caydop ree dxej ni zio'p ree loj guidxliuj guie par yagueen ree xmandad Dios. Zeel bén ni ma baxhliaa ree gol been sirv Dios xt lod guneeetzan lëjt zi'cgajc ree bén ni ad waxhliaat. ³⁰ Ni'qui guialrabaa, ni'qui guialrunaya, ni'qui guial rap bejn xhienin loj guidxliuj guie achet zajc gudxoön guial güün bejn xmandad Dios. ³¹ Bén ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdëd.

³² Ni rënan naj guial ad zutidi xgab por ree ni yu' loj guidxliuj guie. Tijb xinguaaw xtiyb mazri rüjnx xgab por xmandad Dios, mazri rüjnx naguiejn güünx zi'c ruladx Dios. ³³ Per tijb xinguaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjnx naguiejn yabaanë lacheelix laax. ³⁴ Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliaat mazri rüjnxman xgab por ree xmandad Dios guidiblagaa rüjnxman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnxman xgab por ree ni yu' loj guidxliuj guie, mazri rüjnxman naguiejn yabaanë lacheelaman laaman.

³⁵ Gra ni canin lojdi, canin laan par güünan lëjt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn tëë zi'c rën dux Dad ree Jesucrist sin guial gudxoön xhienin lëjt.

³⁶ Chutëëz xinguaaw rüjn xgab guxhliaanë biin rnieenëx abi' bal ma yu' biingunaa guin izj par guxhli-aam, güünri reex ni naladx reex naj zagdxé par laa reex. Bal guxhliaa reex, guxhliari reex. Ad doltan guial guxhliaa bejn. ³⁷ Ziangajc chutëëz bén ni ad rüjnt xgab guxhliaa, ad rayalt güünman xgab guial rüjn naguiejn guxhliaaman bal ma beenman xgab zagdxé guial ad zuxhliaataman. Din zagdxé gajcan bal id zuxhliaa bejn. ³⁸ Zeel rnin lojdi zagdxen guial chu guxhliaa, per mazri zagdxé bal id zuxhliaa bejn.

³⁹ Tijb béngunaa chi ma baxhliaaman, ad rayalt sunëman xinguaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rliladx Jesucrist. ⁴⁰ Per naladxan guial mazri zagdxé guibanman bal id zuxhliaman stijb. Zian rünan xgab guial nabannë'n xSprijt Dios zi'cgajc lëjt.

Guialraw ni rbe'c ree bejn loj ni naladx reeman naj Dios

8 Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. ² Bal yu' bén naladx guial ma bayaaloj rig-nia'man gra, cusquiee laagajcaman din ryaadx da'tri chignia'man. ³ Per bén ni rën Dios, Dios nünbee laa-man.

⁴ Yan por guial raw bejn guialraw ni ma gule'c ree-man loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. ⁵ Majsi yu' ree bejn naladx guial yu' zien ree dios bén rniabee xanyabaa në loj guidxliuj, ⁶ per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēēman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēē raya'p ree guialnaban.

⁷ Per ad grat ree bejn rünj xgab zian. Din yu' ree bén ni guyën graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. ⁸ Dunuj ree rayagbee guial ad ni rawt bejn rünj guiban bejn mazri zagdx loj Dios, lasa'gajcanan bal yadaaw ree o ad zadaawt ree lasa' ree guialraw guin. ⁹ Per majsi lējt ragbee guial zajc gawidi xhi-etēēznin, rayal gapidi cudad ad gūndi guial ree bén qui riladxri Jesucrist gūn reeman dol. ¹⁰ Din bal lūj guial achet naladxil rawil xhietēēznin, zobjil cayawil guialraw ni ma gurej loj ree ni ad najt dios. Dxel guguaa tijb ree bén qui riladxri Jesucrist lūj abi' nēga-jcaman sēēbladx gaw guialraw guin majsi lēn lux-dooman naladxaman guial ad zagdxet naj ni cayūjn-man. ¹¹ Dxel por xguialrajquil cayūjnl guial gūnman dol guial ad nixt yu' luxdooan cayawaman ni guin ree, per badxe'guijc guial në por laaman gūjt Jesucrist loj crūjz. ¹² Zeel bal rünjnl tijb ni naj ni mal par ree bén qui riladxri ree Jesucrist abi' rünj reeman dol por lūj, dolan cayūjnl delant loj Cristo. ¹³ Bal por tijb ni rawan rünj ree da compniaran dol, mejorli ad zawtran laan chitēē gūnman dol por naj.

Ni zajc gūn tijb apóstol

9 Lējt ragbee guial zajc gūnan ni rēnan por guialr-niabee ni ra'pan guial najn apóstol. Ma baguaan dux Dad ree Jesucrist abi' lējt naj ree bén ni ma benan gan par laaman guial ma bililadxidi laaman. ² Bal yu' ree bén ni ad nünbeet naj zi'c apóstol, per lējt ragbee guial apóstol najn. Din zi'c ma riladxidi Jesucrist dxel ma rguien guial diidxli najn apóstol.

³ Abi' par ree bén ad riladx guial najn apóstol, ze naj ni rën loj reeman: ⁴ Ra'pan derejch gunee reeman ni gawan në ni guiē'n. ⁵ Abi' zajc tēē guxhlian con tijb bēngunaa naj dulasa' raliduladx ree Jesucrist din chinē'n laaman bantēēz guin gan, zi'c rünj los demazri ree apóstoles con ree bijch Dad Jesucrist në Bēd. ⁶ ¿O najzi con Bernabé bayal yaguieenan xmandad Dios dux cwentan ya? ⁷ Per ni'qui tijb suldad ad rejt loj wadijl xcwentaman, yu'czi Bén rguijx xgaxtaman. Zian-gajc Bén rxūbin uv, ¿wen id zajc gawaman laan ya? Laadx Bén ni rajp vag ree, ¿wen id zajc guiē'man xlejch reeb ya? ⁸ Abi' ad xixgabtzi bēnguidxliujn canin lojdi, në loj ley ni badēē Dios loj Moisejs rēb zian. ⁹ Din loj ley guin rēb: "Ad gudxe'di guijxh ro' ree be gui'xh la'tgaj cayūjn reeb dxiin." Ad rēbt Dios zian guialzi yu'man laa reeb xgab, ¹⁰ rēbaman zian por dunuj ree. Din zi'c Bén rlia' yuj zi'c Bén rusia trigo, grop reeman yu'guijc guial yu' ni yaca' reeman. ¹¹ Yan ma balūn lējt xhienaag chinalidi xnejz Dios, ¿wen zro' da't yanaaban lojdi ya bal gūndi dunujn yudar din gusnuu dux guialnaban? ¹² Bal stijb ree Bén ni rusiidi lējt rila' rtia' reeman ni ray-al gudēēdidi loj reeman, dxel ziangajc dunujn raya'pan mazri derejch gūndi dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitēē xhie cwib guijc guial ad zucaagdiajgtri ree bejn xti-idxza'c Jesucrist. ¹³ Lējt ragbee guial gra ree bixhioz ni rünj sirv lēn xyadoo Dios, rtia' reeman tibda'n ni rinē ree Bén Israel loj Dios persi rila' rbajn reeman. Ziangajc gra ree bixhioz ni rünj ree sirv lule' yadoo guin lod rinē ree bejn be ree par Dios, në reeman rtia' ta'n ni rinē ree bejn persi rila' rbajn reeman. ¹⁴ Yan laagajcan rēb dux Dad ree Jesucrist por ree Bén ni rulūū xtiidxza-'caman, guial por ree Bén ni rulūū reeman rayal guiban reeman. ¹⁵ Per naj achet caca'n, ad caxhal tēē-tan gui'ch guie lojdi din guneedi xhienin. Din par naj zagdxeli naj guiētan luar chu' Bén chiquied guialrabaa guin luxdon guial cusidan bejn ree xtiidxza'c Jesucrist.

¹⁶ Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bay-alan. ¡Prob naj bal idan gusid bejn ree diidxza'c guin! ¹⁷ Zeel bal cayūnan mandad guin guial ruladxan gūnan laan, dxel yu' ni gaca'n. Per ni'qui bal id ruladxan gūnan mandad guin, laan bayal gūnan. ¹⁸ Abi' ni rūnan gan naj guialrabaa ni yu' luxdon majsi ad naxtan, majsi ad caca'tan ni rayal tia' Bén ni rulūū xtiidxza'c Jesucrist, per cusnuu culūn diidxza'c guin ree bejn ree.

¹⁹ Abi' majsi ad yu't Bén rniabee naj por mandad guin, per laa naj guie par gra ree bejn din gac gūnan sirv xbejn Cristo. ²⁰ Abi' chi za'n con ree Bén Israel, rūnan naguiejn persi yu'guijc reeman guial nayajcan Bén Israel din gūnan gan gac reeman xbejn Cristo. Chi za'n con ree Bén Israel Bén rünj ree naguiejn chinal xley Moisejs dxel rūnan zi'c Bén zinal ley guin, din gūnan gan gac reeman xbejn Cristo, majsi ragbeen guial ad rniabeet ley guin naj. ²¹ Abi' chi za'n con ree Bén ad najt Bén Israel, Bén ad zinalt ree ley guin dxel majsi rag-been guial Dios naj Bén rniabee naj guial nabanani zi'c

rniabee Cristo, per rünan naguiejn din guguaa ree-man naj zi'cgajc tijb lasa' reeman din gac günan gan gac reeman xbejn Cristo. ²² Chi za'n con ree bén yu'-nawëëg par güün reeman o gaw reeman xhienin, dxel rünan naguiejn din su reeman zagdx con naj din günan laa reeman yudar gac reeman xbejn Cristo. Bantëëz lod ran rünan naguiejn din guguaa reeman naj zi'cgajc tijb lasa' reeman, din günczan gan majsi ta'nzi reeman günan gan gap reeman perdon por Cristo.

²³ Gra ree ni guie cayünan guial rënan xtiidxza'c Jesucrist, din tiblojzi güünle' Dios naj con gra ree bén riladix diidxza'c guin ree.

²⁴ Lëjt ragbee guial chi yu' tijb carrer zien bejn ruxüün, per tijbzaman naj Bén rtia' prem. Ziangajc lëjt gol been naguiejn tia'di ni gunee Dios. ²⁵ Bén ni ruxüün ree rajp laagajc reeman cudad chitëë xhie gudxoon guxüün reeman. Rüjn reeman zian din güün reeman gan, abi' ni rüjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. ²⁶ Abi' ragbee chaawan xhienin cayünan, ad cayüntan zi'c tijb Bén ni ruxüün sin guial gagbeen chexc, ad rüntan zi'c tijb Bén ni rga'p sin guial gagbeeman ban ca'-paman. ²⁷ Zeel cusagdiaj naj gajc din gac ganabee naj gajc günan zi'c rayal günan, chitëë guial culün bejn ree xtiidxza'c Jesucrist achet yayalan delant loj Dios.

Guial rën ni ad najt ree Dios

10 Compniar raliduladx ree Jesucrist, gol basaal-adx guial dux bengol gulal ree Bén binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnia. ² Zian biguien guial xbejn Moisejs naj reeman din gra reeman guzanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman loj zaj guin në loj nijsdoo guin. ³ Gra tëë reeman gudaw guialraw ni bi't diizd xanyabaa. ⁴ Gra tëë reeman gu' nijs ni bazaladx Dios loj reeman, nijs brii lad tijb guiaj. Rën guiëban guial diizd nadxel mal naban Cristo con laa reeman lod zëtzi reeman. ⁵ Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

⁶ Gra nine gojc din yayagbee ree guial ad laat yaguieen ree lasa' ree ni mal ni been reeman. ⁷ Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: "Gurej reeman, gudaw reeman dxel bisu reeman been reeman ni dxuudx ree." ⁸ Ad rayal tëët güün bejn ni dxuudx con Bén ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman. ⁹ Ad zaneeguijdx tëët ree Dios zi'c been zien ree Bén guin, abi' gudaw bëël laa reeman persi güjt reeman. ¹⁰ Ad rayal tëët yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

¹¹ Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been ree-

man, dunuj ree guial nabajn ree yan guial ma caydop dxej ni yadëëd ree bejn cwent loj Dios. ¹² Zeel Bén ni naladx za'dxi'ch loj xnejz Dios, mejorli gapaman cudad chitëë güün dol laaman gan. ¹³ Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

¹⁴ Zeel compniar raliduladx ree Jesucrist, zi'c rënan lëjt rñin lojdi gapidi cudad ad goc guiëndi ni naladx ree bejn naj dios. ¹⁵ Naj ragbee guial najdi ganax Bén rignia', zeel lëjt gajc gol been xgab bal zagdx naj ni canin lojdi. ¹⁶ Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guidxtil zi'c beenman, laan naj tijb sen guial ma nayajc ree tijbzi con laaman. ¹⁷ Din majsi zien nayajc ree, per zi'c rlia' tijbzi guidxtil par dugra ree, zian rguen guial ma nayajc ree tijbzi con Cristo.

¹⁸ Lëjt ragbee xhienaag rüjn ree Bén Israel chi rinë reeman tijb gon par Dios, abi' zi'c raw reeman tiblia' gon guin yu'guij reeman guial ma naj reeman tijbzi con Dios. ¹⁹ Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. ²⁰ Din Bén rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin. ²¹ Ad zacjt güündi zian par guiguien guial ma najdi tijbzi con ree xindxab guin, abi' gaw tëëdi guidxtil con vin din guiguien guial ma najdi tijbzi con Cristo. ²² ¿O rëndi ya yache'ch ree Dios? ¿Wen mazri raya'p ree guialrniabee guial lojman ya?

Xhie zajc güün ree xbejn Dios

²³ Graczi zajc güün bejn, per ad gratan naj zagdx guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios. ²⁴ Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

²⁵ Zi'c chi rziidi bëël luguia', ad guiniabdiidxidi bal ma gurejn loj xdios reeman, chitëë xhie guinaladixidi chi gawidi laan. ²⁶ Din xieen dux Dad ree Dios naj guidxliuj con gra ni yu' lojn.

²⁷ Bal tijb Bén ad waliladxt xtiidx Dios na lojdi guial chitawidi lidxaman, abi' bal rëndi chedi gol chej. Gol gudaw gra ni gunee reeman lojdi ad xhie guiniabdiidxidi chitëë xhie naladixidi. ²⁸ Per bal yu' xcompniaridi na guial ni cunee Bén guin cayawidi ma gurejn loj xdiosaman, ad gawidi laan por Bén bagojn lëjt chitëë güünman xgab mal guial ad laat cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin. ²⁹ Ad canitan lëjt xcwent guial xhie naladixidi, ni canin lëjt naj por ree xgab ni zajc güün stibj xcompniaridi por lëjt.

Per wed yu'di rüjn xgab: "Per, ¿chexc zeel ad züntan gra ni ragbeen ad najt ni mal por xixgabzi stibj bejn?

³⁰ Wed rëb tēdi: Naj ragbee guial rudën quixtē loj Dios por gra ni rawan, ¿chexquiza zeel güün reeman xgab mal por naj?" ³¹ Per naj rni lojdi gra ree ni guin rayal gudxe'guijquidi din zi'c ni rawidi zi'c ni rē'di nē gra ree ni rüjndi rayal güündi laan par güündi Dios bén zojbloj. ³² Gol gojp cudad xhienaag nabandi din zi'c ree bén Israel zi'c ree bén ni ad najt bén Israel con ree xcompniaridi bén rliladx ree Jesucrist ad züjnt reeman xgab mal por lējt. ³³ Din zian rünan, rünan nagueijn chitē xhie naladx bejn con naj. Ad rüntan ni rüjnzi naj yudar, rünan nagueijn din günan ni rüjn yudar zien ree bejn din gac gap reeman perdon loj Dios.

11 Zeel gol binal zi'c rünan, zi'c zinaalan zi'c been Cristo.

Xhie rayal güün ree bejn chi rbejdx rniab reeman Dios

² Naj dád rabaanē'n lējt guial rusaaladxidi naj, guial yu'guijquidi rüjn tēdi zi'c balün lējt. ³ Rēn tēen gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee bēngunaa. ⁴ Tijb xinguaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx. ⁵ Ziangajc chutēz bēngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb bēngunaa ni biaj guijc xt garej. ⁶ Zeel bal tijb bēngunaa ad rēntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. ⁷ Per xinguaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpax Dios. Abi' bēngunaa guial rxhioob xhienin guijcaman, zian rulüüman respejt ni rajpaman xinguaaw. ⁸ Din ad gojct xinguaaw con guxtil lad bēngunaa, bēngunaa guin gojc con guxtil lad xinguaaw. ⁹ Ad gojct xinguaaw par bēngunaa, bēngunaa guin gojc par xinguaaw. ¹⁰ Zeel bēngunaa rayal guixhioob xhienin guijcaman din guiguien guial xinguaaw rniabee laaman zi'c rulüü ree anjl chu rniabee laa reeman. ¹¹ Majsi delant loj Dios tiblojzi naj bejn, din bal id bēngunaa niu achut xinguaaw niu, abi' bal id chu xinguaaw niu achut bēngunaa niu. ¹² Walican, guial con guxtil lad xinguaaw gojc bēngunaa, per yan por bēngunaa ri't xinguaaw loj guidxliuj, zeel zi'c xinguaaw con bēngunaa por Dios yu' reeman loj guidxliuj.

¹³ Naj rni lējt, lējt gajc gol been xgab bal zagdxen cwedx guiniab tijb bēngunaa Dios abi' achet naxhoob guijcaman. ¹⁴ Bejn gajc ragbee guial natun bal id zugaj guijc xinguaaw. ¹⁵ Per par bēngunaa mazri zagdxen rguienman bal guyool guidxguijcaman, din rajpaman laan par gusiaawan guijcaman. ¹⁶ Bal chu ad za't conform por ni canin lojdi, per naj rugojn lējt guial achet stijb costumbr raya'p ree, zian naj dux costumbr ree con los demazri ree bén rliladx xtiidx Dios.

Ruxhiin reeman zi'c basa'n Dad Jesucrist gac

¹⁷ Yan xcwent ni ma ganin lējt, ad zile't ganin guial zagdxen naj ni cayüjndi din chi radxaag lasa'di par cwedx guiniabidi Dios, al ni ad rayalt güündi rüjndi. ¹⁸ Yaloj rnin lojdi bigueijnan guial chi radxaag lasa'di par cwedx guiniabidi Dios ad raya'ntidi diidx, abi' tiblad rliladxanan. ¹⁹ Din nawēg najn guial ad zajct zian, abi' zian rguien chu diidxli zinal xnejz Dios. ²⁰ Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. ²¹ Din tijbgajdi rüjn nagueijn diob gawidi, ad rbējzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rē'di zi'ctzi rēndi. ²² ¿Id yu' lidixidi ya lod gawidi guiē' tēdi zi'ctzi rēndi?, ¿o ad rēntidi xcompniaridi bén rliladx ree xtiidx Dios ya, zeel rusa'nxtudi bēnprob ree bén achet rajp? Yan, ¿rēndi ya chu' luxdon zagdxen con lējt por zian? ¿Per zian zi'c cayüjndi, ad zajct ganin lojdi guial zagdxen naj ni cayüjndi!

Ni bigra gudaw Jesucrist xche

(Mt. 26:26-29; Mr. 14:22-25; Lc. 22:14-20)

²³ Abi' ni balün lējt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guidxtil. ²⁴ Abi' chi gulox badēman quixtē loj Dios dxe'l gula'man guidxtil guin, rēb gajman: "Guidxtil guie naj da cuerpan ni ma bayün par guiētan por lējt. Abi' chi güündi zian, gol beenan guial gusaaladxidi naj." ²⁵ Ziangajc beennēman cojp ni yu' vin chi gulox gudaw reeman xche, dxe'l rēbaman: "Vin guie naj da rejnan ni gaxhie'n chi guiētan par gaxhalan tijb nejz cüb guial xhienaag gac ree bejn perdon loj Dios. Abi' chi güündi zian, gol been zian guial rusaaladxidi naj." ²⁶ Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guidxtil rē' tēdi vin, zian rulüüdi guial güjtaman por lējt, gol been zian xt chi gui'taman loj guidxliuj guie zatijb.

Xhienaag rayal gac xche

²⁷ Yan bal yu' bén raw guidxtil rē' tēman vin xche guin, abi' ad yu' guijctaman ni rēn guiēb ni cayüjnman, dolan cayüjnman guial ad yu'guijctaman ni rēn guiēb xcuerp nē xrejnd dux Dad ree Jesucrist. ²⁸ Zeel rayal güün bejn xgab xhienaag nabanman delant loj Dios dxe'l ma zajc gawaman guidxtil guiē' tēman vin xche guin. ²⁹ Din bén raw guidxtil guin con vin guin abi' ad yu'guijctaman ni rēn guiēb xcuerp Jesucrist. Laagajcaman caguiil xcasti. ³⁰ Din guial rüjn ree bejn zian zeel dád ziendi ragxuu, zien tēdi ad yu't gojl abi' zien reeman ma güjt. ³¹ Per bal yalojxgaj yagueien ree xgab xhienaag nabajn ree loj Dios dxe'l ma zajc yadaaw ree xche guin, achetri xcasti Dios yayal ree. ³² Per ziangajc bal yu' xcasti Dios ni yayal ree, laan naj par guzuxnejzman dunuj ree chitē yagueien ree dol, chitē yayal ree casti ni rayal ree bén ad rliladxt xtiidxaman.

³³ Zeel compniar raliduladx ree Jesucrist, chi radxaag lasa'di par gawidi, gol gul jz ree xcompniaridi din gawidi tijbzi. ³⁴ Per bal yu'di ad zajct cw z guial ma rli-aandi, zagdxeli gaw lidxidi chit   yayalidi xcasti Dios guial ad z jntidi zi'c rayal. Gra ni rayal ganin lojdi, chi guialan guidganan l jt dxeel yanee ree.

Quiargueijn ni runee xSprijt Dios

12 Yan ganin l jt, quiargueijn ni runee Dios loj tijb gaj bejn por xyudar xSprijt Dios, din ad r ntan guibandi sin guial gagbeedi ni guin ree.

² L jt ragbee guial chi gadidi g  nbee Dios dxeel gogdxadi, bidxga'di ni na ree bejn lojdi naj ree dios abi'za ni'quid rnieet reen. ³ Zeel gol gogbee, chut  z b n rnieeguijdx Jesucrist, r n gui ban guial ad naban-n taman xSprijt Dios. Achu t  t bejn zajc gui b: " Jesu-crist naj b n rniabee naj!", bal id nabanman con xSprijt Dios.

⁴ Quiargueijn rent quiargueijn ren runee Dios dunuj ree, per Sprijt guin gajc naj b n ragn  duxra ree. ⁵ Majsi ni rent ni ren naj xmandad Dios ni cayguieen ree, per laagajcaman naj b n ni cayguieen ree sirv. ⁶ Abi' majsi garent garen cay jn tijbgaj bejn, Dios gajc naj b n ni cay jn yudar tiblojzi. ⁷ Tijbgaj dunuj ree rul   Dios ni rayal yaguieen ree con xyudar xSprijt Dios din yaguieen ree yudar dux compniar ree. ⁸ Din con xyudar xSprijt Dios yu' ree b n ma ca' quiargueijn par guinee reeman, yu' t   ree b n ma ca' quiargueijn par chignia' reeman diidxi xcwent Dios. ⁹ Abi' por xyudar xSprijt Dios yu' ree b n ma cwa' guialrliladx ni guidiblagaa. Yu' t   ree b n ma cwa' guialrniabee par yay jn reeman b nragxuu ree. ¹⁰ Yu' t   ree b n ma cwa' guialrniabee par g  n reeman gadxagayaa ree milagr. Yu' ree b n ma ca' quiargueijn par gud  d ree-man xtiidx Dios loj ree bejn. Yu' t   ree b n ma cwa' ree quiargueijn par gagbee reeman bal wali o ad walit ni canee b n r b guial caneeman xtiidx Dios. Yu' t   ree-man ma ca' quiargueijn par guinee reeman gadxagayaa ree diidx, abi' yu' reeman ma ca' quiargueijn par yad  d reeman tijb diidx par stijb diidx. ¹¹ Per por xyudar gajc xSprijt Dios r jn bejn ni guin ree, laaman ma ragbee conin rud  man g  n tijb gaj bejn ni nal-adxaman naj zagdx.

Tijbzi cuerp nayajc duxra ree

¹² Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman. ¹³ Din duxra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree b n Israel o ad nayajct ree b n Israel, bal nayajc ree zi'c b n nado' o ad nayajct ree zi'c b n nado', per tijbzi ma nayajc ree din duxra ree tiblojzi nabajn ree con xSprijt Dios.

¹⁴ L jt ragbee guial ad tibia'tzi naj xcuerp bejn, zien la' naj xcuerp bejn. ¹⁵ Yan bal gui b guia' bejn: "Ad najtan tibia' xcuerp bejn din ad najtan yaa bejn." Per ad

por ziant ad najt guia' bejn tibia'man. ¹⁶ Ziangajc majsi gui b guidiajg bejn: "Ad najtan tibia' xcuerp bejn din ad najtan guiallojman", ad por ziant ad najtri guidiajgaman tibia' xcuerpaman. ¹⁷ Din bal guidib xcuerp bejn niajc guiallojman,  xhieza naag niguiejnman?, o bal guidib xcuerp bejn niajc guidiajgaman,  xhieza naag niuxi'man? ¹⁸ Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c r nman. ¹⁹ Din bal niajc xcuerp bejn tiblojzi, dxeel ad najtran cuerp. ²⁰ Per zi'c ma rnin l jt majsi zien la' naj xcuerp tijb bejn per tijbzi naj guidiban.

²¹ Ad zajct gui b guialloj bejn loj yaaman: "Ad ryaadxtan l j." Ad zajct t  t gui b guijc bejn loj guia'-man: "Ad ryaadxtan l jt." ²² Din luar lod rul   ad r jn-za'ct sirv, laa reen naj ni mazri r jn sirv. ²³ Abi' ree luar lod ad rguient zagdx, raguieen ree nagueijn din guiguien reen zagdx. Gui ad ree luar naguei'ch, mazri raya'p ree cudad luar guin ree rata'cw reen din guiguien reen zagdx. ²⁴ Ad zro't radxu' ree xgab por ree luar ni rguien, mazri raya'p ree cudad luar naguei'ch ree zeel radojt ree xhienin din guiguien zagdx dux cuerp ree. Zianan been Dios xcuerp bejn ²⁵ din chit   yaguieen ree xgab guial yu' lod ad r jnt sirv, guidib dux cuerp ree r jn yudar lasa'. ²⁶ Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

²⁷ Yan ziangajc guial nayajc ree tijbzi con Cristo duxra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin. ²⁸ Abi' entr gra dux compniar ree b n rliladx Jesucrist. Dios yaløj bacaabeeman b n naj ree xi ap stoles Jes s, ni barojp bacaabeeman b n gud  d ree xtiidxaman loj ree bejn, bayon bacaabeeman b n gul   ree xtiidxaman bejn ree, dxeel bacaabeeman b n gap ree guialrniabee par yay jn reeman b nragxuu ree. Bacaabee t  man b n g  n ree gadxagayaa milagr. Bacaabee t  man b n ni g  n ree yudar bejn ree. Bacaabee t  man b n ni nabee ree loj ree b n rliladx xtiidxaman abi' bacaabee-man b n ni rniee ree zien ree diidx. ²⁹ Ad grat ree bejn naj ap stoles ad gra t  t ree bejn zajc gud  d xtiidx Dios loj ree bejn, ad grat ree bejn zajc gul   xtiidx Dios bejn ree. Ad grat ree bejn zajc g  n milagr, ³⁰ ad gra t  t ree bejn zajc yay jn ree b nragxuu, abi' ad grat bejn zajc guinee zienloj diidx ad gra t  t bejn zajc yay jn tijb diidx zatijb diidx. ³¹ Per gol been nagueijn din gunee Dios l jt quiargueijn zagdx ree, abi' naj ganin l jt conin naj nejz mazri zagdx chinalidi.

Xcwent guial r n bejn ree

13 Din bal rajc rnien zienloj diidx ni rniee b n-guidxliuj n  xtiidx ree anjl yu' xanyabaa, per bal id r nan bejn najzan zi'c tijb guilb rzijdx o zi'c tijb plati ni yu' cha'. ² O bal nayalan nud dan xtiidx Dios loj ree bejn, o nia'pan quiargueijn par niagbeen gra ni z  d por Dios ni gad gagbee bejn, o nia'pan zienloj guialrig-nia' o nia'pan tijb guialrliladx Dios ni xt zile' guchan xli-ajt ree guia', per bal id r nan bejn ree achet lasajcan. ³ Ziangajc majsi gagui'san gra ni ra'pan loj ree b n ni

ryaadx laan abi' yayü da cuerpan din che'can, per bal id rënan bejn ree achet lasajc ni cayünan.

⁴ Guial rën lasa' naj gap pacens lasa' bejn, gac bejn benza'c con lasa'man, ad zadëdlojt lasa' bejn, ad züjnt bejn nabë, ad züjnt bejn benro' loj lasa'man. ⁵ Guial rën lasa' naj gap respekt lasa' bejn, ad gac bejn naxhien, ad yalenyaman, ad chu'xyajn tëë lasa' bejn, ⁶ ad rayalt yabaa bejn por ni mal ni cayüjn bejn o ni cazajcaman, rayal yabaaman chi zë bejn xnejz. ⁷ Guial rën lasa' naj güün bejn perdon lasa'man ni güünnëtzii reeman laaman, abi' chililadx lasa'man, ad zadxag tëëta-man cwëzaman ni cabëzaman, taan tëëman ni rüjn-nëtzii reeman laaman. ⁸ Guial rën lasa' ad yu't dxej loxan, per guialrajc yu' dxej loxan, ad zu tëëtri bën ni rudëëd ree xtiidx Dios loj ree bejn ni'qui ree bën rniee zienloj diidx. ⁹ Din yan bal rayignia' ree, tibda'nzi naj ni rayignia' ree abi' bal radëëd ree xtiidx Dios loj ree bejn, tibda'nzi rayagbee ree xcwentaman. ¹⁰ Per chi guidxin dxej yayignia' ree gran, dxej achetri lasajc ni rayagbee ree yan.

¹¹ Chi gocan xindoo gunen zi'c xindoo, benan xgab zi'c xindoo, go'pan xquiargueijn xindoo. Per chi bidxin dxej gojcan bengol basa'nan gra guial xindoo tblad. ¹² Ziangajc yan ad rayignia't ree gra zi'cgajc chi ad rguient zagdx loj tijb guiaawajn, per chi guidxin dxej yadxin ree lod zobj Dios dxej yayignia' ree gra. Yan yu'zi ni rignia'n per chi guidxin dxej guidxinan lod zobj Dios dxej günbeen gra zi'c nünbeeman naj.

¹³ Choon naj ree ni ad yu't dxej lox, guialrliladx Dios, guialrbëz ni gunee Dios, në guial rën Dios dunuj ree. Per loj guiyon ree ni guin mazri lasajc guial rën Dios dunuj ree.

Guialrniee stijb diidx

14 Gol been naguieijn gol guyën ree bejn, gol gurejdx gunab tëë Dios din gunee-man xquiargueijn-di din güündi xmandadaman, per mazri rüjn naguieijn gapidi quiargueijn par gudëëdi xtiidx Dios loj ree bejn. ² Bën rniee tijb diidx ni ad rignia't gra bejn, güünman cwent guial achut caneenëman. Tijbzi Dios caneenëman guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni rën guiëb ni caneeman. ³ Per tijb bën rulüü xtiidx Dios bejn ree cayüjnman yudar xhienaag chinal bejn xtiidx Dios, cudëëdaman consejw loj ree bejn ragu' tëëman luxdoo reeman. ⁴ Abi' bën rniee tijb diidx ni ad rignia't gra ree bejn, par tijbzi laaman naj ni caneeman, per bën rniee xtiidx Dios cayüjnman yudar gra ree xbejn Dios din gusnuu chinal reeman xnejzaman.

⁵ Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtëë bal zile' guiëbaman loj ree bejn xhie rën guiëb ni rnieeman din güün sirv ni rnieeman gra ree bejn. ⁶ Din zi'c naj bal guitixlon lëjt compniar raliduladx ree Jesucrist, abi' gannen lojdi tijb diidx ni ad zignia'tidi, xhieza sirv güünan lëjt bal id canin lojdi zagdx ni balüü Dios naj o ni rag-

been o bal id canen xtiidx Dios lojdi zagdx o xhietëëz zatiyb ni rayal gusiididi?

⁷ Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdx ad zignia't ree bejn xhienin cucwejdxaman. ⁸ Ziangajc bal id zucwejdx reeman zagdx trompejt loj wadijl, xhieza naag chignia' reeman guial ma rayal suchaaw reeman par til reeman con ree bën rayal tilnë reeman? ⁹ Yan ziangajc bal guinieenëdi bejn ree con tijb diidx ni ad rignia't reeman, xhieza naag chignia' reeman ni rëbidi! Xlia'zi ca-needi achut rignia' ni rnieedi. ¹⁰ Lëjt ragbee guial zienloj diidx yu' loj guidxliuj guie, per graczan yu' ni rëban par bën rignia' laan. ¹¹ Per bal chu guinieenë naj con tijb diidx ni ad rignia'tan dxej benzit najman par naj abi' za naj benzit najn par laaman. ¹² Zeel zi'c rëndi gapidi quiargueijn por xyudar xSprijt Dios par güündi xhietëëz ni naj xchiin Dios, gol gunab loj Dios din yazal-adxaman quiargueijn lojdi din gac güündi ni rüjn sirv par gra ree xbejn Cristo.

¹³ Zeel bën ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. ¹⁴ Din zi'c naj bal gabedx ganaaban Dios con tijb diidx ni ad rignia'tan dxej tijbzi da sprijtan ragbee ni canen, per naj ni'quid ragbeetan xhienin canen. ¹⁵ Zeel ni rayal günan naj, gabedx ganaaban loj Dios con da sprijtan abi' gagbeen xhie rën guiëb ni canen. Ziangajc chi rolan cant ree par Dios rayal gagbeen chignia' tëën xhie rën guiëb ni cayolan. ¹⁶ Din bal rnieel diidx zagdx ree loj Dios con diidx ni ad rignia't ni'qui lüj. Dxej bën za' con lüj, ad zajct guiëbaman "Amén" chi ma gulox badëëdil quixtëë loj Dios guial ad rignia'taman ni rnieel. ¹⁷ Majsi nix da't badëëdil quixtëë loj Dios, per achetctzi yudar beenl bën za' con lüj par gagbeeman xhienaag chinalaman xnejz Dios guial ad bignia'taman ni rëbil.

¹⁸ Quixtëë Dios naj mazri rajc zien loj diidx guial loj gradi. ¹⁹ Per majsi zian chi za'n lod rado'p ree dux compniar ree bën rliladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman në ni güün laa reeman sirv din gulüü reeman ben ren ree luar ganenë'n laa reeman con chiimil diidx ni ad rignia't reeman.

²⁰ Compniar raliduladx ree Jesucrist, ad bal rüjnridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol. ²¹ Loj xtiidx Dios rëb: "Gaxhalan bën rniee ree diidx ren, bën ad najt ree bën niz guie din guinieenë reeman bën guie ree. Per ni'qui zian ad zuzoobt reeman da diidxan, rëb dux Dad ree Dios." ²² Zeel guial rniee zienloj diidx, najn tijb sen par ree bën ad rliladxt xtiidx Dios din chililadx reeman. Per guial rulüü bejn ree ni rën Dios gagbee reeman, laan naj ni güün sirv par ree bën ma rliladx ad par bën ad rliladxt. ²³ Per ni'qui zian chi radxaag lasa'di par gucaagdiajguidi xtiidx Dios, abi' bal suloj guiniee tijb gajdi gadxagayaa diidx ni achut rignia' abi' chu' ree bën qui bililadxri xtiidx Dios o bën ad waliladxt ree xtiidxaman, xwen id zanal-

adx reeman ya guial guijquidi rajc? ²⁴ Per bal chu' bén qui bililadxri o bén ad waliladxt abi' caneedi xtiidx Dios, dxe chi guiguiejnman ni caneedi, gagbeeman xhie dol cayün reeman, laagajcaman gagbee chu najman. ²⁵ Zian gagbeeman xhienaag nabanman dxe guzuxibaman cwedx guiniabaman Dios, abi' guiëbaman guial diidxli za' Dios con lëjt.

Gol been gra xnejz

²⁶ Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdi-ajguidi xtiidx Dios, gradi zajc güün ni chile' güündi, bén ni gool cant par Dios, bén ni gulüü ree bejn, bén gugojn bejn ree conin balüü Dios lojman, bén guinee diidx ren ni ad rignia't gra bejn në bén gudëed xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusnuu sudxi'ch reeman loj ni riladx reeman xtiidx Dios. ²⁷ Bal yu' bén rniee tijb diidx ni ad rnieet gra bejn, tio'pzanman o choonzaman guinee diidx ni rajcaman, abi' tijb gaj tijb gaj reeman guinee, chu' tée bén ni guiëb loj ree bejn xhie rën guiëb ni rëb reeman. ²⁸ Per bal id yu' bén zajc gugojn bejn ree xhienin rëb reeman con diidx ni rajc reeman, mejorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman. ²⁹ Abi' ree bén gugojn delant loj gra ree bejn conin balüü Dios laa reeman, tio'pzi reeman o choon reeman guinee. Abi' los demazri reeman gucaagdiajg bal zagdxequi naj ni canee reeman. ³⁰ Per bal tijb bén zobj cucaagdiajg loj hor guin gulüü Dios laaman xhienin, rayal yacwëez bén canee din gac gugojn bén guin bejn ree xhie nin balüü Dios lojman loj hor guin. ³¹ Gra ree bén ni bayal gudëed xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi chi yayalidi din gra ree bén cucaagdiajg gusiid reeman chu' tée luxdoo reeman. ³² Gol badxe'guijg guial ree bén rudëe xtiidx Dios loj ree bejn laagajc reeman rniabee laa reeman din guinee reeman chi rayal guinee reeman. ³³ Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, ³⁴ loj hor ni ma cucaagdiajg reeman xtiidx Dios ad yu't permis guinee ree búngunaa rayal guzoob reeman xtiidx xixinguaaw reeman zi'c rëb Dios güün reeman diizd gulal. ³⁵ Bal xhie rën reeman gagbee reeman, mejorli lidx reeman guiniabdiidx loj lacheel reeman, din natun guinee tijb búngunaa loj hor ni cucaagdiajg reeman xtiidx Dios.

³⁶ Gol basaaladx guial ad lëjtit naj bén yaloj cwa' xtiidx Dios ad tijb tëetzi lëjt ragbee xtiidx Dios din güündi zi'c naj xixgabidi. ³⁷ Bal chu' bén naladx guial ma cwa'man quiarguejn par gudëeman xtiidx Dios loj ree bejn o por xSprijt Dios ma cwa'man xhie stijb quiarguejn, dxe laa gagbee gajcaman guial ni cusan loj gui'ch guie najn zi'c rniabee dux Dad ree Dios. ³⁸ Per bal id riladxaman ni canin lojdi loj gui'ch guie, ziangajc ad chililadxidi xtiidxaman.

³⁹ Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguejn din gudëedi xtiidxaman loj ree bejn, ad bal gudxoondi guinee tijb ree xcompniaridi bén rniee tijb diidx ni ad rignia'tidi. ⁴⁰ Per gra ni rüjndi gol beenan xnejz, gol beenan zi'c rayal.

Baban Jesucrist loj ree bengüt

15 Compniar raliduladx ree Jesucrist, rën tëen gusaaladxidi xtiidxza'c Jesucrist ni ma rnin lojdi, diidxza'c ni ma bililadxidi loj ni za'dxi'chidi. ² Gol basaaladx guial por ree diidxza'c guin ma rajpidi perdón por xtolidi bal walidi zinalidi laan, per bal id zinalidi laan bililadx xlia'zidi laan.

³ Yalojxgaj balün lëjt ni basidan yaloj. Rnin lojdi guial Cristo güt por dux tol ree zi'c rëb loj xtiidx Dios. ⁴ Abi' bigue'chaman dxe ni goc choon dxej babanman zi'c-gajc rëb loj xtiidx Dios. ⁵ Chi ma babanman, dxe balüülojman loj Bëd dxe loj los demazri ree apóstoles. ⁶ Zianz balüülojman në loj ree tijb cwaa ree bén riladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. ⁷ Balüü loj tëeman loj Santiaaw dxe loj ree apóstoles. ⁸ Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix. ⁹ Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bén riladx ree Jesucrist. ¹⁰ Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayünan ni cayünan, në con xyudar Dios cayünan laan. ¹¹ Zeel achet güünan bal por chunin biguejndi xtiidx Dios bal por naj o por stijb ree xbejn Jesús, ni mazri lasajc naj guial ma biguejndan abi' ma bililadxidan.

Yaban ree bengüt

¹² Yan zi'c ma balüün lëjt xtiidx Dios guial baban Cristo, ¿chexquiza zeel yu'di rëb ad zabant ree bengüt?

¹³ Bal id zaban ree bengüt, rën guiëban guial ad babant Cristo. ¹⁴ Abi' bal id baban Cristo dxe achet sirv ni caylün lëjt, ache tëet sirv ni riladxidi laaman. ¹⁵ Dxe bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxe ad walitan guial baban Jesucrist. ¹⁶ Din bal id zaban ree bengüt, dxe ni'qui Jesucrist ad babantri. ¹⁷ Abi' bal id babanman, achet sirv guial riladxidi laaman ache tëet perdón yu' por xtolidi. ¹⁸ Bal naj zian, xt ree bén ma güjt achet xperdon reeman majsi bililadx reeman Jesucrist. ¹⁹ Bal lojzi guidxliuj guie güün sirv ni baliladx ree Jesucrist dxe dunujzi ree nayajc ree bén naban mazri naya guial loj chutëez benan.

²⁰ Per diidxliczi Jesucrist naj bén baban, abi' laaman naj quijb bén yaloj baban. ²¹ Abi' zi'c bidoonloj guial-güjt loj guidxliuj guie por tijb bejn, ziangajc por tijb bejn yaban ree bengüt. ²² Zi'c bidoonloj guialgüjt par gra

ree bejn por Ad n, ziangajc yan por Jesucrist ma yu' stijb guialnaban par ree b n rilad  laaman. ²³ Per gra gac zi'c rayal: Yaloj Jesucrist naj b n baban, d el chi gui'taman stijb d el ma yaban ree beng t b n bililad  ree laaman. ²⁴ Abi' chi ma beenman gan gunabeeman gra ree b n rd e'ch laaman, zi'c ree b n rajp guialgux-tis n  ree b n rajp graloj guial rniabee, d el ma yay  xguialrniabeeman loj dux Dad ree Dios. ²⁵ Din rayal nabee Cristo xt chi ma beeman gan canabeeman gra ree b n rd e'ch laaman. ²⁶ Abi' ni chigra gunidlojman naj guialg jt. ²⁷ Loj xtiid  Dios r b guial Dios bad   guialrniabee loj Jesucrist din nabeeman gra, per ad r nt gui ban guial n  Dios rniabeeman din Dios bad  d guialrniabee lojman. ²⁸ Abi' d ej ni ma rniabee Jesucrist loj gra d el yay man guialrniabee ni bad  d Dios lojman din ma nabee tijbzi Dios gra.

²⁹ Yan bal id zaban ree beng t,  chexquiza zeel yu' ree b n rirobnijs xcwent ree b n ma g jt, abi'za bal id zaban ree beng t?

³⁰ Achet sirv guial nadxu'n loj ni nadxeb gra hor.

³¹ Din rugojnan l jt, gra d ej za'n loj guialg jt, laan naj ni diid li ni rnin l jt zi'cgajc wal n guial dad nix yu' lux-don con l jt guial najdi xbejn Cristo. ³² Yan bal naabzi loj guidxliuj guie g  n sirv ni cay nan d el achet sirv ni basajc ree b n  feso naj, naj reeman bendoxh zi'c ree bedoxh. Din bal id zaban ree beng t mejorli yaguieen ree zi'c r b ree b n r b: "Yadaaw ree yad ' t   ree din guixie ma bay jt ree."

³³ Per naj rni l jt ad ti bidi gusquiee reeman l jt. Din guial ridxga' xtiid  ree b n ni ad z t xnejz, najzan par guxhiinan zi'c nabandi. ³⁴ Zeel gol been xgab zi'c rayal ad bal r jn t  ridi dol din yu'di ni'quid n nbeetidi Dios, zeel canin lojdi zian din yaya'nxtudi.

Xhienaag yaban ree beng t

³⁵ Per wed yu'di r jn xgab: " Xhieza naag yaban ree beng t?  Xhienaag naj cuerp ni gap reeman?" ³⁶ Per xgab guin xgab tontzan. Din l jt ragbee guial chi rx bin bejn tijb xhaj xhienin, chi rliejnan d el rniyt xhaj ni gux binman. ³⁷ Ad cwaan ni rliejn quint rx bin bejn, xhajnan rx binman, zi'c r jn bejn con trigo o xhiet  z stijb xhaj nin. ³⁸ Per chi rliejnan ma najn cwaandoo zi'c rniabee Dios gacan, xhiet  z xhaj nin ni rx bin bejn ma yu' cwaando ni guilienan. ³⁹ Zi'c nadxaa xcuerp bejn con xcuerp ree be, nadxaa t   b jl con xcuerp ree biguijn. ⁴⁰ Nadxaa t   ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj. ⁴¹ Nadxaa xbacha' gubijdx guial loj b  w nadxaa t   xbacha' ree bajl xanyabaa, xt ree bajl xanyabaa garent garen naj xbacha' reen.

⁴² Yan ziangajc gac con guial yaban ree beng t. Cuerp ni rguie'ch rod an, per cuerp ni gap bejn stijb ad yu't d ej god an. ⁴³ Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. ⁴⁴ Rguie'ch cuerp ni rajp bejn loj guidxliuj guie, per chi

yaban bejn stijb ma gapaman tijb cuerp ni g  n sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

⁴⁵ Loj xtiid  Dios r b guial yaloj Ad n gojp guialnaban loj guidxliuj guie. D el bi't Jesucrist, b n razalad  guialnaban loj ree bejn. ⁴⁶ Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie d el guialnaban xanyabaa. ⁴⁷ Ad n gojcaman con yuj zeel najman b n-guidxliuj, per Jesucrist xanyabaa z  daman. ⁴⁸ Gra ree b nguidxliuj naj xcuerp reeman zi'c goc xcuerp Ad n loj guidxliuj guie, per chi guidxin d ej d el gap ree bejn tijb cuerp lasa' cuerp ni rajp Jesucrist xanyabaa.

⁴⁹ Din zi'c nayajc ree zi'c goc Ad n loj guidxliuj guie, ziangajc yayajc ree zi'c naj Jesucrist xanyabaa.

⁵⁰ Abi' rugojnan l jt compniar ralidulad  ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rod  ad zajct chu'n lod yu' ni ad rod t. ⁵¹ Per r nan gagbeedi tijb ni achutcz wayagbee xt yan guial ad dugrat ree yay jt, per dugra ree guidxaa zi'c nayajc ree, yaya'p ree cuerp ren. ⁵² Laan gac chi yaguiejn ree trompejt ni gugojn dunuj ree guial ma bidxin tiamp ni yari  ree loj guidxliuj guie, d el tibrajtzi zi'ctzi chi ruchip guialloj bejn zian guidxaa zi'c nayajc ree. Chi guibejdx trompejt guin yaban ree beng t d el ad yu'tri d ej gui t reeman abi' hor zii ma bidxaa zi'c nayajc ree yan. ⁵³ Din r jn nagueijn guidxaa cuerp ni rod  por stijb cuerp ni ad yu't d ej god  guidxaa t   cuerp ni r jt por stijb cuerp ni ad yu't d ej gui t. ⁵⁴ Abi' chi ma bidxaa cuerp ni rod  por stijb cuerp ni ad yu't d ej god  guidxaa t   cuerp ni r jt por stijb cuerp ni ad yu't d ej gui t, d ejzii naj d ej ni ma gojc cumplid ni r b loj xtiid  Dios lod r b: "Xt guin ma bayaaloj gojc gan loj guialg jt."

⁵⁵ Nad el t   ma gojc cumplid zi'c r b loj xtiid  Dios lod r b: "Guialg jt,  conza guial r jnl gan?  Conza guial rusagzil bejn?" ⁵⁶ Guialrusagzi guialg jt naj por dol, abi' por ley ragbee bejn guial dol guin naj ni rniabee laaman. ⁵⁷ Per quixt  dux Dad ree Dios, b n r jn dunuj ree yudar par yaguieen ree gan por xguialg jt Dad Jesucrist.

⁵⁸ Zeel compniar ralidulad  ree Jesucrist zi'c r nan l jt rnin lojdi, gol guzud i'ch ad chu' t   luxdoodi tio'p. Guixie guixie gol been nagueijn g  ndi mazri xmandad Dios, din l jt ragbee guial ad ni xlia'tzi gra ni cay jndi par Dad Jesucrist.

Milia ni rdo'p par ree xbejn Dios

16 Yan por milia ni naj guto'pidi par g  ndi yudar stijb ree dux compniar ree b n ralidulad  ree Jesucrist, gol been zi'c gunabeen g  n ree b n rilad  ree Jesucrist niz Galacia. ² Gazob dumingw tijb gajdi gol gule'c cintabl zi'ctzi beendi gan l n toxman, din chi guialan ad r jntri nagueijn guido'pidi milia guin. ³ Abi' chi guialan, b n ni gucaabeedi par gaxhalan laa reeman chigsa'n gon guin Jerusal n gaxhalan laa reeman con gui'ch ni gui b chu naj reeman. ⁴ Abi' bal guguian guial r jn nagueijn gan d el chin 'n laa reeman.

Xhienaag naj xixgab Pab

⁵ Yaloj gadëëdan niz Macedonia dxe guialan Corinto guidganan lëjt. ⁶ Wed xchej gazun con lëjt. Wed guidib tiamp nayaag gazun con lëjt, dxe güündi naj yudar din gan lod naj gan. ⁷ Ad rëntan gadëëdzi nejzan gaguixlon lëjt, rënan gaglaan con lëjt bal gunee Dios permis. ⁸ Per yan naj yaya'nan Éfeso xt lanij pentecostés, ⁹ din guie merczi yan catiëjb ree bejn cucaagdi-ajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

¹⁰ Chi gui't Timoteo, gol been naguiejn din suman zagdx con lëjt, din lasa'gajc xmandad Dios ni cayünan cayüjman. ¹¹ Zeel achu lëjt guiniajgaa lojman, gol beenman yudar din gusnuu xnejzaman sin guial chu'-man xgab, din gui'taman guie lod cabëëzan laaman con los demazri ree dux compniar ree.

¹² Abi' Apolos, naj guza'c laaman liaadx din nidnë-man laa reeman nitixloj reeman lëjt, per ad guyënta-man ni'taman yan, per zi'tcaman guitixlojman lëjt chi guneen laaman tiamp.

Diidx bigra ni bacaa Pab loj gui'ch guie

¹³ Gol guzujsin gol guzujdxi'ch tëë loj ni riladixidi Jesucrist. Gol gudaan ni gui'tzi gol guzujdxi'ch tëë. ¹⁴ Gra ni güündi gol beenan guial rëndi bejn ree.

¹⁵ Compniar raliduladx ree Jesucrist, lëjt ragbee guial Estéfanos con xfamilaman laa reeman naj bén yaloj bililadx Jesucrist niz Acaya, ragbee tëëdi xhienaag cayüjn reeman yudar dux compniar ree bén riladix ree Jesucrist. Zeel rnin lojdi: ¹⁶ Lasa' ree bén guin gol bazoob xtiidx reeman con gra ree bén cayüjn xmandad Dios në ree bén cayüjn yudar cayajc mandad guin.

¹⁷ Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi. ¹⁸ Laa reeman bagu' luxdon niz guie zi'c ragu' reeman luxdoodi, abi' lasa' ree bén guin gol gojp reeman respejt.

¹⁹ Gra ree compniar riladix Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bén rado'p ree lidx reeman, rugajpdioz reeman lëjt, nayajc ree xbejn Cristo. ²⁰ Gra ree dux compniar ree bén riladix ree Cristo rugajpdioz reeman lëjt, gol bagajpdioz tëë lasa'-di zi'c rayal.

²¹ Naj Pab, quijb naj cuca lëjtr guie ree par gugajpdiozan lëjt.

²² Bal yu' bén ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'-taman!

²³ Abi' dux Dad ree Jesucrist güünle' gradi. ²⁴ Zi'c nayajc ree xbejn Cristo tiblojzi rënan gradi. Amén.

Gui'ch barojp par ree bén Corinto

Rugajpdioz Pab bén Corinto riladx ree Jesucrist

1 Naj Pab, Dios bacaabee naj gacan xi apóstol Jesu-crist, në dux compniar ree Timoteo za' con naj. Naj cuca gui'ch guie par lëjt guial ma riladxidi xtiidx Dios luguiedx Corinto në los demazri ree bén riga' niz Acaya. ² Dux Dad ree Dios con Dad Jesucrist gūnle' lëjt yabe'cdxe tëë reeman luxdoodi.

Tarbajw ni gudëd Pab

³ Quixtëë Dios xDad Dad Jesucrist, bén naj Dad bén raya dunuj ree naj tëëman Dios bén ragu' du luxdoo ree. ⁴ Laaman ragu' du luxdoo ree loj xhietëëz guial-rzagdiaj ni radüüd ree din gac yalu' ree luxdoo ree bén cadëd xhietëëz guialzi, yalu' ree luxdoo reeman zi'c ragu' Dios du luxdoo ree. ⁵ Din majsi cayzaagdiaj da't ree guial nayajc ree xbejn Cristo, ziangajc dád ragu'-man du luxdoo ree. ⁶ Abi' bal cayzaagdiajn, cayzaagdi-ajn din yaguieenan lëjt yudar din chu' luxdoodi din laa tëëdi loj dol. Abi' bal cu'man du luxdoon, rgu'man du luxdoon din chu' luxdoodi din gac taandi lasa' ree guialzi ni caydüüdan. ⁷ Ad yu' nawëëgt du luxdoon con lëjt, din zi'cgajc cazagdiajdi ziangajc cayzaagdiajn dxei ziangajc yagu' Dios luxdoodi zi'cgajc ragu'man du luxdoon.

⁸ Compniar raliduladx ree Jesucrist, rayënan gagbee-di guial dád zro' naj ni baza'can niz Asia. Naya baza'-can niz ni, par dunujn ad zadaantran, ad nagueientran nejz guial yabajnran mazri, ⁹ baguieenan xgab guial ma bayëjtan. Per baza'can zian din yadxë'guijcan guial achet zajc yaguieen dunujzan sin xyudar Dios, bén ras-ban ree bengüt. ¹⁰ Laaman babëë dunujn loj guialgüjt guin abi' gagnëman dunujn loj lasa' ree ni nadxeb guin. Dunuj ree rayagbee guial gusnuu gūnman dunujn yudar, ¹¹ mazri bal gūndi yudar cwedx guini-abidi Dios por dunujn. Abi' bal zien ree bejn cabejdx canab Dios por dunujn dxei zien gajc reeman gudëëd quixtëë lojman zi'c cayagnëman dunujn.

Chexc ad wejt Pab Corinto

¹² Abi' ni rabaan rnin lojdi guial achetczi naduladxan guial rayagbeen nabajnan naya delant lojdi në delant loj ree bënguidxliuj, abi' diidxli cayguieenan ni rayal yaguieenan. Per ad cayguieentan zian por dux quiar-guiejnzan, cayguieenan zian por xyudar Dios. ¹³ Loj dux gui'chan ad racaatan ni ad zajct goolidi o ni ad za-jct chignia'di. Balzianclaa chignia'di gra ni canin lojdi. ¹⁴ Zi'cgajc ta'ngaj cayagbeedi guial chi gui't Dad Jesu-

crist zatijb lëjt yabaadi con dunujn guiáad dunujn yabaan con lëjt.

¹⁵ Laan naj ni yu'guican, zeel yaloj benan xgab nidganan lëjt din nabaadi guial ma barojp volt bidganan lëjt. ¹⁶ Benan xgab nidganan lëjt chi nialan niz Macedonia, abi' chi nazaan Macedonia nialan nidganan lëjt stijb, dxei nagu'nejzidi naj par Judea. ¹⁷ Ad gūndi xgab guial chi rnin guidganan lëjt rnizan zian. Ad gūndi xgab guial rünan zi'c rüjn gra ree bén-guidxliuj, ganin guialan abi' ragbeen guial ad zialtan. ¹⁸ Dios ragbee guial ad raguie'chtan yaguieenan ni rayagbeen ad zaguieentan. ¹⁹ Din Jesucrist Xi'n Dios, bén ni ma baguien xtiidx lojdi, naj con Silvano con Timoteo, ad najt Jesucrist bén na gūnman ni ragbee-man ad zūjntaman, laaman ganax diidxli rnieeman. ²⁰ Din por laaman rajc cumplid gra ree xpromejs Dios. Zeel por laaman raguie'ch ree "Amén" chi radëëd ree quixtëë loj Dios. ²¹ Abi' Dios laaman cayüjn dunuj ree yudar con lëjt din yadxu'dxi'ch ree loj ni nayajc ree ti-jbzi con Cristo, Dios bacaabee dunuj ree din yayajc ree par laaman. ²² Laaman gule dunuj ree par laaman, abi' guxhaal xSprijtaman bén nabajnnë' ree zi'c tijb sen guial yaca' ree ni yaca' ree.

²³ Yan bal gadan ga Corinto zi'c benan xgab, Dios ragbee guial gadan ga guial ad rëntan gadilë'n lëjt, abi' Dios gudëëd naj casti bal id wali ni canin. ²⁴ Ad cayguieentan nagueijn yanabeen lëjt xhiënaag chililadxidi Jesucrist, din dunujn rayagbee guial diidxli za'dxi'chidi loj ni riladxidi Jesucrist, ni cayguieenan naj guial yaguieenan lëjt yudar din chu' luxdoodi nix guibandi.

2 Zeel benan xgab ad zidganatan lëjt yan, chitëë chu'naya luxdoodi. ² Din bal gagu'nayan luxdoodi, ¿chuza cu' luxdon nix bal ma badxe'nayan luxdoodi lëjt ragu' luxdon? ³ Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya lu-ar cu'di luxdon nix. Abi' naj ragbee bal yu' luxdon za-gdxe gradi yu' luxdoo zagdxe por zian. ⁴ Chi bacan gui'ch guie dád guyun xgab abi' guyunayan xt ronabacan diidxnaa ni bacan loj gui'ch guie, per ad bacatan gui'ch guin par gagu'nayan lëjt, bacanan par gagbeedi guial rën da'tan lëjt.

Yu' perdon par bén badxe' falt

⁵ Bal yu' tijbidi ma badxe'naya naj, per ad najtzi guyunaya nëgajc lëjt guyunaya. Rnin në lëjt chitëë gadëëdlajn guial ganin gracziidi guyunaya por zian. ⁶ Per naj rni lojdi compniar raliduladx ree Jesucrist, ma

gojczy yan con casti ni ma badëedidi loj bén guin. ⁷ Yan gol beenman perdon gol bagu' tée luxdooman chitëe chu'naya luxdooman xt ad zadxejlt xhie güünman. ⁸ Zeel rniaaban lojdi, gol been naguiejn din gagbeeman guial rëndi laaman zi'cgajc guyëndi laaman guia'xchej. ⁹ Gui'ch ni guxhalan lojdi gocli, guxhalanan din gagbeen bal ruzoobidi da diidxan guial güündi gra ni ganin lojdi. ¹⁰ Yan chutëez bén güündi perdon, nêgajc naj güün laaman perdon. Abi' bén ma benan perdon, bal yu' ni güünan perdon, benan laaman perdon delant loj Cristo por lëjt ¹¹ chitëe güün xindxab dunuj ree gan, din dunuj ree rayagbee xhienaag naj xguialrusquiee xindxab.

Ad nixt guyu luxdoo Pab guzujman Troas

¹² Chi bidxinan guiedx Troas par ganen xtiidxa'c Jesucrist, dád gognë Dios naj par güünan mandad guin ni. ¹³ Per ad nixt guza'can guial ad bidxaaglojtan dux compniar ree Tito. Zeel basa'nan bén guin ree abi' wan Macedonia.

Ragnë Jesucrist dunujn zianczi

¹⁴ Per quixtëe Dios guial por Jesucrist guixie guixie cayagnëman dunujn chitëe xhie güün dunujn gan abi' por dunujn cayagbee ree bejn xtiidxa'c Jesucrist, diidxa'c guin ree naj zi'c tijb ni rliaa nejxh ni rire'ch cha' guidibczi. ¹⁵ Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree bén rliladx Jesucrist në loj ree bén ad rliladxt. ¹⁶ Par ree bén ad rliladxt laaman, dunujn nayajc zi'c tijb go'xh ni rugüjt, per par ree bén rliladx laaman dunujn nayajc zi'c tijb go'xh ni runee guialnaban. Per, ¿chu za-jc güün ree ni guin sin xyudar Dios? ¹⁷ Dunujn ad cayguieentan negojs con xtiidx Dios zi'c rüjn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

Nejz cüb ni yu' par yadxin ree loj Dios

3 Chi ranan zian, ad naladxidi guial dunuj gajcan cayles dux valoran. Lëjt ragbee guial ad rüjnt naguiejn yalüün tijb gui'ch lojdi par gagbeedi chu dunujn o yanaaban gui'ch lojdi ni güün dunujn yudar par gagbee ree bejn chu nayajcan zi'c rüjn ree ben ren. ² Din lëjt gajc naj tijb gui'ch par dunujn, gui'ch ni yu' du luxdoon ni rool ree bejn ni nünbee tée reeman. ³ Zi'c rulüü yaguie'ch ree lëjt naj tijb xtiidx Cristo ni bacaa, per ad bacaatanan con tint, bacaaan con xSprijt Dios bén naban, tijb ni ad cwat loj tijb guiaj nata', cwan luxdoo ree bejn.

⁴ Dunujn raya'p Dios confianz por Jesucrist, ⁵ abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. ⁶ Dios naj bén razaladx dunujn quiarguejn par yagojnan bejn ree xcwent nejz cüb ni ma yu' par yadxin ree loj Dios, nejz cüb ni ad ryaadxt chinal bejn tijb ley ni zëed loj gui'ch, per rüjn naguiejn chinalaman ni zëed

por xSprijt Dios. Din ley castizi naj ni zidnën, per xSprijt Dios guialnaban naj ni rudëëman loj ree bejn.

⁷ Abi' majsi castizi naj ni zidnë ley ni badëe Dios loj Moisejs loj tijb guiaj nata', per dád bidiin bacha' loj Moisejs chi cwa'man ley guin, xt ad gojct nuguaa ree bén Israel lojman por bacha' guin, bacha' ni ta'ngaj ta'ngaj gunidlojn. ⁸ Bal chi bi't ley guin gojc zian, yan, imazri ni za'cdxoon naj guial gucaagdiajg ree bejn xcwent nejz cüb ni rulüü xSprijt Dios ni ma rajp bejn con Dios! ⁹ Din chi bi't ley ni ridnë casti par ree bejn, con bacha' bi'tan, yan, imazri ni za'cdxoon naj guial guien ree bejn xhienaag gac reeman naya delant loj Dios! ¹⁰ Abi' bal ni za'cdxoon gojc chi bi't xley Dios loj guidxliuj guie, yan achetczy lasajc gualza'cdxoon guin par gualza'cdxoon ni naj por nejz cüb ni ma rajp ree bejn con Dios. ¹¹ Abi' bal ni ad rüjnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

¹² Abi' guial yu'guijc ree zian, zeel sin guialrdxeb caylünün bejn ree. ¹³ Ad raguieentan zi'c been Moisejs, basiaaw lajd lojman chitëe gagbee ree bén Israel guial ziquied guialrulaa bacha' lojman, bacha' ni laa gunit gajc. ¹⁴ Per ad lojtzi Moisejs biaaw, ne gajc xquiarguejn ree bejn biaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. ¹⁵ Per xt yandxej chi rool reeman ni bacaa Moisejs ad rignia't reeman guial sta nayaaw xquiarguejn reeman. ¹⁶ Per bén rliladx Jesucrist, laaman rxhial xquiarguejman. ¹⁷ Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. ¹⁸ Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c rënman yayajc ree, abi' guixie guixie cusniman dunuj ree por xSprijtaman.

4 Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. ² Dunujn achet raquie'chan, achet ni ad rüjnt sirv cayguieenan, ad caysquieetan bejn ree ad caychaa tëetan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. ³ Per bal yu' bén ni ad rignia't xtiidxa'c Jesucrist ni cayneen, ad rignia'taman laan guial ad zëetaman loj xnejz Dios. ⁴ Abi' xindxab rniabee loj guidxliuj guie ma bascajyix xquiarguejn reeman, guial ad rënt reeman chililadx reeman, chitëe gusni xtiidxa'c Jesucrist laa reeman abi' ad zajct guguaa reeman xguialrniabeeman, laaman guial najman zi'c gajczy Dios. ⁵ Ad caytie'chtan dux tiidx gajcan, ni caytie'chan naj xtiidxa'c Jesucrist, bén naj Dad par dunuj ree. Abi' ni ranazan lojdi guial cayguieenan sirv lëjt por guial rayënan Jesucrist. ⁶ Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiar-guejnan, guxhalaman dux quiarguejnan din yayigni-a'n xhienaag naj xguialrniabeeman, guialrniabee raguiaa ree por Jesucrist.

Yabajn ree por guialrliladx

⁷ Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee zëëd por Dios ad por dunujtan. ⁸ Majsi graloj guialzi caydüüdan per ad ralenya'tan. Majsi rulüü achetri zajc yaguieenan, per radxejl gajc xhien-aag yaguieenan. ⁹ Majsi xhietëëz rüjnnë bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. ¹⁰ Bantëëz guin zio'n nadxu'n loj guialgüjt zi'cgajc guzajc Jesucrist, per zian ralüün guial raya'pan xguialnabanman. ¹¹ Dxel la'tgaj nabanman, guixie guixie nadxu'n loj guialgüjt guial nayajcan xbejn Jesucrist, per zian ralüün guial raya'pan xguialnabanman, majsi guidxin dxej nit dux cuerpan. ¹² Nadxu'n loj guialgüjt guial caytie'chan xtiidx Jesucrist, per por zian ma rajpidi guialnaban delant loj Dios.

¹³ Loj xtiidx Dios rëb: "Guial bililadxan, zeel gunen ni gunen." Yan ziangajc guial raliduladxan xtiidx Dios zeel cayneen laan. ¹⁴ Din dunujn rayagbee guial Dios, bén basban dux Dad ree Jesucrist loj guialgüjt, ziangajc yasbanman dunuj ree guial ma nayajcan tijbzi con Jesucrist dxel lëjt con dunujn tijbzi chignëman dunuj ree lod zojbaman. ¹⁵ Din gra ni cayguieenan në gra ni cayza'can, cayza'can zian din yaguieenan lëjt yudar din gusnuu gacxhiey ni riladixidi Jesucrist. Zian ma gac ree bejn mazri zien gudëëd reeman quixtëë loj Dios, guza't tëë reeman laaman zagdxe.

¹⁶ Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie caycüb Dios laan. ¹⁷ Achetdzi lasajc ree guialzi ni caydüüdan loj guidxliuj guie din najn ni rdëd, per por guialzi guin ree rayalan xguialnaza'c Dios, guialnaza'c ni lasajc mazri abi' ad yu't dxej nitan. ¹⁸ Din dunuj ree ad cayguieent ree naguiejn yaya'p ree ni raguiaa ree loj guidxliuj guie, cayguieen ree naguiejn din yaya'p ree ni ad raguiaa ree. Din ni raguiaa ree loj guidxliuj guie yu' dxej nit reen, per ni ad raguiaa ree yan ad yu't dxej nit reen.

5 Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por bën-guidxliuj zi'c rajc tijb yu, abi' cuerp guin yaya'p ree par tiblayaa. ² La'tgaj raya'p ree cuerp guie loj guidxliuj ralu' ree guialquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. ³ Din ad ganaxtizi Sprijt yayajc ree xanyabaa, nëgajc cuerp yaya'p ree. ⁴ La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial rayënan yayëjtan, ni rayënan naj guial yaya'pan cuerp cüb ni yaya'pan par tiblayaa din nit dux cuerpan ni rayal nit. ⁵ Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

⁶ Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt

nadxu' ree guial lod zojb dux Dad ree Jesucrist. ⁷ Per dunuj ree zunaal reeman guial raliduladx ree laaman ad guial raguiaa ree xhienaag gac. ⁸ Zeel raya'p ree confians guin, abi' ma rayën ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. ⁹ Zeel achet güünan bal loj guidxliuj guie o bal xanyabaa, per ni rayën ree naj guial yaguieen ree zi'c rën Cristo. ¹⁰ Din dugra ree rayal yadxin lojman lod güünman guialguxtis din tijbgaj dunuj ree yaca' ni rayal ree, por ni zagdxe o por ni mal ni baguieen ree loj guidxliuj guie.

Xhienaag gap bejn nejz par guidxinman loj Dios

¹¹ Zeel por respekt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa në lëjt güünbee dunujn guial dunujn cayguieencan xnejz. ¹² Ad caylest dux valoran, ni rayënan naj guial yabaadi guial gagbeedi ni naj diidxli por dunujn, din gac yadxi'di diidx loj ree bén rüjn naguiejn yaya'n reeman zagdxe delant loj ree bejn luar güün reeman xgab xhienaag naban reeman delant loj Dios. ¹³ Yan bal par bejn rajc duguijcan por ni cayguieenan, per cayguieenan laan por Dios. Abi' bal par lëjt nadëdguieenan zeel cayguieenan mandad guie, cayguieenan laan par yaguieenan lëjt yudar. ¹⁴ Guial rën Cristo dunujn zeel cayguieenan ni cayguieenan, din dunujn rayagbee guial Cristo güjt par gra bejn abi' gra ree bejn ma naj zi'c bengüt par dol. ¹⁵ Abi' Jesucrist güjtaman por gra bejn din bén chililadx ree laaman ad zabajntri reeman zi'ctzi rën reeman, ma guiban reeman zi'c rënman, laaman guial güjtaman por laa reeman abi' babanman stijb. ¹⁶ Zeel bal guia'xchej baguieen ree xgab guial naj Cristo tijbzi bënguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, ¹⁷ din chutëëz Bén ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

¹⁸ Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. ¹⁹ Din tijbzi naj Dios con Jesucrist abi' por Jesucrist rüjn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. ²⁰ Zeel dunujn nayajc Bén canee por Cristo, caydëëdan xtiidx Dios din gagbee ree bejn xhie rniab Dios güün reeman. Abi' por Jesucrist ranaaban lojdi: Gol guzuj zagdxe con Dios. ²¹ Din Jesucrist achetdzi dol beenman, per por dux tol ree baslaa Dios güjtaman zi'c tijb bëndol din por laaman, cuguiaa Dios dunuj ree zi'c tijb Bén ni ad wayüjnt dol.

6 Zeel zi'c cayguieenan xmandad Dios, dunujn ranaab lojdi: Ad güünbee xlia'di guial rën Dios lëjt.

² Din loj xtiidxaman rëb:

Chi bidxin dxej guidxga'n lüj, bidxga'n lüj

abi' chi bidxin dxej gapil perdon
dxel beenan lüj yudar.

Abi' dunujn rana lojdi guial ma bidxin dxej guin par
lëjt, ma bidxin dxej guidxga' Dios lëjt në dxej güünman
lëjt perdon.

³ Dunujn ad cayguieentan tijb ni güün guial ad
zaliladxtri ree bejn Jesucrist, ad cayguieentan tijb ni
guiëb ree bejn guial ad cayguieentan zi'c balüün bejn
ree. ⁴ Par gra caylүүn bejn ree guial dunujn nayajc bén
cayüjn sirv Dios caydaan tëen xhietëez ni raza'can, zi'c
guialzi, tarbajw, ni naya, ⁵ në guial naa ni rüjn ree bejn
dunujn. Në guial rgu' reeman dunujn ladxguib, rgu'
tëe reeman dunujn loj wadijl, ni radxagan guial tant
zien ni raguieenan, ni ralëen bacaal, ne guialrlaan ni
radüüdan. ⁶ Caylүүn tëen bejn ree chu nayajcan guial
nabajnan zi'c rayal, guial rayagbeen conin naj diidxli,
guial raya'pan pacens nayajc tëen benza'c con ree be-
jn, guial nabajnan con xSprijt Dios, guial diidxli rayë-
nan ben ren ree, ⁷ guial ranen ni naj diidxli, guial
cayüjn Dios dunujn yudar, në guial radëen consejw loj
ree bejn o radxi'n xtiidx ree bejn con xtiidx Dios. ⁸ Yu'
dxej rajp ree bejn dunujn respekt, yu' tëe dxej rnieegui-
jdx reeman dunujn. Yu' dxej rniee reeman diidza'c
ree por dunujn, yu' tëe dxej rniee reeman dunujn di-
idxgujdx. Rüjnnë reeman dunujn zi'c bén rusquiee
majsi diidxli naj ni raneen. ⁹ Yu' dxej rüjn reeman zi'c
bén ad nünbeet dunujn, majsi nünbee reeman dunu-
jn. Majsi rulүү ma yayëjtan per ad rayëjtan, abi' majsi
xhietëez rüjnnë reeman dunujn per ad rugüjtt reeman
dunujn. ¹⁰ Majsi yu' naya du luxdoon, per raguieenan
naguiejn din guiguien guial yu' du luxdoon nix. Majsi
bénprob dunujn per por dunujn zien ree bén ma naj
rijcw niz loj Dios guial ma ragbee reeman xtiidxaman.
Majsi achet raya'pan loj guidxliuj guie, per achet
rayaadxan.

¹¹ Bén Corinto, dunujn ma ranan gra por dunujn,
achet ni naguie'ch par dunujn guial diidxli rayënan
lëjt. ¹² Dunujn ad rliox rayënan lëjt, lëjt bal id rënridi
dunujn. ¹³ Per naj rnienë' lëjt zi'c rnieenë tijb dad gra
xi'nman: Gol guyën dunujn zi'c rayënan lëjt.

Nayajc ree zi'c xyadoo Dios naban

¹⁴ Gol gojp cudad xhie ree compromis güündi con
ree bén ad rliladxt Dios, din garen naj xixgab ree bén
ma zinal ree xnejz Dios guial loj xixgab ree bén contzi
naban. Garen naj xixgab ree bén ridxga' xtiidx Dios
guial loj xixgab ree bén ad ridxga't laan. ¹⁵ Lëjt ragbee
guial ad zajct gac Cristo tijbzi con xinxab, ziangajc
garen naj bén rliladx Cristo guial loj bén ad rliladxt laa-
man. ¹⁶ Garen naj ree bén rliladx dux Dad ree Dios
guial loj ree bén rliladx ni naladx reeman naj dios. Din
dunuj ree guial raliduladx ree Dios naban, dunuj ree
nayajc xyadoodman zi'c rëb tiblajt loj xtiidxaman lod
rëb:

Naj gabajnnë' laa reeman gazu tëen con laa reeman
bantëez guin che reeman.
Naj gac xDios reeman
abi' laa reeman gac da bejnan.

¹⁷ Rëb tëe loj xtiidx Dios:

Gol barii loj ree ben mal, gol been tiblax.

Ad güündi ni dxuudx din yaca'n lëjt,

¹⁸ abi' naj gac tijb Dad par lëjt

guiáad lëjt gaquidi da xi'ngaanan në daxi'ndxa'pan.

Zian rëb dux Dad ree Dios bén ca' gra guialrniabee.

7 Ni guin ree naj ree promise ni ma been Dios con
dunuj ree nayajc ree bén rliladx ree Jesucrist. Zeel
rayal yaguieen ree naguiejn yabajn ree naya. Yasa'n
ree tiblax dol, xgab mal, në gra ree ni dxuudx. Abi'
guixie guixie yaguieen ree naguiejn yabajn ree zi'c rën
Dios por respekt ni raya'p reeman.

Rabaa Pab guial bayüjn ree bén Corinto xgab por xtol reeman

² Gol gojc benza'c con dunujn! Dunujn achet
waguieenan lëjt, achet ni mal waguieenan lëjt ad
wasquiee tëetan lëjt. ³ Ad naladxidi caneguijdxan lëjt,
din zi'c ma rnin lojdi diidz guia'xchej guial dunujn rayë-
nan lëjt, abi' majsi yayëjtan o majsi yabajnan per tijbzi
nayajcan con lëjt. ⁴ Dád ra'pan lëjt confianz abi' dád
rabaanë'n lëjt. Majsi xhietëez guialzi caydüüdan, per
zi'c rgu'di du luxdoon nix zeel dád rabaan, majsi xhi-
etëez cayza'can

⁵ Din diidz chi badxinan niz Macedonia achetdzi guial
yaziiduladxan por gra ni cayza'can, zi'c ni rüjnnë ree
bejn dunujn në guialnadxeb ni caydüüdan. ⁶ Per Dios
bén ragu' luxdoo ree bén yu'naya luxdoo, laaman
bagu' du luxdoon chi bi't Tito guie. ⁷ Abi' ad guialzi
bi'ttaman bayu du luxdoon nix, në guial bagu'di lux-
doodman zeel bayu du luxdoon. Naman du lojn guial
dád rëndi guguaadi naj, yu' tëedi xgab yu'naya tëedi
por naj. Laan naj ni rabaanë'n guial yu'quidi xgab por
naj.

⁸ Majsi naya guyu luxdoodi por gui'ch ni guxhalan lo-
jdi, per achet naladxan. Majsi dád naya guyu luxdon
chi guxhalanan guial ragbeen zunayadi tiblax, ⁹ per
yan nix yu' luxdon, ad guial guyu nayatidi, yu' luxdoon
nix din por guialguyunaya guin ma bayüjndi xgab zëdi
loj xnejz Dios. Guyunayadi abi' gudaandi zi'c rën Dios,
abi' achet ni mal baguieenan lëjt. ¹⁰ Din chi runaya lux-
doo bejn zi'c rën Dios, guialrunaya guin rüjn yudar
persi rayüjn bejn xgab por xtolaman, zian rarii bejn loj
casti, abi' ad yu't dxej yayüjn bejn xgab guial gulaa-
man loj casti guin. Per guial runaya luxdoo bejn abi' ad
rüjntaman naguiejn chu'man loj xnejz Dios, dxel ad za-
jct gapaman guialnaban delant loj Dios. ¹¹ Per lëjt gol
baguiaa zi'c ma been yudar guial guyunayadi abi' gu-
daandi zi'c rën Dios. Por guial guyunayadi nayob
beendi naguiejn bazuxnejzidi ni ma rnin cayüjn tijb
lëjt, abi' balendi bidxeb tëedi por ni cayüjnx. Dxel ma
rënejzdoodi gazun con lëjt, badëe tëedi laax casti zi'c
rayal. Por gra ni beendi zian biguien guial achet dol ra-
jpidi por zian. ¹² Gui'ch ni guxhalan lojdi, ad guxhal-
tan guialzi rünan xgab por bén cayüjn dol guin o
guial rünan xgab por bén cazagdiaj por xtol bén guin.
Guxhalan gui'ch lojdi din gulüüdi loj Dios guial

yu'guijcquidi dunujn. ¹³ Laan naj ni rabaanë'n guial beenquidi zian.

Abi' yan mazri rabaan guial raguiaan Tito yu' luxdooan zagdxë baguiaadaman guial dád naza'c gojquidi con laaman. ¹⁴ Zeel ad basa'nxtutidi naj por gra zi'c bazatan lëjt lojman. Din gra ni rën por lëjt naj diidxli zi'c ragbeedi guial dunujn ganax diidxli raneen, abi' tée diidxli naj ni raguie'chan loj Tito por lëjt. ¹⁵ Yan dad rusaaladxaman lëjt guial rusaaladxaman xhien-aag bazoobidi xtiidxaman në gra respejt ni gopidi laaman chi guzuman con lëjt. ¹⁶ Dád nix yu' luxdon guial ra'pan lëjt confianz par gra.

Guial rudëed gon con guidib luxdoo

8 Yan compniar raliduladx ree Jesucrist, rayënan gagbeedi xhienaaag cayagnë Dios bén rliladx ree Jesucrist niz Macedonia. ² Majsi xhietëez cazajc reeman, per ad rucwëëzt rguien guial dád rabaa reeman. Majsi dád bënprob reen, per dad rabaa reeman rudëed reeman cintabl par gagnë reeman bejn ree. ³ Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. ⁴ Dád been reeman naguiejn du lojn din yatiëjban guial në laa reeman güün yudar bén rliladx ree Jesucrist, ⁵ abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios. ⁶ Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. ⁷ Dunujn rayagbee guial par gra zagdxë zëdi: Diidxli rliladxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rën tëedi dunujn, yan gol been naguiejn din guiguien guial najdi benza'c par güündi yudar con ni ranan lojdi. ⁸ Ad rüntan lëjt naguiejn guial gudëedi ni rdo'p, per rugojnan lëjt zi'c rabaa ree ben ren guial rüjn reeman yudar, din bal rëndi gulüüdi guial diidxli rëndi xcompniaridi. ⁹ Din lëjt ragbee zi'c naza'c Dad Jesucrist, bén basa'n gra guial-naza'c xanyabaa, abi' bi'taman loj guidxliuj zi'c tijb Bén ni achet rajp din por laaman yayal në lëjt xguialnaza'c Dios.

¹⁰ Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güündi yudar, abi' laa guzuloj gajquidi. ¹¹ Yan zi'cgajc yu' luxdoodi nix guzulojdi, ziangajc gol babaa gusnuudi gudëedi ni rdo'p zi'ctzi galguzujdi. ¹² Din chi diidxli rën bejn güünman yudar, xhietëez naag zajc güünman yudar. Ad rayalt gudëedaman xt ni ad rajptaman.

¹³ Ad canitan lojdi guial tëdidi tarbajw cwe'quidi xt ni ad rajptidi par güündi yudar Bén ryaadx ree xhienin chitëe xhie guiyaadx reeman, ni rayënan naj guial tibloj yaguieen dulasa' ree yudar. ¹⁴ Yan lëjt zajc güündi yudar Bén ryaadx ree xhienin, dxel despuejs güün reeman lëjt yudar con ni ryaadxidi. Zian tibloj

yaguieen du lasa' ree yudar. ¹⁵ Loj xtiidx Dios rëb: "Bén bato'p zro' achet been sobr, abi' Bén bato'p ta'nzi achet biaadxaman."

Tito con ree xcompniaraman

¹⁶ Quixtëe Dios badëëman loj Tito lasa'gajc xgab rünan por lëjt. ¹⁷ Yan chi raguie'chan lojman guidganajman lëjt, laa cwëb gajcaman guial ma rënman guguaaman lëjt, ad beent naguiejn chu niniabee ni'taman.

¹⁸ Abi' con laaman cayxhaalan stijb dux compniaran Bén ma nünbee ree dux compniar ree Bén rliladx ree Jesucrist guidibczi, guial rulüüman bejn ree xtiidxza'c Dios zagdxë. ¹⁹ Ma bacaabee tée ree dux compniar raliduladx ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayënan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdxë. ²⁰ Zeel cwabee Bén guie din saman con dunujn chitëe xhie gucaaquia reeman dunujn por gra yudar ni cado'p ni naca'n par yugsa'n. ²¹ Din dunujn rayënan yaguieenan gra zi'c rayal, ad naabtizi loj Dad Jesucrist, në loj ree bejn.

²² Yan cayxhaalan Tito con Bén guin cayxhaalnë'n laa reeman stijb dux compniaran Bén ma balu'been zien volt guial diidxli rënman güünman yudar, abi' mazri yan guial dád rajpaman lëjt confians. ²³ Bal chu guini-abdiidx por Tito, gol güjdx guial da compniaran najman, laaman cayüjn naj yudar par güün lëjt yudar chinalidi xnejz Dios. Guiáad za' tio'p dux compniaran Bén zë ree con laaman, dux compniar ree Bén rliladx ree Jesucrist guxhaal laa reeman, abi' ruza't reeman Jesucrist zagdxë. ²⁴ Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar rliladx Jesucrist xcwentidi, din guguaa tée reeman guial ni diidxli naj ni ma rën loj reeman xcwentidi.

Yudar par ree xbejn Jesucrist.

9 Yan por yudar ni rayal yale'can par yaguieenan yudar dux compniar ree Bén rliladx ree Jesucrist, ad ryaadxt ganin mazri xcwentan, ² din naj ragbee guial ruladxidi güündi yudar. Abi' xt nix yu' luxdon rën loj ree Bén Macedonia guial lëjt Bén Acaya diizd gudibijz cayüjndi naguiejn cayüjndi yudar, abi' gra ree Bén Macedonia been naguiejn güün yudar chi biguiejn reeman zian. ³ Zeel caxhalan Tito con za' tio'p ree dux compniar ree din guiguien guial waliqui ni ma gunen por lëjt xcwent yudar guin, din güündi naguiejn güündi yudar zi'c ma rën por lëjt. ⁴ Din bal guidnë'n tio'p choon ree Bén Macedonia ad yadxaaglojn lëjt ad za'ti-di porvinid, abi' natun par naj chitëe ganin natun par lëjt por confianz ni ra'pan lëjt. ⁵ Zeel benan xgab rën loj Tito con za' tio'p dux compniar ree guial mejorli ned gaj reeman guidganaj reeman lëjt, din güün tée reeman yudar guloox guto'p reeman yudar ni ma nadi

din ma najn purvinid chi guialan. Zian guiguien guial diidxli rëndi yazaladxidi ad guialzi canabeetan lëjt.

⁶ Naj rni lojdi bén rxübin ta'n, ta'n gajc raca'man, guiaad bén rxübin zro', zro' gajc raca'man. ⁷ Tijbgaj lëjt gol badëë zi'c naj xixgabidi gudëëdi, ad mal gant ad nagueijn tëët, din Dios rënman bén razaladx guidib luxdoo. ⁸ Abi' Dios rajpaman gra guialrniabee par güünman lëjt yudar gapidi gra ni ryaadxidi chitëë xhie guiyaadxidi din güündi yudar zi'c rayal. ⁹ Loj xtiidx Dios rëb:

Bén ni rguis ni rajpaman abi'
rudëëman laan loj ree bénprob,
ad yu't dxej yayanladx reeman
ni zagdxe ni rüjnman.

¹⁰ Yan Dios bén razaladx bin rxübin bejn, bén razaladx guialraw par ree bejn, laaman gulüü lëjt xhie güündi din gapidi gra ni rayal gapidi, din gac güündi yudar mazri bén ryaadx ree xhienin. ¹¹ Zian mazri naj ni guneë Dios lojdi din gusunü güündi yudar yazaladxidi. Abi' por yudar ni guixhiaalnëdi dunujn par ree compniar riladx ree Jesucrist, laa reeman gudëëd quixtëë loj Dios. ¹² Abi' yudar guin ad züjntan sirv naabzi par loj ni ryaadx reeman laan, güünan sirv në par gudëëd reeman mazri quixtëë loj Dios. ¹³ Por yudar guin gagbee reeman guial cuzoobquidi xtiidxza'c Jesucrist zi'c riladxidi laan abi' guza't reeman Dios zagdxe por zian, në guial najdi benza'c rguisidi ni rajpidi par laa reeman në par gra ree bén ryaadx laan. ¹⁴ Abi' zën reeman lëjt, cwedx tëë reeman Dios por lëjt por xgab za'c ni banee Dios lojdi guial güündi yudar. ¹⁵ Quixtëë Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

Guialrniabee ni rajp Pab guial najman xi apóstol Jesucrist

10 Naj Pab, yu' ree bén na guial benza'c naj chi za'n con lëjt, abi' chi za'n zijt sin guial rdxeb rdiilë'n lëjt. Per zi'cgajc ninieenë Cristo lëjt con respekt në con diidxza'c, rniaaban lojdi guial ² xi nix chi guialan guidganan lëjt ad rüjnt nagueijn gadilë'n bén rëb ree por da xgabzan cayünan ni cayünan, din ad rdxebtan ganenë'n laa reeman. ³ Walican nayajcan benguixliuj, per ad raguieentan nagueijn yaguieenan gan por dux xgabzan zi'c rüjn ree bén ad zinalt xnejz Dios. ⁴ Ad raguieentan nagueijn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhietëëz ni mal. ⁵ Por guialrniabee guin baguieenan gan loj ni rudxiib ree bejn duguijcan, abi' baguieen tëen gan loj guial nadxal reeman ni rudxoon güünbee reeman Dios. Zianan rase'nan xhietëëz xgab din chile' gucaagdiajg reeman xtiidx Jesucrist. ⁶ Abi' lëjt chi ma cuzoobidi xtiidx Dios diidxli, dxej dunujn ma nadxu'n par yazuxnejzan gra ree bén ad wazoobt diidx zagdxe.

⁷ Lëjt mazri ridxga'di zi'c ruguiaadi bejn. Bal yu' bén rüjn xgab guial diidxli najman xbejn Cristo, rayal cu'guijcman guial nayajc ree xbejn Cristo zi'cgajc laaman. ⁸ Abi' majsi ganin lojdi mazri xcwent guialrniabee

ni banee Dios lon, ad ratutan din laaman banee guialrniabee par günan lëjt yudar chignia'di mazri xcwent xnejzaman ad par gunijttan lëjt. ⁹ Ad naladxidi guial rënzán gucheban lëjt con ree da gui'chan. ¹⁰ Din yu' ree bén ni rëb guial diidx naa abi' sin guialrdxeb rnienë'n lëjt loj ree da gui'chan, abi' chi za'n con lëjt ni'quid rulüüt lasajcan par lëjt, ni'quid radxat loj ree bejn ni rnien. ¹¹ Per naj rnin lojdi guial bén rëb ree zian rayal gagbee reeman guial zi'cgajc raneenë'n lëjt loj dux gui'chan chi nadxu'n zijt, ziangajc zajc yaguieenan chi nadxu'n con lëjt.

¹² Din dunujn ad raguieentan zi'c rüjn ree bén rlies xvalor gajc, per ni'czi ta'n ad raguieentan xgab yaguieenan zian. Din nitontzi rüjn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman. ¹³ Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cwëjbaman badxinan ladxidi. ¹⁴ Zeel ad güündi xgab guial cadëdtë caynabeen lëjt, din yaloj dunujn bio'p ladxidi par yasiidan lëjt xtiidxza'c Jesucrist. ¹⁵ Dunujn ad ralest dux valor gajcan por tijb ni been stijb bejn. Per ralëëzan guial ni's xguialrliladxidi, din yasnuu yaguieenan lëjt yudar gusunü güünbeedi ni rayal gagbeedi xhienaag rayal yaguieen ree. ¹⁶ Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazu-loj chitëë yales dux valor gajcan con ni ma been ben ren.

¹⁷ Bal yu' bén rën guilies xvalor gajc, mejorli guiliesaman xvalor dux Dad ree Dios. ¹⁸ Din ad bén rli-est xvalor gajc naj bén raya'n zagdxe loj Dios, bén raya'n zagdxe naj bén rlies xvalor Dios.

Pab con ree apóstoles bén rusquiee ree

11 Yan, xi nix taandi naj con tio'p choon ree da xgab tontan! Per naj rni lojdi gol gudaan naj. ² Naj rënan lëjt zi'cgajc rën Dios lëjt. Zi'cgajc tijb dad rajp xi'ndxa'p biin ni ma naj guixhiaa din chile' guidxinm naya loj xin tia' laam, zian rënan guidxinë'n lëjt loj Cristo naya sin dol. ³ Per rdxeban chu' bén gusquiee lëjt zi'c basquiee bëël Eva, abi' ad züjntridi xgab guidib luxdoodi xcwent Jesucrist. ⁴ Din chi ri't ben ren rüman diidx lojdi xcwent Cristo, per garen guial zi'c ma balüün lëjt, o chi ri't bén ren rüman diidx lojdi xcwent Sprijt, per ad lasa't xSprijt Dios bén ma nabannëdi, o chi ri't ben ren lojdi naman xhienaag din gapidi perdón, per garen guial loj ni ma ranan lojdi, lëjt laa ridxga' gajquidi laa reeman. ⁵ Per naj rulüü achet ryaadxan delant loj ree bén rëb laa reeman naj quijb xi apóstoles Jesús. ⁶ Din majsi achet sirv naj par ganen, per ad ryaadxtan guialrignia' abi' lëjt ragbee guial diidxlin por gra ni ma baguiaadi baguieenan.

⁷ Per, zchuj ni ni malan benan ya guial ad bentan benro' lojdi persi benan gan gojquidi xbejn Cristo, në guial ad baquijxtan lëjt chi basidan lëjt xtiidx Dios?

⁸ Ben renli ree bén naj ree xbejn Cristo cwa'n xmilia reeman persi beenan naj yudar la'tgaj guzun con lëjt

persi basidan lëjt xtiidx Dios. ⁹ Abi' chi guzun con lëjt, chi biaadxan xhienin ad gunaabtän lojdi güündi naj yudar, bén Macedonia ree bén rliadx ree Jesucrist laa reeman bidnë ni biaadxan nadxel. Ad goct wanin lojdi guneedi xhienin par naj, ad yu' tëët dxej ganin guial rüjn naguiejn güündi naj yudar. ¹⁰ Zi'c najn xbejn Cristo rnin lojdi ni naj diidxli, guial niz Acaya Achutczizajc gudxoön guial chu' luxdon zagdxë guial guiën ni benan con lëjt. ¹¹ Abi' ¿chexc zeel benan zian con lëjt? ¿Guial ad rëntan lëjt ya? Per Dios ragbee guial dád rënan lëjt.

¹² Abi' gusnuu günan zi'c cayünan xt yandxej guial ad zanaabtczan lojdi güündi naj yudar, din chitëë xhie guinee ree bén ruladx guilies xvalor gajc guial naj reeman xbejn Jesús guial zi'cgajc cayguieenan cayüjn reeman. ¹³ Din laa reeman rëbzi reeman guial naj reeman xi apóstoles Jesús, rusquieezi reeman bejn ree rüjnzi reeman zi'c rulüü naj reeman xi apóstoles Jesús. ¹⁴ Per xt ni'quid radxat loj bejn por zian, din xt xindxab zile' gulüüloj loj bejn zi'c tijb xianjl Dios. ¹⁵ Dxel xt ni'quid radxat loj bejn guial bén ni cayüjn ree xmandad xindxab rëb reeman guial laa reeman cayüjn xmandad Dios. Per laa reeman zayal reeman casti ni ryal reeman por ni cayüjn reeman.

Tarbajw ni gudëd Pab guial najman xi apóstol Jesucrist

¹⁶ Yan canin lëjt stijb: Ad naladxidi guial ad nadëdguientan, per bal rüjndi xgab zian gol basa'n za naj ganen zi'c tijb bén ad nadëdguient din nëgajc naj gales da valoran majsi tibda'nzi. ¹⁷ Ad nat Dios guial gales da valoran zi'c cayünan, per gales da valoran zi'c tijb bén ad nadëdguient. ¹⁸ Zi'c yu' zien ree bén rlies xvalor gajc por ni rüjn reeman loj guidxliuj guie, yan ziangajc naj gales da valor gajcan. ¹⁹ Din guial najdi bén rignia' ad nawëëgt naj taandi bén ad nadëdguient ree. ²⁰ Rdaandi bén rniabee ree lëjt rüjn reeman zi'ctzi rën reeman, rdaandi bén rtia' ree ni rajpidi, bén rusquiee ree lëjt, o rniee reeman lojdi ganax ree diidx nabë abi' xt rtiëjbidi rëëz reeman ro'di. ²¹ Majsi natu'n par naj, per naj rni lojdi guial ad baya'ptan valor guial naguieennë'n lëjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bén ad nadëdguient, din ad xnejztan. ²² Per bal na reeman guial naj reeman bén Hebreo, nëgajc naj naj bén Hebreo. Bal na reeman guial naj reeman bén Israel, ziangajc naj bén Israel gajc naj. Bal na reeman guial loj xdiaa Abraham zëëd reeman, nëgajc naj zial loj xdiaa Abraham. ²³ Abi' bal na reeman guial xmandad Cristo cayüjn reeman, naj mazri cayünan xmandadaman. Majsi zi'c rniee bén ad nadëdguient rnien chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma geyun ladxguiib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialgüjt. ²⁴ Gaay volt ma gudijn ree bén Israel naj, abi' beegaj gudijn reeman naj zi'ctiubitap volt rugaz reeman duu ladan. ²⁵ Choon volt gudijn reeman naj con

yag, abi' tib volt bacaaguiaj reeman naj. Choon volt ma wej barcw lod za'n xan nijsdoo, abi' tibdxëj tibguiaal baya'nän loj nijsdoo. ²⁶ Guidibczilod ma wan, gudëëdan loj ree ni nadxeb chi gudëëdan loj ree guiw, loj ree bëngubaan, loj ree bén ladxan bén Israel ree në loj ree bén ad najt bén Israel. Ma gudëëd tëën loj ree ni nadxeb luguiedx ree, dajn ree, loj nijsdoo, në loj ree bén rusquiee na reeman guial naj reeman xbejn Cristo. ²⁷ Dád ma guzaagdiajn. Dád zien volt ma gulën bacaal, ma gulaanan, ma we'can nijs, abi' ma guyu dxëj ni achetctzi gudawan. Ma gognajlan, ma biaadx tëë da xaban.

²⁸ Abi' ad laatzanan ma guza'can, zien ree ni ma guza'can. Abi' guixie guixie rünan xgab por ree xbejn Cristo bén zojb ree niz lod ma wan. ²⁹ Bal xhie cazajc tijb ree bén rliadx Jesucrist, cayünan xgab por laaman. Abi' bal cusquiee reeman tijb ree bén rliadx Jesucrist par güünman dol, dád ralenan yu' tëën laaman xgab. ³⁰ Bal rüjn naguiejn gales da valor gajcan, tijbzi ni ganin por naj, naj por guialrzagdiaj ni ma gudëëdan. ³¹ Abi' Dios xDad Dad Jesucrist, laaman bén ryal respejt guidib tiamp, laaman ragbee guial diidxli naj ni canen. ³² Tiamp chi canabee rey Aretas, wan luguiedx Damasco dxel gunabee gobernador luguiedx guin bi-aaw nejz par guiniaaz reeman naj. ³³ Per guyu ree bén ni badxe' naj lën tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gu-laän loj gobernador guin.

Ni balüüloj lon

12 Achet rüjn bejn gan guial guilies xvalor gajcan, per ryal ganin lojdi por ree ni balüüloj lon në ree ni balüü Dad Jesucrist naj. ² Naj nünbee tijb xin-guiaaw rliadx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binë xcuerp-ix o xsprijtzix wej, ad ragbeetan, tijbzi Dios ragbee. ³ Bal binë xcuerp-ix o xsprijtzix wej, ad ragbeetan, tijbzi Dios ragbee. Per naj ragbee ⁴ guial wejx lod zojb Dios, lod biguiejnx diidx ni xt ni'quid radxëjt xhienaag ninie-ex laan guial ad rayalt gagbee gra bejn laan. ⁵ Bén zii zajc galesan xvalor, per ad rliestan da valor gajcan, ni rnizan por naj por ree guialrzagdiaj ni ma gudëëdan. ⁶ Abi' majsi gales da valoran, ad cayüntan zi'c tijb bén ad nadëdguient din ganax ni diidxli naj ni ganin. Per ad rüntan zian chitëë yadxaloj bejn naj mazri guial loj ni ryal por ni ruguiaa reeman rünan, o por ni rigueijn reeman rnien.

⁷ Në par chitëë gales da valoran zro' por gra ni ma balüü Dios naj, cadëëdan tijb guialzi ni naj zi'cgajc zi'c chi yu' tijb guiëjch tiblajt bejn. Laan naj xchiin xindxab par güünnaax naj chitëë gales da valoran. ⁸ Choon volt ma canaaban loj Dios din chiquiedaman guialzi ni cadëëdan, ⁹ per laaman na lon: "Zi'c rënan lüj achet gac, din mazri rguen da guialrniabeen chi cazagdiaj bejn." Zeel rabaan por ree guialrzagdiaj ni cadëëdan din guiguien guial nabanän con xguialrniabee Cristo. ¹⁰ Rabaan por xhietëëz guialrzagdiaj ni cadëëdan, o në chi rnieeguijdx bejn naj, o chi ryaadxan xhienin, o chi

xhie rüjn bejn naj, në gra ree tarbajw ni cadëëdan, guial cadëëdan laan guial rënan Cristo. Din chi cazaag-diajn dxe mazri ra'pan xyudar Cristo.

Yu' Pab xgab por ree bén rliladx Cristo luguiedx Corinto

¹¹ Gunenë'n lëjt por naj gajc zi'c tijb bén ad nadëdguient, per lëjt rajp dol guial benan zian. Din lëjt naj bén rayal guilies da valoran delant loj ree bén ni rëb guial laa reeman naj quijb xi apóstoles Jesucrist. Din majsi tijbzi bén ad rüjnt sirv naj, per achet ryaadxan delant loj reeman. ¹² Chi guzun con lëjt ad balenya'-tan guial günan milagr ree në gra los demazri ree ni badxalojdi ni benan në graloj ree ni benan ni been sirv zi'c sen guial diidxli najn xi apóstol Jesucrist. ¹³ Gra zi'c ma benan con gra ree compniar rliladx Jesucrist lod ma wan, ma benan laan con lëjt. Tijbzi ni ad bentan con lëjt naj guial ad rnitán lojdi guial güündi naj yudar con gra ni ryaadxan la'tgaj guzun con lëjt, per bal gunequijdxan lëjt por zian ¡Gol been naj perdon!

¹⁴ Yan ma cayünan xgab guidganan lëjt stijb, laan naj ni yayon volt guidganan lëjt. Abi' ni'qui yan ad zanitan lojdi guial güündi naj yudar, ad ni rajptidi rënan, lëjt naj bén rënan. Din ad xi'nt bejn rguil xhienaag guibanman, dad guin ree rguil xhienaag guiban ree xi'n reeman. ¹⁵ Abi' majsi gra ni ra'pan günan gaxt, o majsi yadib da cuerpan par günan lëjt yudar, per achet güünan. Majsi rulüü chi mazri rënan lëjt, ta'nzi rëndi naj.

¹⁶ Walican guial ad gunaabtan lojdi niagnëdi naj nuneedi xhienin, per yu' ree bén rëb guial benan zian din nasinan par gusquien lëjt. ¹⁷ ¿Wen basquieen lëjt ya chi guxhalan bén bidganaj ree lëjt? ¹⁸ Në chi rën loj Tito guial gui'taman guidganajman lëjt abi' guxhalan laaman con stijb dux compniar ree bén rliladx Jesucrist, ¿wen yu' ni basquiee Tito lojdi ya? ¿Nid zi'c laaman zi'c naj tiblojzi naj xgab raguieenan ya abi' zi'cgajc rünan rüjman?

¹⁹ Por gra ni ma ranan lojdi, ad naladxidi guial caylaj dunuj gajcan, din achet waguieenan lëjt. Dios ragbee guial zi'c nayaajcan xbejn Cristo cayneenë'n lëjt, abi' gra ni caynan lojdi najn par yaguieenan lëjt yudar chinalidi xnejz Dios guial rayënan lëjt. ²⁰ Din rdxeban guial chi guialan guidganan lëjt ad zadxaaglojtan lëjt zi'c rënan, abi' lëjt ad zuguaatidi naj zi'c rëndi guguaadi naj. Rdxeban gadxaaglojn lëjt con wadijl, guialnadëdloj, guialrdxe'ch, guialrlies xvalor gajc, guialrniee guijdx lasa', guial ruza't bejn, guial rüjn benro' në guial ad nadxagtri lasa'di. ²¹ Rdxeb tëen guial chi guidganan lëjt stijb abi' yaya'nxtun por lëjt delant loj Dios. Abi' dád chu' naya luxdon por zien ree lasa'di bén ad rbëzt ree rüjn dol, bén ad rayüjnt ree xgab zi'c naban reeman. Ad rucwëëzt rzunë reeman

bén ad najt lacheel reeman, ad rucwëëz tëët reeman vijs ni rajp reeman o stijb ree ni ad rüjnt sirv ni rüjn reeman.

Diidx bigra bacaa Pab loj gui'ch guie

13 Yan ni yayon volt guidganan lëjt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. ² Abi' zi'c rën loj ree bén ni cayüjn dol chi bialan bidganan lëjt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganan lëjt stijb, achetdzi ni téd zezi par ree bén ni cayüjn dol. ³ Zian gagbeedi ni rëndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par güünman zi'c rayal güünman con lëjt abi' con lëjt culüü xguialrniabeeman ni rajpaman. ⁴ Walican güjt Jesucrist loj crüzj zi'c tijb bén ad rajpt guialrniabee, per yan nabanman por xguialrniabee Dios. Abi' zi'c güjtaman zi'c tijb bén ad rajpt guialrniabee ziangajc dunuj ree rulüü ad raya'pt ree guialrniabee, per zi'c nayaajcan xbejn Cristo raya'pan xguialrniabee Dios par yaguieenan ni rayal yaguieenan con lëjt.

⁵ Lëjt gajc gol been xgab bal walidi rliladxidi Jesucrist. Lëjt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman. ⁶ Balzianclaa gagbeedi guial dunuj diidxli raliduladxan laaman. ⁷ Abi' rarejdxan Dios por lëjt chitëë güündi ni mal, ad par yaya'ntan zagdxe delant loj ree bejn, cayguieenan zian par güündi ni naj zagdxe, majsi par ree bejn ad cayguieentan zi'c rayal. ⁸ Per ad zajt yaguieenan tiblad ni naj diidxli, dunuj caynazan ni naj diidxli. ⁹ Zeel yu' du luxdoon nix achet güünan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz. ¹⁰ Abi' caxhalan gui'ch guie lojdi dxelri guidganan lëjt, din chi guialan guidganan lëjt ad ryaadxt gadilë'n lëjt por guialrniabee ni banee Dad Jesucrist lon, guialrniabee ni baneeman lon par günan lëjt yudar chignia'di mazri zagdxe xnejz Dios, ad par gunijttan lëjt.

¹¹ Yan compniar raliduladx ree Jesucrist par guloxan gui'ch guie, naj rni lëjt: Gol badxe' luxdoodi zagdxe, gol been nagueijn gol gubajn zi'c rayal, gol bagu' luxdoodi gol gubajn tëë zagdxe, gol babe'cdxe luxdoodi con ree xcompniaridi. Abi' Dios bén rën dunuj ree rabe'cdxe tëëman du luxdoo ree laaman gagnë lëjt. ¹² Xhietëëz hor ni radxaag ree xcompniaridi, gol bagajpdioz lasa'di zi'c rayal. ¹³ Gra ree dux compniar ree bén rliladx ree Jesucrist niz guie rugajpdioz reeman lëjt.

¹⁴ Dad Jesucrist güünle' gradi, guial rën Dios lëjt abi' xSprijtaman gagnë lëjt zianczi. Amén.

Gui'ch par ree bén Galacia

Rugajpdioz San Pabl bén riladx ree Jesucrist

1 Naj Pab najn apóstol, per ad béguidxliujt ba-caabee naj ad laa tēet reeman guxhaal naj, najn apóstol por Jesucrist nē por dux Dad ree Dios bén bas-ban laaman loj gualgūjt. ² Gra ree dux compniar ree bén za' ree guie con naj ragajpdiozan lējt najdi bén riladx Jesucrist niz Galacia. ³ Dux Dad ree Dios nē Dad Jesucrist gūnle' lējt yabe'cdxe tēē reeman luxdoodi. ⁴ Jesucrist gūjt por dux tol ree persi babēēman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios. ⁵ Zeel rayalczi yaya'p reeman respejt zianczi. Amén

Achetri diidx ren ni zajc yabēē dunuj ree loj dol

⁶ Dád radxalon gual dád cari cabēēladxidi xtiidx Dios, abi' laaman gual rēn Jesucrist lējt zeel gurejdxaman lējt. Per lējt diidx ren ma ridxga'di ⁷ abi' ni'quid xtiidx Diosan. Diidxliczi yu' ree bén rēn gagdxadi abi' rēn reeman guchaa reeman zi'c naj xtiidx Cristo. ⁸ Per bal yu' bén rulüü lējt diidx ren ree gual loj ree diidx ni ma balün lējt par gaquidi perdon, laaman ma rayal xcasti Dios, majsi chutēēznin majsi naj gajc o majsi tijb xi anjl Dios. ⁹ Zi'c ma rnin lējt abi' yan ma rninan zatijb: Bal chu rulüü lējt diidx ren ree gual loj xtiidx Cristo ni ma bililadxidi, laaman ma rayal xcasti Dios.

¹⁰ Ad raguiltan mod gual yaya'nan zagdxē loj ree béguidxliuj, rünan nagueijn din yaya'nan zagdxē loj Dios. Din bal gūnan nagueijn yaya'nan zagdxē loj ree béguidxliuj dxel ad cuzobtran xtiidx Cristo.

Xhienaag gojc zeel gojc Pab apóstol

¹¹ Compniar raliduladx ree Jesucrist, rēnan gagbeedi gual xtiidx Cristo ni ma balün lējt ad béguidxliujt gulēēgujic laan. ¹² Abi' ad cwa'tanan ad basid tēētan laan por béguidxliuj, Jesucrist gajc naj bén balüü laan naj.

¹³ Lējt ma bigueijn gual chi guyu'n loj xreligion ree bén Israel, guzunaalan bén riladx ree xtiidx Dios din gūnan laa reeman ni mal abi' benan nagueijn din gusa'n ni riladx reeman. ¹⁴ Abi' naj mazri guzudxi'chan loj religion guin gual loj ree lasa' zidnē'n tijbzi gual benan nagueijn benan gra ree xcostumbr ree dux bégulalan. ¹⁵ Per gual rēn Dios naj, diidx chi gadan gual loj guidxliuj mal gulejman naj. Dxel chi beenman xgab. ¹⁶ Balüüloj xi'nman lon din gatiechan xtiidxza'caman loj ree bén ad najt bén Israel. Abi' chi goc zian achut loj bignabdiidxan, ¹⁷ ad watan Jerusalén

nignan bén ma naj ree xi apóstoles Jesús gocli diidx chi gadan gac xi apóstol Jesús, laa wa gajcan niz Arabia dxel baye'can niz Damasco stijb.

¹⁸ Chi goc choon ijz dxel wan Jerusalén persi benbeen Bēd abi' guzun con laaman chiin gubijdx. ¹⁹ Per achut apóstol ren baguiaan tijbzi Jacob bijch Dad Jesucrist. ²⁰ Gra ni canin lējt naj diidxli abi' Dios ragbeechaaw gual ad rusquieetan.

²¹ Dxelri wan niz Siria nē niz Silicia. ²² Per ree bén riladx Cristo, bén zojb ree niz Judea ad wayünbeet reeman naj nadxel. ²³ Rgueijnzi reeman rēb ree bejn: "Bén guzunal dunuj ree yaloj par gūnman dunuj ree ni mal yan ma catie'chaman xtiidx Jesucrist, majsi yaloj beenman nagueijn din yasa'n ree ni raliduladx ree Jesucrist." ²⁴ Abi' rudēē reeman quixtēē loj Dios gual nē naj ma riladx Cristo.

Bachajg Pab bén naj ree apóstoles

2 Chi goc chidaj ijz, dxel wan Jerusalén zatijb. Binē'n Bernabé con Tito, ² din Dios na gual gan ni. Abi' Jerusalén guin badxaag dulasa'n tijb luar con ganax ree bén rniabee loj ree xbejn Cristo persi benē'n laa reeman diidx por xtiidx Jesucrist ni culün bén ad najt ree bén Israel. Benan zian din ad rēntan gual ni ma benan o ni cayūnan gacan dxiin xlia'. ³ Per ni'qui Tito bén guzu ni con naj, majsi najman bén grieg ad beent reeman laaman nagueijn chu'man sen ni ru ree bén Israel. ⁴ Din guyu tio'p choon ree bén Israel been reeman zi'c rulüü naj reeman dux compniaran persi gojc bachajg reeman dunujn par gula'ch reeman conin ad raguieentran gual ma raliduladxan Jesucrist din gac nabee reeman dunujn yaguieenan zi'c rniabee ley. ⁵ Per ni'czi tibda'n ad batiējbtan nūjn reeman dunujn gan, din ad rayēntan cwēēladxidi xtiidxli Jesucrist ni ma zinalidi.

⁶ Abi' ree bén rniabee loj ree xbejn Jesucrist achetri na reeman lon gual rayal gūnan, majsi chutēēz naj reeman din delant loj Dios tiblojzi naj bejn. ⁷ Luar ninia reeman xhie mazri nūnan, laa gogbee gajc reeman gual Dios gulej naj din gatiechan xtiidxza'c Jesucrist loj ree bén ad najt bén Israel, zi'cgajc gulejman Bēd din guitie'chaman diidxza'c guin ree loj ree bén Israel. ⁸ Abi' Dios bén bacaabee gajc Bēd din gacaman apóstol loj ree bén Israel, laagajcaman bacaabee naj din gacan apóstol loj ree bén ad najt bén Israel.

⁹ Zeel Jacob, Bēd con Waj bén rniabee ree mazri loj ree bén riladx Jesucrist, gogbee gajc reeman gual Dios naj bén banee naj gualrniabee guin. Abi' banee

yaa reeman zi'c tijb sen guial ma nayajcan compniar guial ma za' tēē reeman conform guial naj con Bernabé yuglūūn bén ad najt ree bén Israel, guiáad laa reeman gulūū reeman bén Israel ree. ¹⁰ Ni gunabzi reeman du lojn din yaguieen yudar bēnprob ree, abi' laan naj ni ruladxan gūnan.

Gudilē Pab Bēd

¹¹ Per chi we Bēd guiedx Antioquía, dxei gudilē'n laaman guial ad cayūjntaman zi'c rayal. ¹² Guial yaloj gudawnēman bén ad najt ree bén Israel. Per chi bidxin ree bén guxhaal Jacob guiedx Antioquía, dxei ad bachajgtraman bén ad najt ree bén Israel guial bidxebaman xhie niējb ree bén zinal ley. ¹³ Nē los demazri ree bén Israel bén rlliladx ree Jesucrist bén zojb ree ni nē reeman been zi'c been Bēd abi' xt nē Bernabé been zian. ¹⁴ Zeel chi baguian guial ad cayūjnt reeman zi'c rēb loj xtiidxa'c Jesucrist, dxei rēn loj Bēd delant loj gra reeman: "Lūj najl bén Israel abi' ad nabantil zi'c laa reeman, ¿chexc zeel rājnl nagueijn guiban ree bén ad najt ree bén Israel zi'c naban ree bén Israel?"

Guialrlliladx Jesús rabēē bejn loj dol

¹⁵ 'Dunuj ree nayajc ree bén Israel diizd chi bayajl ree abi' ad yu't dxei babajn ree sin xley Dios zi'c ree bén ad najt bén Israel. ¹⁶ Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rlliladxaman Jesucrist. Zeel nē dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

¹⁷ 'Yan bal cayguieen ree nagueijn yayajc ree naya delant loj Dios, laan rulūū dunuj ree guial nayajcqui ree bēndol, ¿wen mazri bēndol cayūjn Cristo dunuj ree ya? ¡Dunuj ree rayagbee guial ad ziantan! ¹⁸ Din bal ma basa'nān xley Moisejs, abi' yaye'can con ley guin zatijb dxei naj gajc cayūn naj bēndol. ¹⁹ Zeel ma basa'nān ley guin din gabajnan par Dios. ²⁰ Abi' rūnan cwent guial nē naj gūjt chi gūt Cristo loj crūjz dxei ad nabantri da xtijban, ma nabannē'n Cristo. Abi' yan zi'c nabanān, ma nabanān zi'c rlliladxan Xi'n Dios, bēn rēn naj gūjt tēēman por naj. ²¹ Abi' ad rūntan tiblād guial rēn Dios dunuj ree, din bal nile' nīajc bejn naya niz loj Dios guial rājnl bejn zi'c rniabee xley Moisejs dxei achetri lasajc guial gūjt Cristo."

Guialrlliladx Jesucrist rquied dol

3 ¡Bén Galacia, chexc zeel ad radēdguientidi! ¿Chu bascajy xquiarguejndi? Awa chi balūn lējt, delant loj gradi bagojnan lējt par xhie gūjt Cristo loj crūjz.

² Yan rēnzān gagbeen: ¿Nabannēdi xSprijt Dios ya guial rājndi zi'c rniabee xley Moisejs o por guial rlliladxi xtiidx Jesucrist ni ma bacaagdiajguidi? ³ Xipxi nadidi zeel awa ma nabannēdi xSprijt Dios abi' yan naladxiidi guial din yayaaloj gaquidi zi'c rēn Dios rayal chinalidi ley. ⁴ ¿Wen achet lasajc guialrzagdiaj ni gudēdidi ya, o

guzagdiaj xlia'zidi ya? ⁵ Chi runee Dios xSprijtaman loj-di abi' rājnlman milagr ree delant lojdi, ¿wen rājnlman zian ya por guial zinalidi xley Moisejs o por guial ma bililadxiidi xtiidx Jesucrist ni ma bacaagdiajguidi?

⁶ Gol basaaladx guial Abraham por guial bililadxiaman Dios, been Dios laaman cwent zi'c tijb bén ad wayūjnt dol. ⁷ Zeel gol gogbee guial gra ree bén rlliladx Dios, laa reeman naj zi'c xi'n Abraham. ⁸ Diizd gocli mal ragbee Dios guial majsi loj ree bén ad najt bén Israel yu' ree bén gūnman cwent zi'c bén ad wayūjnt dol guial rlliladx reeman laaman. Din tiblajt loj xtiidxaman rēb guial rēbaman loj Abraham: "Gūnle'n gra ree bēnguidxliuj por lūj." ⁹ Zeel rājnlle' Dios gra ree bén rlliladx laaman zi'cgajc beenle'man Abraham guial bililadxiaman laaman.

¹⁰ Gra ree bén zinal xley Moisejs yu' casti par laa reeman din loj gajc libr ley guin rēb: "Bén ad zinalt gūn gra zi'cgajczi rēb loj ley guin, yayalaman casti." ¹¹ Zeel rayagbee ree ad zile't gac bejn naya loj Dios por guial rājnlman zi'c rniabee ley. Din loj xtiidx Dios rēb: "Bén rlliladx Dios rajpaman guialnaban delant lojman guial ma nūjnlman laaman cwent sin dol." ¹² Per ley guin ad rniabtān chililadx bejn laan, loj libr ley guin rēb: "Bén gūn zi'c gajczi rniabee ley, zajpaman guialnaban."

¹³ Jesucrist badxi'ca dunuj ree loj xmalidicion ley din laaman bayal casti ni rayal ree por ley guin, din loj libr ley guin rēb: "Ma zē maldicion guijc bēn rējt loj crūjz."

¹⁴ Zian guzajc Jesucrist par chile' gūnle' Dios bén ad najt ree bén Israel, zi'c beenle'man Abraham. Abi' guial rlliladx reeman Jesucrist zeel ma naban reeman con xSprijt Dios zi'c tal rēb Dios diizd guia'xchej.

Xley Moisejs nē xpromejs Dios

¹⁵ Yan compniar raliduladx ree Jesucrist ganin lējt xhienaag rājnl ree bēnguidxliuj: Chi rajs tijb gui'ch abi' rgu' bejn laan firm, dxei achut zajc guse'n laan o gucaa guijc ree diidx ni ca loj gui'ch guin. ¹⁶ Ziangajc gol gogbee, chi been Dios promejs guial gūnle'man Abraham con xdiaaman, ad rēbt loj xtiidx Dios guial gūnle'man "bén zēēd ree" loj xdiaa Abraham. Ad rēbtān zien bejn, rēban tijbzi bejn, din laaman rēb gūnle'n "Bén zēēd" loj xdiaaman. Abi' bēn zēēd loj xdiaaman laaman naj Cristo. ¹⁷ Abi' ni canin lējt naj guial xley Moisejs bi'tan tajpgayuu gajlbichii ijs despuejs ni been Dios promejs con Abraham, zeel ad zajct guse'n ley guin promejs ni ma been Dios. ¹⁸ Din bal par yaca' ree ni rēb Dios loj Abraham rayal yaguieen ree zi'c rniabee ley, dxei ad promejstran. Per Dios bazaladx loj Abraham ni rēbaman por promejs ni beenman lojman.

¹⁹ Wed zanabdiidxidi lon, ¿par xhieza rājnl ley guin sirv? Badēē Dios ley guin din gagbee bejn guial najman bēndol, abi' been ley guin sirv xt dxei ni bi't bēn zēēd loj xdiaa Abraham zi'c tal been Dios promejs con laaman diizd guia'xchej. Bén naj ree xianjl Dios badēē ley guin loj Moisejs, abi' Moisejs badēēd laan loj ree bejn. ²⁰ Per chi been Dios promejs con Abraham achutci badēēd xtiidxaman, quijb laaman gūneenē Abraham.

Xhie sirv rüjn ley

²¹ Ad naladxidi canin guial ley guin za' contr xpromes Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan ²² din loj xtiidx Dios rëb guial dol rniabee gra bejn din gra ree bén chililadx Jesucrist tia' reeman gra ni rëb Dios.

²³ Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn balëez ree guidoonloj guialrliladx Jesucrist. ²⁴ Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb bén ni ad wayüjnt dol guial raliduladx ree laaman. ²⁵ Per yan guial ma raliduladx ree Jesucrist ad rüjntri naguiejn gulüü ley guin dunuj ree.

²⁶ Din guial raliduladx ree Jesucrist ma nayajc ree xi'n Dios. ²⁷ Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman. ²⁸ Abi' zi'c bén Israel zi'c bén ad najt bén Israel, zi'c bén naj zi'c bén nado' zi'c bén ad najt zi'c bén nado', zi'c xinguaaw zi'c béngunaa, par Cristo tiblojzi nayajc ree din ma nayajc ree tijbzi con laaman. ²⁹ Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yayal ree ni rëb Dios loj Abraham diizd gulal.

4 Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpax, zi'cgajc tijb mojs, majsi xieenx naj gra ni rajp xdadix. ² Abi' yu' ree bén rajp laax yu' tée ree bén rniabee laax në ree ni rajpax, xt chi guidxin dxej ni rëb xdadix tia'x ni rayalix. ³ Ziangajc dunuj ree, zi'c tijb xindoo bayajc ree yaloj guial bunaalldxi'ch ree gra ree xcostumbr ree bénguidxliuj. ⁴ Abi' chi bidxin dxej gojc zi'c rëb Dios gac, guxhaal xi'nman Jesucrist loj guidxliuj guie, tijb bénguidxliuj gojc xniaaman. Abi' gubajnman zi'c rniabee ley ni basa'n Moisejs duloj ree ⁵ persi bile' babëeman dunuj ree loj ley guin bile' tée nayajc ree Xi'n Dios.

⁶ Abi' guial nayajc ree xi'n Dios, guxhaalaman xSprijt Jesucrist persi nabajnnë' reeman, abi' por Sprijt guin raguie'ch ree: "iDux Dad ree Dios!" ⁷ Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

Yu' Pab xgab por ree bén rliladx Jesucrist

⁸ Yaloj chi gadidi güünbee quijb Dios, beendi sirv loj ree ni naladxidi naj Dios, per diidxli ad Diost reen. ⁹ Per yan guial ma nünbeedi Dios o guial ma nünbeeman lëjt, ¿chexc zeel rëndi yabi'di güündi graloj ni ad rüjnt sirv ni beendi yaloj? ¿Chexc zeel rëndi gaquidi zi'c bén nado' loj ree ni guin ree zatijb? ¹⁰ Abi' yan guial sta zinëdi cwent xhie dxej o xhie bëew o xhie tiamp o xhie ijz naj ni zobjloj par lëjt par güündi xhienin zi'c goc

xcostumbridi. ¹¹ Dád rdxeban por lëjt, doolgui basid xlia'zan lëjt.

¹² Zeel rniaaban lojdi compniar raliduladx ree Jesucrist, gol gubajn zi'c nabanen, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj ¹³ din lëjt ragbee guial yaloj chi basidan lëjt xtiidxza'c Jesucrist, ragxuun nadxel. ¹⁴ Per majsi zian, gudaandi naj. Ad beentidi naj tiblad ad gulëeladx tëetidi naj, bidxga'di naj zi'c tijb xianjl Dios o zi'cgajc Jesucrist. ¹⁵ Naj ragbee guial bal zile'n xt guiaalojdi zajc cwëedi par guneedan lon. Laadx yan, ¿conzan guial rabaanëdi naj? ¹⁶ ¿O al rdxe'chidi naj ya guial rnin ni naj diidxli lojdi?

¹⁷ Rnin lojdi guial ree bén cayüjn naguiejn guial guidxga'di xtiidx reeman, ad zagdxtet rën reeman lëjt, xixgab reeman naj din gusa'ndi ni basidan lëjt abi' mazri guidxga'di xtiidx reeman. ¹⁸ Ad ni malt naj guial guien bejn lasa' bejnman, per par ni zagdxe në zianczi, ad chi za'tzan con lëjt. ¹⁹ Par naj lëjt naj zi'c da xi'nman. Abi' cazaagdiajn por lëjt zatijb, zi'c rzagdiaj tijb béngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal. ²⁰ iBal zianclaa za'n con lëjt din ganenë'n quijb lëjt, per yan ad ragbeetan xhienaag günnë'n lëjt!

Agar con Sara

²¹ Per gol guna, lëjt bén rën ree guiban zi'c rniabee ley. ¿Wen id wayignia'di ni rëb loj ley ya? ²² Loj ley rëb guial guyu tio'p xi'n Abraham: Guyu xi'nman con tijb béngunaa brii laj Agar bén goc xmojsaman, guyu tée stijb xi'nman con quijb xbéngunaaman bén brii laj Sara. ²³ Xi'n Abraham con béngunaa goc xmojsaman, guyux guial bagaal Abraham laaman. Per xi'nman xin guyu con quijb xbéngunaaman guyux ad por guial bagaaltzi Abraham xbéngunaaman, në par gac cumplid promisejs ni been Dios lojman. ²⁴ Yan, Sara në Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni badëed Dios loj Moisejs ruguia' Sinaí, abi' bén zinal ree ley guin naj reeman zi'c bén nado' loj ley guin zi'c goc Agar loj Abraham. ²⁵ Lëjt ragbee guial niz Arabia naj guia' Sinaí, abi' ree bén niz ni rniee reeman guia' guin Agar. Per yan Jerusalén naj zi'c guia' guin, din gra ree bén zëed niz Jerusalén, bén zinal ree ley, laa reeman naj zi'c bén nado' loj ley. ²⁶ Per dunuj ree du ladx ree naj Jerusalén ni yu' xanyabaa abi' Jerusalén guin ad najtan zi'c ni nado' loj ley guin zi'c ad gojct Sara loj Abraham. ²⁷ Loj xtiidx Dios rëb:

Babaa béngunaa ni ad zajct chu' xi'n.

Babaa da't guial ad nünbeetil guialrzagdiaj ni rdëd béngunaa ni rajl xi'n.

Din bén ad rut xi'n, mazri zien xi'nman chu' guial loj Bén ru xi'n.

²⁸ Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. ²⁹ Abi' lën ree dxejzii, xi'n Agar baze'x xi'n quijb xbéngunaa Abraham, ziangajc yan

bén zinal ree ley ruze' reeman dunuj ree nabajnné' ree xSprijt Dios, guial ma nayajc ree xi'n Dios, ³⁰ Per, ¿xhie rëb loj xtiidx Dios? Rëban: "Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xbéngunaa." ³¹ Zeel compniar raliduladx ree Jesucrist, dunuj ree ad nayajct ree zi'c xi'n bén naj zi'c bén nado' guin, nayajc ree zi'c xi'n quijb xbéngunaa Abraham guial ad rniabeet ley dunuj ree.

Gol guzujdxi'ch loj ni rliladxidi xtiidx Dios

5 Cristo naj bén babëë dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c bén nado' guial güündi zi'c rniabee ley.

² Naj Pab rnin lëjt. Bal rudi sen zi'c rniabee ley, achet lasajc guial rliladxidi Jesucrist. ³ Abi' rnin lëjt zatijb: Chutëëz bén ru sen guin rayal güünman zi'c tal rniabee ley. ⁴ Lëjt guial rüjndi xgab guial güündi zi'c rniabee ley ma najdi naya delant loj Dios, laan rën guiëb guial ad najtridi xbejn Cristo ad yu'guijc tëëtridi guial rën Dios lëjt. ⁵ Per dunuj ree por xSprijt Dios në guial raliduladx ree Jesucrist nadxu'guijc ree guial yadxin ree naya delant loj Dios. ⁶ Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliladx guin zajc yabajn ree zagdxé yayën dulasa' ree. ⁷ Lëjt ma zëdi zagdxé. ¿Chu na lojdi guial ad zidxga'tidi ni naj diidxi? ⁸ Din xgab guin ad zëëdtan por Dios, bén gule lëjt. ⁹ Zeel gol gojp cudad "din con ta'n-nijt zajc gusquiee reeman gradi." ¹⁰ Per naj ra'pan Cristo confians guial ad zusa'ntidi ni basidan lëjt. Abi' Dios gudëëd casti bén cusquiee ree lëjt, majsi chutëëznin. ¹¹ Bal rën guial rüjn naguiejn chu' ree bejn sen, ad zazunaltri ree bén Israel naj. Ziangajc bal guiën guial rayal chu' ree bejn sen, rën guiëban guial achet lasajc guial güjt Cristo loj crüzj. ¹² Balzianclaa gra ree bén ruslen lëjt guial rayal chu'di sen, imejorli gutüüg laagajc reeman tiblayaa!

¹³ Din lëjt ma gulaadi loj ley, per ad guial ad rniabeetri ley lëjt din güündi ni rëntzidi, rayal guiëndi güün tëë yudar lasa'di. ¹⁴ Din con tijbzi mandamient ma been bejn gra zi'c rniabee xley Dios. Mandamient guin rëb: "Guyën ben ren zi'c rën lüj gajc." ¹⁵ Per bal rdxe'ch lasa'di abi' rdilidi, gol gojp cudad chitëë zianzi la' lasa'di.

Guialnaban ni runee xSprijt Dios

¹⁶ Zeel rnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi. ¹⁷ Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi rënman. ¹⁸ Per bal xSprijt Dios naj bén rniabee lëjt dxel ad rniabeetri ley lëjt. ¹⁹ Yan laa rguien gajc con ree nin zëëd con xixgabzi ree bejn: Guialrzunë xinguaaw ren o béngunaa ren, guialrünün bejn nidxuudx, guialrajp be-

jn gadxagayaa vijs, ²⁰ guial rën bejn graloj ni naladxa-man naj Dios, guial rünün bejn guialbidxaa, guialrdxe'ch lasa', guialrdil, guialrzëëbladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman, ²¹ guialrdëd-loj, guialrugüjt bejn, guialrzüdx, guialnala në xhietëëz ni mal lasa' ree ni guin. Rugojnan lëjt zi'cgajc ma rnin lojdi yaloj, bén cayün ree lasa' ree ni guin ad zayalt reeman lod rniabee Dios.

²² Per ni zëëd por xSprijt Dios naj, guialrën lasa' bejn, guialrabaa, guialrga'dxe luxdoo, guial yu' pacens, guialnaxanladx, guial rajc naza'c, guial rünün cumplid xtiidx, ²³ guial rünün naya, guialrniabee bejn xixgab mal gajcaman. Abi' ad yu't ley ni rudxoon guial güün bejn ni guin ree. ²⁴ Abi' ree bén ma naj xbejn Cristo ma basa'n reeman gra dol, në gra ree ni mal ni rën reeman güün reeman din ma güjt Cristo por gra dol. ²⁵ Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

²⁶ Ad yales dux valor gajc ree, ad yache'ch du lasa' ree, ad yadëdloj du lasa' ree.

Yaguieen du lasa' ree yudar

6 Compniar raliduladx ree Jesucrist, rnin lëjt, bal chu xcompniaridi rünün dol gan, lëjt guial ma rajquidi mazri xtiidx Dios gol guneenëman con ganax ree diidxa'c, din rayal cu'guijquidi guial nëgajc lëjt zajc güün dol lëjt gan. ² Gol gognë lasa'di loj xhietëëz guialzi ni rdëdidi, zian ma cayündi ni rniabee Cristo güündi.

³ Bal yu' bén ni naladx guial rajcaman gra abi' achetzi rajcaman, dxel laagajcaman cusquiee laaman. ⁴ Tijbgaj bejn rayal güün xgab bal nabancaman xnejz. Abi' bal nabanman xnejz, tijbzi laaman rayal yabaa luar güünman xgab guial nabanman zagdxé loj gra ree bejn. ⁵ Din tijbgaj dunuj ree rayal yaya'p ree xhienaa yabajn ree.

⁶ Chutëëz bén cusiid xtiidx Dios, rayal güünman yudar bén culüü laaman con ni ryaadxaman.

⁷ Ad gusquiee lëjt gajc, din achut zajc guze' Dios. Ni rxübin bejn laagajcan yato'paman. ⁸ Bal nabanman zi'ctzi naj xixgabaman zadxin dxey yayalaman casti. Per bén naban zi'c rniabee xSprijt Dios, por Sprijt guin yayalaman guialnaban tiblayaa delant loj Dios. ⁹ Ad rayalt yadxag ree guial yaguieen ree ni zagdxé, din bal id zadxag ree chi guidxin dxey yaca' ree ni yayal ree.

¹⁰ Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree bén rliladx ree Jesucrist.

Xconsejw Pab

¹¹ Gol baguiaa xi naroob ree lejtr ni cucan par lëjt con quijb yan. ¹² Bén cayün ree naguiejn chu'di sen, rünün reeman zian par yaya'n reeman zagdxé loj ree bejn luar sagdiaj reeman guial rliladx reeman Jesucrist. ¹³ Per ni'qui ree bén yu' sen guin ad rüjnt reeman gra zi'c rëb ley guin. Rënzi reeman chu'di sen guin din güün ree-

man nabë guial ma been reeman gan yu'di sen guin.
¹⁴ Per naj achet por ni gūnan nabë, tijbzi por guialgūjt Dad Jesucrist. Abi' guial gūjtaman loj crūjz ma basa'-nan gra ree ni mal yu' loj guidxliuj guie abi' ma gūjtan par ree ni mal guin. ¹⁵ Din chi ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman.
¹⁶ Abi' ree bén ma zinal xnejz Cristo, Dios yaya laa ree-

man yabe'cdxe tēēman luxdoo reeman nē gra ree bén diidxli naj xbejn Dios.

¹⁷ Diizd yan ad rēntran chu guche'ch naj. Din dib ni ca ree ladan laa reen rulüü guial najn xiapóstol Jesucrist.

¹⁸ Compniar raliduladx ree Jesucrist, dux Dad ree Jesucrist gūünle' gradi. Amén.

Gui'ch par ree bén Éfeso

Rugajpdioz San Pabl bén Éfeso ree

1 Naj Pab, najn tijb xi apóstol Jesucrist por xguialrniabee Dios. Cucan gui'ch guie par lëjt guial diidxli zinalidi xtiidx Jesucrist, lëjt guial ma najdi xbejn Dios luguiedx Éfeso. ² Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rüjnle' Dios bén rliladx ree Jesucrist

³ Quixtëë Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diizd xanyabaa con graloj guialnaza'c din gac yunaal ree xtiidxaman. ⁴ Laaman bacaabee dunuj ree por Dad Jesucrist diizd chi gad guidxliuj gacchaaw din yabajn ree naya sin dol lojman. ⁵ Abi' guial rënman dunuj ree, diizd guia'xchej beenman guial yayajc ree xi'nman por Jesucrist zi'c beenman xgab gac. ⁶ Zeel ad racwëëzt raza't ree Dios zagdx guial dád benza'c najman, ma beenle'man dunuj ree por Xi'nman Jesucrist, bén rënman, ⁷ bén ma gudi-jx por dunuj ree chi guxhie' xrejman, abi' ma gojc perdon dux tol ree guial dád rën Dios dunuj ree. ⁸ Zeel dád zro' guialrajc në guialrignia' ma bazaladxaman duloj ree, ⁹ abi' ma balüüman duloj ree xhienaag naj xixgabaman diizd gocli, zi'cgajczi ma beenman xgab gac. ¹⁰ Guiáad xgab guin gacan cumplid chi guidxin dx-ej, Dios gusa'n gra loj Jesucrist zi'c ni yu' xanyabaa në loj guidxliuj.

¹¹ Nëtëë guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diizd guia'xchej, din laaman rüjn gra zi'c rënman gac. ¹² Abi' laaman ma been zian, din dunuj ree nayajc ree bén yaloj bililadx Jesucrist, yayajc ree bén guza't laaman zagdx por xguialrniabeeman.

¹³ Nëgajc lëjt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rëb Dios guial guneeman xSprijtaman, dxel yan guial ma nabannëdi laaman, laaman naj zi'c tijb sen ni rulüü guial ma najdi par Dios. ¹⁴ Guial ma nabannë xSprijt Dios dunuj ree, yaca' ree ni rëb Dios guneeman chi ma bara xbejnman za' xanyabaa, din chitëë yacwëëz yaza't reeman zagdx por xguialrniabeeman.

Rniab Pab quiarguiejn loj Dios

¹⁵ Abi' guial ragbeen rliladxidi Dad Jesús rën tëëdi los demazri ree bén naj xbejn Dios, ¹⁶ zeel ad rucwëëzt rudën quixtëë loj Dios por lëjt, beegaj rbedx rniaaban

laaman. ¹⁷ Laaman naj Dios rniabee diizd xanyabaa, xDad Dad Jesucrist. Rniaaban lojman yazaladxaman quiarguiejn lojdi din chignia'di ni gulüüman lojdi gusunu tëë güünbeedi laaman mazri. ¹⁸ Rniaaban lojman din guixhialaman xquiarguiejndi din chignia'di xhie rën guiëb ni rbëzidi diizd chi bacaabeeman lëjt, chignia' tëëdi guial ni za'cdxoon narooob tëë naj ni nagu'chaaw Dios par ree bén naj xbejnman. ¹⁹ Rniaab tëën lojman guial gagbeedi guial dád narooob naj xguialrniabeeman ni cayagnë dunuj ree raliduladx reeman. Laagajc guialrniabee narooob guin balüü Dios ²⁰ chi basbanman Jesucrist abi' gule'caman laaman xladbeeman xanyabaa ²¹ lod badëëman guialrniabee lojman ni mazri lasajc guial loj gra ree guialrniabee, në loj gra guialguxtis në loj gra gobiarn. Abi' mazri lasajc guialrniabee guin guial loj gra ree guialrniabee yu', në ni qui chu'ri ree loj guidxliuj guie. ²² Dxel basa'n Dios gran loj Jesucrist, bacaabeeman laaman din nabee-man gra ree bén rliladx laaman. ²³ Guiáad ree bén rliladx laaman, guidiblagaa nabannëman laa reeman abi' bantëëz guin za'man din laaman guidiblagaa rniabee.

Nayajc ree perdon guial rën Dios dunuj ree

2 Gocli gojquidi zi'c bengüt loj Dios por ree ni mal në por ree dol ² ni beendi guial binalidi nejj mal been tëëdi zi'ctzi rën xindxab güündi, sprijtmal ni nabannë gajc ree bén ad ruzoobt xtiidx Dios. ³ Du gra ree ziangajc babajn ree guia'xchej. Baguieen ree zi'ctzi bayën ree, zi'ctzi goc dux xgab ree, abi' zi'cgajc rayal ree bén ad ruzoobt xtiidx Dios casti, ziangajc nayal ree casti. ⁴ Per guial raya da't Dios dunuj ree rën tëëman dunuj ree, ⁵ zeel majs bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon. ⁶ Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa. ⁷ Dios been zian din dx-ej zëëd ree guiguieen guial dád rënman dunuj ree, abi' benza'c tëë najman con dunuj ree por Jesucrist. ⁸ Guial naj Dios benza'c, zeel ma nayajc ree perdon, ad guial nayajc ree benza'c lojman. Por guial rliladx zëëd xperdon Dios. ⁹ Ni'quid por ni zagdx ni ma baguieent ree zëëd perdon guin chitëë chu guilies xvalor gajc. ¹⁰ Por Dios nadxu' ree loj guidxliuj guie abi' por Jesucrist bachaaman mod babajn ree yaloj din yaguieen ree ni zagdx zi'c beenman xgab yaguieen ree diizd gocli.

Tijbzi nayajc ree por Jesucrist

¹¹ Zeel lëjt bén ad najt ree bén Israel, gol basaaladx xhienaag guzajquidi yaloj. Bén Israel ree gulëälaj lëjt bén ad yu't ree sen guial yu' reeman sen zi'c rniabee ley. ¹² Tiamp zii ad beenbeetidi Jesucrist, ad gojctidi cwent loj ree bén Israel ad gojc tëëtidi cwent guial rayalidi ni rëb Dios gudëëman loj ree xbejnman. Contzi gubajndi achet gulëjzidi ad gubajnnë tëëtidi Dios. ¹³ Per yan guial ma rliadixidi Jesucrist, lëjt guial guzujdi zijt loj Dios, por xrejn Jesucrist ma bibiguidi lojman. ¹⁴ Din Jesucrist babe'cdxe du luxdoo ree. Laaman bisüd guialrdxe'ch ni rudxoon gac ree bén Israel tijbzi con ree bén ad najt bén Israel. ¹⁵ Abi' por xguialgüjt Jesucrist gulox gra ree costumbr rniabee xley ree bén Israel güün ree bejn, laaman been persi gojc ree bén Israel con ree bén ad najt bén Israel zi'c tijbzi guiedx cüb guial ma nayajc ree tijbzi con laaman. Zian babe'cdxe-man luxdoo ree bejn. ¹⁶ Din por xguialgüjt Jesucrist loj crüz ma gulox guialrdxe'ch lasa' ree bén Israel con ree bén ad najt bén Israel, abi' ma nadxu'në' ree Dios zagdxe guial ma nayajc ree tijbzi por Jesucrist. ¹⁷ Abi' laaman bidgagojn dugra ree, zi'c ree bén Israel zi'c ree bén ad najt bén Israel xhienaag yadxu'në' ree Dios zagdxe. ¹⁸ Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnnë' ree. ¹⁹ Zeel ad najtridi zi'c bén zëed lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. ²⁰ Lëjt naj zi'c xze' tijb yu ni cayajc, guiáad ree xi apóstoles Jesús con ree bén badëë xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guiaj zojbloj ni cayajc-në yu guin. ²¹ Abi' guial yagaj guzuloj cayajs yu guin, dxel cayë'pzi cayë'p ze' guin ni cayguie'ch ree najdi din yayajc ree tijbzi xyadoo Dios con Jesucrist. ²² Në yan guial ma najdi tijbzi con Jesucrist ma naj tëedi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

Cwabee Pab din chigneeman xtiidxza'c Jesucrist

3 Por zianan yu'n ladxguuib, naj Pab guial cayüan sirv loj Jesucrist din günan yudar lëjt bén ad najt ree bén Israel. ² Lëjt ragbee guial naj Dios benza'c zeel baneeman dxiin guin lon din günan lëjt yudar chignia'-di xtiidxaman. ³ Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej. ⁴ Chi goolidi laan, gagbeedi guial ma ragbeen xhienaag naj xixgab Dios par Jesucrist. ⁵ Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni nagueie'ch par ree bejn. Per yan por xSprijtaman ma balüüman laan loj ree xi apóstoles Jesús në loj ree bén badëë xtiidx Dios loj ree bejn. ⁶ Abi' ni goc zi'c tijb ni nagueie'ch par ree bejn naj guial por xtiidxza'c Jesucrist, në ree bén ad najt bén Israel ma rayal ni gudëë Dios loj ree bén Israel guial ma naj reeman tijbzi, dxel ziangajc ma nayab reeman loj promejs ni been Dios por Jesucrist.

⁷ Naj cugojn xtiidxza'c Jesucrist loj ree bejn, ad guial rayalt günan dxiin guin. Guial naj Dios benza'c, zeel bazaladxaman guialrniabee lon par günan laaman sirv. ⁸ Naj naj bén bigra bén lasajc ta'nz loj gra ree xbejn Dios, per guial naj Dios benza'c, bacaabeeman naj din günn diidx loj ree bén ad najt bén Israel xcwent xguialnaza'c narooob Jesucrist, ⁹ në par gugojnan zagdxe gra reeman xhienaag naj xixgab Dios bén been gra, xgab ni ad balüü gajtaman loj ree bejn. ¹⁰ Din yan zi'c naj ree bén rliadix Jesucrist, gagbee gra ree bén rajp guialrniabee xanyabaa guial gra lojczy guialrajc rajp Dios. ¹¹ Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. ¹² Në guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. ¹³ Zeel rnin lojdi ad runayadi por ree guialzi ni cadëëdan por lëjt, din zagdxen par lëjt.

Dád rën Jesucrist dunuj ree

¹⁴ Zeel ruzuxiban loj dux Dad ree Dios; ¹⁵ laaman naj Dad loj gra ni yu' loj guidxliuj në xanyabaa. ¹⁶ Abi' rni-aaban lojman por xguialrniabee narooobaman yazal-adxaman lëjt gojl në guialrniabee por xSprijtaman din yayu luxdoodi, ¹⁷ guibannë tëedi Jesucrist guial rliadixidi laaman. Din zian zi'c diidxli zinalidi zi'c rën Jesucrist dunuj ree, ¹⁸ dxel ma zajc gagbeedi con los demazri ree compniar raliduladx ree laaman guial gudëdlaj abi' xt banczi naaloj zro' rënman dunuj ree. ¹⁹ Zeel rniaaban loj Dios gagbeedi plact rënman dunuj ree, guial mazri zro' najn guial loj ni raguieen ree xgab, abi' zian guidiblagaa guibannëdi Dios.

²⁰ Laaman, guial rajpaman guialrniabee par güünman mazri guial loj ni raguieen ree xgab o mazri guial loj ni ranaab ree lojman por xSprijtaman bén nabajnnë' ree, ²¹ abi' rayal yaza't reeman zagdxe gra dxej në gra tiamp por Jesucrist, dunuj ree guial raliduladx ree Jesucrist. Amén.

Nayajc ree tijbzi por xSprijt Dios

4 Naj, yu'n ladxguuib guial cayüan sirv Jesucrist, rni-aaban lojdi zi'c ma najdi xbejn Dios, gol gubajn zi'c rayal guiban ree bén ma naj ree xbejnman. ² Gol gojc benza'c në bén naxanladx, gol gojp pacens gol gudaan tëë lasa'di guial rën lasa'di. ³ Gol been nagueijn gusnuu gaquidi tijbzi con xyudar xSprijt Dios bén rabe'cdxe du luxdoo ree par yayajc ree tijbzi. ⁴ Dunuj ree nayajc zi'c tijbzi cuerp, abi' dugra ree nabajnnë' xSprijt Dios, abi' zi'c ma nayajc ree xbejn Dios, ziangajc ralëjz ree ni guneeman. ⁵ Tijbzi Dad, tijbzi guialrliadix në tijbzi guialrirobnis raya'p ree. ⁶ Din tijbzi Dios yu', bén naj Dad par dugra ree, rniabeeman dugra ree, nabannëman dugra ree rüjn tëëman ujs dugra ree.

⁷ Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree. ⁸ Zianan zeel rëb loj xtiidx Dios:

Chi bayë'paman xanyabaa,

beenman gan loj gra guialrniabee,
 abi' badëëdaman loj ree bejn ni rayal güün reeman.
⁹ Abi', xhie rën guiëb lod rëb "bayë'paman"? Rën
 guiëban bi'taman loj guidxliuj. ¹⁰ Guiáad Jesucrist bén
 bi't loj guidxliuj, laagajcaman naj bén bayë'p xanyabaa
 persi canabeeman guidib guidxliuj në xanyabaa. ¹¹ Abi'
 ma badëëman loj ree bejn ni rayal güün reeman, yu'
 reeman bayal gac apóstoles, yu'za reeman bayal gac
 bén rudëë xtiidx Dios loj ree bejn, yu' reeman bayal
 gutie'ch xtiidxaman, yu' tëë reeman bayal gudëë con-
 seju gulüü tëë reeman bén riladx ree laaman. ¹² Zian
 bacaabee Jesucrist bejn ree din gusiid los demazri ree
 bén riladx laaman, gac tëë güün reeman laaman sirv,
 gusnuu tëë güünbee reeman laaman, ¹³ xt yayaaloj
 yaliduladx ree yaguieenbee tëë ree Xi'n Dios guidibla-
 gaa, din yayaaloj yayignia' ree xhienaag rayal yunaal
 ree Jesucrist. ¹⁴ Dxel ad zayajctri ree zi'c ree xindoo
 riladx xhietëëznin, ad zayajctri ree zi'c tijb ni rnë bi niz
 ni niz guie por graloj ni rü ree bén raguüil mod
 gusquiee ree bejn, ¹⁵ rayal yayën du lasa' ree, yadü ree
 diidx yunaal tëë ree ni diidxli din gusnuu yayignia' ree
 yaguieen tëë ree zi'c rën Jesucrist bén rniabee dunuj
 ree. ¹⁶ Din por Jesucrist nayajc ree tibloj gra ree comp-
 niar raliduladx ree laaman. Por laaman nadxajg du-
 lasa' ree nayajc ree tijbzi, abi' tijb gaj dunuj ree con ni
 rayal yaguieen ree par yaguieen du lasa' ree yudar din
 gusnuu yayën dulasa' ree por Jesucrist.

Guialnaban cüb con Jesucrist

¹⁷ Yan por Jesucrist rnin lëjt: Ad bal guibanridi zi'c na-
 ban ree ben ad nünbeet Dios, din laa reeman naban
 zi'ctzi naj xixgab reeman, ¹⁸ nacay xquiargueijn ree-
 man, ad rajpt reeman guialnaban rën Dios gap ree-
 man, guial ad rignia't reeman ache tëët naladx ree-
 man. ¹⁹ Ma been luxdoo reeman gojl, ma gulëëladx
 laagajc reeman abi' cusnuu cayüjn reeman graloj nidx-
 uudx. ²⁰ Per lëjt ad beenbeetidi Jesucrist din guibandi
 zian, ²¹ bal walidi ma bigueijndi xcwentaman bal wali
 tëëdi ma basiididi diidxli zëed por laaman. ²² Gol
 basa'n zi'c gubandi yaloj, din ruxhiinzi zi'c gubandi
 yaloj con xgabmal ni basquiee lëjt guial beendi zi'ctzi
 guyëndi. ²³ Gol been naguiejn guidxaa xixgabidi guidi-
 blagaa ²⁴ din gaquidi zi'c tijb bencüb been Dios zi'c
 rënman, con tijb guialnaban naya në zi'c rayal por xdi-
 idxliman ni ma bigueijndi. ²⁵ Zeel ad bal rnieeridi diidx
 rusquiee. Gol gunee diidxli con xcompniaridi din tijbzi
 nayajc dugra ree con Jesucrist. ²⁶ Bal rdxe'chidi, ad
 güündi dol. Ad gudxe' guialrdxe'ch guin luxdoodi
 dëchej, ²⁷ chitëë tiëbidi güün xindxab lëjt gan. ²⁸ Bén
 rban, rayal gucwëëz cwanman abi' güünman dxiin, din
 con dxiin zagdx güünman dxel ma rajpaman con xhie
 güünman yudar bén ryaadx ree xhienin. ²⁹ Ad rniee
 tëëdi diidxguijdx, gol gunee ganax diidxzagdx ni
 güün yudar chignia' ree ben ren bén gucaagdiajg ree
 laan din güünan laa reeman sirv. ³⁰ Ad rgu'nayadi
 xSprijt Dios, bén ma nabannëdi zi'c tijb sen guial ma
 najdi xbejnman par dxex ni guidxindi lojman. ³¹ Gol
 basa'n tiblad gra guialralenya', guialrdxe'ch, guialralen

lasa', guialrguidxa'në lasa', guialrniee diidxguijdx loj
 lasa' në graloj ni mal. ³² Gol gojc benza'c, gol baya
 lasa'di gol been tëë lasa'di perdon zi'c been Dios lëjt
 perdon por Jesucrist.

Zi'c rayal guiban ree Xi'n Dios

⁵ Zi'c ma najdi xi'n Dios Bén rënman, gol been
 naguiejn güündi zi'c laaman. ² Gol gubajn zagdx,
 gol guyën lasa'di zi'c guyën Jesucrist dunuj ree abi'
 bayü laagajcaman güjtaman por dunuj ree, gojcaman
 zi'c tijb gon ni rliaa nejxh par Dios.

³ Yan lëjt guial ma najdi xbejn Dios, ad rayalt guinee
 loj lasa'di diidx dxuudx, ni'qui graloj ree ni ad rüjnt sirv
 ad rzëëbladx tëëdi gra par lëjt. ⁴ Ad rnieedi diidxguijdx
 ree, diidxont ree, diidx ni ad rayalt guineedi din ad ni
 zagdxet reen. Mazri zagdx gol badëë quixtëë loj Dios.
⁵ Din lëjt ma ragbee guial ree Bén naban nadxuudx në
 ree Bén rüjn ni ad rüjnt sirv, në ree Bén rzëëbladx gap
 gra (mazri yu'guijc reeman ni guin ree luar guiën ree-
 man Dios), dxel ad zile't chu' reeman lod rniabee Jesu-
 crist con Dios. ⁶ Gol gojp cudad achu gusquiee lëjt con
 ree diidx ad rüjnt wen, din por ree ni guin zëed xcasti
 Dios par ree Bén ad ruzoobt diidx. ⁷ Zeel ad güündi zi'c
 rüjn reeman.

⁸ Gocli gubajndi zi'c tijb Bén nayaaw xquiargueijn,
 per yan guial ma najdi tijbzi con Jesucrist, laaman naj
 biani par lëjt. Zeel gol gubajn zi'c ree Bén ma zinal
 biani guin, ⁹ din guial chinal bejn biani guin ma zile'
 güünman ni zagdx zi'c rayal, në ni naj diidxli. ¹⁰ Gol
 been naguiejn gol been zi'c ruladx Dios. ¹¹ Ad në lëjt
 güün ni ad rüjnt ree sirv ni rüjn ree Bén nayaaw
 xquiargueijn, gol guneenë reeman din gagbee reeman
 ni rüjn reeman. ¹² Din xt ratu bejn güman ni rüjn ree-
 man ralan. ¹³ Per por xtiidx Jesucrist laa gagbee gajc
 reeman xhienin rüjn reeman. ¹⁴ Din zianan zeel rëb loj
 xtiidx Dios:

Batie'ch xbaaalil, lüj guial zinalil nejz mal.

Bariica loj dol din gusni Jesucrist xquiargueijnl.

¹⁵ Zeel gol gojp cudad xhienaag nabandi, ad gontzi
 guibandi, gol gubajn zi'c Bén yu' xquiargueijn. ¹⁶ Gol
 been naguiejn guibandi zi'c rayal naga yu' tiamp, din
 lën ree dxex guie ad xnejztri naban bejn. ¹⁷ Zeel ad
 gontzi nabandi zi'c naj xixgabidi, gol beenli naguiejn
 chignia'di xhienaag rën Dios guibandi. ¹⁸ Ad südxidi,
 din guialrzüdx guin ruxhiin bejn. Zagdxeli gol cwëjb
 nabee xSprijt Dios luxdoodi guidiblagaa. ¹⁹ Chi rünë
 lasa'di diidx, gol baza't ni ca loj ree salmos, loj ree him-
 no, në gra loj ree cant ni naj par Dios. Abi' guidib lux-
 doodi gol biil gol baza't tëë Dios zagdx. ²⁰ Abi' guixie
 guixie gol badëëd quixtëë loj dux Dad ree Dios por
 Dad Jesucrist por gra ni rüjnman par dunuj ree.

Zi'c rayal guibannë lasa' ree Bén riladx Jesucrist

²¹ Gol bazoob xtiidx lasa'di por respekt ni rajpidi Jesu-
 crist. ²² Në lëjt bëgunaa nuxhliiaa, gol bazoob xtiidx
 lacheelidi zi'c ruzoobidi xtiidx Jesucrist. ²³ Din xin-
 guiaaw ree rniabee lacheel zi'c rniabee Jesucrist Bén

rliladx ree laaman, b n bab   laa reeman loj dol abi' naj reeman xbejnman. ²⁴ Abi' zi'c ruzoob ree b n rliladx Jesucrist xtiidxaman, ziangajc ree b ngunaa rayal guzoob xtiidx lacheel reeman. ²⁵ N gajc l jt xin-guiaaw nuxhlaa ree, gol guy n lacheelidi zi'c r n Jesucrist b n rliladx ree laaman, abi' xt g jtaman por laa reeman ²⁶ persi bis daman xtol reeman, basiaman laa reeman por xtiidxaman n  por guialrirobnijs, ²⁷ din guidxin reeman lojman nix da't n  ni'qui tijb ni mal, sin falt o dol ren ree, guidxin reeman lojman nayadxuj sin dol. ²⁸ Yan ziangajc ree xinguaaw baxhlaa, rayal gui n lacheel reex zi'c r n laagajc reex. Abi' xin r n lacheel, laa gajquixan r nx. ²⁹ Din ni'qui tijb bejn ad rdxe'cht laagajcaman, ruyaani laagajcaman rniajchi' t   laagajcaman zi'c r jnn  Jesucrist dunuj ree nayajc ree b n rliladx laaman ³⁰ guial nayajc ree tijbzi con laaman. ³¹ Zeel zi'c r b loj xtiidx Dios: "Xinguaaw gusa'n xdad xniaax din gaquix tijbzi con lacheelix abi' grop rex ma naj tijbzi bejn." ³² D d naw  g naj par chignia' bejn diidx guie ree, per caninan din zian naj Jesucrist con ree xbejnman. ³³ Yan, xinguaaw ree, gol guy n lacheelidi zi'c r n l jt gajc. Gui ad l jt b ngunaa, gol gojp respekt lacheelidi.

6 N  l jt najdi xi'n, guial zinalidi Jesucrist, gol bazoob xtiidx ree xdadidi, din zian rayal g undi. ² Abi' mandamient yaloj ni r b guial yu' ni yaca' ree bal yagueien ree ni r b: "Gojp respekt xdad xniaal, ³ din guibanl zagdx guiban t  l xchej loj guidxliuj guie." ⁴ N gajc l jt dad na ad gusagdiaj xi'ndi chit   guidxe'ch reex por zian. Mejorli gol basni's reex zagdx, gol guneen  reex gol bal   t   reex zi'c r n Dios. ⁵ N  l jt b n r jn ree xchiin bejn, gol bazoob xtiidx b n naj xpatrondi loj guidxliuj guie. Con guidib luxdoodi gol gojp respekt gol bazoob t   xtiidx reeman, gol gunaladx xchiin Jesucristan cay jndi. ⁶ Gol been reeman sirv ad chi ruguaatzi reeman l jt par yaya'ndi zagdx loj reeman, gol gunaladx guial Jesucristan cay jndi sirv guial diidxli cay jndi zi'c r n Dios g undi. ⁷ Gol been dxiin con gan, gol gunaladx xchiin Jesucrist cay jndi, ad xchiint b nguidxliuj. ⁸ Din l jt ma ragbee guial tijbgaj bejn majsi b n r jn xchiin bejn o b n ad r jnt xchiin bejn, per gud   Jesucrist ni rayalaman zi'ctzi naj ni zagdx beenman. ⁹ N gajc l jt b n naj ree patron, gol gojc benza'c con ree xmojsidi, ma gojczy rusagzidi laa

reeman, din l jt ragbee guial b n rniabee laa reeman n  l jt yu'man xanyabaa, abi' ad rbetaman loj bejn.

Gol guzudxi'ch loj ni rliladxidi

¹⁰ Rni t  n lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee naroobaman. ¹¹ Gol gojp l jt gajc con xguialrniabee Dios din sudxi'chidi chit   g  n xindxab l jt gan con ree ni rusquiee. ¹² Din ad cayguieent ree naguiejn yagueien ree gan loj tijb ni naj b  l n  dxijs, caydijs ree con gra loj sprijtmal zi'c ree ni rajp guialrniabee, guialguxtis n  gra loj xsprijt xindxab ni yu' ni canabee t   loj guidxliuj guie. ¹³ Zeel gol gojp l jt gajc con xguialrniabee Dios din chile' taandi xhiet  z loj guialzi gui't sudxi'ch t  di loj xhiet  z ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu t   zi'c rayal guiband. ¹⁵ Gol guzusin par guinieedi xtiidxza'c Jesucrist din por laan yadxu' ree zagdx con Dios. ¹⁶ Gol badxe'guijc t   guial guialrliladx ni rajpidi naj ni ragn  l jt loj gra ni z  d por xindxab. ¹⁷ N  ni been Dios perdon xtolidi, laan naj ni rut   l jt, gui ad xtiidxaman naj zi'c tijb espad ni runee xSprijt Dios lojdi. ¹⁸ Ad gucw  z cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx t  man por gra ree xbejnman. ¹⁹ Gol gurejdx gunab t  man por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidn  perdon. ²⁰ Dios bacaabee naj par ganen xtiidxza'caman, abi' por zian yu'n ladxguiib. Per gol gurejdx gunab Dios chit   gadxeban g n xtiidxaman zi'c rayal g nan.

Diidx bigra ca ree loj gui'ch guie

²¹ T quico, tijb du lasa' ree b n ray n da't ree, abi' diidxli cay jnman dunuj ree yudar cayguieent ree sirv Jesucrist, laaman gugojn l jt gra xhienaag za'n xhie t   cay nan, ²² din par zianczy caxhalan laaman din gugojnman l jt xhienaag nadxu'n niz guie yagu' t  man luxdoodi. ²³ Rniaaban loj Dios guial gra ree b n rliladx Jesucrist, cwe'cdxeman luxdoo reeman gui n t   lasa' reeman, chililadx t   reeman laaman n  Dad Jesucrist, ²⁴ g  nle' t  man gra ree b n wali r n Dad Jesucrist.

Gui'ch par ree bén Filipos

Rugajpdioz Pab bén riladx ree Jesucrist

1 Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bén riladx Jesucrist luguiedx Filipos, në par ree bén rniabee lojdi rulüü tëë reeman xtiidx Dios në ree bén rüjn yudar bén riladx ree Jesucrist. ² Dux Dad ree Dios në Dad Jesucrist güünle' lëjt, yabe'cdxe tëë reeman lëjt.

Rbejdx rniab Pab Dios por ree bén riladx Jesucrist

³ Zianczi chi rasaaladxan lëjt, rudën quixtëë loj da Dadan Dios. ⁴ Abi' zianczi chi rbedx rniaaban laaman dád nix ru luxdon, rbedx rniaaban laaman por gradi. ⁵ Din diizd dxej ni guzuloj riladxidi Jesucrist dxej guzuloj raguieen ree tijbzi xgab par guire'ch xtiidxaman xt yan. ⁶ Ragbeechaawan guial diizd chi guzuloj riladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb. ⁷ Najczi guial gūnan xgab zian por gradi, din rusaaladxan lëjt, zi'c chi yu'n ladxguiib ziangajc chi culün conin naj diidxli xcwent Dios din tibloj cayünle'man dunuj ree. ⁸ Dios ragbee guial dád rusaaladxan lëjt guial rēnan lëjt zi'c-gajczi rēn Jesucrist lëjt. ⁹ Rniaab tēen lojman din mazri guiēn lasa'di, abi' guixie guixie gusnuu guixhialaman xquiarguejndi din gagbeedi ni rayal güündi, ¹⁰ din chile' cwedi ni naj mazri zagdxë. Abi' zian guibandi naya sin dol niz loj Dios, chitëë xhie naman contr lëjt dxej ni gui't Dad Jesucrist stijb. ¹¹ Abi' por laaman zajc guibandi zi'c rēn Dios zi'c balüü Jesucrist lëjt din gap ree bejn Dios mazri respekt guilies tëë reeman xvaloraman.

Yabajn ree par Cristo

¹² Compniar raliduladx ree Jesucrist, rēnan gagbeedi guial graczi ni guza'can cayün reen yudar persi care'ch xtiidxza'c Jesucrist. ¹³ Abi' yan, gra ree bén yu' lēn palas në gra ree bén zobj niz guie ragbee reeman guial yu'n ladxguiib por guial najn xbejn Jesucrist. ¹⁴ Abi' chi baguiaa ree compniar raliladxnë' ree Jesucrist guial yu'n ladxguiib, mazri guzudxi'ch reeman abi' zien da't reeman guyu luxdoo guitie'ch reeman xtiidx Jesucrist sin guialrdxëb.

¹⁵ Per diidxliczi yu' reeman rtie'ch xtiidx Jesucrist guial rdëdloj reeman naj abi' rēn reeman gac reeman mazri bén zobjloj. Per yu' reeman rtie'ch xtiidxaman guial naj xixgab reeman zagdxë. ¹⁶ Yu'za reeman guial rēn reeman Jesucrist, catie'ch reeman xtiidxaman abi' ragbee reeman guial yu'n ladxguiib guial za'dxi'chnë'n

xtiidxaman guial najcan diidxli. ¹⁷ Per yu' reeman ad walit reeman naj xixgab reeman zagdxë catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lēn ladxguiib guie. ¹⁸ Per achet güünan majsi zagdxë naj xixgab reeman o ad zagdxet ya, contzi ma catie'ch reeman xtiidx Jesucrist, laan naj ni rabaanë'n abi' mazri yabaan. ¹⁹ Din ragbeen guial yariin loj ni cadëëdan guial cabejdx canabidi Dios por naj në guial cayagnë xSprijt Jesucrist naj. ²⁰ Naj ragbee guial ad yu't dxej guslaa Dios naj yaya'nxtun, sin guialrdxëb gulün bejn ree xhienaag ra'pan respekt Jesucrist majsi naban o majsi guiētan. ²¹ Din par naj la'tgaj naban cayünan laaman sirv, abi' bal guiētan mazri zagdxen din ma gazun con laaman. ²² Per bal gabajnran loj guidxliuj guie, gusnuu gūnan sirv loj Cristo zi'c rayal, per ad ragbeetan conin naj zagdxë par naj. ²³ Din loj grop ree ni guin dád nawëëgan par gaben conin gūnan, tijb rēnan yaca' Dios naj din gazun con Cristo, laan naj mazri zagdxë par naj, ²⁴ per por lëjt rüjn nagueijn gabajnran. ²⁵ Abi' naj ragbeen guial gabajnran din gūnan lëjt yudar gusnuu chinalidi xnejz Dios, din chu' luxdoodi gusnuu chililadxidi Jesucrist. ²⁶ Abi' chi guidganan lëjt stijb, chu' ni yabaanëdi gudëë tëëdi quixtëë loj Jesucrist por ni beenman por naj.

²⁷ Per ganin lëjt, gol been nagueijn gol gubajn zi'c rayal, zi'c rēb loj xtiidx Jesucrist. Din bal guidganan lëjt o bal id zialan, per rēnan guiguiejn guial za'dxi'chidi nadxag tëë lasa'di abi' tiblojz cayünjndi nagueijn catie'chidi xtiidx Jesucrist. ²⁸ Ad guidxëbidi bén rdxe'ch lëjt. Zian guiguien guial ma canijt reeman loj Dios, per lëjt zian guiguien guial ma rajpidi perdon zëëd loj Dios. ²⁹ Din ad cwabeetidi par chililadxzidi Jesucrist, cwabeedi në par sagdiajdi por laaman. ³⁰ Lëjt con naj tiblojz caydüüd ree tarbajw par yatie'ch ree xtiidx Jesucrist, ma baguiaadi xhienaag rdëëdan tarbajw por xtiidxaman abi' yan cagueiejndi guial cusnuu cayünan mazran.

Nadxag yadxu' ree por Jesucrist

2 Yan, zi'c ma yu' luxdoodi zagdxë por Cristo, zi'c ma yu' luxdoodi nix guial rusnuu rēn lasa'di, në zi'c ma nabannëdi xSprijt Dios në zi'c yu' luxdoodi nix con lasa'di, në zi'c raya lasa'di. ² Gol basnuu gol gubajn zian din yagu'di luxdoo nix. Gol gubajn, gol guyēn tëë lasa'di tibloj, gol gojc tijbzi, gol been tëë tijbzi xgab. ³ Ad sëëbladxidi güündi gan loj ree lasa'di o guilies xvalor lëjt gajc, mazri zagdxë gol been naya,

gol been tēē xgab guial stijb lasa'di mazri lasajc guial lojdi. ⁴ Ad bal chu'di xgab por lējtzi, gol guyu xgab por stijb lasa'di.

⁵ Gol been xgab zi'c been Jesucrist xgab. ⁶ Din majsi laaman naj Dios, per ad guzudxi'chtaman guial niējbaman laaman naj Dios. ⁷ Basa'n xguialrniabeeman persi bi'taman loj guidxliuj guie zi'c tijb mojs abi' gojlaman zi'c tijb bēnguidxliuj. ⁸ Abi' chi gocaman zi'c tijb bēnguidxliuj beenman naya abi' bazoob xtiidx xDadaman, xt gūjtaman loj crūjz, majsi ni natu naj guial rējt loj crūjz. ⁹ Zeel dād guialrniabee naroob badēē Dios lojman, badēē tēēman lojman laj bejn ni mazri lasajc loj gra laj bejn. ¹⁰ Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, nē gra ree ni yu' loj guidxliuj, nētēē ree ni yu' lēn liuj. ¹¹ Abi' gra bejn guiēb guial Jesucrist naj Dad, zian guilies reeman xvalor dux Dad ree Dios.

Xbejn ree Jesucrist naj zi'c tijb guij ni rulaa bacha'

¹² Zeel compniar raliduladx ree Jesucrist, zi'c rēnan lējt abi' rniin lējt guial zi'c bazoobidi da diidxan chi guzun con lējt, ziangajc gol bazoob da diidxan mazri yan guial za'n zijt. Con guialrdxeb nē con respekt gol been zi'c rayal gūūn ree bēn ma naj perdon. ¹³ Din por Dios zēēd xgabza'c ni rūjndi, abi' laaman ragnē lējt din gūūndi zi'c rēnman.

¹⁴ Gol been gra ni rayal gūūndi, achet guial ad zayuladxtidi achet tēēt guial tildiidxidi, ¹⁵ chitēē xhie guinee bejn lējt o chitēē xhie xfaltidi yadxelj reeman. Lējt najdi xi'n Dios gol gubajn naya niz loj ree bēn ad zinalt xnejz Dios, bēn rūjn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, ¹⁶ guial za'dxi'chnēdi xtiidx Dios ni zidnē guialnaban. Abi' zian yabaan por lējt dxej ni gui't Jesucrist stijb guial gagbeen ad bentan dxiin xlia' ad bizaa tēētan xlia'. ¹⁷ Din guial rliladxidi Dios laan naj zi'c tijb gon par laaman, abi' nix yu' luxdon majsi guiētan din yayaaloj gon guin guial rabaanē'n gradi. ¹⁸ Yan ziangajc gol babaa, gol babaa zi'c rabaan.

Timoteo nē Epafrodito

¹⁹ Dad Jesucrist gagnē naj din diob gaxhalan Timoteo lod zojbidi din xhienladxan chi gagbeen xhienaag riga'di. ²⁰ Din tijbzi Timoteo yu' lējt xgab zi'c yu'n lējt xgab. Achut bēn ru lējt xgab zi'c laaman. ²¹ Graczi reeman ru xgab per por laagajc reeman, ad rut reeman xgab por ni rēn Jesucrist gūūn reeman. ²² Per ma ragbeedi xhienaag naj Timoteo, ma ragbeedi xhienaag cayūnman naj yudar persi catiechan xtiidx Jesucrist. Cayūnman naj yudar zi'c rūjn bejn xDadaman yudar. ²³ Zeel rēnan gaxhalan laaman din guitixlojman lējt, gagbeezan xhienaag gariican loj cwent guie ²⁴ Dad Jesucrist gagnē naj din diob guidgana quijb naj lējt.

²⁵ Abi' rulūū rūjn naguiejn gaxhalan da miwan Epafrodito ladxidi. Lējt guxhaal laaman din gūūnman naj yudar loj ree ni ryaadxan. Abi' zian cayūnman naj yudar, tiblojzi cayzaagdiajn. ²⁶ Dād rēnman guidganaj-

man lējt abi' dād yu'man xgab guial gogbeedi gogxuman. ²⁷ Abi' walican gogxuuman zamer niējtaman. Per baya Dios laaman, abi' ad laatzaman, nēgajc naj bayaman, chitēē chu'naya luxdon mazri zi'c ma guyu nayan. ²⁸ Zeel diob gaxhal gajcan laaman din yabaadi chi guguaadi laaman stijb chitēē chu'naya tēēn mazri. ²⁹ Gol babaa, gol baca'man guial najman tijb du lasa' ree bēn rliladx Jesucrist. Zian gol guyēn gra ree bēn naj zi'c laaman. ³⁰ Din zamer niējtaman guial rūjnman sirv loj Jesucrist, guzujman loj guialgūjt guial beenman naj yudar loj ni ad bile't nūjn quijb lējt naj yudar.

Ni mazri lasajc

3 Yan, compniar raliduladx ree Jesucrist, gol badxe' luxdoodi zagdx por Dad Jesucrist. Par naj achetan guial ganin lējt diidx ni ma rni gajcan tijb, din par lējt lasajc ree diidx guin chitēē chu' ni gusquiee lējt. ² Gol gojp cudad con ree bentont, bēn ad nadēdguient, benmal, bēn rūjn ree naguiejn din chu' ree bejn xsen bēn Israel. ³ Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman bēn nabajnnē' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. ⁴ Majsi zajc gales da valoran guial zinaalan gra ree costumbr, per bal yu' bēn rlies xvalor gajc, nēgajc naj zajc gūn zian. ⁵ Din chi goc toxman goolan, badxe' reeman naj sen ni ru ree bēn Israel. Abi' bēn Israel naj, loj xdiaa Benjamīn zialan, rnien diidx Hebreo din xi'n ree bēn rniee diidx Hebreo naj. Benan gra ni rniabee ley din bēnfarišew gojcan. ⁶ Benan zi'cgajczi rūjn ree bēnfarišew, zeel xt guzunaalan bēn rliladx ree Jesucrist din gūnan laa reeman ni mal, benan gra zi'c tal rniabee ley abi' achut zajc niējb guial ad cayūntan zi'c rayal. ⁷ Gra ni benan nadxel, par naj dād lasajcan nadxel, per yan achet lasajcan par naj, din yan Cristo mazri lasajc. ⁸ Abi' achet ni mazri lasajc guial loj ni nūnbeen Dad Jesucrist, por laaman gra ni benan nadxel ma basa'nan tiblad, naj reen zi'c tijb guix par naj din nabee Cristo naj guidiblagaa, ⁹ abi' gacan tijbzi con laaman. Ad naladxtan por guial rūnan zi'c rniabee ley achet dol ra'pan niz loj Dios, naladxan por guial rliladxan Jesucrist, din por guialrliladx guin ma naya bejn loj Dios. ¹⁰ Zeel rēnan gūnbeecheaawan Cristo, gūnbee tēēn guialrniabee ni basban laaman, rēn tēēn gadaanan xhietēēz loj guialrzagdiaj ni gadēēdan zi'c gudaanman, ma guidxin dxej gacan zi'c rayal gacan por xguialgūjtaman. ¹¹ Din yu'guican guial yabanan zi'c baban Jesucrist.

Ni gunee Dios xanyabaa

¹² Ad canitan lojdi guial ma bayaaloj benan gra o guial najn benza'c, per cayūnan naguiejn din gacan zi'c rēn Cristo gacan diidz chi guzuloj rniabeeman naj. ¹³ Compniar raliduladx ree Jesucrist, naj rni lējt guial ad wayaalojt gūnan zi'c rayal, per cayūnan naguiejn din yayanladxan gra ni benan gocli din gac gusnuun par delant, ¹⁴ din yayaaloj gūnan zi'c rayal din chile' gaca'n

ni gunee Dios xanyabaa zi'c gurejdxaman dunuj ree por Jesucrist.

¹⁵ Abi' dunuj ree guial ma rayagbee ree zagdxe ni rën guieb xtiidx Dios, rayal yagueen ree xgab zian. Per bal garen naj xixgabidi guial loj ni canin lojdi, Dios gulüü lëjt conin naj diidxli. ¹⁶ Per rüjn nagueijn yabajn ree zi'c ma rayignia' ree.

¹⁷ Compniar raliduladx ree Jesucrist, gol gubajn zi'c naban, gol baguiaa tée xhienaag naban ree bén naban zi'c naban. ¹⁸ Din zien volt ma rnin lojdi abi' yan caydxi'nan zatijb, xt ronan canin lëjt guial zien ree bejn naban zi'c ree bén ad rliladxt guial güjt Cristo loj crüzjz por dux xtol ree. ¹⁹ Abi' ree bén guin castizi naj ni rbëz laa reeman din mazri ruladx reeman güün reeman ni dxuudx. Abi' luar yatu reeman por ni rüjn reeman aal mazri rlies xvalor reeman guial mazri rüjn reeman xgab por ree ni yu' loj guidxliuj guie. ²⁰ Per dunuj ree ma nayab ree xanyabaa abi' caylëjz ree guial diizd xanyabaa gui't Dad Jesucrist bén gudix por dux tol ree. ²¹ Laaman naj bén guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' güünman zian con guialrniabee ni rajpaman par nabeeman gra.

Gol badxe' luxdoodi zagdxe por Dad Jesucrist

4 Zeel compniar raliduladx ree Jesucrist, rënan lëjt rën tëen guidganan lëjt, lëjt rgu' luxdon zagdxe, abi' najdi zi'c tijb prem par naj, gol guzujdxi'ch loj ni rliladxidi Dad Jesucrist.

² Yan, rniaaban loj Evodia në loj Síntique din guidxag cwe reeman guial naj reeman compniar loj ni rliladx reeman Dad Jesucrist. ³ Abi' ziangajc lüj compniar ni cayguieen dxiin tijbzi, rniaaban lojl din güünl yudar bégunaa guin ree din laa reeman been naj yudar bire'ch xtiidx Jesucrist në Clemente con ree ben ren, gra reeman ma yu' laj loj libr ni yu' laj ree bén guiban tiblayaa con Dios.

⁴ Zianczi gol badxe' luxdoodi zagdxe por Dad Jesucrist. Naj rni lëjt ¡Gol badxe' luxdoodi zagdxe! ⁵ Gol been nagueijn güünbee gra bejn lëjt guial najdi benza'c. Gol badxe'guijc guial zamer gui't Dad Jesucrist zatijb.

⁶ Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol badëe tée quixtëe lojman. ⁷ Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagnë lëjt din yayaalyuj luxdoodi yayaalyuj tée xquiarguejndi guial ma najdi tijbzi con Jesucrist.

Gol badxe'guijc ganax ni zagdxe

⁸ Naga gad lox günan gui'ch guie, compniar raliduladx ree Jesucrist, rnin lëjt gol badxe'guijc ganax ni diidxli, ni rayal respekt në ni naj xnejz. Gol badxe'guijc ganax ni rüjn sirv, ni naj zagdxe në ni rayal güün bén zë xnejz. Gol badxe'guijc gra ni naj zagdxe në ni guilies bejn xvalor.

⁹ Gol been zi'c basidan lëjt, zi'c ma balün lëjt, gol been zi'c rnin lëjt zi'c ma baguiaadi benan, zian gagnë Dios lëjt bén rabe'cdxe luxdoo ree bejn.

Ni badëed ree bén filipos loj Pab

¹⁰ Dád rabaan por Dad Jesucrist guial ma basaaladxi-di naj. Ad canitan bayanladxidi naj, canin zian guial ad gojctri nüjndi naj yudar. ¹¹ Ad canitan zian guial cayaadxan xhienin din ma basidan gadëedan con ni ra'ptzan. ¹² Ragbeen xhienaagan chi naban bejn loj guialprob ragbee tëen xhienaagan chi achet ryaadx bejn, din ma basidan rdaanan ni zëedtzi, bal rawan o bal id rawan, bal rüjnan naj sobr o bal ryaadxan. ¹³ Rajc rdaanan ni zëedtzi con xyudar Jesucrist. ¹⁴ Per zagdxe naj ni beendi guial beendi naj yudar loj ni cazaagdiajn.

¹⁵ Ragbee tëedi guial chi briin niz Macedonia din suloj gatie'chan xtiidxza'c Jesucrist, lëjtzi bazaladx xhienin lon guial loj gra ree guiedx lod ma rliladx reeman xtiidx Jesucrist, zi'c benan lëjt yudar ziangajc beendi naj yudar. ¹⁶ Ziangajc chi guzun luguiedx Tesalónica chi biaadxan xhienin, bëlczi volt beendi naj yudar. ¹⁷ Ad cayguiltan mod din güündi naj yudar mazri, ni rënan naj guial mazri yaya'ndi zagdxe loj Dios. ¹⁸ Ma baca'n gra ni guxhaalidi con Epafrodito, yan xt sobr rüjnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. ¹⁹ Zeel Dios gunee lëjt gra ni ryaadxidi por ree ni za'c ni rajpaman xanyabaa con Dad Jesucrist. ²⁰ ¡Abi' por guialrniabee ni rajp dux Dad ree Dios, rayalczi yaya'p reeman respekt goctëez! Amén.

Rugajpdioz ree bén rliladx Jesucrist bén Tesalónica ree

²¹ Gol bagajpdioz gra ree bén ma naj xbejn Jesucrist, guiaad gra ree bén rliladx Jesucrist bén za'në' reen guie, rugajpdioz reeman lëjt. ²² Gra ree bén zobj ree guie, bén ma naj ree xbejn Jesucrist, në gra ree bén rüjn sirv loj rey, në reeman rugajpdioz lëjt.

²³ Dux Dad ree Jesucrist güünle' gradi. Amén.

Gui'ch par ree bén Colosas

Rxhiaal Pab xtiidx Dios

1 Naj Pab, najn tijb xi apóstol Jesucrist, din zian rën Dios. Naj con Timoteo nayaican compniar raliduladxaan Jesucrist, ² caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tēēman luxdoodi.

Rbejdx Pab Dios por ree xbejn Jesucrist

³ Beegaj chi rarejdxan Dios, xDad Dad Jesucrist, radēēdan quixtēē lojman por lëjt. ⁴ Din ma baguiejnan xhienaag riladxiidi Jesucrist xhie tēē naag rëndi gra ree bén naj ree xbejnman. ⁵ Guial cabēzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. ⁶ Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'c-gajc guzaquidi chi biguiejndi guial naza'c Dios abi' diidxli rënman lëjt. ⁷ Lëjt gogbee diidxli guin ree chi balüü Epafras laa reen lëjt. Laaman cayün dunujn yudar abi' dád rayēnan laaman, din laaman diidxli cayün sirv loj Jesucrist delant lojdi. ⁸ Abi' tēē laaman be diidx du lojn xhienaag rën lasa'di guial yu' xSprijt Dios luxdoodi. ⁹ Zeel diizd chi baguiejnan xhienaag nabandi, ad racwēēt rarejdxan Dios por lëjt din chignia'di zagdx xhienaag rënman güündi gunee tēēman lëjt gra loj guialrajc guixhial tēēman xquiarguiejndi por xSprijtaman. ¹⁰ Abi' zian guibandi zi'c rayal guiban ree bén riladxa Jesucrist, din güündi zi'c tal ruladxaman abi' gusnuu güündi ganax ree ni zagdx gusnuu tēē güünbeedi Dios mazri. ¹¹ Abi' ranaaban lojman din con xguialrniabee za'cdxoonman gagnēman lëjt din sudxi'chidi, taan tēēdi xhietēēz loj guialzi tēdidi sin guial yalenyadi. ¹² Abi' xt nix chu' luxdoodi gudēēdi quixtēē loj dux Dad ree Dios guial basiaman lëjt din yayalidi ni rayal ree xbejnman, bén zinal ree xnejzaman. ¹³ Laaman babēē dunuj ree loj xguialrniabee xindxab abi' bagu'man dunuj ree loj xguialrniabee xi'nman Jesucrist bén rënman, ¹⁴ abi' gudijxaman por dux tol ree, yan ma raya'p ree perdon loj Dios.

Por xguialgüjt Jesucrist ma nadxu'nē' ree Dios zagdx

¹⁵ Achut zajc guguaia Dios, per Jesucrist naj zi'c gajczi naj Dios. Abi' laaman mal rniabeenēman Dios diizd chi gad guidxliuj gacchaaw. ¹⁶ Por Jesucrist gojc gra ni yu' xanyabaa nē loj guidxliuj, zi'c ni ruguaia bejn zi'c ni ad ruguaataman. Abi' por laaman yu' graloj guialrniabee

nē graloj guialguxtis ni rajp ree ni ad rajct ruguaia ree bejn. Gran gojc por laaman nē par laaman. ¹⁷ Mal yu' Jesucrist diizd guialxchej chi gad guidxliuj gacchaaw, laaman dxiibguijc gra abi' rniabeeman gra. ¹⁸ Abi' laa tēēman rniabee gra ree bén riladxa laaman, bén ma naj ree xbejnman. Laaman naj bén yaloj abi' yaloj laaman baban loj ree bengüt din guiguien guial tijbzi laaman rajp guialrniabee loj gra. ¹⁹ Din bayuladx Dios gac Jesucrist zi'c gajczi naj Dios. ²⁰ Abi' por Jesucrist gra bēnguidxliuj ma za' zagdx con Dios, zi'c ni yu' loj guidxliuj zi'c ni yu' xanyabaa. Za' bejn zagdx con Dios por xguialgüjt Jesucrist loj crüz. ²¹ Gocli ad gojctidi tijbzi con Dios, gojquidi zi'c bén bidxe'ch laaman guial beendi ganax ni mal. ²² Per yan ma za'di zagdx con Dios por ree guialzi ni gudēd Jesucrist chi gütaman loj crüz din gac guidxindi lojman naya sin dol chitēē xhie naman lojdi. ²³ Per par zian rayal sudxi'chidi loj guialriladxa ni rajpidi, ad gucwēēz chinalidi xtiidxza'c Jesucrist ni ma biguiejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bén catie'ch diidxza'c guin ree.

Bacaabee Dios Pab din güünman sirv loj ree xbejn Dios

²⁴ Abi' yan nix yu' luxdon por guialzi ni cadēēdan guial rünan lëjt yudar abi' lasa'gajc guialzi ni gudēd Jesucrist cadēēdan din chile' günan yudar bén riladxa ree laaman bén ma naj ree xbejnman. ²⁵ Din Dios bacaabee naj par günan sirv loj ree xbejnman. Abi' laaman banee dxiin guin naj din gulün lëjt xtiidxaman zi'c tal najn. ²⁶ Diizd tiamp gulal ad bignia't ree bejn zagdx ni rën guiēb xtiidx Dios. Per yan ma balüüman ni rën guiēban loj ree xbejnman. ²⁷ Din gugojn reeman bén ad najt ree bén Israel xhienaag naj xguialnaza'c za'cdxoonman. Abi' ni ad balüüt Dios loj ree bejn tiamp gulal naj guial nabannē Jesucrist lëjt abi' por laaman ragbeedi zagdx guial yu' dxej yayalidi xanyabaa. ²⁸ Abi' dunujn batie'ch xtiidx Jesucrist, baneenē'n bejn ree, balüü tēēn laa reeman con gra quiarguiejn ni runee Dios din chi guidxin reeman lojman por Jesucrist ma naj reeman zi'c rënman gac reeman. ²⁹ Abi' naj dád cayünan nagueijn cayünan dxiin guie con guialrniabee ni baneeman naj.

2 Rēnan gagbeedi guial cayün da'tan nagueijn cayünan lëjt yudar, nē ree bén zojb guiedx Laodicea nē gra ree bén ad wayünbeet naj. ² Cayünan nagueijn din yayu luxdoo reeman din gusnuu guiban reeman tijbzi, guiēn lasa' reeman chu' tēē xquiar-

guiejn reeman din chile' gūünbee reeman ni ad balüüt Dios bejn ree gulal abi' laaman naj Jesucrist, ³ por laaman zëed gra guialrajc në guialrignia'. ⁴ Canin diidx guie ree lojdi chitëe chu gusquiee lëjt con ree xtiidx za-gdxe reeman. ⁵ Majsi ad za'tan con lëjt, per yu'guican lëjt abi' rabaan guial cayüjndi zi'c rayal, za'dxi'ch tēedi loj guialrliladxidi Jesucrist.

⁶ Zeel zi'c ma rliladxidi Dad Jesucrist, ziangajc gol gojc tijbzi con laaman. ⁷ Gol been naguiejn gol binalaman guidiblagaa, gol guzudxi'ch loj guial rliladxidi laaman zi'c ma basiididi ad gucwëez tēe gudëedi quixtëe loj Dios.

Guialnaban ni rudëed Jesucrist

⁸ Gol gojp cudad, ad tiëbidi gūün ree bén rën gusquiee lëjt gan con ree ni rulüü reeman o con ree diidx ni ad rüjnt sirv ni zëed por ree costumbr o por ree guialrniabee yu' loj guidxliuj, din ad zëedt reen por Jesucrist.

⁹ Din zi'cgajczi naj Dios, ziangajczi naj Jesucrist. ¹⁰ Abi' nabannëdi Dios guidiblagaa guial najdi tijbzi con Jesucrist, din laaman rniabee loj gra guialrniabee në loj guialguxtis. ¹¹ Abi' tēe guial ma najdi tijbzi con Jesucrist ma yu'di xsenman, per ad lasa't sen ru ree bén Israel, sen yu'di por laaman najn guial ma basa'ndi dol tibladi. ¹² Chi gurobnijsidi, laan rën guiëb guial güjtidi con Jesucrist abi' babandi con laaman stijb guial rliladxidi Dios rajp guialrniabee persi basbanman Jesucrist loj guialgüjt. ¹³ Gocli gojquidi zi'c bengüt delant loj Dios por xtolidi në por guial ad guyutidi sen ni ru ree bén Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. ¹⁴ Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi güt Jesucrist loj crüjz abi' laaman naj Bén gudijx laan por dunuj ree. ¹⁵ Abi' zian beenman gan gra loj ree guialguxtis në loj gra guialrniabee zëed loj xindxab. Basa'nxtuman laa reeman loj ree bejn, beenman laa reeman gan guial güjtaman loj crüjz.

Gol been xgab ni yu' ree xanyabaa

¹⁶ Zeel achut rayal gula'ch lëjt por ni rawidi në ni rë'di o por guial ad rüjntidi cwent dxej lanij o dxej ni yu' bëew cüb o dxej raziiladx ree bejn. ¹⁷ Din gra ree ni guin naj zi'c tijb xbaala Jesucrist abi' yan laaman naj Bén ma bi't. ¹⁸ Ad tiëbidi gutiaalguiiw Bén rën ree anjl zi'c Dios lëjt, par gusa'ndi xnejz Dios, din laa reeman rulüü naj reeman Bén naxanladx, per ad najt reeman laan rëb tēe reeman guial yu' ni rulüüloj loj reeman. Dxel laagajc reeman rlies xvalor por xixgab gajc reeman. ¹⁹ Per laa reeman ad nabannët reeman Jesucrist, Bén rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

²⁰ Yan bal walidi ma güjtidi con Jesucrist par ree ni rbëëguijc ree bénguidxliuj, çchexquiza zeel ruzoobidi

xtiidx ree Bén rëb: ²¹ "Ad rayalt gugaalil ni guin, ad gawil ni guin, ad guiniaazil ni guin?" ²² Gra ree mandamient guin yu' dxej nit reen, din bénguidxliuj gulëëguijc laa reen. ²³ Diidxliczi rulüü lasajc da't ree mandamient guin guial tant rüjn ree bejn naguiejn gūün reeman laa reen cumplid abi' rüjn reeman Bén naxanladx dxel rusagzi laagajc reeman, per achetctzi lasajc ree mandamient guin par gucwëez reen ni mal rzëëbladx reeman gūün reeman.

3 Zeel bal ma rajpidi guialnaban cüb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. ² Ad güündi xgab ganax ree ni yu' loj guidxliuj, gol been xgab mazri ni yu' ree xanyabaa. ³ Gol gunaladx ma güjtidi par ree ni yu' loj guidxliuj abi' ma rajpidi guialnaban delant loj Dios por Jesucrist. ⁴ Abi' chi gui't Jesucrist stijb, Bén runee dunuj ree guialnaban, në lëjt yayal guibannë laaman loj xguialrniabee za'cdxoonman.

Zi'c rayal guiban ree Bén rliladx Jesucrist

⁵ Yan, gol basa'n gra ree ni mal riga' loj guidxliuj guie. Ad sunëdi Bén ren Bén ad najt lacheelidi. Gol basa'n ni ad rüjnt ree sirv, në ree xgabmal në ree ni mal yu'di gan güündi. Ad sëëbladx tēedi gapidi gra loj ni yu' loj guidxliuj din Bén rüjn zian laan rënman mazri luar Dios. ⁶ Abi' por ree ni guin zëed xcasti Dios par ree Bén ad ruzoobt xtiidxaman. ⁷ Lasa' ree ni mal guin beendi chi gadidi gūünbee Jesucrist. ⁸ Per yan gol basa'n gra ree ni mal guin zi'c guialrdxe'ch, guialralen lasa', guialrüjn ni mal lasa', guialrnieeguijdx në guial rniee diidxguijdx. ⁹ Ad rusquiee loj lasa'di, din ad nabantridi zi'c gubandi gocli chi beendi ni mal ree, ¹⁰ din yan ma bidxaa mod nabandi. Ma najdi zi'c bencüb guial chigagaj ma cayajquidi zi'c rën Dios gaquidi din gūünbeedi Dios mazri zagdxe, Bén runee lëjt guialnaban. ¹¹ Abi' chi ma rliladx bejn Jesucrist, achet gūünan chutëez najman, bal najman Bén grieg o Bén Israel, bal yu'man sen ru ree Bén Israel o ad yu'taman laan ya, bal najman benzit o najman Bén zojb dajn, bal najman zi'c Bén nado' o ad najtaman zi'c Bén nado' Per ni mazri lasajc naj guialrliladxaman Jesucrist, Bén rniabee za' tēëman con dugra ree.

¹² Abi' Dios rën lëjt, zeel gulejman lëjt din gaquidi xbejnman. Zeel gol baya bejn ree, gol gojc benza'c, gol gojc Bén naxanladx, ad gaquidi bendxal, gol gojp pasens lasa'di. ¹³ Ad yaleny'a'në lasa'di. Gol been tēe perdon lasa'di bal xhie rüjnnë reeman lëjt. Zi'c been Dad Jesucrist lëjt perdon ziangajc gol been perdon bejn ree. ¹⁴ Gol badxe'guijx guialrën lasa' naj ni mazri lasajc. Abi' guialrën lasa' guin rüjn yudar din guidxaa guiban bejn. ¹⁵ Gol cwëjb nabee Jesucrist lëjt din yabedxe luxdoodi, din par zian gulej Dios lëjt par gaquidi tijbzi por Jesucrist gol badëe tēe quixtëe lojman por zian.

¹⁶ Gol badxe'guijx da't xtiidx Jesucrist, gol balüü gol guneenë tēe lasa'di zi'c rayal. Gol badëe quixtëe loj Dios con ree cant në ree salmos në los demazri ree cant ni naj par Dios. ¹⁷ Xhietëez ni güündi ni guinee

tëedi, yaloj xgaj gol basaaladx Dad Jesús abi' por laaman gol badëed quixtëe loj dux Dad ree Dios.

Zi'c rayal guiban tijb famil

¹⁸ Lëjt béngunaa yu' ree lacheel, gol bazoob xtiidx lacheelidi, din zian rayal güün bén rliidx Jesucrist.

¹⁹ Abi' ziangajc lëjt xinguaaw yu' ree lacheel, gol guyën lacheelidi ad gusagzi tëedi laa reeman.

²⁰ Në lëjt xin naj ree xi'n, gol bazoob gra xtiidx ree xDadidi, din zian ruladx Dios. ²¹ Abi' ziangajc lëjt dad na, ad gusagdiaj xi'ndi chitëe guidxe'ch reex abi' yalenyä' reex.

²² Lëjt bén rüjn ree xchiin bejn, gol bazoob gra xtiidx xpatroni loj guidxliuj guie. Ad chi ruguiaatzi reeman lëjt par yaya'ndi zagdx loj reeman, guidib luxdoodi gol been xchiin reeman por respekt ni rajpadi Dad Jesucrist. ²³ Xhietëez nin güündi, gol beenan con gan. Gol gunaladx loj Jesucrist cayüjndi sirv, ad lojt bénguidxliuj. ²⁴ Din lëjt ma ragbee guial zian yu' ni tia'di loj Dad Jesucrist guial cayüjndi laaman sirv. ²⁵ Per par ree bén rüjn ni mal, laa reeman yayal casti por ni mal been reeman, din Dios ad rbetaman loj bejn.

4 Nægajc lëjt bén naj ree patron, gol been zi'c rayal con ree bén rüjn xchiindi, gol gojc tëe benza'c con laa reeman, din lëjt ragbee guial xanyabaa yu' bén rniabee lëjt.

² Gol guzusin, gol gurejdx Dios ad bal gucheeladxidi, gol badëe quixtëe lojman. ³ Gol gurejdx tëe Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguiib. ⁴ Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdx.

⁵ Gol gubajn zagdx delant loj ree bén ad waliladxt Jesucrist gol gunee tëe xtiidxaman loj reeman beegaj chi chu' mod. ⁶ Chi rüdi diidx, gol be diidx xnejz din yayuladx bejn ni rnieedi gagbee tëedi xhienaag yadxi'di ni rniabdiidx reeman lojdi.

Rxhial ree xbejn Jesucrist xtiidx Dios

⁷ Tíquico, tijb du lasa' ree, bén rayën ree, bén diidxli cayüjn naj yudar cayünan sirv loj Jesucrist, laaman gugojn lëjt gra xhienaag za'n niz guie. ⁸ Par zian caxhalan laaman din gugojnman lëjt xhienaag nadxu'n niz guie din yagu' tëëman luxdoodi. ⁹ Abi' con laagajcaman caxhalan Onésimo, tijb du lasa' ree bén rayën gajc ree, bén naban zi'c rayal, bén naj bén ladxidi. Laa reeman gugojn lëjt gra ni cayajc niz guie.

¹⁰ Aristarco, bén yu'në'n ladxguiib, laaman rxhial xtiidx Dios lojdi. Nægajc Marcw, bijchwin Bernabé rugajpdioz lëjt. Abi' ma bagojnman lëjt chunin naj Marcw, bal gui'taman guidganajman lëjt, gol baca'man zagdx. ¹¹ Abi' nægajc Jesús, bén la gajc Justo, rxhial xtiidx Dios lojdi. Loj gra ree bén Israel rliidx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bén cagu' luxdon. ¹² Në Epafra, bén ladxidi, rxhial xtiidx Dios lojdi. Laaman cayüjn sirv loj Jesucrist. Gra dxejcz rbejdxaman Dios por lëjt din sudxi'chidi chinalidi xnejz Dios güün tëedi gra zi'c rënman. ¹³ Naj ragbee zagdx guial dád ruman xgab por lëjt, në por ree bén Laodicea, në por ree bén Hierápolis. ¹⁴ Lujc, doctor rayën da't ree, në Demas, në reeman rxhial xtiidx Dios lojdi.

¹⁵ Gol bagajpdioz ree dux compniar ree bén rliidx ree Jesucrist, bén zojb ree luguiedx Laodicea. Gol bagajpdioz tëe Ninfas con los demazri ree xbejn Jesucrist bén rado'p ree lidxaman. ¹⁶ Chi ma gulox biilidi gui'ch guie, dxel gol guxhaalan loj ree bén rliidx Jesucrist, bén zojb ree luguiedx Laodicea, din në reeman gool laan. Në gui'ch ni guxhalan loj reeman rayal yaxhaal reeman lojdi din nægajc lëjt gool laan. ¹⁷ Abi' gol güjdx loj Arquipo din güünman cumplid ni ma ba-caabee Dad Jesucrist güünman. ¹⁸ Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguiib. Dios güünle' lejt. Amén.

Gui'ch yaloj par ree bén Tesalónica

¹ Naj, Pab con Silvan në Timoteo, cayxhaalan gui'ch guie par lëjt najdi bén riladix Jesucrist luguiedx Tesalónica, dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rudëë Pab quixtëë loj Dios

² Guixie guixie radëën quixtëë loj dux Dad ree Dios por gradi, rasaaladx tëën lëjt chi rarejdx ranaaban laaman. ³ Në zianczi chi rarejdx ranaaban laaman, nadxe'-duguijcan ni ma beendi guial riladixidi laaman, në guial rën lasa'di, nadxe'duguijcan tëën guial cadaandi cabëzidi gui't Dad Jesucrist stijb. ⁴ Compniar raliduladx ree Jesucrist, dunujn rayagbee guial Dios rën lëjt, gulej tëëman lëjt. ⁵ Din chi baneen xtiidxa'caman lojdi, ad diidxtizi balüün lëjt, balüün lëjt con xguialniabee xSprijt Dios abi' rayagbeen guial diidxli naj ni caynan lojdi. Lëjt ragbee xhienaag babajnan chi badxu'në'n lëjt, babajnan zian din yaguieenan lëjt yudar xhienaag guibandi.

⁶ Abi' lëjt nabandi zi'c babajnan lojdi në zi'c balüü Jesucrist, abi' por xSprijt Dios babaadi bililadixidi ni banan lojdi, majsi dád guzagdiajdi. ⁷ Zian najdi tijb ejempl par gra ree bén riladix Jesucrist niz Macedonia në niz Acaya. ⁸ Por lëjt bire'ch xtiidxaman ad tijbtizi luarzii ree, gra ladczi ruza't reeman xhienaag riladixidi Dios, xt ni'qui chetri ryaadx yaguie'chan. ⁹ Din laagajc reeman rü diidx xhienaag baca'di dunujn chi budganajn lëjt, xhie tëë naag basa'ndi ni naladixidi naj ree dios persi binalidi quijb Dios naban abi' guzuloj cayjndi laaman sirv. ¹⁰ Rü tëë reeman diidx xhienaag cabëzidi gui't Jesucrist Xi'n Dios diidz xanyabaa, bén basbanman loj ree bengüt, Jesús bén rabëë dunuj ree loj casti ni zëëd.

Ni been Pab luguiedx Tesalónica

² Lëjt ragbee, compniar raliduladx ree Jesucrist, guial ad budganaj xlia'tzan lëjt, ² majsi lëjt ragbee guial luguiedx Filipos guna ree bejn diidxguijdx du lojn në graloj ree guialzi badëëd reeman dunujn. Per Dios baneen dunujn valor persi badün xtiidxa'caman lojdi, majsi xhietëëz raza'can por ree bén rdxe'ch dunujn. ³ Din ad baneenë'tan lëjt diidx rusquiee, o par yaguieennë'n lëjt zi'ctzi rayënan ya, o par yasquieen lëjt, ⁴ per zi'c bacaabee Dios dunujn din yaneen xtiidxa'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdx loj ree bejn, par yaya'nan zagdx loj Dios, bén ragbee gra ni yu' luxdoo bejn. ⁵ Lëjt ragbee guial ad

yu't dxej baneenë'n lëjt zagdx naabzi par guiëndi dunujn, ache tëët gui'c badxiiban din yaca'n xmiliadi. Dios ragbee guial laan naj diidxli. ⁶ Ad radiiltan guza't ree bejn dunujn zagdx, ad radiil tëëtan guza'tidi dunujn zagdx, o guza't ree ben ren dunujn zagdx, ⁷ majsi guial nayajcan xiapótol Jesucrist, raya'pan derejch yanabeen lëjt güündi xhienin par dunujn, per ad raguieentan zian. Lëjt ragbee guial benza'c bayajcan chi badxu'në'n lëjt, zi'cgajczi tijb na rusni's rnij tëë xi'n. ⁸ Abi' guial tant rayënan lëjt, ad tijbtzi xtiidx Dios baneen lojdi, në dux guialnaban bayënan naneen por lëjt, guial tant rayënan lëjt. ⁹ Abi' lëjt ragbee compniar, guial dád baguieenan dxiin. Dxej guiaal baguieenan dxiin, chitëë yalu'n xchiindi guial güündi dunujn yudar yabajnan la'tgaj balüün lëjt xtiidxa'c Dios.

¹⁰ Lëjt në Dios ragbeechaaw guial chi badxu'në'n lëjt, babajnan xnejz zi'c rayal, abi' achet chile' gudxiibidi du guijcan, lëjt bén riladix ree Jesucrist. ¹¹ Lëjt ragbee xhienaag baneen lëjt consejw, xhie tëë naag balu'n luxdoodi zi'c rüjn tijb dad con ree xi'nman. ¹² Ma banan lojdi din guibandi zi'c rayal guiban bén ma naj ree xbejn Dios, bén rbejdx lëjt din yayalidi xanyabaa lod rniabeeman.

¹³ Zeel në dunujn ad racwëëzt radëën quixtëë loj Dios, guial chi biguiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bén-guidxliuj. Abi' diidx guin ree naj ni rusni xquiarguejndi, lëjt guial riladixidi Jesucrist. ¹⁴ Abi' lëjt compniar raliduladx ree laaman, ma guzajquidi zi'c guzac ree xbejn Dios, bén Israel zojb ree niz Judea, bén riladix ree Jesucrist. Din zi'cgajc basagdiaj ree bén ladxidi lëjt, ziangajc basagdiaj lasa' bén Israel reeman laa reeman. ¹⁵ Abi' tëë ree bén Israel bagüjt reeman Dad Jesús, zi'cgajc bagüjt reeman bén badëëd ree xtiidx Dios loj ree bejn, balaagdxa tëë reeman dunujn, ad rüjnt reeman zi'c rën Dios, abi' contzi gra bejn rdxe'ch reeman. ¹⁶ Rudxoon reeman yalüün bén ad najt ree bén Israel xhienaag gac reeman perdon, zian laagajc reeman cu-tioob gui'c xtol reeman, abi' yan ma cadëd reeman xcastiro' Dios.

Guyën Pab niejman Tesalónica stijb

¹⁷ Compniar raliduladx ree Jesucrist, chi basa'nan lëjt tio'p choondxej, majsi ad raguiaatan lëjt, per rasaaduladxan lëjt, abi' rayën nejzdoon yaguiaan lëjt stijb.

¹⁸ Dád bayënan nudganajn lëjt. Naj Pab, zien volt da't guyënan nidganajn lëjt, per badxoon xindxab niaj

zian. ¹⁹ Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxë. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb. ²⁰ Lëjt naj bën rabaanë'n rlies tëëdi dux valoran.

3 Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. ² Abi' baxhaal dux compniaran Timoteo, bën cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rliladxidi, ³ din ni'qui tijbidi ad zalenya't por ree gualzi ni cadëdidi, lëjt ragbee guial zian yaza'c ree. ⁴ Chi badxu'në'n lëjt, banan guial dád zien loj gualzi yadüüd ree, abi' lëjt ragbee guial laan naj ni ma gojc. ⁵ Zeel ad gudaantran, abi' guxhalaan Timoteo din gagbeen xhienaag zinalidi ni rliladxidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

⁶ Per yan ni ma baguiaad Timoteo ni bidganajman lëjt, ma bagojnman dunujn guial zinalidi zagdxë ni rliladxidi Jesucrist në zi'c rën lasa'di. Laaman na guial zianci yu' luxdoodi zagdxë rasaaladxidi dunujn, abi' dád ma rëndi guguaadi dunujn, zi'cgajc rayënan yaguaan lëjt. ⁷ Zeel, compniar raliduladx ree Jesucrist, majsi graloj tarbajw në gualzi caydüüdan, per dád nix yu' du luxdoon raguiejan guial zagdxë zinalidi ni rliladxidi. ⁸ Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist. ⁹ Dxel xt ni'quid radxejltan xhienaag yadëen quixtëe loj Dios por lëjt, guial dád nix yu' du luxdoon lojman por lëjt. ¹⁰ Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rliladxidi Jesucrist.

¹¹ Dux Dad ree Dios në Dad Jesucrist gagnë dunujn din gac yudganajn lëjt. ¹² Abi' Dad Jesucrist gagnë lëjt din gusnuu guiën lasa'di mazri, guiën tëëdi gra lasa' bejndi zi'c rayënan lëjt. ¹³ Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

Zi'c rën Dios guiban ree xbejnman

4 Yan, compniar raliduladx ree Jesucrist, raza'can lëjt liaadx, rana tëen lojdi por laaman, guial zi'c nabandi yan zi'c ma balüün lëjt guibandi, din güündi zi'c rën Dios, gol been naguiejn gol basnuu mazri guibandi zi'c rënman.

² Din lëjt ma ragbee gra ni guxhaal Dad Jesús dunujn yanan ni güündi. ³ Ni rën Dios naj guial guibandi naya lojman, guial ad güündi nidxuudx ree con ree bën ad najt lacheelidi. ⁴ Gol gogbee guial tijbgaj lëjt rayal guibannë lacheelidi zagdxë zi'c rën Dios con respejt, ⁵ ad chu' lacheelidi naabzi par grii xgustidi zi'c rüjn ree bën ad nünbeet Dios. ⁶ Ni'qui tijbidi ad rayalt güünnaladx lasa'di, gusquiee lasa'di güündi xhie nidxuudx con lacheel reeman. Din dux Dad ree Dios zudëedaman casti gra ree bën rüjn zian, zi'c ma banan lojdi zi'c ma bagojnman lëjt. ⁷ Din Dios ad gurejdxatman dunuj ree

yayajc ree xbejnman par yabajn ree nadxuudx, gurejdxaman dunuj ree par yabajn ree naya. ⁸ Zeel bën ad ridxga't ni ma banan lojdi, ad bënguidxliujtan ad ridxga'taman, Diosan ad ridxga'taman, bën razaladx xSprijt duloj ree.

⁹ Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, ¹⁰ abi' laan naj ni cayüjndi con gra dux compniar ree bën rliladx ree Jesucrist niz Macedonia. Per raza'can lëjt liaadx din gusnuu guiën lasa'di mazri. ¹¹ Gol been tëë naguiejn guibannë lasa'di zagdxë, gol guyu xgab xchiindi, zi'c ma ranan lojdi güündi dxiin, ¹² din guibandi zagdxë loj ree bën ad rliladxt Jesucrist në chitëe xhie guiyaadxiidi.

Ni gac chi gui't Dad Jesucrist

¹³ Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëe chu'nayadi zi'c ree bën ad rliladxt Jesucrist. ¹⁴ Din bal raliduladx ree guial güjtaman abi' babanman stijb, ziangajc raliduladx ree guial ree bën ma güjt, bën bililadx ree laaman, yasban Dios laa reeman por Jesucrist.

¹⁵ Zeel zi'c ma rayignia'n xtiidxaman, dunujn rana lojdi guial gra ree xbejnman, bën sta naban ree chi gui'taman stijb, ad zanedt reeman loj ree xbejnman bën ma güjt ree. ¹⁶ Din dxejzii guiguien cha' bën rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diidz xanyabaa, abi' yaloj ree xbejnman bën ma güjt ree yaban stijb. ¹⁷ Guiáad dux compniar ree bën sta naban ree dxejzii, yadxaag ree con ree bën baban guin, dxel yo' ree ladya loj ree zäj lod yadxaag ree Dad Jesucrist. Zian yo' ree yuchu'në' reeman tiblayaa.

¹⁸ Zeel gol bagu' luxdoo lasa'di con ree diidz guin.

5 Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganiinan lëjt. ² Din lëjt ragbeechaaw guial zi'cgajczi ri't tijb bëngubaan guxhin, chi achut rbëz laaman, zian guidxin dxej gui't Dad Jesucrist stijb. ³ Chi guiëb ree bejn: "Zagdxë zio' ree, achet gac", dxel dxejczii gui't gualzi par laa reeman ni ad zariit reeman loj, zi'c chi rdxin hor ragnaa lën bëngunaa chi ma gal xi'nman. ⁴ Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb bëngubaan. ⁵ Din graczidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. ⁶ Zeel ad najt guial yabajn ree zi'c tijb bënnaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguiendxuj. ⁷ Bën zinal ree nejzmal zi'c tijb bënnaayëjs, zi'c tijb bengu', zian zinal reeman nejz guin. ⁸ Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialrliladx ni ma raya'p ree në loj ni rën Dios dunuj ree, abi' yadxu'dxi'ch tëë ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëe yaya'p tëë reen zi'c tijb ni gutëe dunuj ree loj ni mal ⁹ Din ad gurejdxatman Dios dunuj

ree par yayal ree xcastiman, gurejdxaman dunuj ree din yayal ree perdon por Dad Jesucrist, ¹⁰ bén güt por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'në' reeman. ¹¹ Zeel gol bagu' luxdoo lasa'di gol been tëë yudar lasa'di din gagbeedi mazri xtiidx Dios zi'c ma cayüjndi.

Ni rayal güün ree bén riladx Jesucrist

¹² Compniar raliduladx ree Jesucrist, raza'can lëjt li-aadx, gol gojp respekt bén rusiid ree lëjt xtiidx Dios, bén rulüü ree lëjt rnieenë tëë reeman lëjt xhienaag chinalidi Jesucrist. ¹³ Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdxë.

¹⁴ Ranaab tëën lojdi compniar, gol guneenë ree bén ad rënt güün dxiin, gol bagu' luxdoo ree bén ralenya'në xnejz Dios, gol been tëë yudar bén ad za-'dxi'cht ree loj xnejzaman, gol gojp pacens gra reeman.

¹⁵ Gol been naguiejn ad güündi ni mal bén rüjn ree lëjt ni mal, zagdxeli gol gojc benza'c con lasa'di në con gra ree bejn. ¹⁶ Gol badxe' luxdoodi zagdxë zianczi.

¹⁷ Ad gucwëëz cwedx guiniabidi Dios. ¹⁸ Gol badëë quixtëë lojman por gra, din zian rënman güündi, lëjt najdi xbejn Jesucrist.

¹⁹ Ad rbexuudi nabee xSprijt Dios lëjt. ²⁰ Gol bidxga' ni rnnee ree bén rudëëd xtiidxaman. ²¹ Yaloj xgaj gol gogbee zagdxë xhietëëznin, dxeel gol been ni naj zagdxë. ²² Gol gubi'ca loj gra ree ni mal.

²³ Dios, bén rabe'cdxe luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidiblagaa di gaquidi nayadxuj lojman dxej gui't Dad Jesucrist.

²⁴ Abi' Dios güün zian, din laaman, bén rbejdx dunuj ree par güünman dunuj ree xbejnman, rüjn xtiidxaman cumplid.

Diidx bigra ca ree loj gui'ch guie

²⁵ Compniar raliduladx ree Jesucrist, gol gurejdx gunab Dios por dunuj. ²⁶ Gol badëë xtiidx Dios da cwentan loj gra ree compniar riladx Jesucrist. ²⁷ Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar riladx laaman. ²⁸ Dux Dad ree Jesucrist güünle' lëjt.

Gui'ch barojp par ree bén Tesalónica

1 Naj, Pab con Silvan në Timoteo, cayxhaalan gui'ch guie par lëjt rlliladxidi Jesucrist luguiedx Tesalónica, lëjt najdi xbejn dux Dad ree Dios në xbejn Dad Jesucrist. ² Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rudëed Pab quixtëe loj Dios

³ Guixie guixie radëen quixtëe loj Dios por lëjt compniar raliduladx ree Jesucrist, din zian rayal yaguieenan guial mazri cusnuu rlliladxidi laaman, abi' tijb gajdi mazri ma rën lasa'di. ⁴ Zeel dád nix yu' du luxdoon raza'tan lëjt loj gra ree xbejn Dios, raguie'chan loj ree-man pacens ni rajpidi në guialrliladx ni rajpidi, rdaan tëëdi gra ree ni rüjnnë ree bejn lëjt në gra ree guialzi ni cadëdidi. ⁵ Zian rguien xnejz naj xguialguxtis Dios, guial gulejman lëjt din yayalidi lod rniabeeman, din por laan cadëdidi guialzi.

⁶ Abi' guial gra ni rüjn Dios naj xnejz, zeel gudëedaman casti gra ree bén cudëed lëjt casti. ⁷ Guiáad lëjt cadëdidi guialzi yan, gunee-man lëjt guialraziiladx con dunujn, dxej ni gulüüloj Dad Jesucrist diidz xanyabaa galay xbianiman ni naj zi'c bajl, con ree xianjlaman bén ca' ree mazri guialrniabee. ⁸ Dxel gudëedaman casti bén ad bayagbeet ree Dios, bén ad guyënt ree nuzoob xtiidxza'c Dad Jesucrist. ⁹ Gudëedaman laa reeman casti tiblayaa, su reeman zijt par Dios në par xguialrniabee za'cdxoonman. ¹⁰ Zian gac dxej ni gui't Dad Jesucrist, din guza't ree bejn laaman zagdx por ree xbejnman, yadxa tëë loj gra reeman laaman, abi' në lëjt, din ma bililadxidi xtiidxaman ni badün lojdi.

¹¹ Zeel ad racwëëzt rarejdx ranaaban Dios por lëjt din gagnëman lëjt guibandi zi'c rayal, zi'c guredxaman lëjt guibandi. Ranaab tëën lojman guial con xguialrniabee-man gac cumplid gra xixgabzagdxedi në gra ni rüjndi guial rlliladxidi laaman. ¹² Abi' zian guiliesidi xvalor Dad Jesucrist, guiáad laaman guilies xvaloridi guial laaman con dux Dad ree Dios rën reeman dunuj ree.

Gulüüloj bén ca' xguialrniabee xindxab

2 Yan, compniar raliduladx ree Dad Jesucrist, xcwent guial gui'taman stijb në guial yadxaag ree con laaman, raza'can lëjt liaadx, ² ad bal tiëbidi tibrajtzi gusquiee ree bejn lëjt, bén rëb ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tijb sprijt rëb loj reeman zian, o dunujn baxhaal gui'ch loj reeman lod raguie'chan zian. ³ Ad tiëbidi chu gusquiee lëjt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx

Dios. Abi' gulüüloj tijb bén güün ganax ni rën xindxab, bén ma naj par gabijl. ⁴ Laagajc laaman guilies xvalor, abi' yalenman gra ni nünbee bejn zi'c Dios në gra ni rnijachi' bejn zi'c dios, xt cweman lën xyadoo Dios, abi' guiëbaman guial laaman naj Dios.

⁵ Gol basaaladx guial zian rnin lojdi chi guzunë'n lëjt. ⁶ Abi' yan lëjt ma ragbee chu cutëe chitëe gulüüloj-man, la'tgaj guidxin dxej rayal gulüülojman. ⁷ Ma caya-jc ree xgabmal guin, per yu' bén cutëe gac reen cumplid. Chi ma bisüd bén cutëe guin, ⁸ dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnë-man gunidlojman laaman. ⁹ Benmal guin por xindxab gui'taman, abi' dád gapaman guialrniabee. Güünman zien ree ni yadxaloj ree bejn, güün tëëman zien ree mi-lagr par gusquieeman. ¹⁰ Con graloj ree ni mal gusquieeman bén canijt ree loj Dios, guial ad guyënt reeman ad cwëjb tëët reeman nililadx reeman ni di-idxli zile' nuslaa laa reeman loj dol. ¹¹ Zeel ruslaa Dios gusquiee gra ree ni guin laa reeman, abi' guililadx ree-man ni ad najt ni diidxli, ¹² din yayal gra reeman casti, guial ad bililadx reeman ni diidxli guin, din mazri bayuladx reeman been reeman ni mal.

Sudxi'ch reeman loj ni rlliladx reeman

¹³ Compniar, rën Dad Jesucrist lëjt. Zianczi rayal yadëen quixtëe loj Dios por lëjt, din diidz guia'xchej ma bacaabeeman lëjt din laadi loj casti, guial ma naya-di por xSprijt Dios në guial ma bililadxidi ni naj diidxli.

¹⁴ Par zian gurejdx Dios lëjt gaquidi xbejnman chi badün xtiidxza'c Dad Jesucrist lojdi, din yayalidi xanyabaa lod za'man.

¹⁵ Zeel, compniar raliduladx ree Jesucrist, gol guzujdxi'ch gol binal tëë ni balüün lëjt chi badxu'në'n lëjt, në ni ma banan lojdi loj gui'ch ren. ¹⁶ Abi' Dad Jesucrist gajc në dux Dad ree Dios bén rën dunuj ree, bén ragu' du luxdoo ree zianczi, bén banee tëë ni ralëjz ree guial najman benza'c, ¹⁷ laaman yagu' luxdoodi gagnë tëë-man lëjt din sudxi'chidi din gra ni guinieedi güün tëëdi gac zagdx.

Rën Pab cwedx guiniab reeman Dios

3 Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdx zi'cgajc beendi. ² Gol gurejdx gunab tëëman din yabëëman dunujn loj ree benmal, loj ree bendxu-udx ad nabant xnejz, din ad grat bejn rlliladx xtiidx Dad

Jesucrist. ³ Per laaman zianczi rüjn xtiidxaman cumplid, abi' laaman gagnë lëjt din sudxi'chidi, guinia tēēman lëjt chitēē güündi ni mal. ⁴ Dunujn rayag-beechaaw guial laaman cayagnë lëjt cayüjndi gusnuu tēē güündi ni banan lojdi. ⁵ Gagnëman lëjt din guiëndi bejn ree zi'c rën Dios laa reeman gap tēēdi pacens zi'c gojp Dad Jesucrist pacens.

Rüjn naguiejn güün bejn dxiin

⁶ Yan, compniar raliduladx ree Jesucrist, por laaman ranabeen lëjt: Gol bariica loj chutēēz compniar gaz za' ad rënt güün dxiin, bén ad naban tēēt zi'c balüün lëjt. ⁷ Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin guial naguieenan dxiin, ⁸ achu tēēt banee xlia' ni badaawan. Lëjt ragbee guial dád baguieenan naguiejn baguieenan dxiin, dxej guiaal baguieenan dxiin chitēē yalu'n xchiindi guial güündi dunujn yudar din gac yabajnan. ⁹ Majsi zajc nanabeen lëjt nüjndi dunujn yudar, per baguieenan dxiin par yalüün xhienaag rayal guibandi güündi zi'c raguieenan. ¹⁰ Chi badxu'në'n lëjt,

ranan lojdi: Bén ad rënt güün dxiin, ad zajw gajctaman. ¹¹ Per yan baguiejnan guial yu'di gaz za' ad rënti-di güündi dxiin, abi' rudi loj ni ad rayaltidi. ¹² Par bén zii ree dunujn rana ranabee tēēn laa reeman por Dad Jesucrist yabedxe reeman, güün reeman dxiin din guiban reeman.

¹³ Guiáad lëjt compniar, ad yalenya'di güündi ni naj zagdxë. ¹⁴ Bal yu' tijbidi ad ruzoobt diidx guial güündi ni ranan loj gui'ch guie, gol baguiaa chu benan, ad guchajg tēēdi laaman din yatu lojman. ¹⁵ Per ad guguaadi laaman zi'c tijb bén rdxe'chidi, gol baguiaa-man zi'c tijb bijchidi, gol guneenëman din guibanman zagdxë.

Diidx bigra ca ree loj gui'ch guie

¹⁶ Dad Jesucrist bén rabe'cdxe luxdoo bejn, laaman yabe'cdxe luxdoodi guixie guixie në loj gra. Laaman sunë lëjt.

¹⁷ Naj, Pab, quiyb naj cuca ree lejtr guie par gugajp-diozan lëjt. Zian rünan con gra ree da gui'chan, zian naj ree da lejtran. ¹⁸ Dad Jesucrist güünle' gradi.

Gui'ch yaloj par Timoteo

Rugajpdioz Pab Timoteo

1 Naj Pab, najn tijb xiapóstol Jesucrist por xguialrniabee Dios bén rüjn perdon dux tol ree në por Jesucrist bén rayagbee ree gui't stijb. ² Cucan gui'ch guie par lüj Timoteo, din par naj lüj naj zi'cgajc da xi'nan guial tiblojzi raliduladx Jesucrist. Dux Dad ree Dios në Dad Jesucrist güünle' lüj, yayaman lüj yabe'cdxe tēeman luxdool.

Rēb Pab loj Timoteo xcwent ree bén rusquiee

³ Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chitēē rulüü reeman bejn ree ni ad najt diidxli. ⁴ Ad chililadx reeman ni rbēēgujic ree bejn, ad guidxga' tēē reeman ban za reeman, o chu rajc reeman xbengol gulal reeman, din ad ni quint ree gagnē laa reeman par gusnuu chililadx reeman xtiidx Dios.

⁵ Canabeen lüj din güün reeman zian din guiguien guial diidxli rēn lasa' reeman, achet naladx reeman din guiguien tēē guial guidib luxdoo reeman rililadx reeman xtiidx Dios. ⁶ Din yu' reeman ad rüjntri zian guial ganax ree ni ren ni ad rüjnt ree sirv rü reeman. ⁷ Rēn reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rēn guiēb ni rnīee reeman ni'quid rignia't reeman ni naladx reeman naj zagdx culüü reeman bejn ree.

⁸ Dunuj ree rayagbee guial zagdx naj ley guin par bén rignia' xhie sirv rüjnan. ⁹ Abi' rayagbee ree guial ad baneet Dios ley guin par ree bén naban xnejz niz lojman, baneeman ley guin par tēd ree bejn casti, bén naban ree zi'ctzi naj xixgab reeman, bén ad ruzoobt ree diidx, bén ad yu'guijct ree Dios, bén rüjn ree dol, bén ad rajpt ree Dios respekt, bén ad rüjnt ree naguejn guiēn reeman Dios, bén rugüjt xdad xniaa, në par gra ree bén rugüjt bejn, ¹⁰ rüjn tēēn sirv par xcasti ree bén za'nē xinguaaw o bēngunaa ren, par ree xin ruladx lasa' xinguaaw gajc o bēngunaa ruladx lasa' bēngunaa gajc, në par ree bén rban bejn ree par guto' reeman laa reeman zi'c mojs, nētēē par ree bén rusquiee në ree bén ruza't Dios par sudxi'chnē xguialrusquiee reeman në par gra ree bén rüjn xcontr ni naj diidxli. ¹¹ Diidxli guie ree naj ni zēēd ree loj xtiidxza'cdxoon Jesucrist. Dux Dad ree Dios, bén rayal respekt, laaman naj bén basa'nnē naj diidx guin ree din gatiechan laa reen.

Xhienaag baya Dios Pab

¹² Quixtēē Dad Jesucrist laaman cayagnē naj, rajp tēēman naj confianz abi' bacaabeeman naj par gatiechan xtiidxaman, ¹³ majsi yaloj gunen laaman diidxguijdx abi' guzunaalan bén rililadx ree laaman din gūnan laa reeman ni mal abi' dād naya bennē'n laa reeman. Per Dios bayaman naj guial ad bignia'tan ni cayūnan din gad naj chililadx Jesucrist. ¹⁴ Abi' dād benza'c gojcaman con naj, balüüman naj xhienaag chililadxan balüü tēēman xhienaag guiēnan Dad Jesucrist.

¹⁵ Diidxli ni ganin lējt, rayal chililadx bejn: guial Jesucrist bi't loj guidxliuj par güünman xtol bejn perdon, abi' loj gra ree bejn naj naj mazri bēndol. ¹⁶ Per majsi najn mazri bēndol, baya Dios naj abi' gojp Jesucrist naj pacens din gagbee ree bén chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblayaa con Dios. ¹⁷ Zeel zianczi rayal yaya'p reeman respekt yaza't tēē reeman zagdx guial najman rey bén ad yu't dxej guiēt, abi' rajpaman guialrniabee par tiblayaa guial tijbzi laaman naj Dios abi' achut rajc ruguaa laaman. Amén.

¹⁸ Timoteo, par naj lüj naj zi'c da xi'nan zeel rnin lüj been zi'c guneē reeman xcwentil diidz yaloj, abi' zi'c tijb suldad ni rej loj wadijl ad guidxebil niz loj ree bén za' ree contr xtiidx Dios. ¹⁹ Guzudxi'ch loj ni rililadxil Jesucrist, been tēē ganaxzi ree xgab zagdx par güünl zi'c rayal. Din yu' ree bejn guial ad rüjnt reeman zian, yan ma banijt reeman ni rililadx reeman Dios. ²⁰ Zian ma guzajc ree Himeneo con Lejandr, zeel ma bayūn laa reeman loj satanás din gusiid reeman guial ad rayalt guinee reeman Dios diidguijdx.

Xhienaag cwedx guiniab bejn Dios

2 Yalojdoo ni rnin lojdi naj guial cwedx guiniabidi Dios, cwedx guiniabidi laaman por gra ree bēnguidxliuj, gudēēd tēēdi quixtēē lojman. ² Rayal yarejdx yanaab ree Dios por ree rey në por gra ree guxtis loj guidxliuj din chile' yabajn ree zagdx gusnuu tēē yabajn ree zi'c rēn Dios. ³ Din laan naj ni zagdx ni rayuladx tēē dux Dad ree Dios, bén rüjn perdon dux tol ree, ⁴ bén rēn guial gra bejn gac perdon guidxin tēē dxej gagbee bejn xhie rēn guiēb xtiidxliman. ⁵ Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bēnguidxliuj. ⁶ Güjtaman loj crüjz persi gudijxaman por xtol gra ree bēnguidxliuj, zian naj ni balüü Dios be-

jn chi bidxin dxej bacaabeeman gac zian. ⁷ Zeel bacaabeeman naj gacan xi apóstol Jesucrist din gatiechan xtiidxaman, në par gusidan bën ad najt ree bën Israel conin naj diidxli, xhie tëë naag chililadx reeman Jesucrist, walin ad rusquieetan.

⁸ Yan rënan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guialrdxe'ch në sin wadijl. ⁹ Rën tëën guial ree búngunaa su reeman zi'c rayal, ad tēdlaj suchaaw reeman con or, në ree perl në ree vistid zagdxo o guial tēdlaj gūūnchaaw guidxguijc reeman. ¹⁰ Din mazri zagdxo gūūn reeman ni naj zagdxo, zi'c rayal gūūn ree búngunaa ni ma zinal xnejz Dios. ¹¹ Abi' rayal gucaagdiajz reeman ache guinee reeman chi rulūū ree xinguaaw xtiidx Dios. ¹² Din ad zatiēēbtan guial gulūū tijb búngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabe búngunaa xinguaaw, rayal gucaagdiajgzaman. ¹³ Din Dios, yaloj Adán beenchaawaman, dxelri Eva. ¹⁴ Din ad Adánt basquiee reeman, yaloj Eva basquiee reeman, abi' por guialrusquiee guin beenman dol. ¹⁵ Per zajc gac búngunaa perdon, bal gūūn xchiinman zagdxo guial najman na, bal gusnuu chililadxaman Dios, guienman bejn ree guiban tëēman xnejz.

Xhienaag guiban ree bën rniabee

3 Gol badxe'guijc da diidxan: Bal chu bën rën gap guialrniabee loj gra ree bën rliladx Jesucrist par gulūūman laa reeman xnejz Dios, zagdxequi naj ni rënman gūūnman. ² Per bën rajp guialrniabee guin rayal gūūnman zi'c rayal chitēē chu guinieeguijdx laaman. Rayal chu' tijbzi lacheelaman, guibanman zagdxo chu' tëë xquiargueijnman din gap ree bejn laaman respekt. Gacaman benza'c con ree bën rdxin lidxaman, gac tëēman tijb bën rignia' par gulūūman bejn ree. ³ Ad rayalt gacaman beng'u, ni'qui bën rguil wadijl ad rayal tëēt yaguilaman mod par tia'man xmilia ree bejn, rayal gacaman benza'c con chutēēz, gac tëēman bën naxanladx ad zazēēbladx tëētaman milia. ⁴ Rayal nabe lidxaman zi'c rayal din gulūū ree xi'nman xhienaa gap reex respekt guzoob tëë reex diidx. ⁵ Din bal id rajc rniabee lidxaman, xhieza naag nabeeman bën rliladx ree Jesucrist? ⁶ Zeel tijb bën qui guzulojri rliladx Jesucrist, ad rayalt nabeeman loj ree bën ma rliladx chitēē guilies xvalor gajcaman abi' yayalaman lasa' casti ni bayal xindxab. ⁷ Bën rajp guialrniabee guin xt ree bën ad rliladxt Jesucrist rayal gūūnbee laaman guial najcaman benza'c chitēē yaya'ntuman abi' gūūn xindxab laaman gap.

Ni gūūn ree bën rñjn yudar bën rniabee ree

⁸ Yan ziangajc ree bën ma cwabee par gūūn reeman yudar bën rniabee ree, rayal gūūn reeman zi'c rayal din gap ree bejn laa reeman respekt, gūūn cumplid xtiidx reeman, ad guiē' tëë reeman, ad yaguil tëë reeman mod par tia' reeman xmilia ree bejn. ⁹ Con xgabza'c chinal reeman ni ma balūū Dios dunuj ree.

¹⁰ Zeel yalojxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din gūūn reeman yudar bën rniabee ree. ¹¹ Ziangajc ree búngunaa ni ma cwabee par gūūn reeman yudar, rayal gūūn reeman zi'c rayal din gap bejn laa reeman respekt ad zaneeguijdx reeman bejn, rayal guiban reeman zagdxo abi' gūūn cumplid xtiidx reeman. ¹² Abi' ree xinguaaw cwabee guin par gūūn reex yudar bën rniabee loj ree xbejn Cristo, tijbzi lacheel reex rayal chu', nabe tëë lidx reex con xi'n reex zi'c rayal. ¹³ Din bën rñjn ree sirv zi'c rayal ad respektzi rajp bejn laa reeman, sin guialrdxeb ma zile' guiēb reeman xhienaa g rliladx reeman Jesucrist.

Naroob naj bën raliduladx ree

¹⁴ Gagnë Dios chile' guialan guidganan lñj. Per cucan gui'ch guie, ¹⁵ din bal gaglaan ma ragbeel xhienaag guiban bejn delant loj los demasri ree xbejn Dios, bën ma naj ree xbejn Dios naban, abi' za'dxi'ch reeman rulūū tëë reeman xtiidxliman. ¹⁶ Dunuj ree rayagbee guial dád bën naroob najman, bën raliduladx ree: Bi'taman loj guidxliuj zi'c tijb bēnguidxliuj, rēb xSprijt Dios guial laaman naj bën naya abi' baguiaa ree anjl laaman bi'taman loj guidxliuj. Bre'ch xtiidxaman loj ree bën ad najt bën Israel, guidibczi bililadx bejn laaman abi' baca' Dios laaman xanyabaa.

Bën rusa'n ree guialrliladx reeman Jesucrist

4 Ma bagojnchaaw xSprijt Dios guial zēēd ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiidx ree bēnrusquiee në gra ree ni zēēd por xindxab. ² Mazri guidxga' reeman bēnrusquiee ree, bën wed rñjn ree, bën achetri ree rzajc guial rñjn reeman dol din ma naya' reeman zian. ³ Guiēb reeman guial ad najt guial guxhliaa ree bejn ad zajw tëēt reeman graloj. Per Dios badxe' graloj guialraw par gaw ree bën rliladx laaman, bën ma ragbee ree conin naj diidxli abi' gudēēd reeman quixtēē lojman. ⁴ Din gra ni badxe' Dios naj zagdxo, achet ni rayal cwexuu bejn tia'man bal gudēēman quixtēē chi cayawaman laan. ⁵ Din chi rarejdx ranaab ree Dios con xtiidxaman rñjnle'man guijc ni yadaaw ree.

Bën rñjn sirv zagdxo loj Jesucrist

⁶ Zeel bal rulūūl bën rliladx ree Jesucrist zi'c ma rnin, dxel cayūjnquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx guin në ree diidxza'c ni zinalil. ⁷ Per ad guidxga'l ni rbēēguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rën Dios. ⁸ Zagdxo naj par gūūn bejn graloj ejercijs par gacaman gojl, per loj gra xhietēēznin mazri lasajc guiban bejn zi'c rën Dios. Din ad lojtzi guidxliuj guie gūūn sirv guial naban bejn zi'c rën Dios, nēgajc xanyabaa lod gap bejn guialnaban tiblayaa. ⁹ Dunuj ree rayagbee guial ni diidxli naj ree diidx guie, abi' rayal chililadx gra bejn

laan. ¹⁰ Zeel majsi cayza'can ni cayza'can, per cayguieenan ni cayguieenan guial raliduladxan Dios naban, bén naban par güünman yudar gra ree bejn, per mazri bén riladix ree laaman.

¹¹ Zian rayal gusiidil bejn ree güjdx tõe loj reeman din güün reeman zian. ¹² Gojp cudad chitõe guiëb ree bejn guial achet sirv lüj guial ad wayajctil bengol. Mejrli been naguiejn din gaquil tijb ejempl par ree bén riladix Jesucrist, zi'c xhienaaag rül diidix, zi'c nabanl, zi'c rën ben ren ree, zi'c riladixil Dios nētõe por ree xix-gabza'quil. ¹³ La'tgaj guialan, basnuu biil xtiidix Dios loj ree bejn, guneeñ reeman balüü tõe reeman xhie rën guiëb xtiidix Dios. ¹⁴ Ad yayanladixil güünl zi'c rayal güünl por quiarguejn ni banee Dios lojl chi badxiib yaa ree bengol guijquil chi gogbee reeman guial lüj naj Bén gule Dios.

¹⁵ Badxe'guijx diidix guie ree din gagbee gra ree bejn guial cusnuu zël delant. ¹⁶ Gojp lüj con ni rusiidil bejn ree. Guzujdx'i'ch loj ni ma ragbeel, zian yabõe lüj gajc loj casti yabõe tõe bén cucaagdiajg ree xtiidixil.

Xhienaaag güün Timoteo con ree Bén riladix Jesucrist

5 Ad tilnël tijb bengol, badëëman consejw zi'cgajc xdadil, abi' xin naj ree xinguiag, badëë reex consejw zi'cgajc bijchil. ² Ziangajc béngunaa bengol ree badëë reeman consejw zi'cgajc xniaal, abi' biinguiag ree, badëë reem consejw zi'cgajc bizanl con xgabza'c.

³ Bidxga' ree béngunaa bizëjb ni diidxli achut rajp. ⁴ Per bal tijb béngunaa bizëjb guin yu' ree xi'n o xiajg, dxel yaloj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdx, zian tõe ruladx Dios. ⁵ Béngunaa naj diidxli Bén bizëjb, Bén ad rajptri chunin loj guidxliuj guie, tijbzi Dios naj Bén yu'guijcaman güün laaman yudar dxel ad rucwëëzt rbejdx rniabaman laaman dxej guiaal. ⁶ Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. ⁷ Bagojn gra ree diidix guie Bén ma riladix ree Jesucrist chitõe chu guinieeguijdx laa reeman.

⁸ Din Bén ad rüjnt yudar xcompniar, abi' ni'qui xfamilaman Bén zojb ree lidxaman ad rüjntaman yudar, laaman ma basa'n ni riladixaman abi' piorli najman guial loj ree Bén ad riladix Jesucrist.

⁹ Ad tia'l laj chutëëz béngunaa bizëjb par gac reeman yudar, naabzi ree béngunaa bizëjb Bén ma nadëd ree gayojn i'z abi' ad guzunëtaman ben ren la'tgaj naban lacheelaman. ¹⁰ Bal nünbee tõe ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëë lidxaman baya'n ree bejn bal gojcaman benza'c con ree Bén riladix Jesucrist Bén bidxin ree lidxaman, bal beenman yudar Bén rzagdiaj ree, bal been tõeëman naguiejn beenman ganax ni zagdx.

¹¹ Per ad tia'l laj ree béngunaa bizëjb benguiag ree, din despuejs rën reeman guxhliaa reeman abi' ad rüjntri reeman ni rayal güün reeman por Cristo guial rën reeman guxhliaa reeman stijb. ¹² Dxel rüjn reeman dol guial ad rüjntri reeman ni ma been reeman compromis con Cristo. ¹³ Abi' tõe ree benguiag guin zë ree-

man yu yu, zianz rajc reeman costumbr achetçi rüjn reeman. Abi' ad laatzan, rzuloj ruza't reeman bejn, ru reeman loj xhietëëznin abi' rniee reeman ni ad rayalt guiniee reeman. ¹⁴ Zeel rënan guial Bén naj ree béngunaa bizëjb benguiag, mejorli guxhliaa reeman stijb, chu' xi'n reeman nabee tõe lidx reeman zi'c rayal, chitõe gudëëd reeman mod guinieeguijdx ree Bén ralen ree dunuj ree laa reeman. ¹⁵ Din yu' ree béngunaa bizëjb ma guro'nladix reeman xnejz Dios abi' ma zinal reeman xnejz xindxab.

¹⁶ Abi' bal tijb Bén riladix Jesucrist naj xfamilaman tijb Bén baya'n bizëjb, dxel laaman rayal güün yudar béngunaa bizëjb guin chitõe gacan mazri carg par ree dux compniar ree Bén riladix ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

¹⁷ Bén riladix ree Jesucrist rayal gap reeman respekt Bén rniabee laa reeman në ree Bén rniee rulüü tõe xtiidix Dios zi'c rayal, gudëë tõe di loj reeman gra ni ryaadx reeman. ¹⁸ Din loj xtiidix Dios rëb: "Ad gudxe'di guijxh ro' ree begui'xh la'tgaj cayün reeb dxiin", rëb tõe loj xtiidix Dios: "Rayal gax Bén rüjn dxiin".

¹⁹ Ad guidxga'di ni rudxiib ree bejn guijc tijb ree Bén rniabee ree Bén riladix Jesucrist, bal id yu' tio'p choon ree bejn rëb guial diidxli naj ni rniee reeman por laaman. ²⁰ Per bal tijb Bén ma ca' guialrniabee rusnuu rüjnman dol, rayal guinieenël laaman delant loj gra reeman din guidxeb los demazri reeman.

²¹ Yan por Dios, por Jesucrist në por ree anjl ni ma gulejman, naj rni badxe'guijx been tõe zi'c ma rnin ad cwel loj ree bejn, tiblojzi been con gra reeman. ²² Gojp cudad cwel tijb Bén ni nabee din ad ragbeetil bal yu' ni mal cayünman, dxel güün ree bejn xgab guial nëgajc lüj ruladx ni cayünman. Gojp cudad graloj ree dol.

²³ Në guial guiët' guiët' ragxuu lën guial ad nadaant lën, ad rë'l nijs lagajzi mejorli gu' tibda'n vin.

²⁴ Yu' reeman laa rguien gajc xhie dol cayün reeman diidz chi gad reeman gudëëd cwent loj Dios, per yu' reeman ad rguient xhie dol cayün reeman xt chi yadëëd reeman cwent loj Dios. ²⁵ Ziangajc yu' ree Bén ni laa rguien gajc ni zagdx ni cayün reeman, abi' yu' reeman ni'quid rguient ni zagdx ni cayün reeman, per yu' dxej gagbee ree bejn laan.

6 Gra ree mojs rayal gap reeman respekt xpatron reeman chitõe chu guiniee diidxguijdx contr Dios o contr xtiidixaman ni caylün. ² Abi' bal riladix patron guin Jesucrist dxel rayal gap reeman laaman mazri respekt guial nëman riladix Jesucrist zi'cgajc laa reeman. Abi' tõe rayal güün xchiin reeman zi'c rayal guial cayün reeman sirv tijb xcompniar reeman Bén riladix Jesucrist compniar ni rën reeman. Zian balüü ree bejn güjdx tõe loj reeman din güün reeman zian.

Guialnaza'c ni naj diidxli

³ Bal yu' Bén rulüü diidix ni ad najt zi'c xtiidixza'c Dad Jesucrist ni'qui zi'c raliduladx ree Jesucrist ad rulüütaman bejn ree, ⁴ najzaman bendxal. Din ruladixaman tildiidxaman abi' ni'quid xnejzt rnieeman, dxel ni zëëd

guialnadëdloj, guial rdxe'ch, guial rniee diidxguijdx abi' ad rliladxtri lasa' reeman, ⁵ ad rucwëëzt rdil reeman por ree ni ad rüjnt sirv ni yu' guiyc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bén naj ree zian, biquied loj reeman. ⁶ Dad ben rijcw naj bejn chi ma rliladxaman Jesucrist, per bén za' conform con ni rajptzaman. ⁷ Din achet budnë' ree loj guidxliuj ache tëët zajc yunë' ree chi yayëjt ree. ⁸ Bal raya'p ree ni yadaaw ree në lajd ni yadojt ree con laan rayal yaya'n ree conform. ⁹ Per ree bén rzëëbladx gac reeman rijcw loj guidxliuj guie ad rile't sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rniyt reeman. ¹⁰ Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rliladx reeman Dios abi' laagajc reeman cusagdiaj laa reeman.

Ni rayal güün Timoteo

¹¹ Per lüj Timoteo, xbejn Dios, briica loj ree ni mal guin. Been nagueijn guibanl zagdx, guibanl zi'c rën Dios, bililadxaman, gojc bén naxanladx, gojp pacens guyën tëë ree ben ren. ¹² Been da't nagueijn guzudxi'ch loj ni rliladxil xtiidx Jesucrist. Ad gusëëbil guialnaban ni naj guialnaban tiblayaa, din par zian gulejman lüj abi' rëbil delant loj zien ree bejn xhienaag rliladxil Jesucrist. ¹³ Yan, por Dios bén razaladx guialnaban loj gra ni yu' loj guidxliuj në por Jesucrist bén ni gunee sin guialrdxeb loj Poncio Pilato, naj rniabee lüj ¹⁴ din gu-

zoobil diidx güünl ni rnin lojl, sin guial guchaal xhienin chitëë guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. ¹⁵ Gui'taman dxej ni nabee Dios gui'taman, Dios bén rayal respekt Bén naj tijbzi Dios rajp tëëman gra guialrniabee, Bén naj xrey ree rey naj tëëman xDad ree dad. ¹⁶ Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc tëët guguaa bejn laaman. ¡Par laaman naj respekt në guialrniabee par tiblayaa! Amén.

¹⁷ Bén naj ree benrijcw loj guidxliuj guie, güjdx loj reeman ad güün reeman benro' ad cu'guiyc tëë reeman guial ni rajp reeman najn par tiblayaa, din guialnaza'c ni rajp bejn yu' dxej yaran. Mejrli cu'guiyc reeman Dios bén naban din laaman razaladx da't dunuj ree graloj din chu' du luxdoo ree nix. ¹⁸ Güjdx loj reeman din güün reeman ni zagdx, güün reeman zien ree ni rüjn sirv, cu' tëë luxdoo reeman zagdx güün reeman yudar bénprob ree. ¹⁹ Abi' zian guto'p reeman guialnaza'c ni güün laa reeman yudar loj ree dxej ni zëëd din yayal reeman guialnaban tiblayaa xanyabaa.

Xconsejw Pab

²⁰ Timoteo, badxe'guiyc ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bén ni naladx guial rajc da't reeman abi'za ad walit ni rajc reeman. ²¹ Din yu' ree bén rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

Gui'ch barojp par Timoteo

Rugajpdioz Pab Timoteo

1 Naj Pab, najn tijb xi apóstol Jesucrist, Dios gule naj din gatiechan diidx por promisejs ni beenman guial gudëedaman guialnaban tiblayaa loj ree bén riladx Jesucrist. ² Naj caxhal gui'ch guie par lüj Timoteo bén rënan zi'c da xi'nan. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

Guialrulüü xcwent Jesucrist

³ Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bén rünan sirv con guidib luxdon zi'c been ree da bengol gulalan been reeman laaman sirv. ⁴ Chi rusaaladxan ni biinl, ma rën nejzdoon guguan lüj din yayu luxdon zagdxe.

⁵ Yu'guican guial lüj diidxli riladxil Jesucrist, yaloj xnaxüjsil Loida con xniala Eunice bililadx laaman zian, zeel ragbeechaawan guial ziangajc riladxil laaman.

⁶ Zeel rnin lojl, been naguiejn din guiguien quiar-guiejn ni banee Dios lojl chi badxib yan guijquil. ⁷ Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiar-guiejn zagdxe.

⁸ Zeel ad yatul guinieel xtiidx Dad Jesucrist, ad yatu nëtëël naj yu'n ladxguiib por laaman, con xyudar Dios gudaan guialzi ni rayal tädil guial gutie'chil xtiidxza'c Jesucrist. ⁹ Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diizd chi gad guidxliuj gacchaaw beenman xgab guial por Jesucrist gulüüman dunuj ree xhienaag rënman dunuj ree. ¹⁰ Yan bi't Jesucrist bén güt por dux tol ree, rayagbee ree guial diidxli rën Dios dunuj ree. Abi' Jesucrist naj bén biquied guialrniabee loj guialgüjt abi' zian biguien guial yu' guialnaban, guialnaban tiblayaa par ree bén riladx xtiidxaman.

¹¹ Zeel gulej Dios naj din gacan xi apóstol Jesucrist, din ganen xtiidxaman gulü tëën laan bén ad najt ree bén Israel, ¹² abi' por zian cadëëdan guialzi ni cadëëdan. Per ad ratutan por zian, din naj ragbee chu riladxan, abi' ragbeen guial laaman rajp guialrniabee par cu'chaawaman ni basa'nan lojman xt dxej ni gui'taman stijb.

¹³ Badxe'guijc binal tëë ree diidxza'c ni ma balün lüj, tant zi'c riladxil Dios në zi'c rën ree lasa'l guial ma nayajc ree tijbzi con Jesucrist. ¹⁴ Abi' con xyudar xSprijt

Dios bén naban con dunuj ree, gojp ni banee Dios güünl.

¹⁵ Lüj ragbee guial gra ree bén zojb niz Asia ma gulëëladx reeman naj, loj reeman no'ch Figelo con Hermógenes. ¹⁶ Dios gagnë ree xfamil Onesíforo, din laaman dád zien volt bagu'man luxdon. Abi' ad batunëtaman naj yu'n ladxguiib, ¹⁷ naabzi bi'taman Rom baguillaman naj xt lodzi badxejlaman naj. ¹⁸ Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

Zi'c tijb xsuldad Jesucrist

2 Guiaad lüj xi'ngaan, guzujdxi'ch loj yudar ni raya'p ree por Jesucrist. ² Abi' ni biguiejn rën delant loj zien ree bejn, balüün loj ree bén diidxli riladx, bén ni zajc gulüü ree ben ren.

³ Zi'c tijb suldadza'c, zian gudaan ree guialzi, zi'c najl xbejn Jesucrist. ⁴ Ni'qui tijb bén naj suldad ad rut loj ni ad najt xcwent ree suldad par chile' yaya'nman zagdxe loj bén rniabee laaman. ⁵ Ziangajc bén ni rguijt xhie tijb nin, rayal quitaman xnejz din chile' tia'man prem.

⁶ Abi' bén rüjn dxiin dajn, yaloj xgaj rüjn da'taman dxiin din gac yaca'man guialnaza'c. ⁷ Been xgab ni canin lojl, abi' Dad Jesucrist gagnë lüj din chignia'l gra.

⁸ Basaaladx Jesucrist, bén güt abi' babanman, bén zëëd loj xdiaa rey Davi, zian naj xtiidxza'caman ni catiechan. ⁹ Abi' por zian cadëëdan guialzi, xt naxiin lën ladxguiib zi'c tijb benmal, per xtiidx Dios ad naxiitan. ¹⁰ Zianan zeel rdaanan gra par günan yudar bén ni ma naj ree par Dios, din gap reeman perdon por Jesucrist yayal tëë reeman guialnaban za'cdxoon ni naj par tiblayaa.

¹¹ Waliqi ree diidx ni rëb:

Bal ma bayëjt ree con laaman, ziangajc yabajn ree con laaman.

¹² Bal radaan ree xhietëëz ni raza'c ree, ziangajc yanabee ree con laaman.

Bal raguie'ch ree guial ad naguieenbeet reeman, ziangajc guiëbaman guial ad nünbeetaman dunuj ree.

¹³ Bal id raguieen ree cumplid dux tiidx ree, per laaman rüjn cumplid xtiidxaman din ad zajct guidxaa zi'c najman.

Tijb bén raya'n zagdxe con xchiin

¹⁴ Güjdx loj ree bejn din gusaaladx reeman ni guie ree, abi' por Dios güjdx loj reeman guial ad rdildiidx

reeman por ree ni ad rüjnt yudar, ruxhiinzan bén ni riguejn ree laan. ¹⁵ Been xt lod chile' güünl din yaya'n! zagdxe loj Dios, din chibiguil lojman zi'c tijb bén ni rüjn dxiin abi' achet ni gustu laaman, guial cayüjn! xnejz con xtiidx Dios. ¹⁶ Ad gül diidx ni ad rüjnt sirv, ni ad rüjnt yudar bejn ree. Din bén rüjn ree zian zi'cri zinal reeman nejz mal, ¹⁷ abi' xtiidx reeman naj zi'c tijb guialguidx ni rigaa. Lasa' ree bén guin naj Himeneo con Fileto, ¹⁸ din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rüjndxa reeman xguialrliladx tio'p choon ree bejn. ¹⁹ Per xtiidx Dios ad zajct guidx-aan zi'c tijb guiaj ni zojbdxi'ch. Abi' loj xtiidx Dios rëb: "Dios nünbee bén naj ree xbejnman", rëb tëë loj xtiidxaman: "Graczi ree bén rëb guial nünbee reeman Dios rayal gusa'n reeman gra ni mal."

²⁰ Lën tijb yu naroob, ad ganaxt ree ni or yu' o ni pla-jt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tëë reen ma naj dxej rüjn reen sirv. ²¹ Yan ziangajc bén ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdxe.

²² Zeel basa'n xixgab xinguiag, xgab ni ad rüjnt sirv, gubajn xnejz. Binal guialrliladx, guialrën lasa' në guial yabedxe luxdoo con los demasri ree bén ni con guidib luxdoo rbejdx rniab Dad Jesucrist. ²³ Ad tildiidxil por tijb ni ad züjntil gan, o por tijb ni ad lasajct par tildiidxil, din lüj ragbee guial por zian rzuloj wadijl. ²⁴ Abi' tijb bén ni rüjn sirv Dad Jesucrist ad rayalt gacaman bén ruladx wadijl, rayal gacaman benza'c con chutëëz, rayal gacaman tijb bén ni gac gulüü ree bejn, gacaman bén pacens ²⁵ guzuxnejz tëëman con ree diidxzagdxe bén ni rüjn ree xcontr ni naj diidxli. Abi' rupent zian güün Dios guial yayüjn reeman xgab din gagbee ree-man ni naj diidxli. ²⁶ Par laa reeman loj xtramp xindxab ni rniabee laa reeman güün reeman ni rënman.

Xhienaag gac ree bejn dxej ni bigra ree

3 Rayal tëë gagbeel Timoteo guial dxej ni bigra ni zëëd ree, dád nawëëg gacan par ree bejn guial guiban reeman. ² Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdxal guinee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, ³ ad zëntri reeman ad zaya tëëtri reeman bejn ree. Ganax diidx rusquiee guinee reeman bejn ree, ad zucwëëzt güün reeman ni dxuudx ree, dád bén nayaaladx gac reeman, abi' guidxe'ch reeman ni naj zagdxe. ⁴ Yayü reeman laagajc ree bén ni rajp laa ree-man confians, sin guialrdxeb guinee reeman xhietëëz ni gui't guijc reeman, dád guilies xvalor reeman, mazri ma güün reeman ni rëntzi reeman guial loj zi'c rën Dios. ⁵ Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bén ni naj ree zian. ⁶ Din loj reeman no'ch bén ni ru ree lidx ree bejn, abi' rüjn reeman gan búngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rliladx reeman laa reeman ⁷ búngunaa guin ree zianczi rusiid reeman, per ad ragbeetczi reeman ni diidxli. ⁸ Gulal bén ni brii ree laj Janes con Jambres been xcontr ree-man Moisejs. Yan ziangajc naj ree bén ni za' ree contr ni naj diidxli, laa reeman ma guxin xquiarguejn ree-man, ad zinaltri reeman zi'c rayal chililadx reeman. ⁹ Per ad xchejt güün reeman zian, din gra ree bejn gagbee guial rusquiee reeman zi'c goc con Janes në Jambres.

Rniabee Pab sudxi'ch Timoteo loj ni basiidaman

¹⁰ Per lüj Timoteo, ragbeel zagdxe xhie rulün bejn ree, xhienaag naban, xhienaag naj da xgaban, xhienaag rliladxan, xhienaag ra'pan pacens, xhienaag rënan bejn ree, xhienaag rdaanan, ¹¹ xhie ma been ree bejn naj, xhie tëë ree guialzi ma gudëëdan. Lüj ragbee xhienaag guza'can luguiedx Antioquía, Iconio con Lистра. Dád ma guzaagdiajn por gra ni ma been ree bejn naj, per Dios babëë naj loj gra ree guialrzagdiaj guin. ¹² Abi' dunuj ree rayagbee guial gra ree bén ni rën guiban zi'c rën Dios guialrliladx reeman Jesucrist, naj sagdiaj reeman por ni güün ree bejn laa reeman. ¹³ Per ree ben mal con ree bén rusquiee, zi'cri zinal reeman nejz mal, rusquiee reeman bejn ree rusquiee tëë laagajc reeman.

¹⁴ Per lüj basnuu guzudxi'ch loj ni ma basiidil, në loj ni ma rliladxil, din lüj ragbee chu ree nin basiid lüj. ¹⁵ Abi' lüj diizd xindool nünbeel xtiidx Dios, diidx ni zile' güün lüj yudar gagbeel xhienaag naj perdon ni zëëd por guialrliladx Jesucrist. ¹⁶ Gra ni zëëd loj xtiidx Dios, por Dios zëëdan. Abi' rüjnan sirv par gusiid bejn bejn ree, par gudëë bejn consejw, par guzuxnejz bejn bejn ree, në par gagbee bejn xhienaag rayal guibanman, ¹⁷ din gagbee xbejn Dios guidiblagaa din güünman graloj ni naj ni zagdxe.

4 Delant loj Dios në delant loj Jesucrist, bén gui't zi'c tijb rey par güünman guialguxtis loj ree bén naban në loj ree bén ma güjt, naj rni lojl, ² gutie'ch xtiidx Dios. Been naguiejn gunee xtiidxaman ad chi yu'tzi mod. Been naguiejn chililadx ree bejn ni rnieel, gudilë ree bén ad ruzoobt diidx, badëë tëë consejw loj ree bejn, balüü reeman sin guial yalenya'l. ³ Din zadxin dxej ad zatiëjbt ree bejn gucaagdiajg reeman ni naj diidxli, ma güün reeman zi'ctzi rën reeman, zaguil reeman zien ree bén gulüü laa reeman ganax ni ruladx ree-man gucaagdiajg reeman. ⁴ Ad zidxga'tri reeman ni naj diidxli, mazri ma guidxga' reeman ni rbëëguijc ree bejn. ⁵ Per lüj Timoteo, gubajn nadëdguien, gudaan xhietëëz guialrzagdiaj tëdil, gutie'ch xtiidxza'c Jesucrist, been mandad ni banee Dios lojl güünl.

⁶ Din naj zamer gugüjt reeman naj, ma zidbig guial-güjt par naj. ⁷ Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal gü-nan abi' ad basa'ntan ni rliladxan. ⁸ Yan prem ni ray-

alan ma cabëzan naj, prem ni guneë Dad Jesucrist lon chi guidxin dxej, bën rüjn guialguxtis zi'c rayal. Abi' ad lotzan guneeman prem guin, në loj gra ree bën yu' luxdoo nix cabëz reeman laaman.

Ni rayal güün Timoteo

⁹ Been naguiejn diob guidganajl naj, ¹⁰ din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. ¹¹ Tijbzi Lujc za' con naj. Chi gui'til tanë Marcw din zile' güünx yudar gutie'chix xtiidx Dios. ¹² Tíquico ma guxhalan laaman luguiedx Éfeso. ¹³ Chi gui'til tanë da cajpan ni basa'nán luguiedx Troas lidx Carpo, në ree da li-bran tanë ad yayanladx tēēl guidnēl da gui'ch reen.

¹⁴ Lejandr bën naj herrer, dād zien ree ni mal ma beenman naj, per con Dios yaguijxaman gra ni beenman. ¹⁵ Gojp cudad con laaman, din laaman dād rüjn xcontraman ni ranee ree.

¹⁶ Yaloj chi guzun loj ree guxtis achutczi been naj yudar, graczi reeman guro'nladx naj. Gagnë Dios ad zidx-ga'taman ni been reeman. ¹⁷ Per Dad Jesucrist been naj yudar banee tēēman naj gojl persi baloox gutiechan xtiidxaman, persi biguiejn ree gra ree bën ad najt bën Israel laan. Zian baslaa Dios naj, zi'c rliaa tijb bejn loj beedx. ¹⁸ Abi' Dad Jesucrist, laaman yabëē naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczi! Amén.

Diidx bigra ca loj gui'ch guie

¹⁹ Bagajpdioz Prisca në Aquila në ree xfamil Onesíforo. ²⁰ Erasto baya'nman Corinto, guiáad Trófimo ragxuuman basa'nán laaman luguiedx Mileto. ²¹ Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bën rliladx Jesucrist rugajpdioz reeman lüj.

²² Dad Jesucrist gagnë lüj, abi' Dios güünle' gradi. Amén.

Gui'ch par Tito

Rxhial Pab xtiidx Dios

1 Naj Pab cayünan Dios sirv, naj najn xiapó stol Jesucrist par gūnan yudar bēn ma naj ree par Dios xhienaag chililadx reeman laaman din gagbee tēē reeman diidxli xhienaag guiban reeman delant loj Dios, ² din yu'guijc ree guial zian yaya'p ree guialnaban tiblayaa delant loj Dios. Diizd chi gad guidxliuj gacchaw, rēbaman guial yazaladxaman guialnaban guin, abi' dunuj ree rayagbee ree zagdxē guial ad rnieet Dios diidx rusquiee. ³ Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj gūnan, bēn ni rüjn dux tol ree perdon. ⁴ Cuan gui'ch guie par lüj, Tito, guial najl zi'c da xi'nan guial tiblojzi raliduladx Jesucrist. Dux Dad ree Dios con Jesucrist bēn güt por dux tol ree, yaya reeman lüj, gūnle' reeman lüj yabe'cdxe tēē reeman luxdool.

Dxiin ni been Tito guiedx Creta

⁵ Naj basa'n lüj niz Creta din gūnl ni ryaadx gūnan ni. Abi' tijbgaj luguiedx gucaabeel bēn ni nabee ree loj ree xbejn Cristo zi'c ma rnin. ⁶ Chi gucaabeel laa reeman rayal gucaabeel bēn ni naban ree zi'c rayal chitēē chu guinieeguijdx laaman, bēn ni yu' tijbzi lacheel, rililadx tēē ree xi'nman Jesucrist, bēn ni nūnbee ree bejn guial ad nabant ree xi'nman zi'ctzi rēn reex ad najt tēēt reex xin rusagloj. ⁷ Din bēn rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt gūnman xgab guial tijbzi ni guiēbaman gūn sirv, ad rayalt gacaman bēnralenya', ad rayalt gacaman bengui', ni'qui ben ruladx wadijl, ad zaguiil tēētaman mod xhienaag tia'man xmilia ree bejn. ⁸ Rayal gacaman bēn ni gudēē lidx yaya'n ree bejn chi rüjnan naguiejn, bēn ruladx gūn ganax ni zagdxē, gac tēē nabee laagajcaman. Rayal gacaman benza'c, guibanman zi'c rayal delant loj Dios nē delant loj ree bejn, ad rayalt guibanman zi'ctzi rēnman. ⁹ Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tēēman bēn ni rnieeguijdx ree xtiidxli Dios.

¹⁰ Din dād zien ree bēn ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bēn Israel ni rulüü ley loj reeman no'ch mazri lasa' ree ben guin. ¹¹ Lasa' ree bēn guin ad rayaltri yatiēēb ree gulüü reeman bejn ree, din dād zien ree yu ma beendxa reeman gra tijb famil guial

rulüü reeman laa reeman ni ad rayalt naabzi par gūn reeman gan milia.

¹² Tijb gajc bēn ladx reeman bēn rēb reeman naj bēn badēē xtiidx Dios loj ree bejn, laaman rēb guial ree bēn Creta ganax diidx rusquiee rniee reeman, dād nadoxh reeman, dād bēn nala naj reeman abi' achetczi rēn reeman gūn reeman. ¹³ Abi' waliman, zeel gudilē reeman con diidxdoxh din chile' chinal reeman xtiidx Cristo zi'c rayal, ¹⁴ ad guidxga'ri reeman ni rbēēguijc ree bēn Israel, ad gūn tēē reeman ni rniabee ree bēn ni ma guro'nladx ree ni naj diidxli.

¹⁵ Bēn naya ree xquiarguejn, achet xgab mal rüjn reeman. Per ree bēn rüjn ganax xgabdxuudx, bēn ad rililadx, achetczi xgab zagdxē rüjn reeman guial ad nayat xquiarguejn reeman, ganax ree xgab mal yu' guijc reeman. ¹⁶ Laa reeman rēb guial nūnbee reeman Dios, per rēbzi reeman din ad rüjnt reeman ni rēn Dios. Dād bendxuudx naj reeman rusagloj tēē reeman, ni'qui tijb ni rüjn sirv ad rajct rüjn reeman.

Ni rayal gulüü Tito

2 Per lüj Tito, balüü ree bejn gra zi'c tal naj xtiidxza'c Dios. ² Balüü ree bengol din guiban reeman zagdxē, gustēdguien reeman din gap bejn laa reeman respekt, guidib luxdoo reeman chililadx reeman, guiēn reeman bejn ree, taan tēē reeman xhietēēz ni sac reeman. ³ Ziangajc ree bēngunaa bengol rayal guiban reeman zi'c rayal guiban ree xbejn Cristo. Ad rayalt gū reeman xtiidx bejn, ad gac reeman bengui'. Rayal gulüü reeman bejn ree xhienaag naj ni zagdxē, ⁴ rayal gulüü reeman bēngunaa guiag ree din guiēn lacheel reeman con xi'n reeman, ⁵ din guiban tēē reeman naya delant loj Dios, nadēdguien, guinia lidx reeman, gac reeman benza'c guzoob tēē reeman xtiidx lacheel reeman chitēē chu guinieeguijdx xtiidx Dios.

⁶ Ziangajc lüj Tito, badēē consejw loj ree xinguaaw guiag din guiban reex nadēdguien. ⁷ Been naguiejn din gūnl gra xnejz din guguaa reex xhienaag gūn reex ni naj zagdxē. Chi rulüü laa reex, balüü reex zagdxē zi'c rayal, ⁸ con ganax ree diidx zagdxē chitēē xhie gudxiib ree bejn guijquil, din yaya'nxtu ree bēn ni rdxe'ch dunuj ree guial achet yadxejl gudxiib reeman duguijc ree.

⁹ Badēē tēē consejw loj ree bēn naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. ¹⁰ Ad cwan reeman xhie xieen xpatron reeman, gac reeman bēn confians din guguaa gra ree bejn xhienaag naban reeman guial

niza'cdxoon naj xtiidx dux Dad ree Dios bén rŭjn dux tol ree perdon.

¹¹ Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon. ¹² Guial rënman dunuj ree rayagbee ree guial rayal yasa'n ree ni mal con ree ni ad rŭnjt sirv ni rayën ree yaguieen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie ¹³ la'tgaj caylëjz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xguialrniabeeman, bén been perdon dux tol ree. ¹⁴ Laaman güt por dunuj ree din yabëëman dunuj ree loj gra dol abi' basiaman dunuj ree din yayajc ree xbejnzaman abi' yaguieen ree nagueijn yaguieen ree ganax ni zagdxe.

¹⁵ Gra ni ma rnin lojl balüün laa reeman sin guialrdxeb badëëd reeman consejw, bazuxnejz reeman con guialrniabee ni ca'l. Ad tiëbil gusagloj reeman lŭj.

Ni rayal güün ree bén rliladx Jesucrist

3 Basaaladx reeman din güün reeman ni rëb ree bén rniabee laa reeman në ni rëb ree guxtis, gac reeman bén nacaagdiajg susin tëë reeman par güün reeman ni naj zagdxe. ² Ad guinieeguijdx reeman bejn ree, ad quiil reeman wadijl, gac reeman benza'c në bënchaawladx con chutëëz bënan.

³ Gocli nëgajc dunujn baguieenan zi'ctzi bayënan, ad bazoobtan diidx, badxu'n loj nejz mal, baguieenan ni bayëntzan në zi'ctzi naj dux xgaban. Baguieenan ganax ni ad najt zagdxe, bayajcan bén nadëdloj, bidxe'ch ree bejn dunujn abi' badxe'ch gajcan laa reeman. ⁴ Per chi bidxin dxej dux Dad ree Dios bén baguijx por dux tol ree, balüüman loj ree bejn guial najman benza'c rën tëëman bejn. ⁵ Laaman been dux tol ree perdon, per ad guial baguieent ree xhie ni rŭjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb. ⁶ Por Dad Jesucrist bén

baguijx por dux tol ree, Dios bazaladx dunuj ree zro' da't xSprijtaman. ⁷ Dxel zi'cgajc laaman ma nulabaman dunuj ree sin dol guial najman benza'c, yayal ree guialnaban tiblayaa ni ralëjz ree.

⁸ Laan naj diidxli. Zeel rënan gusnuu gugojnl diidx guie ree bén ni rliladx ree Dios din güün reeman nagueijn güün reeman ni naj zagdxe. Abi' nine ree naj ni zojbloj në ni güün sirv par gra ree bejn. ⁹ Per ad guidxga'l diidx ni ad rŭjnt ree sirv ni rniee ree bejn, ad guidxga'l xtiidx ree bén ni ru ree xgab mazri chunin naj diidxli xdiaa gulal ree bejn. Ad guidxga' tëël bén ni rdildiidx ree por xley Moisejs, din ad najtan ni zojbloj achet tëët lasajc ni rniee reeman, achetci sirv rŭjn ree ni guin.

¹⁰ Bal por tijb lëjt rzuloj rlia' lasa' ree xbejn Cristo, guneenëman tib volt o tio'p volt, abi' bal id ruzoobaman xtiidxil mejorli babëëman lojdi. ¹¹ Din lŭj ragbee guial lasa' ree bén guie ma guro'nladx reeman ni naj diidxli abi' laagajc reeman cuniyt laa reeman por xtol reeman.

Ni rayal güün Tito

¹² Chi gaxhalan Artemas o Tíquico lod zojbil, been da't nagueijn tagnaj naj luguiedx Nicópolis, din ni ma benan xgab gadëëdan tiamp nayaag. ¹³ Been tëë yudar Apolos në licenciad Zena zi'ctzi gaquil. Badëë gra ni ryaadx reeman din chinal xnejz reeman chitëë xhie guiyaadx reeman. ¹⁴ Në ree dux compniar ree rayal gusiid güün ni naj ni zagdxe, güün reeman yudar chi rŭjn nagueijn güün reeman yudar chitëë guiban xlia'zi reeman.

Diidx bigra ca ree loj gui'ch guie

¹⁵ Gra ree bén za' con naj rugajpdioz reeman lŭj. Bagajpdioz sii gra ree bén rën dunujn por guialrliladx ni raya'pan. Dux Dad ree Dios güünle' gradi. Amén.

Gui'ch par Filemón

¹ Naj Pab, yu'n ladxguiib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayën da'tan lüj. ² Raxhaal tëen gui'ch guie par gra ree bën rliladx Jesucrist bën rado'p ree lidxil, në par Apia nètëe par Arquipo, bën naj dux compniar ree caytie'ch ree xtiidx Jesucrist. ³ Dux Dad ree Dios në Dad Jesucrist güünle' lëjt yabe'cdxe tëe reeman luxdoodi.

Rudëe Pab quixtëe loj Dios por Filemón

⁴ Beegaj chi rbedx rniaaban Dios rudën quixtëe lojman por lüj, ⁵ din ma cwa'n ruson guial dád rënrl riladxtëel Dad Jesús dád rën tëel gra ree bën ma naj xbejn Dios. ⁶ Rniaab tëen lojman guial lüj cayüjn dunujn yudar par yatie'ch ree mazri xtiidx Jesucrist, gusnuu gagbeel gra ni zagdx ni raya'p ree guial ma nayajc ree tijbzi con Jesucrist. ⁷ Dád nix yu' luxdon rabaa tëen guial rënrl dux compniar ree bën rliladx ree Jesucrist, din por lüj bijch ma bayu luxdoo reeman zagdx.

Rniee Pab por Onésimo

⁸ Zeel majs ra'pan guialrniabee par ganin conin rayal güünl guial najn tijb xi apóstol Jesucrist, ⁹ per guial rayën du lasa', zagdxeli rniaaban lojl, naj Pab, ma najn tijb bengol abi' yan yu'n ladxguiib guial rtiechan xtiidx Jesucrist, ¹⁰ rniaaban lojl por Onésimo, bën naj zi'c da xi'nan guial ma bililadxaman xtiidx Jesucrist ni ben lojman lën ladxguiib guie.

¹¹ Gocli achet sirv been Onésimo lüj, per yan zi'c rüjnman naj sirv ziangajc güünman lüj sirv. ¹² Yan caydxi'n

laaman lidxil, gunajchi'man zi'c rniajchi'l naj. ¹³ Guyënan nizujman con naj din nünman naj yudar luar lüj, la'tgaj yu'n ladxguiib guial rtiechan xtiidx Jesucrist. ¹⁴ Per ad guyëntan nünan xhienin sin xtiidxbeel din xhietëez favor güünl por naj ad züjntilan naguejn, güünlan guial guiën. ¹⁵ Bal brii Onésimo lidxil tiblädëd, per gojc zian din chile' sunëman lüj tiblayaa, ¹⁶ per ad zi'ctri tijb mojs, mazri zagdx guial loj tijb mojs, zi'c tijb bijchil bën rën. Dád rënan laaman, per lüj rayal guiën laaman mazri ad zi'ctzi tijb bejn, rayal guiën laaman zi'c tijb bijchil por Jesucrist.

¹⁷ Yan bal walil nayajc ree compniar por Jesucrist, bacca' Onésimo gunaladx naj gajcan. ¹⁸ Bal yu' xhie beenman lüj, o bal yu' xhie ralaman lojl, naj yaguix laan. ¹⁹ Abi' naj Pab, quijb naj cuca diidx guie ree: Naj yaguixan, majs rulüü ad rüjnt naguejn ganin lojl din gusaaladxil guial xt xguialnabanl ralil lon. ²⁰ Yan been naj favor guin guial rënrl Jesucrist, zian bagu' luxdon guial nayajc xbejn Jesucrist.

²¹ Naj caxhal gui'ch guie lojl abi' ragbeechaawan guial guzoobil da diidxan, ragbee tëen guial mazri naj ni güünl guial loj ni canin lojl. ²² Been tëe porvinid lënü lidxil lod yaya'nan, din zi'c cabejdx canabidi Dios, ragbeen tiëbaman guidganan lëjt.

Diidx bigra ca ree loj gui'ch guie

²³ Epafras, bën yu'në'n ladxguiib guial ratie'chan xtiidx Jesucrist, rugajpdiozaman lüj. ²⁴ Nègajc Marcw, Aristarco, Demas në Lujc, bën cayüjn gajc ree naj yudar caytie'chan xtiidx Jesucrist në reeman rugajpdioz lüj. ²⁵ Dad Jesucrist güünle' lëjt.

Gui'ch par ree bén Hebreos

Ma gunee Xi'n Dios xtiidx xDadaman

¹ Tiamp gulal, Dios guneenë ree dux béngulal ree zien volt në gadxagayaa mod por ree bén badëë xtiidx Dios loj ree bejn, ² per yan ma guneenëman dunuj ree por Xi'nman. Dios been gra ni yu' xanyabaa në loj guidxliuj por Xi'nman. Abi' gra basa'n loj Xi'nman. ³ Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por guialrniabee ni rajpaman.

Xi'n Dios naj mazri bén zobjloj guial loj ree anjl

⁴ Zianan zeel laaman naj mazri bén zobjloj loj ree xi-anjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxe gurejman xanyabaa xladbee xDadaman Dios bén rajp gra guialrniabee ⁵ Din ad yu't dxej rëb Dios loj ree anjl:

Lüj naj da xi'nman,
abi' diidz yan gulün guial lüj naj da xi'nman.
Achut tēët loj anjl rëbaman:

Naj gac Xdadil, abi' lüj gac da xi'nman.

⁶ Per chi guxhaal Dios Xi'nman loj guidxliuj, Xi'nman bén rajp guialrniabee zi'cgajc laaman, dxe rëbaman:

Gra ree da anjlan,
gol guyën da Xi'nman, gol gojp tēëman respekt.

⁷ Abi' chi gunee Dios por ree anjl, rëbaman:

Naj rün ree da anjlan zi'c bi, rün tēën laa reeman zi'c bajl.

⁸ Per por Xi'nman rëbaman:

Dad Dios, xguialrniabeel naj par tiblayaa,
abi' guidib tiamp nabeel zi'c rayal.

⁹ Lüj ruladxil ni naj zagdxe
abi' rdxe'chil ni mal.

Zeel Dios bén naj xDiosil
baneeman lüj mazri guial rabaa guial loj gra ree bén za'nël.

¹⁰ Rëb tēëman:

Dad, diidz yaloj lüj been guidxliuj në xanyabaa con gra ni yu' loj reen.

¹¹ Gra reen yu' dxej nit reen,
per lüj ma nabanl tiblayaa.

Gra reen yayox zi'c tijb lajd,

¹² gusie'til laa reen zi'c rusie't bejn xabaman,
abi' zuchaal laa reen zi'c ruchaa bejn xabaman,
per lüj ad yu't dxej guidxaa zi'c najl

abi' zianczi gapil guialnaban.

¹³ Ad yu't dxej rëb Dios loj tijb ree xianjlaman:

Gurej da ladbeen xt günan gan nabeel bén rdxe'ch ree lüj.

¹⁴ Din gra ree anjl naj sprijt cayün ree sirv loj Dios, abi' rxhiaalaman laa reeman din güün reeman yudar bén ni gap ree guialnaban tiblayaa delant loj Dios.

Ad yasa'n ree diidz ni yabëë dunuj ree loj dol

² Zeel rüjn naguiejn yayidxga' ree xtiidx Dios ni ma bacaagdiajg ree chitëë yasa'n ree xnejzaman ni ma zunaal ree. ² Din zi'c goc cumplid gra xtiidx Dios ni gunee ree anjl diidz gocli, bén ad bazoobt diidz, bén been ree dol, laa reeman bayal casti ni rayal reeman.

³ ¿Xhieza naag laa ree loj casti bal në dunuj ree ad yayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diidz yaloj, abi' ree bén biguiejn laan, laa reeman bagojn dunuj ree. ⁴ Yan zi'c ma cwa' bejn guialrignia' rent guialrignia' ren por xSprijt Dios zi'c naj xixgabaman, abi' por ree sen në ree milagr con los demazri ree ni radxaloj bejn, zian ma balüü Dios guial ni diidxli naj ree diidz guin.

Jesucrist rabëë bejn loj dol

⁵ Dios ad badëëtaman guialrniabee loj ree xianjlaman par nabeë reeman lod yaya'p ree guialnaban cüb ni cayza't ree, ⁶ din yu' tibljat loj xtiidx Dios lod rëb bejn:

Dios, ¿chu naj bénguidxliuj zeel rusaaladxil laaman?
¿Chu naj xi'n bénguidxliuj zeel rüjnl xgab por laaman?

⁷ Guyu tijb tiamp ni baletil xi valoraman guial loj ree anjl.

Per despuejs ma beenl laaman bén zobjloj,
badëël guialrniabee lojman din nabeeman gra ree ni beenchaawil,

⁸ abi' gra basa'nl lojman.

Chi badëë Dios guialrniabee lojman par nabeeman gra, achetctzi ni baya'n ni ad zanabeetaman majsi dunuj ree sta ad cayguiaat ree guial nabeeman gra.

⁹ Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man guialrniabee abi' rajp bejn laaman respekt por guialzi ni gudëdaman chi gütaman por gra bejn, abi' zian gojc guial rën Dios dunuj ree.

¹⁰ Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudëd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon.

¹¹ Bén ma naya ree delant loj Dios, por Jesucrist naya reeman. Abi' tant Jesucrist tant ree bén ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan. ¹² Zi'c ca tib lajt loj xtiidx Dios lod rëb:

Gün diidx loj ree da bichan xcwentil,
abi' chi yadxaag lasa' reeman golan
cant ree ni guza't luj zagdex.

¹³ Rëb tëëman:

Tijbzi Dios yu'guican gagnë naj;
abi' rëbaman:

Laa naj guie con ree da xi'nan xin bazaladx Dios naj.

¹⁴ Abi' zi'c bénguidxliuj tibloj najman rejn con bëë, ziangajc gojc Jesucrist chi bi'taman loj guidxliuj persi gojc güjtaman, abi' por xguialgüjtaman beenman gan loj guialrniabee ni gop xindxab loj guialgüjt. ¹⁵ Zian beenman persi babëëman bejn ree loj guialnadxeb xieen guialgüjt, bén ni guidib tiamp ni naban reeman rdxeb reeman guialgüjt zi'c rdxeb bejn xpatronman. ¹⁶ Din laaman ad bi'ttaman loj guidxliuj par gagnëman anjl ree, bi'taman par gagnëman bén naj ree xdiaa Abraham. ¹⁷ Zeel gojcaman zi'cgajczi bénguidxliuj, persi bidxin dxej gojcaman tijb bixhioz zobjloj delant loj Dios, bixhioz ni raya bejn, bén rüjn tëë cumplid xtiidx Dios persi gojc gudixxaman por xtol ree bejn. ¹⁸ Abi' guial laagajcaman guzagdiaj been tëë xindxab guial ad zuzoobtaman xtiidx Dios, zeel laaman zajc gagnë ree bén ni cayüjn xindxab naguiejn güün reeman dol.

Jesús naj mazri bén zobjloj guial loj Moisejs

3 Zeel compniar, lëjt guial ma najdi xbejn Dios, lëjt guial ma bacaabeeman lëjt par gaquidi xi'nman, gol badxe'guic Jesucrist guial laaman naj bixhioz zobjloj, bén raliduladx ree, bén guxhaal Dios loj guidxliuj. ² Din Jesucrist bazoobaman xtiidx Dios bén bacaabee laaman zi'c bazoob Moisejs xtiidx Dios delant loj ree bén Israel. ³ Per mazri rayal Jesucrist respekt guial loj Moisejs guial mazri zobjlojman, zi'c tijb bén ni rüjn yu mazri ruza't reeman laaman zagdex guial loj yu guin. ⁴ Gra yu yu'czi tijb bén rüjn laan, per Dios laaman been gra ni yu'. ⁵ Abi' Moisejs bazoobaman xtiidx Dios, beenman sirv lojman chi badëëdaman xtiidxaman loj ree bén Israel persi bagojnman laa reeman ni rëb Dios. ⁶ Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yalenya' ree abi' yalëëz ree xt dxej bigra.

Gol guzujdxi'ch loj xnejz Dios

⁷ Zeel, zi'c rëb xSprijt Dios:

Bal rucaagdiajguidi xtiidx Dios yan dxej,

⁸ ad cwexuudi zi'c been ree bén ad bacaagdiajgt xtiidxaman

chi been reeman laaman prueb chi guzu reeman loj yujbidx.

⁹ Abi' yagaj naj lod ad bacaagdiajgt ree xbëngulalidi xtiidx Dios

majsi baguiaa reeman milagr ni beenman delant loj reeman

loj tiuu ijz niz loj yujbidx.

¹⁰ Zeel bidxe'ch Dios bén guin ree, abi' rëbaman:

"Xgab ren rüjn reeman, ni'quid rüjnt reeman

naguiejn

din gagbee reeman xhienaag rënan güün reeman."

¹¹ Zianan zeel bidxe'ch Dios abi' rëbaman

guial ad yu't dxej gap reeman xguialraziiladx Dios.

¹² Zeel gol gojp cudad compniar raliduladx ree Jesucrist, chitëë chu' tijbidi guial por xixgab malidi ni rudxoon chililadxidi, guibi'cadi loj xnejz Dios bén naban.

¹³ Mejorli guixie guixie gol guneeën gol badxe' tëë luxdoo ree lasa'di naga yu' tiamp, chitëë ad zuzoobtridi xtiidx Dios guial ma been dol lëjt gan. ¹⁴ Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

¹⁵ Abi' zi'c ma nnin lojdi, loj xtiidx Dios rëb:

Bal rucaagdiajguidi xtiidx Dios yan,

ad bal gaquidi nad zi'c goc ree bén ad bazoobt xtiidx Dios gocli.

¹⁶ Abi', çchuza ree nin ad bazoobt xtiidx Dios majsi biguiejn reeman ni guneeëman? ¿Nid bén Israel ni babëë gajc ree Moisejs Egipton ya? ¹⁷ Abi', ¿nid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx? ¹⁸ Abi', ¿nid bén guin gajc reen rëb Dios loj ya guial ma been-chaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? ¹⁹ Zian rayagbee ree guial ad gojpt reeman guialraziiladx guin guial ad bililadxt reeman ni rëb Dios loj reeman.

4 Zeel yan guial sta raya'p ree promejs ni been Dios guial yaya'p ree xguialraziiladxaman, rayal yaya'p ree cudad chitëë awa raya'p ree promejs guin yaya'n tijb dunuj ree guial ad zaya'pt ree guialraziiladx guin. ² Din dunuj ree ma bacaagdiajgt ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajgt reeman diidx guin ree, guial ad bililadxt reeman laan. ³ Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree bén ad bililadxt rëb Dios:

Guial bache'ch reeman naj zeel ma benan xgab

guial ad zajpt reeman da guialraziiladxan.

Diizd chi gule'cchaaw Dios guidxliuj baloox xchiinman,

⁴ zi'c rëb loj xtiidxaman por dxej ni raziiladx bejn:

Chi gulox been Dios gra xchiinman

dxel ni goc gajdx dxej baziiladxaman.

⁵ Per par ree bén ad bazoobt xtiidxaman rëbaman:

Ad yu't dxej gap reeman da guialraziiladxan.

⁶ Bén biguiejn ree xtiidx Dios yaloj, ad gojpt reeman guialraziiladx guin guial ad bazoobt reeman xtiidxaman, per sta yu' ree bén ryaadx gap guialraziiladx guin.

⁷ Zeel chi gudëd zien ijz, Dios gulëëca zatijb dxej ni naj

yandxej. Abi' zi'c ma rnin guial rëb rey Davi tib lajt loj xtiidx Dios:

Bal riguiejndi xtiidx Dios yandxej,
gol bazoob xtiidxaman.

⁸ Din bal por Josué niajp ree bén Israel guialraziiladx, ad nuza'tt Dios zatijb dxej. ⁹ Zeel xt yandxej yu' guialraziiladx guin par ree xbejn Dios. ¹⁰ Din bén rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman.

¹¹ Zeel rayal yaguieen ree naguiejn yaya'p ree guialraziiladx guin, chitëe chu güün zi'c been ree bén ad bazoobt xtiidx Dios.

¹² Din xtiidx Dios nabanen rajp tëen guialrniabee. Mazri rëezan guial loj tijb espad ni nadoxh grop lad, rëezan lën luxdoo bejn në lën xsprijtaman. Xt lën dxijt në lën yob rëezan, abi' por laan ragbee bejn bal ni mal o ni zagdxë naj ni rënman güünman. ¹³ Achetzi ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

Jesús naj bixhioz mazri zobjloj

¹⁴ Zeel guial ma raya'p ree bixhioz ni mazri zobjloj, abi' laaman naj Jesucrist Xi'n Dios, bén ma zobj xanyabaa, rayal yasnuu yadxu'dxi'ch ree loj ni raliladx ree laaman. ¹⁵ Din Jesucrist bén naj dux bixhioz zobjloj ree laaman zajc gagnë dunuj ree chitëe güün dol dunuj ree gan. Din në laaman guzajc graloj zi'cgajc cayza'c ree, per laaman ad yu't dxej beenman dol.

¹⁶ Zeel con confianz ma zajc yabiig ree loj Dios yarejdx yanaab reeman, bén rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

⁵ Gra bén rajc bixhioz mazri zobjloj, Dios gulej laaman loj ree bejn persi rbejdx rniabaman Dios por ree bejn. Abi' lojman rudëe bejn gon par Dios në ree be ni guiët por ree xtol ree bejn. ² Abi' guial bén-guidxliuj gajc naj bixhioz guin, zeel ragbeeman xhien-aag rzajc bejn. Zeel rile' rajpaman pacens bén ni ad ragbeet xhienin rüjn, në ree bén ad zinalt xnejz Dios. ³ Abi' guial yu' chi rüjn bixhioz guin dol zeel nëman rugüjt tijb be zi'c gon par Dios por xtolaman, zi'cgajc rüjnman por ree bejn.

⁴ Abi' achut zajc guiëb guial gacaman bixhioz zobjloj, Dios naj bén rbe laaman zi'c guleman Aarón. ⁵ Zianga-jc gojc con Jesucrist, ad laataman rëb guial gacaman bixhioz zobjloj par dunuj ree, Dios bacaabee laaman, chi rëbaman:

Lüj naj da Xi'nan, abi' diizd yan
gulün guial lüj naj da Xi'nan.

⁶ Zianga-jc rëb zatib lajt loj xtiidx Dios por Jesucrist: Lüj naj bixhioz par tiblayaa zi'c goc Melquisedec bixhioz.

⁷ Chi guban Jesucrist loj guidxliuj guie dád biinman gurejdx gunabaman Dios bén zajc yabëe laaman loj guialgüjt ni gudëdaman. Dxel bidxga' Dios Jesús badëëman laaman valor guial bazoobaman gra xtiidxaman. ⁸ Majsi Xi'n Dios najman, per basiidaman bazoobaman diidx majsi guzagdiajman. ⁹ Abi' guial

guidiblagaa beenman gra ni rën Dios güünman, zeel por laaman tiblayaa ma yu' perdon par gra ree bén guzoob xtiidxaman. ¹⁰ Abi' Dios naj bén gule laaman par gacaman bixhioz zobjloj zi'c goc Melquisedec bixhioz.

Royal yasnuu yaguieenbee ree xtiidx Dios

¹¹ Dád zien ni yu' ganin lëjt por ree ni guin, per nawëeg najn par ganinan zi'c rënan guial dád nen rignia'di. ¹² Ma gojc xchej da't nünbeedi xtiidx Dios, yan bal zajcan, lëjt ma rayal gulüü ben ren ree, per lëjt sta ryaadx chu' bén gulüü lëjt xtiidx Dios stijb ni basiididi guia'xchej. Lëjt naj zi'c tijb xindoo ni rë' ganax lejch luar gawix graloj. ¹³ Abi' gra ree bén naj zi'c xindoo ad wayajct gaw graloj, ad zile't gagbee reeman conin naj xnejz. ¹⁴ Per ree bén ni cusnuu cayignia' xtiidx Dios, laa reeman naj zi'c bén ma raw graloj guial ma rignia' reeman conin naj zagdxë con tëenin naj ni mal.

⁶ Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni bagueien ree yaloj, o xhienaag yaliduladx ree Dios, ² o xhienaag tiobnijs bejn, o xhienaag yadxiib du yaa ree guijc bejn, o xhienaag yasban Dios bengüt ree, o xhienaag güün Dios xguialguxtisaman chi guidxin dxej yadëed ree cwent lojman, ³ zagdxeli naj guial yasnuu ree yasiid ree xtiidxaman. Abi' Dios gagnë dunuj ree din chile' yaguieen ree zian.

⁴ Din bén ma ragbee ree xcwent Dios, bén ma nün-bee ree xcwent ree ni yu' xanyabaa, bén ma gubajn ree con xSprijt Dios, ⁵ abi' bayuladx reeman xtiidxza'c Dios, ma ragbee tëe reeman xhienaag nabee Dios, ⁶ dxel rusa'n reeman guial chinal reeman xtiidxza'c Jesucrist, par laa reeman dád nawëeg naj chu' reeman loj xnejz Dios, din zi'c rulüü cucaa reeman Jesucrist Xi'n Dios loj crüjz zatijb din guze' ree bejn laaman. ⁷ Bénguidxliuj ree naj reeman zi'c tiblia' guidxliuj ni rë' guibidx guia ni ryajb, abi' bal rajc da't guiniaa guin par bén rüjn dxiin lojn dxel rüjnle' Dios laan. ⁸ Per bal ganax guiëjch në ree gui'xh mal rliejn lojn, dxel ad rüjntan sirv, abi' mazri zëed gajxh casti par guidxliuj guin abi' casti guin naj guial che'can.

Ni nuzujdxi'ch dunuj ree loj xnejz Dios

⁹ Ad caynatan zian por lëjt, din dunujn rayagbee guial zagdxen cayüjndi, guial zinalquidi ni rayal güündi din laadi loj xcasti Dios. ¹⁰ Abi' laaman rüjn xguialguxtisaman zi'c rayal, abi' ad zayanladxtaman ni zagdxë ni beendi në guial ma balüüdi guial rëndi laaman, abi' beendi yudar cusnuu tëe cayüjndi yudar dux compniar ree bén raliduladx ree Jesucrist. ¹¹ Per dunujn rayënan guial gusnuu güündi zian xt dxej chigra, sin guial yalenyadi din yayalidi ni cabëzidi tia'di. ¹² Ad gaquidi bén ploj, gol been zi'c been ree bén bililadx Dios sin guialralenya' tia' reeman ni rëb Dios tia' reeman.

¹³ Chi been Dios promeys loj Abraham, baza't laagaj-caman din achut bén mazri lasajc guial lojman, ¹⁴ abi' rëbaman loj Abraham: "Naj diidxli günle' lüj abi' dád zien ree xdiaal chu'." ¹⁵ Abi' Abraham guyuman pacens ad balenya'taman persi cwa'man ni rëb Dios gudëeman lojman. ¹⁶ Chi rüjn bejn jurar, rüjnman jurar por stijb bén mazri lasajc guial lojman din guiguien guial diidxliqui güünman ni rëbaman. ¹⁷ Ziangajc yan, guial rën Dios gulüüman loj ree bén ni tia' ni rëbaman guial ad yu't dxej guchaa xixgabaman por promeys ni beenman, zeel beenman jurar. ¹⁸ Tio'p ni ad zaze'nt been Dios, beenman promeys been tëëman jurar abi' rayag-bee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din güünman dunuj ree yudar guial ma raya'p ree confianz guial gac zi'c ma rëbaman. ¹⁹ Abi' guial rayagbee ree guial gac zi'c ma rëb Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guuib tijb barcw. Abi' guial nadxu'dxi'ch ree diidz xanyabaa zëëdan, ²⁰ lod ma guyu Jesús par guixhialaman nejz par dunuj ree, bén ma naj bixhioz zobjloj tiblayaa zi'c goc Melquisedec.

Jesús naj bixhioz zi'cgajc gojc Melquisedec

7 Melquisedec gojc rey Salem gojc tëëman xbixhioz Dios Bén yu' xanyabaa. Chi baza Abraham loj wadijl lod beenman gan rey gudilnë ree laaman, dxel bigchaagloj Melquisedec laaman, abi' beenle'man Abraham. ² Dxel loj gra ree ni been Abraham gan, beenman laan chii lala' abi' badëëman tijban loj Melquisedec. Melquisedec rën guiëban "rey ni rüjn xguialguxtis zi'c rayal", Abi' guial gojcaman xrey Salem rën guiëban "rey rabe'cdxe luxdoo ree bejn", din Salem rën guiëb "ni rabe'cdxe luxdoo ree bejn". ³ Melquisedec guin achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc tëë güjtaman. Laaman goc bixhioz zi'cgajc Jesús Xi'n Dios Bén ma naj bixhioz par tiblayaa. ⁴ Gol been xgab xi Bén lasajc gojc Melquisedec nadxel. Zeel xt dux béngulal ree Abraham badëë tib part loj chii ni beenman gan loj ree rey ni gudilnëman. ⁵ Loj ley rëb guial ree bixhioz Israel ni zëëd loj xdiaa Leví rajp reeman derejch tia' reeman tib part loj chii ni rajp ree Bén Israel, majsi tijbzi loj xdiaa Abraham zëëd gra ree-man. ⁶ Melquisedec majsi ad zëëdtaman loj xdiaa Leví, per cwa'man tib part loj chii ni been Abraham gan. Dxel beenle'man Abraham Bén cwa' xpromeys Dios. ⁷ Abi' dunuj ree rayagbee guial Bén rüjnle' stijb bejn, mazri lasajcaman guial loj Bén rüjnle'man. ⁸ Per gra ree bixhioz ni rtia' tib part loj chii la' ni rajp ree bejn, rëjt gajc reeman zi'cgajc dunuj ree. Sa'n Melquisedec Bén cwa' tib lia' ni been Abraham gan, loj xtiidx Dios ruza't laaman zi'c rulüü sta nabanman. ⁹ Yan zi'c rulüü yaguie'ch ree guial Leví con ree bixhioz ni zëëd loj xdiaaman Bén ni rtia' ree tib part loj chii ni rajp ree bejn në reeman badëë tib part guin loj Melquisedec loj hor ni bigchaagloj Melquisedec dux béngulal ree Abraham. ¹⁰ Din chi bigchaagloj Melquisedec dux béngulal

ree Abraham, ad wayut Leví, per loj xdiaa Abraham zëëd Leví.

¹¹ Bal por ree bixhioz Levitas nile' niajc bejn naya delant loj Dios por ley ni guyu par ree Bén Israel, dxel ad rüjntri naguiejn ni't stijb bixhioz Bén naj zi'c Melquisedec ad zi'ct Aarón. ¹² Din chi bidxaa bixhioz nëgajc ley bidxaa, ¹³ din dux Dad ree Jesucrist laaman naj bixhioz guin. Per ad lojt xdiaa ree bixhioz zëëdaman, loj diaa ren zëëdaman abi' ni'qui tijb ree xdiaaman ad gojct bixhioz. ¹⁴ Dunuj ree rayagbee guial loj xdiaa Judá zëëd dux Dad ree Jesucrist abi' Moisejs ad baza'ttaman diaa guin chi rëbaman chu reenin gac bixhioz.

¹⁵ Per laa rguien gajc guial Jesucrist naj bixhioz zi'cgajc Melquisedec, ¹⁶ guial ad lojt xdiaa Leví zëëdaman zi'c rëb loj ley par gac bejn bixhioz, najman bixhioz guial rajpaman guialrniabee guibanman tiblayaa. ¹⁷ Din ze rëb loj xtiidx Dios por laaman:

Lüj naj bixhioz par tiblayaa,
lasa' bixhioz ni goc Melquisedec.

¹⁸ Zianan zeel gojc ley guin tiblad guial ad beentan sirv guial nünj bejn zi'c rniabee ley guin. ¹⁹ Ad bile't nünj ley guin gan nibajn bejn zagdxe delant loj Dios. Per lu-ar ley guin zagdxe naj guialrliladx ni raya'p ree din por guialrliladx guin ma raya'p ree nejz par yadxin ree loj Dios. ²⁰ Gulal chi ru bejn rajcaman bixhioz, achet promeys been Dios, per chi bacaabee Dios Jesús gacaman bixhioz, Dios been promeys zi'c ca tiblajt loj xtiidxaman lod rëb:

Dux Dad ree Dios ma been promeys abi' ad zuchaat xixgabaman:

"Lüj naj bixhioz par tiblayaa, lasa' bixhioz ni goc Melquisedec."

²² Zeel zian zagdxe naj nejz cüb ni guxhal Jesús par yadxin ree loj Dios. ²³ Gulal zien gojc ree bixhioz per guial rdxin dxej rëjt reeman ad bile't niajc reeman bixhioz par tiblayaa. ²⁴ Per Jesús ad yu't dxej guiëtaman ad yu' tëët dxej lox guial najman bixhioz. ²⁵ Zianan zeel rile' rabëëman bejn ree loj xcasti Dios, Bén rën ree gap nejz par guidxin reeman loj Dios por laaman, din laaman rajpaman guialnaban par tiblayaa par cwedx guiniabaman Dios por laa reeman. ²⁶ Zeel laaman naj bixhioz zobjloj Bén rayaadx ree gagnë dunuj ree. Din laaman naj Bén naya nali, achet ni mal rüjnman, naya-man loj Dios, garen najman guial loj béndol, abi' zobjbaman xanyabaa cwë' Dios. ²⁷ Laaman ad ryadxt güünman zi'c rüjn ree bixhioz zobjloj guial guixie guixie rugüjt reeman be gui'xh zi'c gon par Dios. Yaloj por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiëtaman stijb. ²⁸ Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs rëb Dios guial diidxliczi xi'nman gac bixhioz zobjloj, laaman nayaaloj nayaman niz loj Dios zianczi.

Jesús naj dux bixhioz zobjloj ree

8 Loj gra diidx ni caydü ree ni mazri lasajc naj guial Jesucrist naj dux bixhioz zobjloj ree, Bén ni ma zo-

jb xanyabaa xladbee Dios bén rniabee. ² Ni ma rüjn-man sirv guialbixhioz, lèn yadoo ni bazoob Dios, ad bénguidxliujt. ³ Gra ree bixhioz zobjloj loj guidxliuj guie xchiin reeman naj guial rinè reeman gon rugüjt tēē reeman be ree zi'c gon par Dios. Ziangajc Jesucrist bén naj dux bixhioz zobjloj ree yu' ni badēēman loj Dios. ⁴ Abi' bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rinè ree gon loj Dios zi'c rniabee ley ni basa'nnē Dios Moisejs. ⁵ Per gra ni rüjn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh güün Moisejs yadoo, dxel rēb Dios lojman: "Baguiaa zagdxe din güünl zi'cgajczi balün lüj ruguia' Sinaí." ⁶ Per mazri zagdxe naj ni rüjn Jesucrist, bén bayal naj dux bixhioz zobjloj ree, din mazri zagdxe naj nejz cüb ni guxhalaman din chile' yadxin ree loj Dios. Abi' por nejz cüb guin mazri zagdxe naj ree xpromejs Dios par bejn.

⁷ Bal por ley nile' nibajn bejn zagdxe delant loj Dios, dxel ad rüjnt naguiejn niu nejz cüb. ⁸ Per baguiaa Dios guial ad cayüjnt ree bejn zi'c rayal zeel rēbaman: Naj rni guial guidxin dxej gaxhalan nejz cüb par ree bén Israel nē ree bén Judá.

⁹ Per nejz cüb guin ad najtan zi'c ley ni basa'nan loj xbéngulalidi chi babēn laa reeman Egipto. Abi' guial ad bazoobt reeman da diidxan zeel gulēladxan laa reeman, zian rēb Dios.

¹⁰ Rēb tēēman:

Zian ma baya'n diidx gac con ree bejn chi guidxin dxej

guijc reeman yasa'nan da leyan
abi' lèn luxdoo reeman gucanan.

Dxel naj gac xDios reeman, abi' laa reeman gac da bejnan.

¹¹ Dxejzii ree ad rüjntri naguiejn gusiid ree bejn lasa' reeman.

Ni'qui bijch reeman par güünbee reeman naj,
din gra reeman güünbee naj,
diizd xindobēz xt bengol.

¹² Abi' naj gūn perdon gra ree ni mal ni ma been ree-man,

abi' ad yu't dxej gusaaladxan xtol reeman.

¹³ Chi rēb Dios guial guixal nejz cüb guin rēn guiēban guial achetri sirv rüjn nejz gulal guin ni gop ree bejn par guidxin reeman lojman, abi' ni ad rüjntri sirv nay-ob nitan.

Yadoo ni yu' loj guidxliuj nē yadoo ni yu' xanyabaa

9 Dunuj ree rayagbee guial chi binal bejn ley ni cayguie'ch ree naj nejz gulal, loj ley guin zēēd xhienaag guiēn bejn Dios, xhie tēē naag rayal güün reeman tijb yadoo loj guidxliuj guie. ² Lèn yadoo guin guzēēb tijb lajd persi gojcan tio'p lèn. Tijb lēnan ni naj niz ro' port, lod bii laj lod nada abi' lèn guin guzobj ni ru gandel nē tijb mex ni gudxib ree guiadxtil ma gogle'. ³ Dxel stijb lèn guin xijch lajd guin bii laj lod mazzci nada. ⁴ Lèn guin guyu tijb altar ni or lod rgu'

reeman goxyl nē tijb caj ni bii laj xcaj xpromejs ree Dios. Abi' caj guin nadüüban or zi'c lēnan zi'c xijchan. Lèn caj guin yu'chaaw guiaj ni ca ree guidxii xmandamient Dios nē xvar Aarón ni бага' con stijb re or ni guyuchaaw mana. ⁵ Dxel guijs caj guin guzobj tio'p xfigur ree anjl bén la ree querubines abi' con xhiil reeman rusiaaw reeman guijs lod ruroob bixhioz zobjloj xrejñ ree be por xtol ree bejn. Per por yan ad rüjnt naguiejn guzatan mazri ree ni guin lojdi.

⁶ Chi gulox been reeman gra zi'c rayal gac lèn tijb yadoo loj guidxliuj guie, dxel guixie guixie guyu ree bixhioz lèn yadoo guin per naabzi lod bii laj lod nada, lod rguieen reeman ni rayal güün reeman par Dios. ⁷ Per stijb lèn guin lod la mazcsi nada, tijbzi bixhioz zobjloj ru ni tib volt lèn tib ijs. Abi' ad zajct chu'man bal id zinēman xrejñ ree be din güün Dios perdon xtolaman nē xtol ree bejn. ⁸ Por ree ni guin rulüü xSprijt Dios dunuj ree guial la'tgaj rüjn sirv lod bii laj lod nada ad yu't mod chu' bejn lod la mazcsi nada. ⁹ Gra ree ni guin najzi reen tijb ejempl par dunuj ree yan, din gon nē ree be ni binē ree bejn par Dios, ad beent reen sirv par nayaaloj ninialadx reeman guial ma naya reeman loj Dios. ¹⁰ Gra ree costumbr ni gop reeman zi'c ree con ni gudaw reeman, nē ree ni gu' reeman nē gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

¹¹ Din yan ma bi't Jesucrist, bén naj bixhioz zobjloj par dunuj ree, abi' por laaman ma raya'p ree yaya'p tēē ree ni ma rēb Dios yaya'p ree. Abi' mazri zagdxe naj lèn yadoo lod ma guyuman mazri lasajc yadoo guin guial ad zobjtan loj guidxliuj guie ad gojc tēētan por ree bénguidxliuj guie. ¹² Jesucrist ma guyuman lèn yadoo lod nada da't, per ad con xrejñt ree go'n dobēz o xrejñ ree dxib, guyuman con quijb xrejñman. Laaman con tib volt guyuman, ad rüjnt naguiejn güünman zian stijb abi' por laaman raya'p ree perdon par tiblayaa. ¹³ Tiamp gulal xrejñ ree dxib o xrejñ ree go'n o cobdēj ni we'c ree vagdobēz ruroob bixhioz guijs ree bejn persi naladx reeman ma naya reeman. Yan bal zian naladx reeman guial raya'n reeman naya, ¹⁴ diidxgui con xrejñ Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rēn Dios bén naban. Din por xguialrniabee xSprijt Dios, Jesucrist bén ad beentczi dol, badēē laagajcaman zi'c tijb gon par Dios.

¹⁵ Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt Jesucrist ma yu' perdon par dux tol ree nē xtol ree bén ni binal ley, gra ree bén naj xbejn Dios zian yaca' ree ni rēb Dios yaya'p ree par tiblayaa. ¹⁶ Din zi'cgajc tijb bén rlies tijb gui'ch guial chu yaya'nnē ree ni rajpaman, ad züjñt gui'ch guin dxiin xt chi ma güjtaman. ¹⁷ La'tgaj naban bén guin achet sirv rüjn gui'ch guin, rüjñan sirv xt chi ma güjtaman. ¹⁸ Zeel diizd tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulēē reeb rejñ. ¹⁹ Din chi gulox bagojn Moisejs gra ree bejn gra ni zēēd loj xley

Dios dxe' cwa'man guidxlad xil ni nayë' culor xnia ba-caaman laan guijc tib xidx yag ni la hisopo, dxe' badxe'man laan loj nijs ni no'ch xrejn ree go'n dobëz con xrejn ree dxib dxe' bacojpaman laan loj libr ley në guijc ree bejn ²⁰ rëbgajman: "Rejn guie naj tijb sen guial ma banee Dios xleyaman lojdi par gũndi laan cumplid." ²¹ Bacojp tēēman rejn guin lēn yadoo në guijc gra ree ni rüjnnē ree bixhioz dxiin lēn yadoo. ²² Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

Xrejn Jesucrist rquied dol

²³ Zeel par guiguien guial ma naya ree ni beennē ree bixhioz dxiin lēn yadoo guin, gojc naguiejn bagũjt ree-man be ree persi beenle' ree-man ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. ²⁴ Abi' Jesucrist ad lēnt yadoo ni been bēnguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. ²⁵ Jesucrist ad bi-aadxt niējtaman zien volt por dol ree, ad beentaman zi'c been ree bixhioz zobjloj guial gazobijz binē ree-man xrejn ree be lēn yadoo lod brii laj lod nada da't. ²⁶ Din bal id zian, zien volt niējtaman diizd chi goccha-aw guidxliuj. Per chi bidxin dxej bi'taman, con tib voltzi badēē laagajcaman par guiētaman din chiquied dux tol ree. ²⁷ Zi'cgajc gra bejn tib voltzi rējt ree-man, dxe' zēēd ni yadēēd ree-man cwent loj Dios. ²⁸ Ziangajc Jesucrist tib voltzi badēē laagajcaman par guiētaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignēman bēn cabēz ree laaman.

Ad leyt riquied dol

10 Ley ni basa'nnē Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz gũjt ree be par Dios zi'c gunabee ley gũn bejn, per ad guyut dxej ni naladx ree-man guial ma bayaaloj naya ree-man loj Dios. ² Din bal ninialadx ree-man guial ma naya ree-man con tib volt ni bagũjt ree-man be ree par Dios, dxe' ad ryaadxttri nũjn ree-man zian guial ma ragbee ree-man achetri xtol ree-man. ³ Per ad gunaladxt ree-man zian, gazobijz rusaaladx xtol ree-man chi rugũjt ree-man be ree par Dios, ⁴ din xrejn ree go'n në xrejn ree dxib ad zajct chiquiedan xtol ree bejn.

⁵ Zeel chi bi't Jesucrist loj guidxliuj, rēbaman loj Dios: Ad rēntil xrejn ree be

ni'qui los demazri ree ni ridnē bejn par lűj, zeel baneel naj cuerp ni ra'pan loj guidxliuj guie.

⁶ Ad rēntril guial ruze'c ree-man be ree par lűj ni'qui xrejn ree be ni ridnē ree-man por xtol ree-man.

⁷ Zianan zeel rēn:

"Laa naj guie, Dad Dios, zialan par gũnan zi'c rēnl,

zi'c ca loj libr por naj."

⁸ Jesucrist yaloj rēbaman guial ad rēnt Dios xrejn ree be, ni'qui los demazri ree ni rinē bejn par laaman, ni'qui guial ruze'c ree-man be ree por xtol ree-man zi'c rniabee ley gũn ree-man. ⁹ Chi gulox rēb Jesús zian, dxe' rēb tēēman: "Laa naj guie, Dad Dios, zialan par gũnan zi'c rēnl." Zianan baloox Jesucrist guial rinal ree costumbr ni rēb loj ley abi' guxhalaman tijb nejz cűb par yadxin ree loj Dios. ¹⁰ Yan ma nayajc ree naya de-lant loj Dios guial ma been Jesucrist zi'c rēn Dios, badēēd laagajcaman gũjtaman por xtol ree bejn, con tib volt par tiblayaa, ad ryaadxt gũnman zian stijb.

¹¹ Gra ree bixhioz Israel guixie guixie za' ree-man cayũjn ree-man gra ni rniabee ley gũn ree-man, abi' guixie guixie rugũjt ree-man be ree par Dios. Abi' majsi zien volt rűjn ree-man zian per ad rquiedt gualrugũjt be guin ree xtol ree bejn. ¹² Per Jesucrist con tib volt badēēd laagajcaman gũjtaman por xtol ree bejn, ad ryaadxt gũnman zian stijb. Dxe' gurejman xladbee Dios, ¹³ lod cabēzaman guidxin dxej nabeeman loj gra ree bēn rdxe'ch laaman. ¹⁴ Din laaman con tib volt badēē laagajcaman gũjtaman por xtol ree bejn dxe' tiblayaa ma naya ree bēn rliladx laaman. ¹⁵ Abi' dunuj ree rayagbee ree guial walin din por xSprijt Dios zēēd ree diidx ni ca loj xtiidx Dios guial rēb Dios:

¹⁶ Zianan ma baya'n diidx gac con ree bejn chi guidxin dxej: Guijc ree-man gusa'n da leyan abi' lēn luxdoo ree-man gucanan

¹⁷ Abi' rēb tēēman:

Ad yu't dxej gusaaladxan xtol ree-man në graloj ree ni mal ni ma been ree-man.

¹⁸ Abi' zi'c ma yu' perdon par dol, ad rűjntri naguiejn guiēt ree be por dol.

Royal yubiig ree loj Dios

¹⁹ Zeel compniar raliduladx ree Jesucrist sin guial-rdxe' ma zajc yadxin ree lod zobj Dios por xrejn Jesucrist, ²⁰ din chi badēēd xcuerpaman persi gũjtaman, guxhalaman tijb nejz cűb ni zidnē gualnaban par dunuj ree. ²¹ Yan zi'c ma rniabee Jesucrist dunuj ree, bēn naj bixhioz zobjloj xanyabaa, ²² con guidib du luxdoo ree ma zajc yubiig ree loj Dios con tijb gualrliladx ni wali ree raliduladx ree laaman, con tijb quiarguiejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. ²³ Zeel royal yadxu'dxi'ch ree loj ni raliduladx ree Dios, din laaman zũjn cumplid xtiidxaman zi'c ma rēbaman.

²⁴ Royal yaguieen ree xgab xhienaag yalu' ree luxdoo ree dux compniar ree yayēn tēē du lasa' ree yaguieen tēē ree ni naj zagdx. ²⁵ Ad rayalt yaguieen ree zi'c rűjn ree bēn ad rejtri ree lod radxaag lasa' ree dux compniar ree par chignia' ree-man mazri xtiidx Dios, royal yalu' ree luxdoo du lasa' ree, abi' mazri yan guial ma rayagbee ree guial ma zidyob dxej gui't Jesucrist stijb.

²⁶ Din bal ma rayagbee ree xtiidxli Jesucrist abi' baguieen ree xgab yaguieen ree mazri dol, dxe' ad yu'tri por chu zajc yayajc ree perdon. ²⁷ Ni cabēsi dunuj

ree naj xguialguxtis doxh Dios, tijb bajl lod yayal ree bén ad ruzoobt xtiidxaman. ²⁸ Chi bal id been tijb bejn zi'c rniabee ley ni basa'nnē Dios Moisejs, abi' yu' tio'p choon testiw guial ad beent bén guin zi'c rniabee ley guin, dxei ad yu'tri mod laaman loj guialgüjt ni rayalaman. ²⁹ Yan gol been xgab, i'xipxi mazri castiro' yayal bén rnieeguijdx xSprijt Dios bén ragnē dunuj ree! Bén ni naladx guial achet lasajc Xi'n Dios, abi' rüjnman desprejs xrejnman, rejn ni rulüü guial gac zi'c rēb Dios, rejn ni rusia xtol bejn. ³⁰ Dunuj ree rayagbee guial rēb Dios: "Naj rayal gūn guialguxtis, naj gudē ni rayal bejn." Rēb tēēman: "Dios naj bén ni yaca' cwent por ni cayüjn bejn." ³¹ i'Abi' nadxeb yayal bejn xcasti Dios bén naban!

³² Per lējt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra guialzi ni gudēdidi. ³³ Yu'di zien loj da't guialzi badēd ree bejn lējt, abi' baze' reeman lējt delant loj ree bejn, yu' tēēdi ad gulēēladxtidi bén guzac ree zian. ³⁴ Ad gulēēladxtidi bén ni guyu ree ladxguib, abi' chi baca' ree bejn gra ni rajpidi, babaagajquidi guial ma ragbeedi mazri lasajc ni rajpidi xanyabaa, nē ree ni rajpidi ni, taan reen tiblayaa. ³⁵ Zeel ad gusa'ndi guialrliladxidi Jesucrist, din por guialrliladx guin dād zagdxē naj ni tia'di. ³⁶ Rüjn naguiejn gapidi pacens din chile' güündi zi'c rēn Dios, zian tia'di ni ma rēbaman guneeaman lojdi. ³⁷ Din loj xtiidx Dios rēb:

Nayob, dād nayob gui't bén naj gui't,
ad zaglaataman.

³⁸ Abi' bén naban zi'c rēnan,
guidib tiamp ni nabanman rliladxaman naj.
Per bal gusa'nman ni rliladxaman naj,
ad zabaanē'tan laaman.

³⁹ Per dunuj ree ad nayajct ree zi'c ree bén rusa'n ni rliladx reeman Jesucrist abi' rayal reeman casti, dunuj ree nayajc ree bén rliladx Jesucrist diidxli par chitēē yayal ree casti.

Guialrliladx Dios

11 Yan, xhienin naj guialrliladx? Guialrliladx naj guial guidiblagaa yaliduladx ree gac zi'c caylējz ree gac, nē guial waliqui ni raliduladx ree ni ad raguiaat ree. ² Dux bēngulal ree baya'n reeman zagdxē delant loj Dios guial bililadx reeman laaman.

³ Zi'c raliduladx ree Dios, dunuj ree rayagbee guial con xtiidxaman beenman xanyabaa nē guidxliuj nē gra ni raguiaa ree, achetzi ni beenman con ree ni raguiaa ree yan.

⁴ Guial bililadx Abel Dios, zeel zagdxē naj gon ni badēēman guial loj Caín, abi' baya'nman zagdxē delant loj Dios abi' cwa' Dios gon ni bazaladx Abel lojman. Zian majsi ma güjt Abel, per sta rguiajt xhienaag bililadxaman Dios.

⁵ Guial bililadx Enoc Dios zeel ad güjttaman, guidib nabanman ziaman xanyabaa abi' ad badxejlt ree bejn laaman guial ma zignē Dios laaman. Per chi gadaman chignē laaman, loj xtiidx Dios rēb guial bayuladx Dios zi'c gubanman. ⁶ Abi' achut zajc güün zi'c rēn Dios bal

id rliladxaman laaman. Chutēēz bén rēn gap nejz par guidxinman loj Dios rayal chililadxaman guial yu' Dios chililadx tēēman guial laaman rudēē ni rēbaman gudēēman loj ree bén raguil laaman.

⁷ Guial bililadx Noé Dios dxei chi rēb Dios lojman guial gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni rēb Dios gac. Dxei por guialrliladx guin biguien guial gra bēnguidxliuj rayal casti ni rēb Dios, abi' baya'n Noé zagdxē delant loj Dios guial bililadxaman xtiidxaman.

⁸ Ziangajc Abraham guial bililadxaman Dios, bazoobaman xtiidxaman chi rēbaman lojman din grii ladxaman cheman lod tia'man guidxliuj ni gudēēd Dios lojman. Abi' brii ladxaman ni'quid ragbeetaman banguin cheman. ⁹ Guial bililadxaman Dios, gubajman zi'c benzit loj guidxliuj ni rēb Dios gudēēdaman lojman. Gurejman lēn ree carp ni naj nē guid, ziangajc Isaac nē Jacob nē laa reeman rayal guidxliuj guin.

¹⁰ Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

¹¹ Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial rüjn Dios cumplid xtiidxaman. ¹² Zian gojc majsi bengol da't ma naj Abraham per gojcaman famil. Dād zien ree xdiaaman guyu zi'c ree bajl xanyabaa, zi'c ree üx ni riga' ro' nijsdoo ni ad zile't guiyab.

¹³ Gra ree bén ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promejs ni been Dios loj reeman, per guial rliladx reeman ragbee reeman guial zajc zi'c rēb Dios abi' rabaa reeman. Laa reeman ragbee guial tio'p choon dxejzi zēēd reeman loj guidxliuj guie ad tiblayaat. ¹⁴ Abi' ree bén rniee zian, zian rguienchaaw guial sta rguil reeman lod diidxli gac ladx reeman. ¹⁵ Din bal por guidxliuj lod guza reeman cayüjn reeman xgab, dxei zile' nayejc reeman ni stijb. ¹⁶ Per laa reeman mazri rüjn reeman xgab por tijb luar lod naj mazri zagdxē, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

¹⁷ Guial bililadx Abraham Dios, dxei chi been Dios laaman prueb din gugüjt xi'nman Isaac din gudēēdaman laaman zi'c gon par Dios, cwējb Abraham majsi tijbzi Isaac guin naj xi'nman, majsi ragbee tēēman guial rēb Dios lojman: ¹⁸ "Por xi'n! Isaac gacxhieje da't xdiaal."

¹⁹ Per Abraham yu'guijcman guial rajp Dios guialrniabee xt par yasbanman bengüt ree, abi' zi'c rulüü baban xi'nman stijb chi gudēdaman prueb guin.

²⁰ Ziangajc Isaac por guialrliladxaman Dios dxei chi beenle' ree xi'nman Jacob con Esaú, rēbaman xhienaa gac con tijbgaj reeman. ²¹ Abi' ziangajc Jacob guial bililadxaman Dios ziangajc beenle'man grop ree xi'n Xiēb chi ma guidxin hor guiētaman. Dxei cwa' yagrliladxaman abi' gurejdx gunabaman Dios. ²² Ziangajc Xiēb guial bililadxaman Dios, chi ma guidxin hor guiētaman, rēbaman guial grii ree bén Israel Egipto, abi'

rëbaman loj reeman xhienaag gүүnnë reeman xdxijta-man.

²³ Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon bëëw guial baguiaa reeman najx xindoza'cdxoon, abi' ad bidxebt reeman guial rëb ben naj rey guial guiët gra ree xindobëz. ²⁴ Abi' chi goc Moisejs guin bengol, guial bililadxaman Dios, gojc xixgabaman cwexuuman niaj-caman xi'n xi'ndxa'p rey Egipto. ²⁵ Par laaman zagdxeli naj sagdiajman con ree xbën Israelaman, luar nūjn-man dol niro'nladxaman laa reeman din niajpaman ni rënman, ni ad rdaant ree par tiblyaa. ²⁶ Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios. ²⁷ Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rulüü ruguiaaman Dios ben ad zajct guguaa ree bejn.

²⁸ Në guial bililadx Moisejs Dios, beenman lanij pascw, abi' gunabeeman baroob ree ben Israel rejn ro' xport lidx reeman, din chi täd xianjl guialgüjt, ad zugüjttaman xi'n yaloj ree ben Israel. ²⁹ Guial bililadx ree ben Israel Dios, gudëd reeman zi'c loj yujbidx lod bixal loj nijsdoo la nijsdoo xnia. Per chi guyën ree ben Egipto nidëd reeman, loj hor guin bayaaw nijs guin dx-el gu' reeman nijs abi' güjt reeman.

³⁰ Guial bililadx ree ben Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. ³¹ Abi' Rahab ben goc bëngunaa dxuudx luguiedx Jericó, guial bililadxaman ad güjtta-man chi güt ree los demazri ree ben ladxaman ben ad bazoobt ree diidx, guial baca'man ben Israel ni we ree bigla'ch luguiedx guin.

³² Yan, xhie mazri ganin lojdi? Ad zaaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree ben badëë xtiidx Dios loj ree bejn. ³³ Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni rëb Dios loj reeman abi' basiaaw reeman ro' ree beedx. ³⁴ Guzuj reeman loj bajl ro' abi' achet goc reeman, gulaa reeman loj guialgüjt con espad, guyu reeman gojl chi rulüücüzi ad yu't reeman gojl, guzudxi'ch reeman loj wadijl abi' balaagdx reeman benzit ni gudilë reeman. ³⁵ Në ree bëngunaa ni güt ree xfamil, por guial bililadx reeman Dios baban ree xfamil reeman stijb.

Per yu' ree bejn majsi güjt reeman, per par laa reeman mazri zagdx guzagdiaj reeman loj ree ben bagüjt laa reeman, luar nusa'n reeman guialrliladx reeman Dios par gap reeman stijb guialnaban cüb ni mazri lasajc. ³⁶ Yu' täd reeman guzagdiaj baze' ree bejn laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxgui-ib. ³⁷ Yu' reeman bagüjt ree bejn con guiaj, yu' täd reeman bagüjt reeman gulëëxhün reeman laa reeman con sierr, güjt täd reeman con espad. Yu' täd reeman biza gra lad najcw reeman guid xab xiil në guid xab dx-ib, probza laa reeman naya biza reeman, graloj been-

në ree bejn laa reeman. ³⁸ Biza reeman niz loj yujbidx, niz ruguia' ree, në graloj lën ree guiajbiliaa. Bén guin ree ad rayal nibajn reeman loj guidxliuj guial däd ben-za'c gojc reeman. ³⁹ Abi' majsi biguien guial gra reeman diidxli bililadx reeman Dios, per ad cwa't reeman ni rëbaman loj reeman. ⁴⁰ Din laaman beenman xgab tijb ni mazri zagdx par dunuj ree, abi' ad gojc gajt ni rëbaman loj reeman din tijbzi yaca' ree ni rëbaman con laa reeman.

yunaal ree Jesús

12 Zeel, zi'c ma bacaagdiajg ree por zien ree bejn xhienaag bililadx reeman Dios, rayal yasa'n ree tiblax gra dol në gra ree ni rudxoon yaguieen ree zi'c rayal, ad zalenya' täd ree yunaal ree nejz ni ma balüü Dios dunuj ree. ² Rayal yadxeguijc ree Jesucrist din por laaman zäd guialrliladx ni raya'p ree abi' por tijbzi laaman rayaalox guialrliladx ni raya'p ree. Gudaanman guialzi ni gudëdaman loj crüz, ad batutaman güjta-man zian din ragbeeman guial chi ma gulox guzagdiaj-man, dxel gui't guialrabaa. Abi' yan ma zojbaman xlad-bee Dios xanyabaa.

³ Gol been xgab xhienaag guzagdiaj Jesucrist chi basagdiaj ree bëndol laaman, chitëë yadxaguidi, ad yalenya'di por ni cazajquidi. ⁴ Din majsi cusagdiaj ree bejn lëjt guial cayündi nagueijn ad cayüntidi dol, per ad wazujtidi loj guialgüjt por zian. ⁵ Wen ma bayan-ladxidi ya xhienaag banee Dios lëjt consejw najdi xi'n-man? Loj xtiidxaman rëb:

Xi'n, bidxga' zi'c runee dux Dad ree Dios lüj consejw, ad bal yalenya'l chi guzuxnejzaman lüj.

⁶ Din rüjnnaaman ben ni naj ree xi'nman, ruzuxnejzaman laa reeman guial rënman laa reeman.

⁷ Zeel gol gudaan guialzi, din zagdx najn par lëjt. Rüjnnë Dios lëjt zi'c rüjnnë bejn xi'nman, wën yu' dad ad ruzuxnejz xi'n ya? ⁸ Yan bal id ruzuxnejz Dios lëjt zi'c rüjnnë gra ree xi'nman, rën guiëban guial ad najti-di xi'nman diidxli, ad najtaman xDadidi. ⁹ Lëjt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan, xchexc di ad ree yazoob xtiidx dux Dad ree Dios ben yu' xanyabaa, din yaya'p ree guialnaban con laaman? ¹⁰ Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdx. Per Dios ruzuxnejzaman dunuj ree par tijb ni mazri zagdx par dunuj ree, ruzuxnejzaman dunuj ree din yabajn ree naya zi'c laaman. ¹¹ Diidxliczi achet guialnaa naj nix loj hor ni cadëdilan, ragnaalil. Per ree ben ni rusiid ru-zoob diidx zian, laa reeman naban zagdx, naalyuj de-lant loj Dios.

Ad cwëëladxidi xtiidx Dios

¹² Zeel gol bagu' luxdoodi, gol badëëd valor lëjt gajc zi'c tijb ben raca'ladx chi ma badxag da'taman. ¹³ Gol been nagueijn gol gubajn xnejz, din ree ben ragdx

xhie güün reeman, ad gusa'n reeman xnejz Dios, chu' luxdoo reeman zagdxé chinal reeman laan.

¹⁴ Gol been naguiejn guibandi zagdxé con gra ree bejn, gol gubajn naya delant loj Dios din bén ad nabant naya ad zile't guguaaman dux Dad ree Dios. ¹⁵ Gol gojp cudad chitéé chu' tijbidi gusa'n tiblax zic' rên Dios gagnëman lëjt chitéé chu' tijbidi gac zic' gui'xh nala ni rûjn guialquia abi' guxhiinan gra xcompniaridi.

¹⁶ Ni'qui tijbidi ad rayalt sunëdi bén ad najt lacheelidi, ad cwe'quidi tiblax ni zagdxé ni zëéd ree por Dios chitéé saquidi zic' guzac Esaú, por tijb guialraw bato'-man guialrniabee ni rayalaman guial najman bén yaloj loj bijchaman. ¹⁷ Abi' lëjt ragbee guial chi guyën Esaú nûjnle' xdamaman laaman ad beenle'taman laaman zic' rayalaman. Majsi dád biinman gunabaman laan, per ad bile't nuchaaman ni beenman.

¹⁸ Lëjt gadidi chibig lod ad najt par gugaalidi zic' gubig ree bén Israel gulal guijc guia' Sinaí lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj zic' bidojn. ¹⁹ Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rneenëman laa reeman. ²⁰ Din ragbee reeman guial nawëég naj ni gunabee Dios güün reeman chi rëbaman: "Chutééz bejn o be gui'xh ni gugaal guijc guia' guie rayal guiëtaman o guiëtib con guiaj o con lans." ²¹ Nadxeb naj ni baguiaa reeman xt Moisejs rëb: "Rnijn guial tant rdxëban."

²² Per lëjt ma bibiguidi loj Dios, ad guzajctidi zian. Ma yu' nejz par guidxindi ruguia' Siôn, xanyabaa lod naj Jerusalén ladx Dios bén naban, lod nadxag lasa' ree zien da't ree anjl, ²³ dád nix yu' luxdoo reeman rên reeman laaman lod yadxajc lasa' ree xbejn Dios bén ni ma ca ree laj loj libr xanyabaa. Ni zojb Dios, bén yanab cwent loj gra bejn, ni tée za' xSprijt ree bén guban zic' rayal laa reeman ma naya reeman por Dios. ²⁴ Ni gajc zojb Jesucrist, bén guxhal nejz cüb ni raya'p ree par yadxin ree loj Dios. Chi güt Abel xrejnman gunab gac guialguxtis, per con Jesucrist ad gojct zian, güjtlaman, guxhie' tée xrejnman par yayajc ree perdon.

²⁵ Zeel gol gojp cudad gol bidxga' Dios, laaman najman bén rneenë dunuj ree. Din bal Bén ni ad bidxga't ree xtiidx Moisejs Bén badëéd xtiidx Dios loj guidxliuj guie ad gulaat reeman loj casti ni rayal reeman, didxgui dunuj ree nid zayal ree xcasti Dios ya bal id zayidxga' ree xtiidx Jesucrist, Bén guza diizd xanyabaa din guinieenëman dunuj ree. ²⁶ Chi gunee Dios béngulal ree ruguia' Sinaí, binij guidxliuj. Per yan ma rëbaman: "Gunin guidxliuj zatijb, per ad guidxliujtzi, nê xanyabaa." ²⁷ Chi rëb Dios guial güünman zian zatijb, rên guiëban guial gunijman gra ni beenman, din chiquied ni rayal chiquied din yaya'n ni ad rayalt chiquied. ²⁸ Zeel rayal yadëéd ree quixtëé loj Dios guial ma rayal ree lod canabeeman, lod ad yu't dxej nit, abi' con respekt nê guialrdxeb yaguieen ree ni ruladxaman. ²⁹ Din dux Dios ree naj zic' tijb bajl ni ruze'c gra.

Xhienaag güün bejn ni yayuladx Dios

13 Ad cwëz guiëndi xcompniaridi Bén riladx ree Jesucrist. ² Ad yayanladxidi gudëé lidxidi yaya'n ree Bén ri't, din zian yu' ree Bén baca' ree xianjl Dios sin guial gagbee reeman chunin.

³ Gol basaaladx Bén yu' ree ladxguib, gol gunaladx guial nê lëjt yu' ladxguib con laa reeman. Gol been tée xgab por ree Bén ni cazagdiaj, gol gunaladx guial nê lëjt cazagdiaj.

⁴ Gol gojp respekt guialruxhliia, ad gusquiee lacheelidi. Din Dios zudëédaman casti Bén za'nê xinguaaw o béngunaa ren, nê gra ree Bén ni rûjn ree ni dxuudx con ree Bén ad najt lacheel reeman.

⁵ Ad sëébladxidi milia, gol baya'n conform con ni rajpidi din Dios ma rëb: "Gra dxej za'n con lûj, abi' ad yu't dxej gabëladxan lûj." ⁶ Abi' con confianz zajc yaguie'ch ree:

Da Dadan Dios naj Bén ragnë naj ad rdxëbtan majsi xhietëéz güünne ree bejn naj.

⁷ Gol basaaladx ree Bén ni gunabee ree lojdi, Bén ni balüü ree lëjt xtiidx Dios. Gol been xgab xhienaag gubajn reeman gol binal tée zic' bililadx reeman Jesucrist.

⁸ Abi' Jesucrist laagajcaman nieey, laagajcaman yan nê zianczi. ⁹ Ad tiëbidi gusquiee graloj ni rulüü ree bejn lëjt, din ad najt reen zic' rayal chinalidi Cristo. Mazri zagdxé gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar rûjn ree delant loj Dios.

¹⁰ Dunuj ree raya'p ree tijb Bén güt por dunuj ree, laaman naj zic' tijb xgon bejn por xtolaman, gon ni ad zajct gaw ree bixhioz rûjn ree sirv lën yadoo guin.

¹¹ Bixhioz zojbloj guin, laaman rinë xrejn ree be ni rudëéd ree bejn zic' gon por xtol reeman, rinëman rejn guin lën yadoo lod rayal chinëman laan. Dxel ree begüt guin re'c reeb ro' guiedx lod achut zojb. ¹² Zian-gajc gojc con Jesucrist, ro' guiedx Jerusalén güjtaman par gusiaman bejn xtol reeman por xrejnman. ¹³ Zeel yunaal ree Jesucrist majsi gulëe reeman laaman luguiedx Jerusalén, nê majsi xhietëéz guialxtu o guial-rzagdiaj yadüüd ree zic' laaman. ¹⁴ Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa. ¹⁵ Zeel con xyudar Jesucrist ad yacwëéz ree yadëéd ree quixtëé loj Dios, laan naj gon yadëéd ree lojman, abi' zian raxhoobdol ree guial nayajc ree xbejnman. ¹⁶ Ad yayanladxidi güündi ni zagdxé güün tée lasa'di yudar con ni gactzidi, din laa reen naj ni ruladx Dios.

¹⁷ Gol bazoob xtiidx ree Bén rniabee lojdi, Bén rulüü ree lëjt xtiidx Dios. Gol gojp reeman respekt din laa reeman ruguiaa lëjt din chinalidi xtiidx Dios, guial ragbee reeman yadëéd reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güünan lëjt.

¹⁸ Gol gurejdx gunab Dios por dunujn. Dunujn rayagbee guial achet ni mal cayguieenan, abi' rayënan guial

gra ni yaguieenan, yaguieenan laan xnejz. ¹⁹ Rniaaban lojdi din cwedx guiniabidi Dios por naj, din guneeman permis diob guialan din gazun con lëjt zatijb.

Diidx bigra ni bacan loj gui'ch guie

²⁰ Dios bén rabe'cdxe luxdoo ree bejn, bén basban Jesucrist, rajpaman dunuj ree zi'c rajp tijb bejn xiil, por xgualgüjtaman zianczi ma raya'p ree nejz par yadxin ree loj Dios, ²¹ laaman gagnë lëjt par gra ni naj zagdxë din chile' güündi zi'c rënman. Laaman gagnë dunuj ree din yayajc ree zi'c rënman guial ma nayajc ree ti-

jbzi con Jesucrist. ¡Laaman rayal yaya'p ree respekt zianczi! Amén.

²² Compniar raliduladx ree Jesucrist, ad naroobt gui'ch guie, per rniaaban lojdi ad yalenya'di por ree diidx ni canin lëjt cunen lëjt consejw. ²³ Rugojn tēen lëjt guial ma barii dux compniar ree Timoteo ladxguiib abi' bal nayob gui'taman niz guie, dxel du gropan yo'p yudganajn lëjt.

²⁴ Gol bagajpdioz gra ree bén rniabee lojdi bén ni rulüü ree lëjt, në gra ree dux compniar ree bén rliladx ree Jesucrist. Abi' ree bén Italia rugajpdioz reeman lëjt.

²⁵ Dios güünle' gradi. Amén

Gui'ch bacaa Santiaaw

Rxhiaal Santiaaw xtiidx Dios

1 Naj naj Santiaaw, cayünan xchiin Dios në xchiin Dad Jesucrist, rugajpdiozan gra ree bén naj xdiaa Israel, nare'chidi guidib guidxliuj.

Quiargueijn zëed loj Dios

² Gradi compniar raliduladx ree Jesucrist, rnin lëjt, gol babaa majsi xhietëez loj guialrzagdiaj tédidi. ³ Lëjt ragbee, chi rdëdidi gralojn guial riladixidi Dad Jesucrist, zian rusiidiidi gapidi pasens. ⁴ Per gol been naguiejn güün pasens guin lëjt yudar din gaquidi zi'c rën Dios, gusnuudi loj xnejzaman, chitëë guiyaadixidi xhienin.

⁵ Bal chu lëjt riaadx chu' mazri xquiargueijn, gol gunab xquiargueijndi loj Dios. Laaman gunee gra ni riaadixidi, ad zabexuutaman gunee laan. ⁶ Per rayal chililadixidi guial gunee laan, ad rayalt chu' nawëeguidi, din bén ru nawëeg luxdoo naj zi'c xtüjp nijsdoo ni rinë bi ni guiezi. ⁷ Bén naj zian ad cwëzidi gunee Dios ni guiniabidi, ⁸ din bén ru nawëeg, ad rüjn-taman tijbzi xgab, ad rinal tëetaman tijbzi nejz.

⁹ Lëjt guial najdi bénprob gol babaa, din loj Dios najdi bén zojbloj. ¹⁰ Guiáad lëjt benrijcw, gol babaa guial ma ragbeedi achet lasajc guialrijcw loj Dios, din guialrijcw guin najn ni téd zi'c rdëd guiaa rial dajn. ¹¹ Lëjt ragbee chi rbëë loj gubijdx gojl, dxel rucwiidxan gui'xh, rba'y ree xguiaan, dxel ad nixtri rguenan. Zian-gajc benrijcw yu' dxej guiëtaman majsi galay gra ree ni rajpaman.

Bén rdaan ree rdëd loj guialrzagdiaj

¹² Chabaa bén rzudxi'ch loj xnejz Dios rdaan tëëman xhietëez rzajcaman guial riladixaman Jesucrist. Chi ma gudaanman loj guialrzagdiaj, tia'man coron rayalaman, laan naj guialnaban tiblyaa ni cwëb Dios yazal-adxaman loj ree bén rën laaman.

¹³ Bal chu rüjn xgab güün ni mal, ad najtan ni nal-adxaman guial Dios rudxe' xgab guin guijcaman. Din ad yu't dxej guiën Dios güünman ni mal, ni'quid rgu' tëetaman xgab guijc bejn güünman ni mal. ¹⁴ Xixgab-mal gajc bejn rudëë laaman gan güünman ni mal.

¹⁵ Zeel por xgabmal guin rüjn bejn dol, dxel chi ma rniabee dol guin laaman, stijbzi xcasti Dios rayalaman.

¹⁶ Gradi compniar raliduladx ree Jesucrist, diidxli rënan lëjt, ad gusquiee lëjt gajc. ¹⁷ Graczi xgab zagdxë në gra ni za'c zëed loj Dios, bén been gra ree bajl yu'

xanyabaa. Ad yu't dxej guidxaaman, zianczi rüjnman ni zagdxë.

¹⁸ Guial guyënman, zeel baneeman guialnaban tiblyaa duloj ree, guial ma raliduladx ree xtiidxaman, din yayajc ree zi'c ree bin yaloj yaca'man loj gra ree ni beenman. ¹⁹ Zeel yan ma ragbeedi nine ree.

Rayal yasa'n ree gra ni mal riga' loj guidxliuj

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yooladixidi guial guinieedi ni'qui guial yalendi, ²⁰ din bén ralen ad zajct güünman ni rën Dios. ²¹ Zeel gol gulëeladx gra ni ad najt zagdxë në gra ni mal riga' loj guidxliuj guie, gol gojc bënchaawladx, gol bazoob xtiidx Dios ni ma bacaagdiajguidi, din laan yabëë lëjt loj dol. ²² Per gol been zi'c rëb xtiidxaman, ad aal rucaagdiajgzidan, chitëë gusquiee lëjt gajc. ²³ Din bén rucaagdiajzi laan abi' ad rüjntaman zi'c ma bacaagdiajgaman, najman zi'c tijb Bén rugiaa loj guiaawajn, ²⁴ per chi ma ziaman, rayanladxaman xhienaag naj lojman. ²⁵ Per bén ad rayanladxt ni bacaagdiajgaman rüjnman naguiejn chignia'man xtiidx Dios mazri, din laan nayaaloj rabëë tëen dunuj ree loj dol. Rzudxi'chaman loj nejz guin, rüjn tëëman ni rën Dios. Bén güün zian chu' luxdooman zagdxë por ni cayünman.

²⁶ Bal chudi naladx zinalidi xnejz Dios zagdxë per ad rajptidi cudad xhienin guinieedi, cusquiee lëjt gajc, dxel achet lasajc guial naladixidi zinalidi xnejz Dios. ²⁷ Din par dux Dad ree Dios Bén zinal xnejzaman zagdxë naj Bén rüjn yudar xindo bizëjb ree në ree bëngunaa bizëjb chi rzagdiaj reeman, rajp tëëman cudad chitëë yabaman loj ni mal riga' loj guidxliuj.

Ad rayalt yalej ree loj ree bejn

2 Gradi compniar raliduladx ree Jesucrist Bén rniabee, ad rayalt cwedi loj ree bejn. ² Yaguie'ch ree, chu' tijb bejn lod rado'pidi, najcwaman lajd zagdxë yu' tëë guibnil or yaaman, chu' tëë tijb Bénprob najcwaman lajd senci, ³ abi' mazri güüncwentidi Bén najcw lajd zagdxë guin, guiëbidi lojman: "Gurej guie, laan naj luar zagdxë", guiáad loj Bénprob guin guiëbidi: "Yagaj guzuli o gurej luyuj zii ya." ⁴ Chi rüjndi zian, ¿nid cabedi bejn loj gajquidi ya?, ¿nid rula'chidi ya chi rüjndi gra ree xgabmal guin? ⁵ Gradi compniar raliduladx ree Jesucrist, rënan lëjt, gol bacaagdiajg nine: Dios gule Bén naj ree Bénprob loj guidxliuj din chililadx da't reeman laaman, din yayal reeman lod rniabeeman zi'c cwëbaman loj ree Bén rën laaman. ⁶ Guiáad lëjt rusa'n xtudi

bénprob ree. Wen, ¿id benrijcw guin ree rusagzi lèjt ya rudxig tée reeman lèjt loj guxtis? ⁷ ¿Id laagajc reeman rnieeguijdx Jesucrist ya, bén naj bénlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

⁸ Bal walidi rüjndi ni ca loj xley Dios, zi'c ca loj xtiidxaman ni rëb: "Guyèn bejn ree zi'c rën lüj gajc", dxei za-gdxequi cayüjndi. ⁹ Per bal mazri rüjncwentidi tijb bejn guial loj stijbaman, dxei ma cayüjndi dol, ma rajpidi dol guial ad rüjntidi cumplid xley Dios. ¹⁰ Din bal chutëez zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin. ¹¹ Dios gajc rëb: "Ad sunël xinguaaw ren o béngunaa ren", rëb tée man: "Ad gugüjtil bejn." Per bal id za'nël xinguaaw o béngunaa ren ya per rugüjtil, dxei ma cusagloj xley Dios. ¹² Zeel gol gunee gol been tée zi'c ree bén yadëed cwent diidxli loj Dios por xtiidxaman ni rabëe dunuj ree loj dol. ¹³ Din bén ad rayat ree lasa', ad zayat Dios laa reeman dxei güün xguialguxtisaman. Per bén raya ree lasa' ad najtan ni guidxeb reeman dxei guin.

Royal yagueien ree ni rën Dios

¹⁴ Zeel rnin lèjt, ¿xhie sirv güün bal chu guiëb, rliiladxan Dios, abi' ad rüjntaman ni rënman? ¿Wen, guialzi rliiladxaman ya gacaman perdon? ¹⁵ Yagueie'ch ree, tijb dux compniar ree, bén rliiladx Jesucrist, najman xinguaaw o béngunaa ya, guiyaadx xabaman con ni gawaman, ¹⁶ abi' guiëb tijb lèjt loj reeman: "Yagueiajdi zagdxe, gawidi zagdxe ad gagnajl tëedi." Per bal id rudëedi ni riaadx reeman, ¿xhieci gan guiëbidi zian? ¹⁷ Ziangajc rzajc bén rëb rliiladx Dios abi' ad rüjntaman ni rënman, achet lasajc guial rëbaman rliiladxaman laaman.

¹⁸ Xt zajc chu na lojl: "Lüj na rliiladxil Dios, guiáad naj rünan ni rënman." Yan balüü naj guial rliiladxil laaman guial ad rüjntil ni rënman, guiáad naj gulün guial rliiladxan guial rünan zi'c rënman. ¹⁹ Zagdxe rüjnl bal rliiladxil yu' tijbzi Dios, per në ree xindxab rliiladx zian, abi' xt rnij reex guial rdxeb reex. ²⁰ Zeel ad bal natontil, bignia' achet lasajc guial chililadx bejn Dios bal id rüjntaman ni rënman. ²¹ Basaaladx, dux béngulal ree Abraham, bayagbee Dios laaman zi'c bén ad beent dol, guial beenman ni guyèn Dios, chi rëbaman lojman din nugüjt xi'nman Isaac nudëe tée man laax zi'c gon lojman. ²² Ma qui ruguiaa, guial bililadxaman, zeel beenman ni guyèn Dios. Guial beenman zian, zeel biguien guial diidxli bililadxaman laaman. ²³ Zian gojc cumplid ni ca loj xtiidx Dios, lod rëb: "Bililadx Abraham Dios, zeel bayagbeeman laaman zi'c bén ad beent dol", bayagbee tée ree bejn laaman zi'c tijb xmiw Dios.

²⁴ ¿Ma bignia'di yan ya? Rayagbee Dios bejn zi'c tijb bén ad wayüjnt dol guial rüjntaman ni rënman, ad guialzi rëbtaman rliiladxaman laaman. ²⁵ Ziangajc gojc con tijb bén brii laj Rahab, bén goc béngunaa dxuudx, bayagbee Dios laaman zi'c bén ad beent dol guial beenman ni rën Dios, chi badëed lidxaman baquie'chloj tio'p ree bén Israel we ladxaman biquiaa

reeman xhienaag chu' ree xsuldad reeman, been tée man laa reeman yudar persi zia reeman nejz ren.

²⁶ Din bén achet xsprijt ad zajct guibanman. Ziangajc rzajc tijb bén rliiladx Dios: bal id züjntaman zi'c rënman, achet lasajc guial rëbaman rliiladxaman laaman.

Du lüdx ree naj zi'c tijb luar lod guidxa ni mal

3 Gradi compniar raliiduladx ree Jesucrist, rnin lèjt: Ad bal ziendi guiën gac mextr gulüü xtiidx Dios, din ma ragbeedi, dunujn guial ralüün xtiidxaman, mazri zro' naj guialguxtis ni güün Dios con dunujn bal id zagueienan zi'c rayal. ² Du graczi ree rüjn xhietëez dolan gan yu' dxei, per bal chu lèjt ad rüjnt dol ni'qui tijb diidxguijdx ad ririi tëet ro'di, najdi bén naya delant loj Dios, rajc tée rniabee lèjt gajc. ³ Lèjt ragbee, chi ralu' ree fren ro' ree way din che reeb lod rayën ree, zian raguieen ree gan ranabee reeb. ⁴ Ziangajc ree barcw, majsi narooob reen, majsi por mazt rucadxaa bidoxh laa reen, per con tijb guibdobëz ni la timón, con laan ma zajc chinë bejn laan lod rëntzaman. ⁵ Ziangajc naj du lüdx ree, najn ni dobëz, per narooob guialquia rüjnan. Najn zi'c tijb guij dobëz, per majsi najn ni dobëz, rüjnan guialquia narooob ruze'can dajn narooob. ⁶ Du lüdx ree naj zi'c tijb guij, zajc yanee në' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxei zianczi grii diidx zëed loj xindxab du ro' ree. ⁷ Rayagbee ree guial graloj ree bedoxh zajc gagnadoo, xt në ree be rzuj në ree bëel nëtëe ree be yu' loj nijs, yan ma gognadoo reeb por ree bénguidxliuj. ⁸ Per lüdx bejn achut wayüjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugüjt. ⁹ Con du lüdx ree ranee ree diidx zagdxe par dux Dad ree Dios, abi' con laagajcan raneeguijdx ree bejn, bén been gajc Dios zi'c najman. ¹⁰ Gradi compniar raliiduladx ree Jesucrist, du ro' ree ririi diidx zagdxe në diidxguijdx, per ad rayalt gacan zian. ¹¹ Lèjt ragbee, lod rajch nijs zagdxe ad zajct grii nijs naxij, ¹² ad zajc tëet tia aceitunas loj yag higo, ad za zajct tia higo loj yag uv, ad zajc tëet grii nijs zagdxe lod ririi nijs naxij.

Ni rüjn bén ca' quiargueijn rudëe Dios

¹³ Bal chu lèjt naladx rajc rignia' tée gra xtiidx Dios, royal gacaman bënchaawladx guiban tée man zi'c rayal, zian guiguien guial yu' xquiargueijnman. ¹⁴ Per bal guidxa guialnadëdloj luxdoodi rën tëedi gra par lèjt gajc din gaquidi mazri bén zojbloj, ad güündi benro' guial rajquidi xtiidx Dios, cusquieezidi guial rüjndi zian. ¹⁵ Lasa' quiargueijn guin ad Diost rudëe laan, xquiargueijn gajc bén riga' loj guidxliuj guien, zëed tëen loj xindxab. ¹⁶ Din lod yu' guialnadëdloj lod yu' tée bén rën gra par laagajcaman, ni yu' wadijl në gra loj ni mal. ¹⁷ Per bén rajp quiargueijn runee Dios, yaloj rüjntaman naguieijn guibanman zagdxe lojman, gac tée man bén ad rüjnt nabë, në benza'c, gap tée man bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tée man cumplid

ni guinieeman. ¹⁸ Bén rüjn ree naguiejn ribajn sin wadijl, raguil reeman mod guinieenē reeman bejn zagdx, zian rbajn reeman zi'c rēn Dios.

4 ¿Ban zēed guial ralen lasa'di nē guial rdilidi? ¿Id zēedan por xgabmal ni rüjndi ya? ² Rzēēbladxidi gapidi ni ad rajptidi, zeel xt rugūjt lasa'di din tia'di ni rēndi, rdēdloj tēēdi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rēndi, din ad rniabtidan loj Dios. ³ Abi' bal rniabidan, ad runeetaman laan, din ad rniabtidan par gūūndi ni zagdx, rēnzidan din guibandi zi'ctzi rēndi. ⁴ ¿Bén rusquieel? ¿Id ragbeedi ya guial chu rinal ni mal yu' loj guidxliuj ad zajc gaquidi xmiw Dios? Zeel bal chu rēn chinal ni mal guin, laagajcaman za' contr Dios. ⁵ Ad ca xlia'tzi loj xtiidxaman lod rēb: "Badxe' xSprijt Dios du luxdoo ree, rēnman Sprijt guin, xt neelojman laaman." ⁶ Dád zro' naj yudar rüjn Dios dunuj ree, zi'c ca loj xtiidxaman lod rēb: "Dád naza'c Dios con ree bén rüjn naya lojman, per ad rüjn cwenttaman bén rüjn ree benro'." ⁷ Zeel gol bazoob xtiidx Dios, ad gudēēdi mod gūūn xindxab lējt gan, zian chiquiedix loj xnejzidi. ⁸ Gol gubig loj dux Dad ree Dios din gūūn cwenttaman lējt, guiáad lējt bēndol, gol bariica loj dol, guiáad ree bén yu' nawēēg luxdoo guial chinalidi xnejz Dios, con guidib luxdoodi gol binalaman. ⁹ Gol guyu xgab, gol guyu naya gol biin tēē por xtolidi, luar guxijxidi gol biin, luar chu' luxdoodi nix gol guyu naya, ¹⁰ gol been naya loj Dios, din guiliesaman xvaloridi.

Ad rayalt yala'ch du lasa' ree

¹¹ Gradi compniar raliduladx ree Jesucrist, ad bal rnieeguijdx lasa'di, din bén rnieeguijdx o bén rula'ch lasa', ma caneeguijdxaman cula'ch tēēman xley Dios. Bal rula'chidan, ad cayūjntridi zi'c rniabeen, lējtl ma canabee laan. ¹² Per tijbzi Dios basa'n ley guin rüjn tēēman guialguxtis, laaman ca' guialrniabee guial yabēēman nē guial gunijtaman. Per lūj, ¿chu najl zeel rula'chil bejn?

Dux guialnaban ree naj ni tibrajtzi

¹³ Yan gol bacaagdiajg nine lējt Bén rēb ree: "Yan o guixie ya yo'n loj tijb ciuda, ni yadxu'n tib iijz, yaguieenan negojs lod yaguieenan gan zro' da't milia." ¹⁴ Ni'quid ragbeetidi xhie gac guixie, din dux guialnaban ree naj zi'c tijb bēj rguien tibrajt, stibrajt ma gunidlojn. ¹⁵ Zagdxeli naj guiēbidi: "Bal gunee Dios dunujn guialnaban, yaguieenan nine o ni ni ya." ¹⁶ Per lējt mazri zinalidi xtiidx dxalidi, abi' laa reen naj ni mal. ¹⁷ Zeel Bén ragbee xhienaag gūūnman ni zagdx abi' ad rüjntaman laan, ma cayūjnman dol.

Ni rüjn ree benrijcw

5 ¿Lējt, najdi benrijcw! Gol bacaagdiajg nine, gol biin gol gurixdiaj tēē, din ma zēēd lod sagdiajdi, ² tant zien ni rajpidi xt rxin reen, guiáad xabidi xt raw be laa reen. ³ Gra or nē plajt ni rajpidi xt rzobēj reen,

laagajc reen rulūū ni mal rüjndi, laagajc reen gac zi'c tijb bajl gustib lējt. Ma zidyob gūūn Dios xguialguxti-saman, guiáad lējt gule'cchaaw ni lasajc ree loj guidxliuj guie. ⁴ Gol baguiaa, laa ree Bén been xchiindi canab din quixidi laa reeman, xt Dios Bén ca' gra guialrniabee ma biguiejn guial caygu' reeman guialquia. ⁵ Nabandi zi'ct rēndi, per cusni'szidi ni ad zūjnt lējt sirv chi guidxin dxej gūūn xguialguxtis Dios. ⁶ Din xt baguillidi mod persi bagūjtidi Bén ad beent ree xhienin, abi' achet gojc nūjn reeman chitēē niējt reeman.

Royal yarejdx ree Dios yaya'p tēē ree pasens

⁷ Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb Bén rüjn dxiin dajn, rbēzaman guía yaloj xt guía bigra din yalesaman ni guxūbinman. ⁸ Ziangajc lējt gol gojp pasens, ad yalenya'di, din ma zidyob dxej gui't dux Dad ree Jesucrist.

⁹ Rni tēēn lējt, ad yalenya' nē lasa'di, chitēē xhie casti yayalidi, din ma zidyob dxej gūūn xguialguxtis Dios. ¹⁰ Gol binal zi'c been ree Bén badēē xtiidx Dios loj ree bejn, gojp reeman pasens gudaan tēē reeman graloj guialrzagdiaj gudēd reeman. ¹¹ Rayagbee ree guial xiquilbaa ree Bén rdaan loj guialrzagdiaj. Ma biguiejn-di xcwent Bén brii laj Job, xhienaag gudaanman chi guzagdiajman, ragbee tēēdi xhienaag beennē Dios laaman, chi gulox gudēdaman loj gra guialrzagdiaj guin, din Dios dád naza'caman raya tēēman bejn ree.

¹² Gol gojp cudad chi rüjndi xhie compromisan loj bejn, ad guza'tidi Dios o xhie stijbnin ya, chitēē gudēēd Dios lējt casti, zagdxeli naj guinieedi diidxli gūūn tēē xtiidxidi cumplid.

¹³ Bal chu lējt cazagdiaj, gol gurejdx Dios, o bal yu' luxdoodi zagdx, gol biil par laaman. ¹⁴ Guiáad bal ragxuu tijb lējt, royal guinieedi Bén rniabee ree lējt guial najdi Bén rililadx Jesucrist, din cwedx reeman Dios por laaman quiēēb tēē reeman laaman sejt por laj Jesucrist. ¹⁵ Bal cwedx reeman Dios con guidib luxdoo reeman, zayajc Bénragxuu guin, yales Dios laaman, abi' bal xhie dolan ma beenman, gūūnman laan perdon. ¹⁶ Zeel gol baxhoobdol loj lasa'di gol gurejdx tēē Dios por lasa'di din yayajquidi, din tijb Bén zinal xnejz Dios, chi rbejdxaman laaman, rüjn cwenttaman laaman. ¹⁷ Zi'c Bén brii laj Elías Bén badēē xtiidx Dios loj ree bejn, gojcaman Bénguidxliuj zi'cgajc dunuj ree, abi' chi gudi'n gunabaman loj Dios guial ad zalt guía, dxel ad golt guía choon iijz garol. ¹⁸ Chi guredxaman Dios zatijb, zianz bazuloj gol guía, dxel bayu guialnaza'c loj guidxliuj.

¹⁹ Gradi compniar raliduladx ree Jesucrist, bal chu lējt rarii loj xnejz Dios abi' por stijb bejn yayejuquidi, ²⁰ gol gogbee guial chutēēz Bén rasiejc tijb bēndol loj nejz zagdx chitēē chinalaman ni mal, laaman rabēē bēndol guin loj casti, abi' majsi ma beenman zien dol, gran gac perdon.

Gui'ch yaloj bacaa San Pedr

Rxhiaal Bëd xtiidx Dios loj ree bejn

1 Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bën bire'ch gra lad abi' zobjidi guiedx riga' ree niz Ponto, Galacia, Capadocia, Asia Menor në Bitinia. ² Ma gulej dux Dad ree Dios lëjt diizd gocli, zi'c goc xixgabaman. xSprijtaman gulëeca lëjt din guzoobidi diidx gac tõe luxdoodi naya delant lojman por xrejn Jesucrist. Zro' gūnle' Dios lëjt yabe'cdxe tõeaman luxdoodi.

Ni ralëjz ree gunee Dios

³ Quixtõe Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. ⁴ Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tõeet dxej nitan. ⁵ Guial rliladxidi Dios, laaman rnij lëjt con xguialrniabeeman, din chi guidxin dxej nit guidxliuj, dxej gagbee gra bejn guial ma beenman lëjt perdon.

⁶ Zeel rabaa da'tidi majsi tødidi graloj guialrzagdiaj tibläd, ⁷ din por guialrzagdiaj guin guiguien chu diidxli rliladx Dios, zi'c rüjnnë reeman or, rudëed reeman laan loj bajl din gagbee reeman bal najn ganax or. Or guin najn ni rñidloj, zeel mazri lasajc guialrliladx laaman, bal chu taan xhietëez loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiáad ree bejn në ree anjl guza't reeman laaman zagdx gap tõe reeman laaman respekt guial rusnuu rliladxidi laaman.

⁸ Ad waguiaatidi Jesucrist per rëndi laaman, abi' yan rliladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, ⁹ din lëjt ragbee, guial rliladxidi, ma nūjn Dios lëjt cwent zi'c ree bën achet xtol.

¹⁰ Diizd gocli, bën badëe ree xtiidx Dios loj ree bejn basiid reeman been tõe reeman naguiejn niagbee reeman xhienaag gūn Dios bejn ree perdon, abi' rëb reeman xhienin gūn Dios par lëjt guial najman benza'c. ¹¹ Por xSprijt Jesucrist gogbee reeman diizd gocli guial sagdiajman zianz qui gapraman guialrniabee, dxej been reeman naguiejn niagbee reeman chu benan sac zian goc tõe gac zian. ¹² Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrni-

abee Sprijt zëed xanyabaa. Në ree anjl ma rën nejzdoo gagbee nine ree.

Ze rayal guiban ree xi'n Dios

¹³ Zeel gol guzusin gol bastëdguien tõe, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. ¹⁴ Zi'c ree xi'n Dios nazobdiidx reeman, ad bal guibanridi zi'c gubandi gocli chi gadi gūnbee laaman. ¹⁵ Laaman gule lëjt, zeel gol been naguiejn guibandi naya delant lojman, din laaman naj bën naya nali. ¹⁶ Zi'c rëb loj xtiidxaman: "Gol gubajn naya delant lon, din naj naj bën naya nali." ¹⁷ Yan bal rnieedi Dios "Dad", bën rüjn xguialguxtis tibloj, bal conin rüjn tijb gaj bejn, rayal gapidi laaman respekt guidib tiamp guibandi loj guidxliuj guie. ¹⁸ Din lëjt ragbee guial babëeman lëjt loj costumbr ni basa'n në ree xbéngulalidi lëjt, costumbr ni ad rüjnt ree sirv, abi' lëjt ragbee guial gojx din yariidi loj reen, per ad gojxt con ree ni rñijt, zi'c or o plajt ya, ¹⁹ gojx con xrejn za'cdxoon Jesucrist ni guxhie'man loj crüz chi gūtan zi'c tijb xiil zagdx be ad naxint, be rugüt reeman par Dios por xtol ree bejn. ²⁰ Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rënman lëjt. ²¹ Zeel por laaman rliladxidi Dios bën basban laaman badëe tõeaman guialrniabee lojman, yan con guidib luxdoodi ma rliladxidi Dios rbëz tõe di ni guneeaman.

²² Yan, guial ma ruzoobidi xtiidxaman ni naj diidxli, ma naya luxdoodi delant lojman din guiën lasa'di zi'c rayal, zeel gol guyën lasa'di con guidib luxdoodi. ²³ Din ma bidxaa mod nabandi, zi'c rulüü gojlidi stijb, abi' guialnaban zinalidi ad zëedtan por tijb bën nit, zëedan por xtiidx Dios, diidx naban, diidx ni ad zanijt, ²⁴ din loj xtiidxaman rëb:

Gra bénguidxliuj naj zi'c gui'xh dajn, guiáad ni rajp reeman naj zi'c xguiaa gui'xh guin.

Rbidx gui'xh guin, abi' rijb xguiaan,

²⁵ per xtiidx Dios ad yu't dxej nitan.

Abi' laan naj xtiidxza'c Jesucrist ni ma biguiejndi.

2 Zeel gol basa'n gra ni mal, gra ni rusquiee, ad bal rüjnzidi, gol basa'n guialnadëdloj në guial rnieeguidx lasa'di. ² Zi'c re'c ree xindo quigojlnëjzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengüt con gra ree bën nuchajg Jesucrist chi gui'taman stijb, ³ bal walidi ma ragbeedi guial naj Dios benza'c.

Jesucrist naj zi'c guiaj naban

⁴ Gol bibig loj Jesucrist, laaman naj zi'c guiaj naban. Been ree bénguidxliuj laaman tiblax, per par Dios najman bèn lasajc, laaman gule laaman. ⁵ Ziangajc lèjt, guial ma rliadixidi Jesucrist, najdi zi'c ree guiaj naban ni cayajcnè xyadoo Dios. Najdi bixhioz naya luxdoo rùjn sirv lojman, din nabandi zi'c ruladx Dios, laan naj ni rudèèdi lojman zi'c gon por Jesucrist. ⁶ Rèb loj xtiidx Dios:

Gol baguiaa, guzoban tijb guiaj zagdx luguedx Jerusalén.

Laan naj guiaj nabee, guiaj zobloj, nilasajc tèè.
Bal chu chililadx laan,
ad yu't dxej yaya'nxtuman.

⁷ Par lèjt, guial rliadixidi Jesucrist, laaman naj zi'c guiaj lasajc da't. Per par ree bèn ad rliadxt rajc cumplid ni rèb loj xtiidx Dios, lod rèb:

Guiaj ni gulèègo'n ree bèn rùjn yu,
yan laan naj guiaj zobloj.

⁸ Rajc tèè cumplid ni rèb stib lajt loj xtiidxaman, rèban:
Laaman naj guiaj rirèjl guia' ree bejn,
abi' rureeyujn laa reeman.

Rzajc reeman zian, guial ad ruzoobt reeman xtiidx Dios, zian rajc ni rèbaman xcwent reeman.

⁹ Per lèjt naj bèn guleman, najdi bixhioz rùjn ree sirv lojman, guial najman dux rey ree. Lèjt ma naya luxdoo delant lojman, abi' gulejman lèjt din chigtie'chidi diidx xcwent ree ni zagdx rùjnman. Laaman babèè lèjt loj nejz mal, persi bagu'man lèjt loj xnejz za'cdxoonman.

¹⁰ Gocli achutczi najdi, per yan ma najdi xbejn Dios. Gocli ad ragbeetidi guial raya Dios lèjt, per yan ma ragbeedi.

Zi'c rayal guiban ben rliadix Dios

¹¹ Gradi compniar raliiduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tièbidi gùun ree xgab mal lèjt gan, din xgab mal guin ree rùjn nagueijn zianczi din gusa'n ree bejn xnejz Dios. ¹² Gol gubajn zagdx loj ree bèn ad nünbeet laaman, zian majsi rnieeguijdx reeman lèjt yan, rèb reeman najdi benmal, per chi guguaa reeman guial zagdx naj ni cayùjndi, dxej guza't reeman laaman zagdx, dxej ni yadèèd reeman cwent lojman.

¹³ Guial rliadixidi Dad Jesucrist, gol bazoob xtiidx gra ree bèn rniabee loj guidxliuj guie. Gol bazoob xtiidx pristent rniabee xnaciondi ¹⁴ nè xtiidx gobernador bèn rxhiaalaman din gudèèdaman casti bèn rùjn ree ni mal guilies tèèman xvalor ree bèn rùjn ni zagdx.

¹⁵ Din rèn Dios gùündi ni zagdx ree din gucwèèzidi ro' ree bentont ad rignia't abi' rnieeguijdx reeman lèjt.

¹⁶ Zajc gùündi zi'c rèndi, per ad por ziantzi gùündi ni naj ni mal, gol been zi'c rayal gùün ree xbejn Dios.

¹⁷ Gol gojp respekt gra bejn zi'c rayal, gol guyèn ree bèn rliadix Jesucrist, gol bidxeb Dios, gol gojp tèè respekt pristent rniabee xnaciondi.

Gol gudaan loj guialrzagdiaj

¹⁸ Lèjt bèn naj ree mojs, gol bazoob xtiidx ree xpa-trondi, gol gojp tèè reeman respekt, ad bèn najtzi ree benza'c raya tèè reeman lèjt, nè ree bèn naj bendxudx. ¹⁹ Din zagdx naj guial chu rdaan loj guialrzagdiaj, majsi ad rayaltaman laan, rdaanman laan guial rënman gùünman ni ruladx Dios. ²⁰ Bal chu lèjt rzagdiaj por ni mal rùjndi, achet lasajcan, per bal rzagdiajdi por ni zagdx rùjndi abi' rdaandi loj guialrzagdiaj guin, laan lasajc delant loj Dios, ²¹ din par zian gulejman lèjt. Guzagdiaj Jesucrist por lèjt, zian balüüman lèjt xhien-aag guibandi din chinalidi xnejzaman. ²² Ad yu'tczi dxej beenman dol abi' ni'qui tijb diidx rusquiee ad briit ro'man. ²³ Chi rèb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rèbtaman loj reeman guial yaguijx reeman ni cayüjnnè reeman laaman, graczan basa'nman loj Dios bèn rùjn xguialguxtis zi'c rayal. ²⁴ Guzagdiaj Jesucrist loj crùjz por dux tol ree persi babèèman dunuj ree lojn din yabajn ree zi'c rën Dios, abi' por lod bidxeelguijdxaman ma bayùjnman du luxdoo ree naya. ²⁵ Gocli gubajndi zi'c xiil rzèèb, per yan ma najdi xbejn Jesucrist bèn rën lèjt rajp tèèman lèjt zi'c tijb bèn rajp xiil.

Zi'c rayal guiban ree bèn ca' lasa'

3 Nè lèjt béngunaa ma yu' ree lacheel, gol bazoob xtiidx lacheelidi, din bal chu lacheelidi ad rliadxt xtiidx Dios, per chi guguaa reex zi'c nabandi, dxej guililadx reex. Ad rùjnt nagueijn xhie guièbidi loj reex, ² chililadx reex guial guguaa reex nabandi zi'c rayal rajp tèèdi laa reex respekt. ³ Chi rzujchaawidi, ad bal rdèdlaj rùjnchaaw guidxguijquidi ni'qui guial gùündi ujs ganax ni or o gacwidi ganax lajd lasajc. ⁴ Mazri zagdx naj guial gùündi nagueijn gac luxdoodi naya delant loj Dios, gol gojc benza'c nè bèn chaawladx, din laan ad yu't dxej nitan, abi' laan mazri lasajc delant lojman. ⁵ Din zian gubajn ree béngunaa binal ree xnejzaman goc da't, bililadx reeman laaman bazoob tèè reeman xtiidx lacheel reeman. ⁶ Zian been Sara, bazoob xtiidx lacheelaman Abraham, abi' guneeaman laaman "Dad". Gaquidi zi'c xi'n Sara, bal rùjndi ni zagdx sin guialrdxeb.

⁷ Ziangajc lèjt xinguaaw, gol gubajnnè lacheelidi zagdx, gol gojp reeman respekt ad guialzi najt reeman bèn nada, rayal gùündi zian guial nè reeman rayal guialnaban tiblayaa razaladx Dios, guial najman benza'c. Zian gol gubajn, chitèè xhie gudxe' nawèèg lèjt chi cwedx guiniabidi laaman.

Xhie rayal gùündi chi xhie gùün nè reeman lèjt

⁸ Zeel rnin loj gradi: Gol gubajnnè lasa'di zagdx, gol bachajg lasa'di, gol been xgab tijbzi, gol guyèn lasa'di zi'c rayal, gol gojc benza'c nè bèn chaawladx. ⁹ Ad yadxi'di ni mal rùjn ree bejn lèjt, ad yadxi'di diidxguijdx ni na reeman lojdi, gol gurejdx Dios din gagnëman

laa reeman, din Dios gulej lëjt par gagnëman lëjt.

¹⁰ Din rëb loj xtiidxaman:

Bén rën guiban zagdx chu' tée luxdooan zagdx, rayal gapaman cudad ad guinieeman diidxguijdx ad guinee tēēman diidx rusquiee.

¹¹ Cwēēladxaman ni mal, gūnman ni zagdx gūn tēēman nagueijn guibannē ree lasa'man zagdx, zian rayal guibanman zianczi.

¹² Din dux Dad ree Dios rniaj bén rŭjn ree ni rēnman rŭjncwent tēēman xtiidx reeman chi rbejdx reeman laaman, per ralenman bén rŭjn ree ni mal.

¹³ Achut gūn lëjt ni mal, bal cayŭjndi nagueijn gūn-di ni zagdx. ¹⁴ Per xiquilbaadi bal cusagdiaj bejn lëjt guial cayŭjndi ni zagdx. Ad chu'di xgab ad guidxeb tēēdi por zian, ¹⁵ gol gojp respekt gol badxe'guijc tēē dux Dad ree Jesucrist. Gol guzujsin din yadxi'di xtiidx ree bén guiniabdiidx lojdi xcwent ni rliidxidi, per gol badxi' xtiidx reeman zagdx con diidx zagdx ree.

¹⁶ Gol gubajn zagdx din guiguien guial achet ni mal yu'guijquidi din yaya'nxtu ree bén rnieeguijdx lëjt, guial rŭjndi ni zagdx rliidx tēēdi Jesucrist. ¹⁷ Mazri zagdx naj sagdiaj bejn guial gūnman ni zagdx, bal zian rën Dios, luar sagdiajman guial gūnman ni mal.

¹⁸ Din xt Jesucrist guzagdiaj, gŭjtaman tib voltzi por dux tol ree majsi ad beentaman dol, per gŭjtaman duxcwent ree nayajc ree bēndol, zian guxhalaman nejz din gac yadxin ree loj Dios, gŭjtaman zi'c bēnguidxliuj per babanman por xSprijtaman. ¹⁹ Chi gadaman yaban, wej xSprijtaman bigneenēman xsprijt ree bengŭt lod nayaaw reeman. ²⁰ Sprijt guin ree naj xsprijt ree bén ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayŭjn Noé barcw, abi' xhujnzi bejn gulaa loj nijs banijs guidxliuj tiamp zii. ²¹ Nijs guin naj zi'c guialrirobnis ni rulŭŭ guial ma nayajc ree perdon. Guialrirobnis guin ad rēnt guiēban guial najn par gusian dux cuerp ree, rulŭŭn guial caynaab ree loj Dios din yaya dux quiar-gueijn ree, guial ma raya'p ree guialnaban cŭb guial baban Jesucrist loj ree bengŭt, ²² bén bayē'p xanyabaa abi' za'man xladbee Dios lod canabeeman anjl ree nē ree sprijt ca' guialrniabee.

Gol beennē quiar-gueijn ni banee Dios dxiin

4 Zeel zi'c gudēd Jesucrist loj guialrzagdiaj, nē lëjt rayal taan lojn. Din por guialrzagdiaj guin rŭjn bejn dol tibladi, ² din gūnman zi'c rën Dios guidib xguialnabanman luar gūnman zi'c naj xixgabaman. ³ Xchej da't gubajndi zi'c naban ree bén ad nŭnbeet Dios, gubajndi zi'ctzi guyēndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzŭdx da'tidi, guyēn tēēdi ni ad najt ree Dios, laan naj ni rbiixhladx Dios. ⁴ Per yan guial ad zinaltridi zi'c naban ree bén naban zian, zeel radxa loj reeman, rnieeguijdx tēē reeman lëjt. ⁵ Per rayal yadēēd reeman cwent loj Dios bén za' par gūn xguialguxtisaman con ree bén naban nē ree bén ma gŭjt. ⁶ Din nē ree bén ma gŭjt bigueijn xtiidx Dios chi

guban reeman loj guidxliuj guie, din guiban reeman loj Dios majsi par ree bēnguidxliuj ma gŭjt reeman.

⁷ Ma zidyob dxej nit guidxliuj, zeel gol bastēdguien gol guzujsin tēē din cwedx guiniabidi Dios con guidib luxdoodi. ⁸ Ad yayanlaxidi guial guiēn lasa'di zi'c rayal, din bén rën lasa' rŭjnman perdon majsi xhietēēz rŭjnnē reeman laaman. ⁹ Bal yu' tijb xcompniaridi rniab luar lidxidi din yaya'nman, gol badēēdsii lidxidi con guidib luxdoodi ad yalenya'di. ¹⁰ Loj tijb gajdi ma banee Dios quiar-gueijn din gūndi ni rayal gūndi. Zeel gol been lasa'di yudar con ni rajc rŭjndi, din guiguien guial cayŭjndi zi'c rayal con quiar-gueijn ni bazaladxaman lojdi. ¹¹ Bal chu lëjt ca' quiar-gueijn par gulŭŭ xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bén ca' quiar-gueijn par gūnman yudar dux compniar ree, rayal gūnman laan con gojl razaladx Dios lojman. Gra ni cayŭjndi, gol beenan din guza't ree bejn Dios zagdx por Jesucrist, bén rayal respekt nē guialrniabee zianczi. Amén.

Gol gudaan gra guialrzagdiaj

¹² Gradi compniar raliiduladx ree Jesucrist, rēnan lëjt, zeel rnin lojdi, ad ru nawēēguidi guial zro' naj loj guialrzagdiaj cadēdidi, din laan naj zi'c prueb par lëjt. Ad rudi xgab chexc zeel cazajquidi zian. ¹³ Gol babaali chi cazagdiajdi zi'c guzagdiaj Jesucrist, din ziangajc yabaa-di chi guguaadi xbianiman dxej gui'taman stijb.

¹⁴ Xiquilbaadi bal chu na diidxguijdx lojdi guial zinalidi Jesucrist, din gra dxejci za'nē xSprijt Dios lëjt, bén ca' guialrniabee. ¹⁵ Achet lasajc bal cazagdiajdi guial bagŭjtidi bejn, o por guialgubaan, o por guial rŭjndi ni mal o guial rudi lod ad rayaltidi. ¹⁶ Per bal chu cazagdiaj guial zinalaman xnejz Jesucrist, ad rayalt yatuman, rayal gudēēman quixtēē loj Dios guial ma najman xbejn Jesucrist.

¹⁷ Gol gogbee, guial rtiējb Dios rzagdiaj ree xbejnman din guzoob reeman diidx, abi' bal dunuj ree naya-jc ree xbejnman cayza'c ree zian, xhieci naag sac ree bén ad rēnt guzoob xtiidxza'caman. ¹⁸ Nacli ree bén zinal xnejz Dios nawēēg naj guial yaguij reeman xanyabaa, piorli ree bēndol bén ad nŭnbeet ree Dios, xhieci naag naj luar lod yayal reeman. ¹⁹ Zeel bén cazagdiaj ree zi'c naj xixgab Dios, rayal gusnuu gūn reeman ni zagdx gusa'n tēē reeman gran loj Dios, laaman gagnē laa reeman. Laaman bazaladx guialnaban rŭjn tēēman zi'c rayal.

Consejw par ree bén rliidx Jesucrist

5 Yan rēnan gudēdan consejw loj ree bén rniabee ree lojdi, naj guial ca'n guialrniabee zi'cgajc laa reeman, naj tēēn testiw xcwent ni guzagdiaj Jesucrist, zi'cgajc laa reeman guguan xbianiman dxej gui'taman stijb, zeel rēnan guiēn nine ree loj reeman. ² Rnin lojdi, gol gunaj ree xbejn Jesucrist, bén rayal ree gulŭŭdi din gusnuu chinal reeman xnejz Dios. Ad gūndi dxiin guin guialzi ragbeedi rayal gūndi laan, gol beenan guial yu'di gan gūndi laan, con guidib luxdoodi gol

beenan, ad bal güündi laan guialzi rzëëbladxi di milia.
³ Ad guial ca'tidi guialrniabee din nabeedi zi'c tal rëndi, rayal guibandi zagdxë din guguaa ree bën rliladx Jesucrist din guiban reeman zian, ⁴ din chi gui't bën rniabee dunuj ree stijb, dxeel guneeaman tijb niza'cdxoon ni ad yu't dxej nit.

⁵ Ziangajc lëjt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tēë xtiidx ree xcompniaridi, din:

Ralen da't Dios bën rüjn ree benro',
 per dád benza'can con ree bën rüjn naya.

⁶ Zeel gol been naya loj Dios, bën ca' gra guialrniabee, din guiliesaman xvaloridi chi guidxin dxej. ⁷ Gol basa'n gra xgab yu'di loj Dios, din laaman rnaij lëjt.

⁸ Gol guzujsin, gol gojp cudad, din xindxab xin ralen da't lëjt, za'x zi'c tijb beedx rliaan, rguilix chu güünx gan. ⁹ Zeel ad tiëbidi güünx lëjt gan, gol guzujdx'i'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bën rliladx Jesucrist guidib guidxliuj.

¹⁰ Per chi ma gudëdidi ta'n loj guialrzagdiaj, dxeel gag-në Dios din gusnuu güündi nagueijn guibandi zi'c rën-

man, su tēëdi rejs, sudxi'chidi, gap tēëdi segur guial zinalidi xnejzaman. Laagajcaman naj Dios cayüjn dunuj ree yudar loj gra ni cayza'c ree, abi' ma gulejman dunuj ree din yayal ree tiblaxaa lod rniabeeman guial nachajg ree Jesucrist. ¹¹ Laaman rayal respekt, din tijbzi laaman ca' guialrniabee zianczi. Amén.

Diidx bigra ca ree loj gui'ch guie

¹² Silvan, tijb dux compniar ree, bën ragbeen naban zi'c rën Dios, laaman been gui'ch guie din ganin lojdi tio'p choon diidx, par gunen lëjt consejw nētēë par gugojnan lëjt guial diidxli rën Dios lëjt, zeel gol basnuu gol guyënman gol guyën tēë lasa'di. ¹³ Bën rliladx ree Jesucrist, bën ma gulej Dios zi'cgajc lëjt, bën zojb ree Babilonia, rugajpdioz reeman lëjt. Nē Marcw xin nūnan zi'c da xi'nan rugajpdioz lëjt. ¹⁴ Guial rën lasa'di, gol bagajpdioz lasa'di xhietēëz horan radxaaglojdi. Yabe'cdxe Dios luxdoodi guial ma nuchajguidi Jesucrist.

Gui'ch barojp bacaa San Pedr

Rxhiaal Bëd xtiidx Dios loj ree bejn

1 Naj, Simón Bëd, najn tijb xi apóstol Jesucrist rün tēen sirv lojman, cukan gui'ch guie par lējt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bën rabëë bejn ree loj dol. ² Güünle' Dios lējt mazri, yabe'cdxe tēēman luxdoodi guial ma nünbeedi laaman nē dux Dad ree Jesucrist.

Zi'c rayal gac ree xbejn Jesucrist

³ Por xguialrniabee Dios ma baneeman gra ni rayaadx ree, din yaya'p ree guialnaban tiblyaa, yaba-jn tēē ree naya delant lojman, din ma naguieenbee ree Dios bën gule dunuj ree guial ca'man guialrniabee naj tēēman benza'c. ⁴ Zeel ma beenman promejs du loj ree, promejs naroob ree ni lasajc ree, abi' por laa reen ma yu' xSprijt Dios luxdoodi, ma been tēēdi tiblyad gra ree ni ad rüjnt sirv nē ree ni mal riga' loj guidxliuj guie. ⁵ Zeel gol been naguiejn por guialrliladx ni rajpidi gol gubajn zagdx, din guial guibandi zagdx, dxe mazri ma gagbeedi xhienaag guibandi. ⁶ Abi' guial gagbeedi xhienaag guibandi, ma zajc gucweëz xixgabmalidi, abi' guial gucweëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, ⁷ dxe guial guibandi naya delant lojman, ma zajc guiën lasa'di, abi' guial guiën lasa'di, ma zajc guiëndi gra ree bejn.

⁸ Bal yu'guijquidi nine ree cusnuu tēē cayündi naguiejn guibandi zian, dxe ad naban xlia'tzidi, ad beenbee xlia' tēētidi dux Dad ree Jesucrist. ⁹ Per bën ad rüjnt naguiejn guiban zian, laaman naj zi'c tijb bën-lutia'p o zi'c tijb bën ad ruguiaat zijt, ma bayanladxman guial biquied Dios xtolaman ni beenman guia'x-chej. ¹⁰ Zeel rnin lojdi, compniar raliduladx ree Jesucrist, zi'c ma bacaabee Dios lējt ma gulej tēēman lējt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol. ¹¹ Zian gapidi nejz nali din chu'di lod rniabee dux Dad ree Jesucrist tiblyaa, bën babëë dunuj ree loj dol.

¹² Zeel zianczi ganin nine ree lojdi din gusaaladxidi laa reen, majs ma ragbeedan, majs ma zinal tēēdi ni diidxli ni ma bacaagdiajguidi. ¹³ La'tgaj naban loj guidxliuj guie, naladxan rayal gunen consejw lojdi con ree diidx guin. ¹⁴ Din por dux Dad ree Jesucrist ma gogbeen guial ma zidyob dxej yazaan loj guidxliuj guie.

¹⁵ Zeel cayün da'tan naguiejn rnienë'n lējt, din gusaal-adxidi da diidxan majs ma güjtan.

Bën baguiaa ree xguialrniabee Jesucrist

¹⁶ Chi ranan lojdi xhienaag naj xguialrniabee Jesucrist xhie tēē naag gui'taman stijb, ad balëëguijctan ni banan lojdi. Din con quijb du lojn baguiaan xbianiman ¹⁷ chi biguien cha' Dios diizd xanyabaa, gulesaman xvaloraman baza't tēēman laaman zagdx, rëbaman: "Xin guie naj da xi'nan, rënan laax rabaanë' tēē laax." ¹⁸ Abi' dunuj nayajc bën biguien cha' Dios diizd xanyabaa chi nadxu'në'n Jesús ruguia' zii, lod biguien xbianiman.

¹⁹ Zianan zeel mazri raliduladxan ni rëb ree bën badëëd xtiidx Dios loj ree bejn, zeel zagdx naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaa. Yan ziangajc lējt chaawladx cusnuu cayagbeedi xcwent Dios xt chi gui't Jesucrist stijb, bën naj bajl rusni par dunuj ree, dxe ma gagbeedi graczan zi'c tal najn. ²⁰ Per gol gogbee guial ni'qui tijb xtiidx Dios ad zajc chignia' bejn por xixgabzaman. ²¹ Din bën badëëd ree xtiidx Dios loj ree bejn, ad gunee reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

Bën rulüü ree diidx rusquiee

(Judas 4-13)

2 Zian zi'c guyu ree bën rusquiee loj ree bën Israel tiamp gulal rëb reeman rudëëd reeman xtiidx Dios loj ree bejn, ziangajc chu' ree bën rusquiee gulüü lējt ni rusquiee ree, yaguil reeman mod din gulüü reeman lējt ni ad najt diidxli par gagdxadi. Ad zatiëjbt reeman nabee Jesucrist laa reeman, majs baguijxaman xtol reeman, zeel ad zaglaat gunijt Dios laa reeman. ² Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. ³ Abi' guial rzëëblad reeman milia, yaguil reeman xhie ni rusquiee gulüü reeman lējt din tia' reeman xmiliadi, per ziangajc ad zalaat reeman loj xcasti Dios ni cabëz laa reeman, din diizd gocli mal yu' casti ni yayal ree bën rün zian.

⁴ Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxe güün xguial-guxtisaman. ⁵ Ad been tēētaman perdon benmal guyu ree tiamp gulal, baniytaman laa reeman con nijs. Tijbzi Noë bën balüü xhienaag chinal ree bejn xnejz Dios,

laazaman naj bén gulaa con zagajdx ree bejn. ⁶ Zian-gajc chi been xguialguxtis Dios con ree guiedx Sodoma në Gomorra, baze'caman laa reen xt bayajc reen cobdëj, abi' laan naj ejempl par ree bén guiban nadxuudx zi'c ree bén guiedx zii ree. ⁷ Per baslaa Dios bén brii laj Lot, bén guban zi'c rën Dios guyu tēēman xgab guial baguiaaman zi'c guban ree benmal guin. ⁸ Abi' guial gubajnman zagdx, zeel guixie guixie guyunaya da'taman por ree nidxuudx biguiejnman baguiaa tēēman been ree bén guin. ⁹ Rajc rüjn Dios yudar bén ruzoob ree xtiidxaman xhietēēz loj prueb cadëd reeman, abi' ma naj xhie güünnēman benmal ree dxej güün xguialguxtisaman.

¹⁰ Laan naj ni yalay ree bén naban zi'ctzi rën reeman, ad rënt reeman nabee Jesucrist laa reeman, dád nad reeman, ad ratut reeman, ad rdxebe tēēt reeman rnieeguijdx reeman bén naj ree xianjl Dios. ¹¹ Abi' ni'qui ree xianjl Dios, majsí rajp reeman mazri gojl në guialrniabee, per achet diidxguijdx rëb reeman lojman contr laa reeman.

¹² Lasa' ree bén guin naban reeman zi'c ree be, ad yu't xquiarguiejn reeman abi' rnieeguijdx reeman ni ad rignia't reeman, guidiblagaa rüjn reeman ni rëntzi reeman sin xgab. Zi'c ree be zēēdzi reeb loj guidxliuj guie par guiniaaz reeb din guiēt reeb, ziangajc laa reeman por nidxuudx rüjn reeman ma cusēēb laagajc reeman, ¹³ abi' yaguijx reeman gra ni rüjnnē reeman bejn ree.

Rabaa da't reeman guial rüjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rüjndi chi rawidi tijbzi, abi' rabaa da't reeman guial rusquiee reeman lëjt.

¹⁴ Ad zajct guguaa reeman tijb bēngunaa sin guial ad züjnt reeman xgabdxuudx, ad rucwēēzt rüjn reeman dol rusquiee tēē reeman bén ad rignia'za'ct ree xtiidx Dios din güün reeman dol, abi' dád nasin reeman par güün reeman gan ni rzēēbladx reeman, laa reeman ma naj par yalay reeman xcasti Dios. ¹⁵ Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bén badēēd xtiidx Dios loj ree bejn, xi'n bén brii laj Beor, chi guyēnman nünman gan milia por ni mal nünman. ¹⁶ Per chi zēman ziguieenman ni mal guin, bacwēēz Dios laaman, basneeman xburaman zi'c tijb bejn, zian bacwēēz Dios xixgabtontaman.

¹⁷ Yan bén rusquiee cuzat reen lojdi naj reeman zi'c bizë ni ad yu't nijs, zi'c zāj ni ad nēt guia, zeel rayal reeman lod nacay da't lod ad yu' tēēt dxej yarii reeman.

¹⁸ Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bén qui cusa'nri ree nejzmal. ¹⁹ Rëb reeman guial achut rayal nabee bejn, per ad rignia't reeman guial nidxuudx rüjn reeman rniabee laa reeman, din graczi ni ad rajct rucwēēz rüjn ree bejn, laan naj ni rniabee laa reeman. ²⁰ Chi ma beenbee ree bejn dux Dad ree Jesucrist guial laaman naj bén babëe dunuj ree loj dol ma basa'n tēē reeman

nidxuudx yu' ree loj guidxliuj guie, abi' rtiējb reeman rniabeen laa reeman stijb, dxei piorli guiban reeman guial chi gad reeman güünbee laaman. ²¹ Zagdxeli naj ad nünbeet reeman xnejzaman, guial beenbee reeman laan abi' basa'n reeman xtiidxza'caman ni ma biguiejn reeman. ²² Con laa reeman rajc cumplid diidx ni rëb: "Rayaw bë'cw ni bayëbib, guiáad cüch qui gojzri con nijs naya rayub loj nizbajn."

Ni gac chi gui't Jesucrist stijb

3 Gradi compniar raliduladx ree Jesucrist, rën da'-tan lëjt, nine naj gui'ch rarojp rxhialan par lëjt. Loj grop gui'ch guie cayünan naguiejn ganenë'n lëjt din güündi xgab zi'c rayal. ² Gol basaaladx ni rëb ree bén badēēd xtiidx Dios loj ree bejn tiamp gulal, gol basaaladx tēē xtiidx dux Dad ree Jesucrist, bén babëe dunuj ree loj dol, xtiidxaman ni balüü ree apóstoles lëjt.

³ Gol badxe'guij, chi ma zidyob nit guidxliuj, chu' ree bén guze' lëjt abi' guiban reeman zi'ctzi rën reeman.

⁴ Abi' na reeman lojdi: "¿Gon promejs been Jesucrist guial gui'taman stijb? Ma güjt gra ree dux bēngulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj." ⁵ Na reeman zian, guial ad rënt reeman yayagbee reeman guial diizd tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs. ⁶ Gojc xchej, dxei con nijs gajc baniit Dios bén gocli ree. ⁷ Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxei ni güün xguialguxtisaman con ree bén ad ruzoobt xtiidxaman.

⁸ Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxei naj zi'c timil ijz, guiáad timil ijz naj zi'c tib dxei.

⁹ Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰ Zi'c tal ri't tijb bēngubaan achut ragbee gui'taman, zian guidxin dxei gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

¹¹ Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. ¹² Con gan gol gulëjz dxei ni ma gulejman, dxei ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxei zii. ¹³ Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

¹⁴ Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tēē lasa'di. ¹⁵ Gol badxe'guij, guial dux Dad ree Dios caya-jpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bén rayën da't ree, ziangajc naman lojdi loj ree xtiidxaman, zi'ctzi naj quiarguiejn ni bazaladx Dios

lojman. ¹⁶ Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bén ad rajtczi ree në ree bén ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëëd ree loj xtiidx Dios, zeel laagajc reeman cusëëb laa reeman.

¹⁷ Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bén rën ree gusquiee lëjt gan, chitëë gucwëëz sudxi'chidi loj xnejz Dios. ¹⁸ Zagdxeli gol been naguiejn güünbeedi mazri dux Dad ree Jesucrist, bén baguijx dux tol ree, gol been tëë naguiejn gagbeedi mazri guial rën da'taman dunuj ree. Laaman rayal respejt gra tiampczi.

Gui'ch yaloj bacaa San Juan

Jesucrist runee guialnaban tiblayaa

1 Gui'ch guie naj par gugojnan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacaagdiajgan, ma baguiaa ni beenman, baguiaa laaman zagdx, ma baqui' tēen laaman con quijb du yaan. Laaman naj bën runee guialnaban, ² ma bi'taman loj guidxliuj, ma baguiaa laaman, dunujn nayajc testiw ragojn tēen lëjt xcwentaman. Laaman naj bën runee guialnaban tiblayaa, najman bën guzunē Dios diizd gocli bi't tēeman loj guidxliuj. ³ Zeel ragojnan lëjt ni ma baguiaa ni ma baguiejn tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. ⁴ Ragojnan lëjt nine ree loj gui'ch guie din chu' luxdoodi zagdx, zi'c yu' du luxdoon zagdx.

Royal yanaab ree loj Dios din gūnman dux tol ree perdon

⁵ Ni ne naj ni balūū Jesucrist dunujn, yan ragojnan lëjt guial naj Dios biani, achetdzi dol nabannēman. ⁶ Bal yaguie'ch ree nadxu'nē' reeman abi' zunaal gajc ree nejz mal rasquiee ree ad zunaalt ree diidxli. ⁷ Per bal yunaal ree xbiani Dios zi'c za'man, guial achet xtolaman, dxeel ma nayajc ree tijbzi con du lasa' ree. Abi' xrejn xi'nman Jesucrist chiquied gra dux tol ree. ⁸ Bal yaguie'ch ree achet dux tol ree yu', rasquiee dunuj gajc ree, ad cayguie'ch tēet ree diidxli. ⁹ Per bal yaxhoobdol ree loj Dios, rayagbee ree zagdx guial gūnman ni naman, gūnman perdon dux tol ree, chiquied tēeman gra ni mal yu' du luxdoo ree. ¹⁰ Per bal yaguie'ch ree ad waguieent ree dol, raguieen reeman zi'c bēnrasquiee, ad raliduladx tēet ree xtiidxaman.

Bën rēn Dios rayal guzoobaman xtiidxaman

2 Xi'n, rucan nine ree par lëjt chitēē gūndi dol. Per bal chu lëjt rūjn dol, raya'p ree bën guiniee por dunuj ree loj Dios, laaman naj Jesucrist bën ad wayūjntdzi dol. ² Por xguialgūjtaman naj dux tol ree perdon, abi' ad dux toltzi ree, nē gra xtol ree bēnguidxliuj.

³ Bal razoob ree xtiidx Dios, zian raya'p ree segur guial ma naguieenbee reeman zagdx. ⁴ Per bal chu rēb: "Nūnbeen Dios", abi' ad ruzoobtaman xtiidxaman, rusquieeman, din ad walit ni rēbaman. ⁵ Per bēnruzoob xtiidxaman, diidxli rēnman laaman con guidib luxdooan, zian rayagbee ree guial ma nabajnnē' ree-

man. ⁶ Bën rēb nabannēman Dios, rayal guibanman zi'c guban Jesucrist.

Bën zinal ree xnejz Dios rēn lasa' reeman

⁷ Gradi compniar raliduladx ree Jesucrist, diidx canin lojdi yan ad diidx cūbt reen, xtiidx gajc Jesucristan ni ma biguiejndi diizd yaloj, laagajcanan canin lojdi yan. ⁸ Per canin laa reen zi'c rulūū diidx cūb reen, din por Jesucrist nē por lëjt ma rguien guial ma cusa'ndi ni mal abi' zinalidi ni zagdx.

⁹ Bal chu rēb zinal xnejz Dios abi' ralen lasa'man, sta zinalaman nejz mal. ¹⁰ Bën rēn lasa' zinalaman xnejz Dios, abi' ma naj nawēēg guial gūn dol laaman gan. ¹¹ Per bën ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bēnlutia'p.

¹² Xi'n, rucan gui'ch guie par lëjt, din ma gojc xtolidi perdon por xguialrniabee Jesucrist. ¹³ Cukan nine ree par lëjt guial najdi bën ma rignia' mazri chunin naj Jesucrist. Bën ma yu' gocli diizd chi gad guidxliuj gacchaaw, cukan ni ne ree par lëjt bën ma rignia' ta'n chunin naj Jesucrist din ma beendi gan ad zūjntidi ni zēēd loj xinxab, cuca tēen nine ree par lëjt bën qui guzulojri ree cayignia' chunin naj Jesucrist din ma nūnbeedi dux Dad ree Dios.

¹⁴ Bacan nine ree par lëjt guial ma rignia'di mazri chunin naj Jesucrist bën ma yu' gocli diizd chi gad guidxliuj gacchaaw, baca tēen nine ree par lëjt guial ma rignia'di ta'n chunin naj Jesucrist, din za'dxi'chidi zinal tēēdi diidxli xnejz Dios con guidib luxdoodi, ma been tēēdi gan ad zūjntidi ni zēēd loj xinxab.

¹⁵ Ad sēēbladixidi ni ad najt zagdx ni rūjn ree bejn loj guidxliuj, bal chu rēn mazri ni riga' loj guidxliuj guie, ad rēntaman dux Dad ree Dios, ¹⁶ din achetdzi ni mal yu' loj guidxliuj guie zēēd loj Dios, ni rajc gajc loj guidxliuj guien, rūjn reeman zi'c naj xixgab dxuudx reeman, rzēēbladix reeman gap reeman gra ni ruguiaa reeman, rūjn tēē reeman benro' por gra ni rajp reeman. ¹⁷ Per guidxliuj guie yu' dxej nitan con guidib ni mal yu' lojn, per bën naban zi'c rēn Dios rajpaman guialnaban tiblayaa con laaman.

Yunaal ree ni naj diidxli

¹⁸ Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bën su contr Jesucrist guiēb tēeman laaman naj Jesucrist. Yan zien ree bën ralen laaman ma balūūloj, zeel rayagbee ree guial ma zidyob dxej nit guidxliuj. ¹⁹ Bën ralen ree Jesucrist, du-

loj gajc ree brii reeman nayajc ree bén rliadx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duloj ree guial raliladx ree Jesucrist, per gojc nine din guiguien guial ad grat reeman naj dux bejn ree. ²⁰ Jesucrist banee xSprijt Dios lojdi, abi' por laaman gradi ma ragbee ni naj diidxli. ²¹ Cucan nine par lëjt, ad guial ad ragbeetidi conin naj ni diidxli, cucanan guial ma ragbeedan, abi' lëjt ragbee guial ni'qui tijb ni rusquiee ad zajct gui't loj ni diidxli guin. ²² Yan, ¿chu naj bén rusquiee? Bén rusquiee naj bén rëb guial ad Jesúst naj bén guxhaal Dios loj guidxliuj. Bén rëb zian naj zi'cgajc naj bén za' contr Jesucrist guial ad rliadxtaman Dios ni'qui xi'nman Jesucrist. ²³ Din chutëez bén rëb guial ad najt Jesucrist Xi'n Dios, laaman ad nünbeet dux Dad ree Dios, per bén rëb Jesucrist naj Xi'n Dios në dux Dad ree Dios nünbeeman.

²⁴ Zeel gol binal diidx ma biguejndi diidx guia'xchej chi bililadxidi Jesucrist. Bal chinalidi diidx guin ree, dxel ziz nabannëquidi dux Dad ree Dios con xi'nman Jesucrist. ²⁵ Abi' ni ma rëb Jesucrist guneeman naj guialnaban tiblayaa.

²⁶ Cucan diidx guie ree par lëjt por ree bén rën gusquiee lëjt. ²⁷ Per nabannëdi xSprijt Dios, bén banee Jesucrist, ad riaadxtidi bén gulüü lëjt, din Sprijt guin gajc rulüü lëjt gra, abi' ganax diidxli ad ni rusquieet, zeel gol gubajn zi'c rniabeeman din gusnuu gaquidi tijbzi con Jesucrist.

²⁸ Yan rnin lojdi xi'n, gol binal xnejz Jesucrist, chitëe yadxeb ree chi gulüülojman, ad zaya'nxtu tëtë ree lojman chi gui'taman. ²⁹ Lëjt ragbee guial rüjn Dios zi'c rayal, ragbee tëtëdi guial graczi ree bén rüjn zi'c rayal, laa reeman naj xi'n Dios.

Bén naj ree xi'n Dios

3 Gol been xgab, plact rën dux Dad ree Dios dunuj ree, zeel balëe dulaj ree xi'n Dios, abi' waliczan nayajc ree xi'nman. Per bén ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman. ² Gradi compniar raliduladx ree Jesucrist, rënan lëjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguaa ree diidxliczi xhienaag najman. ³ Graczi ree bén rliadx guial gac zian, rüjn reeman nagueijn guiban reeman naya delant loj Dios zi'c laaman, guial achet xtolaman.

⁴ Per graczi ree bén ad zinalt ni rniabee Dios, cayüjn reeman dol, din dol naj guial ad rüjnt reeman ni rniabeeman. ⁵ Lëjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczu dxej ad yu' tëtë dxej nünman dol. ⁶ Zeel bén naj ree tijbzi con laaman rüjn reeman nagueijn ad rüjnt reeman dol, per graczi bén rüjn dol zianczi ad wayignia't reeman chu najman, ad wayünbee tëtë reeman laaman. ⁷ Xi'n, ganin lëjt, ad bal tiëbidi chu gusquiee lëjt, din bén cayüjn ni rën Dios, laaman naya delant lojman zi'c naya Jesucrist delant lojman. ⁸ Per

bén yu' loj dol xbejn xindxaban, din xindxab rüjn dol diidx yaloj, abi' Jesús Xi'n Dios bi'taman loj guidxliuj par zianczi din güünman gan loj xguialrniabee xindxab.

⁹ Zeel ni'qui tijb ree bén ma zinal xnejz Dios ad rusnuutri rüjn dol, din ma nabannëman Dios, ad rayal tëtëri güünman dol din ma najman xi'nman. ¹⁰ Laa rguien gajc chu reenin naj xi'n Dios chutëe reenin naj xi'n xindxab, din chutëez ad rüjnt ni rën Dios ad rën tëtë lasa'man, dxel ad najtaman xi'n Dios.

Rayal yayën du lasa' ree

¹¹ Abi' lëjt ma biguejndi xtiidx Dios diidx guia'xchej guial rayal yayën dulasa' ree. ¹² Ad rayalt yagueien ree zi'c been Caín, cwëjbaman gunabee xindxab laaman, zeel bagüjt bijchaman. Caín been zian, din beenman ganax ni mal, guiáad bijchaman been ni zagdx.

¹³ Zeel gradi compniar raliduladx ree Jesucrist, ad gagdxadi bal yalen ree benguixliuj lëjt guial ma zinalidi xnejz Dios. ¹⁴ Dunuj ree rayagbee guial ad nayajc ree zi'c bengüt par laaman, ma raya'p ree guialnaban delant lojman, guial rayën du lasa' ree. Per bén ad rënt lasa', sta najman zi'c bengüt par Dios. ¹⁵ Graczi bén ralen lasa' najman zi'c bén rugüjt bejn, abi' lëjt ragbee, tijb bén rugüjt bejn ad rajptaman guialnaban tiblayaa delant loj Dios. ¹⁶ Ma rayagbee ree conin naj guial rën lasa', guial güjt Jesucrist por dunuj ree, yan ziangajc dunuj ree rayal yayën dulasa' ree xt yayëjt ree por laa reeman. ¹⁷ Per bal chu tijb dunuj ree ad riaadxt xhienin loj guidxliuj guie abi' ruguiaaman tijb bén cayaadx laan abi' ad rüjntaman laaman yudar, dxel, xhienaag guiëbaman guial rënman Dios? ¹⁸ Xi'n, ganin lëjt, ad con diidxtizi yaguei'ch ree guial rayën dulasa' ree, rayal guiguien guial rayën dulasa' ree por ni raguieen ree.

Raya'p ree segur guial za' në Dios dunuj ree

¹⁹ Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yagueien ree delant lojman. ²⁰ Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra. ²¹ Zeel zi'c rënan lëjt rnin lojdi, bal ragbee du luxdoo ree guial cayguieen ree ni zagdx, dxel raya'p ree segur guial cayguieen ree ni zagdx delant loj Dios. ²² Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree nagueijn raguieen ree ni ruladxaman. ²³ Ni ne naj ni rniabeeman yagueien ree guial yaliduladx ree Jesucrist naj xi'nman yayën tëtë dulasa' ree zi'c gunabeeman dunuj ree. ²⁴ Bén rüjn ree ni rniabee Dios, laa reeman nabannë Dios abi' Dios nabannë laa reeman, rayagbee tëtë ree guial za'man con dunuj ree por xSprijtaman bén baneeman duloj ree.

Bén ad riladxt Jesucrist ad yu't xSprijt Dios luxdoo man

4 Gradi compniar raliduladx ree Jesucrist, rēnan lējt, rni tēen lojdi: ad riladxidi chutēēz bēn rēb rnieeman xtiidx Dios. Yaloj xgaj gol gogbee zagdx bal wali reeman xtiidx Diosan rniee reeman o ad laatanan ya, dīn loj guidxliuj guie ziza zien ree bēn rusquiee, rēb reeman rniee reeman xtiidxaman. ² Yan dīn gagbeedi chu reenin rniee xtiidx Dios: Laa reeman nāj bēn riladx guial Jesucrist bi't zi'c bēnguidxliuj. Bēn riladx ree zian yu' xSprijt Dios luxdoo reeman. ³ Per bēn ad riladxt ree zian ad yu't xSprijtaman luxdoo reeman, laa reeman nāj bēn ralen Jesucrist. Ma biguejndi guial rayal gui't tijb bēn su contr laaman. Abi' diizd yan ma za' sprijt guin guidxliuj, zeel zien ree bēn ralen Jesucrist ma yu' loj guidxliuj guie.

⁴ Per lējt xi'n ma najdi xi'n Dios, guiáad ree bēn ralen Jesucrist ad zajct gūūn reeman lējt gan, dīn mazri naroo guialrniabee ca' bēn nabannē lējt guial loj bēn nabannē bēn zinal ree nejz mal loj guidxliuj guie. ⁵ Bēn za' ree contr Jesucrist rājn reeman xgab tijbzi ni riga' loj guidxliuj guie rniee reeman, guiáad ree bēn ad riladxt Jesucrist rājncwent reeman ni rēb reeman. ⁶ Per dunuj ree ma nayaic ree xbejn Dios, abi' bēn ma nūnbee ree Dios rucaagdiajg reeman ni ranee ree, guiáad ree bēn ad nūnbeet Dios ni'quid rājncwentt reeman ni ranee ree, zian rayagbee ree chu nabannē xSprijt Dios bēn rulūū dunuj ree diidxli chutēēnin nabannē sprijt ni rulūū ganax ni rusquiee.

Rēn Dios dunuj ree

⁷ Rēnan lējt, rnin lojdi rayal yayēn dulasa' ree, dīn guialrēn lasa' zēēd loj Dios. Gra bēn rēn lasa' nāj xi'n Dios nūnbee tēē reeman laaman. ⁸ Abi' bēn ad rēnt lasa' ad wayūnbeetaman Dios, dīn guialrēn lasa' zēēd loj Dios. ⁹ Balūū Dios guial rēnman dunuj ree, dīn majsi tijbzi xi'nman Jesucrist, guxhaalaman laaman guidxliuj dīn yaya'p ree guialnaban delant loj Dios por laaman. ¹⁰ Rēn Dios dunuj ree. Ad dunujt ree bayēn laaman, yaloj laaman guyēn dunuj ree, zeel guxhaal xi'nman Jesucrist persi gūjtaman por dux tol ree, zeel ma yu' perdon par dunuj ree. ¹¹ Rēnan lējt, zeel rnin lojdi, zi'c rēn Dios dunuj ree, ziangajc rayal yayēn dulasa' ree. ¹² Majsi achut waguiaa laaman, per bal rayēn dulasa' ree, nabannē'qui ree Dios, abi' diidxli rayēn reeman.

¹³ Dunuj ree rayagbee guial nabannē' reeman abi' laaman za' con dunuj ree, dīn ma banee xSprijtaman duloj ree. ¹⁴ Abi' dunuj gajcan baguiaa ragojn tēēn guial guxhaal Xi'n Dios loj guidxliuj guie persi gūjtaman por xtol gra ree bejn. ¹⁵ Chutēēz rēb guial Jesucrist nāj Xi'n Dios nabannēman Dios, abi' Dios nabannē laaman. ¹⁶ Dunuj ree rayagbee raliladx tēē ree guial rēn Dios dunuj ree. Por laaman zēēd guial rayēn dulasa' ree. Abi' bēn rēn lasa' nabannēman Dios, guiáad Dios nabannē laaman.

¹⁷ Bal wali rayēn ree Dios zi'c rēnman, ad najtan ni yadxeb ree dxej gūūn xguialguxtisaman, dīn ma naya-

ic ree tijbzi con laaman, zi'c nāj Jesucrist tijbzi con laaman. Dīn guidib dux guialnaban ree nabannē' reeman loj guidxliuj guie. ¹⁸ Bēn rēn Dios, ad rdxebtaman, dīn bēn rēn laaman diidxli, ad rdxebtraman, per bēn ad rēnt laaman rdxebaman, dīn rājnman xgab casti ni yayalaman, zeel bal chu rdxeb, ad walitaman rēnman laaman. ¹⁹ Dunuj ree rayēn Dios, dīn yaloj laaman guyēn dunuj ree. ²⁰ Bal yu' bēn rēb: "Rēnan Dios", abi' ralen lasa'man, rusquieeman. Dīn bal id rēn lasa'man bēn ruguiaaman, xhienaag guiēnman Dios bēn ad waguiaataman? ²¹ Laagajcaman na: Bēn rēn Dios rayal guiēn lasa'man.

Guial raliduladx ree Jesucrist zeel raguieen ree gan loj ni mal

5 Gra ree bēn riladx guial Jesús nāj bēn guxhaal Dios, laa reeman nāj xi'nman. Bal chu rēn dux Dad ree Dios, nē gra ree xi'nman rēnman. ² Chi rayēn ree Dios raguieen tēē ree ni rniabeeman, dxei rayagbee ree guial rayēn ree gra ree xi'nman. ³ Guial guiēn bejn Dios nāj guial gūūnman ni rniabeeman. Abi' ad nawēēgt nāj guial gūūnman ni rniabeeman, ⁴ dīn gra bēn nāj xi'nman ma rājn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. ⁵ Bēn riladx guial Jesús nāj Xi'n Dios, tijbzi laaman zajc gūūn gan loj ree ni mal yu' loj guidxliuj.

Ni rulūū Dios dunuj ree xcwent Jesucrist

⁶ Jesucrist bi't loj guidxliuj, gurobnijsaman guxhie' tēē xrejnman loj crūjz. Ad gurobnijsztaman, nē guxhie' xrejnman. XSprijt Dios nāj testiw, laaman rū diidxli xcwent ree nine.

⁷ Choon testiw yu' xanyabaa: xDadaman Dios, Jesucrist nē xSprijt Dios, guiyon reeman nāj tijbzi Dios.

⁸ Yu' tēē choon testiw loj guidxliuj: XSprijt Dios, nē guial gurobnijs Jesucrist con ni guxhie' xrejnman loj crūjz, guiyon reen rū diidx tijbzi.

⁹ Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, dīn xtiidxaman mazri lasajcan. ¹⁰ Bēn riladx Xi'n Dios, laaman riladx ni rēb Dios xcwentaman. Per bēn ad riladxtaman ni rēbaman xcwent Xi'nman. ¹¹ Abi' ni rēbaman nāj guial ma baneeman guialnaban tiblayaa duloj ree, guialnaban guin zēēd por xi'nman. ¹² Bēn za-nē Xi'n Dios tijbzi, laaman naban tiblayaa delant loj Dios, per bēn ad za'nēt laaman tijbzi, laaman ad ca't guialnaban guin.

Ni bigra ca loj gui'ch guie

¹³ Cucan nine ree par lējt najdi bēn riladx Jesucrist Xi'n Dios dīn gagbeedi guial ma ca'di guialnaban tiblayaa delant loj Dios.

¹⁴ Rayagbee ree zagdx: chi yanaab ree xhienin lojman, rājncwentaman dunuj ree, bal yanaab ree zi'c rēnman. ¹⁵ Bal rayagbee ree rājncwentaman dunuj ree

chi ranaab ree xhienin, ziangajc rayagbee ree zagdxé guial guneeman ni ranaab ree.

¹⁶ Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudëë Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por bén rüjn dol guin. ¹⁷ Graczi ni mal naj dol, per yu' dol ni zajc gac perdon.

¹⁸ Rayagbee ree guial bén ma naj ree xi'n Dios ad rusnuutri rüjn reeman dol, din Jesucrist Xi'n Dios naj

bén rnij laa reeman, abi' xindxab ad zajctri nabeex laa reeman. ¹⁹ Rayagbee ree guial nayajc ree xbejn Dios, per ree bénguidxliuj, bén ad najt ree xbejn Dios, xindxab rniabee laa reeman. ²⁰ Rayagbee tēë ree guial Jesucrist Xi'n Dios ma bi'taman loj guidxliuj guie, gux-halaman dux quiarguejn ree, persi baguieenbee ree bén naj quijb Dios. Yan nadxu'në' reeman tijbzi por Xi'nman Jesucrist. Tijbzi laaman naj Dios, por laa tēë-man yu' guialnaban tiblayaa. ²¹ Xi'n, gol gojp cudad chitëë chinalidi ni naladx ree bejn naj Dios.

Gui'ch barojp bacaa San Juan

Rxhiaal Waj xtiidx Dios loj ree bejn

¹ Naj, bén rniabee loj ree bén rliladx Jesucrist, rxhialan gui'ch guie lojdi najdi bén gulej Dios rliladx tēēdi Jesucrist, diidxli rēnan lējt, abi' ad tijbtizi naj, nē gra ree bén zinal xtiidx Dios. ² Rēnan lējt guial ma nabannē' ree xtiidx Dios abi' laan nabannē dunuj ree zianczi. ³ Dux Dad ree Dios con Xi'nman Jesucrist gūūnle' lējt, yaya reeman lējt, yabe'cdxe tēē reeman luxdoodi guial zinalidi xtiidxaman rēn tēē lasa'di.

Rniabee Dios yayēn du lasa' ree

⁴ Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tēē reeman zi'c rniabee dux Dad ree Dios. ⁵ Yan, zi'c rēnan lējt najdi dux compniar ree, gol been wen gol guyēn lasa'di. Ni canin lojdi ad nicūbtan, diidx ni bacaagdiajg gajquidi diizd guia'xchejn. ⁶ Guial rēn Dios naj guial guiban bejn zi'c rniabee Dios, abi' ni rniabeeman ni bacaagdiajgui-di diizd guia'xchej naj guial rayal guiban bejn, guiēn lasa'man.

Bén rusquiee ree bejn

⁷ Rnin zian, din gra ladczi guidxliuj ziza zien ree bén rusquiee ree bejn, guial ad rliladxt reeman bi't Jesucrist loj guidxliuj zi'c bejn, bén rūjn zian rusquieeman abi' za'man contr Jesucrist. ⁸ Gol gojp cudad chitēē gusēēbidi ni rayalidi por ni cayūjndi, din tia'di gra ni rayalidi delant loj Dios.

⁹ Chutēēz bén racaa guiyc zi'c balūū Jesucrist bejn ree ad nabannētaman Dios, per bén zinal xtiidx Jesucrist zi'c balūūman bejn ree, laaman nabannē Dios con Xi'nman. ¹⁰ Bal chu gui't lidxidi abi' ad rulūūtaman xtiidx Dios zi'c balūū Jesucrist, ad cu'di laaman lēnū, ad gūūncwent tēēdi ni rnieeman. ¹¹ Din bén rūjncwent xtiidxaman, rēn guiēban guial ma za'man conform con ni rusquiee bén guin.

Diidx bigra ca ree loj gui'ch guie

¹² Zien ree ni rēnan ganin lējt, per ad rēntan gucanan loj gui'ch, din wed ad zaglaat guialan guidganan lējt din ganenē' quijb naj lējt din chu' du luxdoo ree zagdxē tijbzi. ¹³ Bén naj ree bén ma gulej Dios, dux compniar raliduladx ree Jesucrist bén zojb ree niz guie, rugajpdioz reeman lējt.

Gui'ch bayon bacaa San Juan

Rugajpdioz Waj Gayo

¹ Naj, bén rniabee loj ree bén rliladx Jesucrist, rxhialan gui'ch guie par lüj Gayo najl da miwan didxli rënan lüj.

² Zi'c rënan lüj rniabab loj Dios zi'c zël zagdx loj xnejzaman ziangajc grii zagdx gra ni cayüjnl gunee tēēman lüj guialnadaan. ³ Dád nix guyu luxdon chi guna garol dux compniar ree guial diidxli nabanl zi'c rëb loj xtiidx Dios. ⁴ Achet mazri ni rgu' luxdon zagdx zi'c chi riguejnan guial diidxli naban ree da compniaran zi'c rëb loj xtiidx Dios.

⁵ Zi'c rënan lüj Gayo, rnin lojl guial zagdx da't naj ni cayüjnl con dux compniar ree bén rliladx Jesucrist abi' mazczi zagdx naj ni rüjnl con ree bén zēēd lood ren.

⁶ Din laa reeman na delant loj gra ree bén rliladx Jesucrist, bén rado'pnë' reen guie, guial gunajchi'l laa reeman, zeel zagdx güünl guial güünl laa reeman yudar con ni ryaadx reeman guial cayüjn reeman sirv loj Dios din gusnuu xnejz reeman. ⁷ Din brii reeman zigtie'ch reeman xtiidx Jesucrist abi' ad rtiëjbt reeman tia' reeman ni rudëē ree bén ad rliladxt laaman. ⁸ Zeel dunuj ree bén raliduladx ree Jesucrist, rayal yaguieen ree yudar bén catie'ch ree xtiidxaman, zian yaguieen ree yudar guire'ch ni naj diidxli.

Ad ruzoobt Diótrefes diidx

⁹ Ma guxhalan tijb gui'ch loj ree dux compniar ree bén rliladx ree Jesucrist, per Diótrefes guial ruladxaman nabeeman ad rüjncwenttaman dux tiidxan. ¹⁰ Zeel bal guidganan lëjt dxel ganenë'n laaman xcwent guial rnieeguijdxaman rniee tēēman diidx rusquiee contr dunujn abi' ad tijbtzi laan rüjnman nē ad rudëēt lidxaman yaya'n dux bejn ree bén zēēd ree lood ren, ad rtiëjb tēētaman gudëēd lidx ree ben ren yaya'n reeman, abi' ree bén rudëēd lidx ad rtiëjbtaman chu' reeman lën yadoo.

¹¹ Zi'c rënan lüj Gayo rnin lojl ad chinalil nejz mal, been ni naj ni zagdx din bén rüjn ni zagdx laaman naj xbejn Dios per bén zinal ni mal ad nünbeetaman Dios.

¹² Graczi reeman ruza't Demetrio zagdx guial binalaman zi'c rayal, laa nen gajc xhienaag nabanman xt dunujn raza't laaman zagdx abi' lüj ragbee guial didxli naj ni raguie'chan.

Diidx bigra ca ree loj gui'ch guie

¹³ Zien ni rënan ganin lojl per ad rëntan gucanan loj gui'ch, ¹⁴ din wed ad zaglaat guialan guidganan lüj, dxel ganenë' quijb naj lüj.

¹⁵ Yabe'cdxe Dios luxdool, dux miw ree bén riga' ree guie rugajpdioz lüj, bagajpdioz tēē gra dux miw ree.

Gui'ch bacaa San Judas

Rugajpdioz Judas bén naj ree bén gule Dios

1 Naj, Judas bijch Santiaaw, cayünan sirv Jesucrist, cukan gui'ch guie par lëjt najdi bén ma gulej dux Dad ree Dios guial rënman lëjt, abi' dux Dad ree Jesucrist canaj lëjt. ² Gusnuu yaya Dios lëjt, yabe'cdxeman luxdoodi guiën tēēdi laaman.

Bén ad rnieet ree diidxi

(2Pe. 2:1-17)

³ Gradi compniar raliduladx ree Jesucrist, rēnan lëjt, diizd gocli guyēnan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist. ⁴ Din yu' ree bén rüjn bén rliladx naabzi par go'ch reeman lojdi. Bén guin ree diizd gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi rēn reeman. Ad rtiējbt reeman nabee Jesucrist laa reeman, laaman naj tijbzi dux Dad ree bén rniabee dunuj ree.

⁵ Majsi ma ragbeedi ni ganin lëjt, per ganinan din gusaaladxidi guial majsi babēē Dios bén Israel ree Egipto, per despuejs banijtaman bén ad bililadxt ree laaman. ⁶ Nē ree anjl ad bazoobt xtiidx Dios niniabee reeman lod badēēman loj reeman, basiaawaman laa reeman lod nacay da't xt dxej güün xguialguxtisaman. ⁷ Nētēē ree bén Sodoma con ree bén Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guyēn reeman, zeel basagzi Dios laa reeman, banijtaman baze'c tēēman laa reeman, laan naj ni rayal yaguaiaa ree chitēē yagueien ree zian.

⁸ Per ni'czi zian, yan ziangajc rüjn ree bén raguiil mod par go'chzi reeman lojdi, rüjn reeman xgab guial zajc güün reeman zi'ctzi rēn reeman, ruxhiin laagajc reeman, ad rtiējb tēēt reeman nabee Jesucrist laa reeman, rnieeguijdx tēē reeman bén naj ree xianjl Dios. ⁹ Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin niējbaman diidxguijdx loj xindxab guin, tijbzi ni rēbaman naj: "Ladxa Dios gusa'nan lüj." ¹⁰ Abi' yan bén raguiil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan xgab, contzi rüjn reeman laan zi'c ree be

guial ad rüjnt reeb xgab. Zian cusēēb laagajc reeman delant loj Dios.

¹¹ ¡Prob laa reeman!, guial zinal reeman ni mal zi'c been Caín, mazri zinal reeman milia zi'c been Balaam, guiēt tēē reeman zi'c güt Coré chi guyēnman niniabee-man luar Moisejs. ¹² Laagajc reeman ruxhiin lanij rüjndi chi rado'pidi din gawidi tijbzi, guidiblagaa ad ratut reeman raw reeman ad rüjn tēēt reeman xgab por ree bejn, rüjnz reeman xgab par cha lēn reeman. Naj reeman zi'c zaj ni ad nēt guia ni rinē bi, zi'c ree yag rbidx abi' ria'xh reen guial ad rtat reen. ¹³ Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tēē reeman zi'c ree bajl xanyabaa ni basēēb xnejz, dxei tiblayaa ma rayal reeman lod nacay da't.

¹⁴ Abi' bén brii laj Enoc, laaman gojc gajdx loj ree xdi-aa Adán, guneeman xcwent ree bén guin chi rēbaman: "Naj baguiaa dux Dad Dios zidnē zien da't ree xianjla-man ¹⁵ zidgagueien xguialguxtisaman con gra ree bejn, din guiēbaman xhie casti rayal ree benmal por gra ni mal been reeman nē por diidxguijdx ni gunee reeman laaman guial naj reeman bēndol." ¹⁶ Lasa' ree bén guin achetzi ruladx reeman, abi' graczi rnieeguijdx reeman. Zianczi rüjn reeman zi'ctzi rēn reeman, abi' zianczi ruza't laagajc reeman zagdxe ruza't tēē reeman bejn ree zagdxe din cwentzi güün ree bén guin ni rēn reeman.

Mod rayal guiban ree xbejn Dios

¹⁷ Per lëjt compniar raliduladx ree Jesucrist, rēn da'-tan lëjt, gol basaaladx guial bén goc ree xi apóstoles Dad Jesucrist ¹⁸ rēb reeman: "Chi ma zidyob nit guidxli-uj, chu' ree bén guze' gra ni zēēd loj Dios güün tēē reeman zi'ctzi naj xixgabdxuudx reeman." ¹⁹ Lasa' ree bén guin naj bén rlia' lasa' ree bén ma zinal xnejz Dios, abi' naban reeman zi'ctzi rēn reeman, ad yu't xSprijt Dios luxdoo reeman.

²⁰ Per lëjt compniar raliduladx ree Jesucrist, gol guzudxi'ch loj ni rliladxidi, din guialrliladx guin zēēd loj Dios. Gol gurejdx gunab Dios con xyudar xSprijtaman.

²¹ Gol basnuu gol binal guial rēn Dios la'tgaj cabēzidi guidxin dxej gunee Jesucrist guialnaban tiblayaa duloj ree guial rayaman dunuj ree.

²² Gol been yudar bén sta yu' nawēēg ree luxdoo.

²³ Gol been yudar bén zē ree loj nejzmal, zi'c rüjn tijb bén rüjn yudar bén cayajb loj bajl, gol guyēn reeman per ad chu'ladxidi zi'c rüjn reeman, gol gojp cudad chitēē yabidi loj xtol reeman.

Diidx bigra ca ree loj gui'ch guie

²⁴ Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxë sin dol chi guidxindi xanyabaa lod za'man. ²⁵ Laaman naj tijbzi

Dios bén babëë dunuj ree loj dol por dux Dad ree Jesu-crist, rayalaman respekt din gra naj xieenman, tijbzi laaman ca' guialrniabee con guialguxtis diizd gocli, yan con gra tiampczi. Amén.

Ni balüü Jesucrist loj San Juan

¹ Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xi-anjlaman din gulüüman ni guin ree lon, naj Waj xbejn Jesucrist, bën cayüjn laaman sirv. ² Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

³ Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

Rxhiaal San Juan gui'ch loj guigajdx ree yadoo

⁴ Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diidz gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tëë reeman luxdoodi. ⁵ Jesucrist been gra ni naj güünman, laa tëëman goc bën yaloj baban loj ree bengüt abi' laaman rniabee gra ree bën rniabee loj guidxliuj. Laaman rën dunuj ree abi' con xrejman basiaman dux tol ree ⁶ abi' beenman dunuj ree zi'c bën rniabee, been tëëman dunuj ree bixhioz rüjn sirv xDadaman Dios. Zeel Jesucrist rayalaman respekt në guialrniabee zianczi. Amén.

⁷ ¡Gol gogbee guial gui'taman loj zaj! Gra ree bejn guguaa laaman xt ree bën ni guliiz lans cwë'lënman, abi' gra ree bēnguidxliuj goon da't chi guguaa reeman laaman. Laan naj diidxli. Zian gac.

⁸ Dux Dad ree Dios bën rajp gra guialrniabee. Laaman gui't, laaman naj Dios diidz guia'xchej, në yan, laaman rēb por laagajcaman: "Naj naj zi'c lejtr A con Z, lejtr ni rzuloj në ni rlioxnē alfabeto, naj ca' gra guialrniabee."

Baguaa San Juan xguialrniabee Cristo

⁹ Naj Waj tijb ree lasa'di bën rliidx Jesucrist. Tijbzi nadxu' ree loj xguialrniabeeman, tijbzi cayzaagdiaj ree abi' caydaan ree por laaman. Naj guyu'n ladxguiib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist. ¹⁰ Chi yu'n ladxguiib loj yuj riga' loj nijsdoo guin, guyu tijb dūingw chi guza'can zi'c bën rnie'xhchaal por xguialrniabee xSprijt Dios, abi' xichan biguiejnan zi'c cha' trompejt abi' biguien rejs da't cha' tijb ¹¹ bën ni rēb:

—Naj naj zi'c lejtr A con Z, lejtr ni rzuloj në ni rlioxnē alfabeto, din tijbzi naj naj bën rniabee. Bacaa loj gui'ch gra ni cuguiaal dxe guixhiaalil gui'ch guin loj guigajdx

cwaa ree da bejnan bën zojb ree niz Asia, luguiedx Éfeso, Esmirna, Pérgamo, Tiatira, Sardis, Filadelfia në Laodicea.

¹² Dxel chi badxi' lon par guguan chunin rnieenē naj dxe baguian gajdx ree candeler or. ¹³ Abi' galay ree candeler guin baguian tijb ni naj zi'c tijb bejn, najcwa-man tijb lajd yool xt guia'man, abi' naxii tijb cinch or luxdooan. ¹⁴ Naquichbēj guijcaman zi'c naj guidxlad xiil, zi'c naj guiajnayaag naquich naj guidxguijcaman abi' zi'c bajl re'criani guiaalojman. ¹⁵ Abi' guia'man rdiinan bacha' zi'c guiib ni la bronce chi yu'n loj guij, abi' cha'man naj rejs zi'c rüjn nijs naquie' chi rguiajtan. ¹⁶ Guiaad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiaad lojman rulaa bacha' zi'c chi rusni gubijdx gojl da't.

¹⁷ Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bën rniabee diidz guia'xchej abi' par tiblayaa. ¹⁸ Ma güjtan, per yan ma babanan, abi' ma nabanen tiblayaa, abi' naj rniabee guialgüjt në gabijl. ¹⁹ Yan bacaa ni ma baguaal në ni cuguiaal në ni qui gacri. ²⁰ Ni në rēn guiēb guigajdx ree bajl xanyabaa ni baguaal yan ladbee, në guigajdx ree candeler or. Guigajdx ree bajl xanyabaa guin rēn guiēban gajdx ree bën rniabee guigajdx cwaa ree da bejnan niz Asia, abi' guigajdx candeler or guin rēn guiēban guigajdx cwaa ree da bejnan.

Diidz par ree bën Éfeso

² Yan bacaa ni guixhiaalil loj bën rniabee ree da bejnan luguiedx Éfeso. Bacaa: "Bën ni ziza galay ree candeler or, bën ni ca' gajdx ree bajl xanyabaa con yaa ladbeeman, laaman na lojdi: ² Naj ragbee xhie cayüjndi. Naj ragbee xhie tarbajw cadēdidi, ragbee tëēn guial ad ralenya'tidi. Naj ragbee guial ad rdaanti-di bën mal ree, abi' ma beendi prueb bën na ree naj xi apóstoles Jesucrist majsi achut naj reeman abi' ma gogbeedi guial ganax diidz rusquiee rniee reeman. ³ Naj ragbee guial rajpidi pacens abi' ma guzagdiajdi guial rēndi naj sin guial yalenya'di. ⁴ Per yu' ni ad rladxtan rüjndi: guial ad rēntridi naj zi'c guia'xchej. ⁵ Gol basaaladx xhienaag guyēndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab. ⁶ Per yu' ni cayüjndi zi'c rayal, guial

rdxe'chidi ni rüjn ree ben nicolaítas, zi'cgajc rdxé'chan por ni rüjn reeman. ⁷ Bén rën ree gucaagdiajg, gol ba-caagdiajg ni rníee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zojb xanyabaa lod zojb Dios."

Diidx par ree bén Esmirna

⁸ Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: "Bén rniabee diizd guíaxchej në par tiblayaa, bén ni güt abi' babanman stijb, laaman na lojdi: ⁹ Naj ragbee xhienaag cadëdidi tarbajw por ni rüjn bejn lëjt, ragbee tëen loj guialprob ni nabandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieeguijdx bejn lëjt, bén ni na ree naj reeman bén Israel xbejn Dios majsi laa reeman naj xbejn xindxab. ¹⁰ Ad rdxebtidi guialzi ni tëdidi din xindxab güünx gan din cu' ree bejn tio'p choondi ladxguib par guiguien guial diidxli zinalidi xnejz Dios. Chii dxej tëdidi guialzi guin ree, per gol guzujdx'i'ch xt dxej guiëtidi, abi' naj yazaladx lëjt guialnaban tiblayaa. ¹¹ Bén rën ree gucaagdiajg gol ba-caagdiajg ni na xSprijt Dios par ree da bejnan: Bén güün gan loj dol, achetri güün guialgüjt ni rarojp laaman."

Diidx par ree bén Pérgamo

¹² Yan bacaa ni guixhiaalil loj bén rniabee ree da bejnan luguiedx Pérgamo. Bacaa: "Bén ca' espad ni nadoxh grop lad ro', laaman na lojdi: ¹³ Naj ragbee guial luguiedx zojbidi xindxab rniabee ni. Per majsi zian lëjt za'dxi'chidi con naj ad rucwëëzt riladxidi naj ni'qui lën ree dxej ni bagüjt reeman Antipas, tijb ree xcompniari-di bén ad bacwëëzt bililadx naj, bén bagüjt reeman ladxidi lod rniabee xindxab. ¹⁴ Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bén ad rusa'nt ni basiid Balaam bejn ree, bén rëb loj Balac xhienaag guzaalguiiwaman bén Israel ree din gaw reeman guialraw ni ma gurej loj ree xdios Balac guin, në par been reeman graloj ree nidxu-udx con ree bén ad najt lacheel reeman. ¹⁵ Stijb ni ad ruladxtan naj guial lojdi no'ch ree bén ad rucwëëzt rüjn zi'c rüjn ree bén nicolaítas. ¹⁶ Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririi ro'n. ¹⁷ Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tëen tijb guíaj naquichdoo lod ca laj cübaman ni achutczí ragbee, tijbzi bén tia' guíaj guin gagbee."

Diidx par ree bén Tiatira

¹⁸ Yan bacaa ni guixhiaalil loj bén rniabee ree da bejnan luguiedx Tiatira. Bacaa: "Xi'n Dios, bén re'criani guíaloj zi'c bajl, bén rdiin bacha' guíax zi'c guib ni la bronze, laaman na lojdi: ¹⁹ Naj ragbee ni cayüjndi, rag-

been xhienaag rëndi naj, xhienaag riladxidi naj, xhie cayüjndi por naj abi' ad ralenya'tidi. Naj ragbee guial mazri zagdxé cayüjndi yan guial loj guíaxchej, ²⁰ Per yu' ni ad ruladxtan cayüjndi: Rdaandi Jezabel, béngunaa ni na rudëed xtiidx Dios. Abi' rtiëjbidi rulüüman da bejn reen dxel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bénguidxliuj. ²¹ Ma badën tiamp din yayüjnmán xgab, din gusa'n xguialdxuudxaman, per ad rëntaman. ²² Zeel yan gaxhalan guialguijdx par laaman, gaaman gagxuuman. Abi' bén rüjn ree zi'c rüjnmán, bal id reeman guchaa mod ni naban reeman ziangajc zro' naj guialzi ni tëd reeman, ²³ gugüjtán gra ree bén ma been xgab guiban zi'c naban béngunaa guin. Zian gagbee ree da bejnan guial naj ragbee xhie yu' guíjx bejn xhie tëë yu' luxdooman, xhie xgab rüjnmán. Naj gune lëjt ni rayalidi bal gonin rüjndi. ²⁴ Par gra ree da bejnan bén zojb ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi, ²⁵ tijbzi ni rnin lojdi: Gol guzujdx'i'ch loj ni ma ragbeedi xt chi guialan stijb. ²⁶ Bén güün gan loj dol, abi' gusnuu güünmán zi'c rënan guidib tiamp ni guibanmán, naj gudë guialrniabee lojman din nabeeman loj ree nacion. ²⁷ Nabeeman loj ree nacion guin zi'c tijb bén ni ca' tijb var guib, zi'czi rlia' bejn tijb guíajz zian güün-nëman bén ni ad rënt ree guzoob diidx. Gudën guialrniabee guin lojman zi'c banee da Dadanan lon, ²⁸ gudë tëen lojman bajl xanyabaa ni rliejn rsildoo. ²⁹ Bén rën ree gucaagdiajg, gol bacaagdiajg ni rëb xSprijt Dios par ree da bejnan."

Diidx par ree bén Sardis

3 Yan bacaa ni guixhiaalil loj bén rniabee ree da bejnan luguiedx Sardis. Bacaa: "Bén naban con guigajdx ree xSprijt Dios abi' ca'mán gajdx bajl xanyabaa, laaman na lojdi: Naj ragbee gra ni cayüjndi ragbee tëen guial ma güjtidi, majsi par ree bejn nabandi. ² Zeel gol batie'ch xbaaalidi, gol been naguiejn chitëë nit ni sta cayüjndi, din naj ruguian guial ad cayüjntidi xnejz delant loj da Dadan Dios. ³ Gol basaaladx ni ma biguiejndi në ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbaaalidi zi'c cayüjndi, dxel zi'c ri't tijb bën-gubaan ziangajc chi gagbeedi ma bi't casti par lëjt. ⁴ Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan. ⁵ Bén güün gan loj dol, chi guidxin hor, zian gacwaman lajd naquich abi' ad zuse'n tëëtán lajman loj xlibr guialnaban. Abi' delant loj Dios në loj ree anjl guien guial laaman naj da bejnan. ⁶ Bén rën ree gucaagdiajg, gol bacaadiajg ni rëb xSprijt Dios par ree da bejnan."

Diidx par ree bén Filadelfia

⁷Yan bacaa ni guixhiaalil loj bén rniabee ree da bejnan luguiedx Filadelfia. Bacaa: "Bén naya nali, bén naj diidxli, bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi: ⁸Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din gutie'chidi da diidxan sin guial chu gutëë lojdi, din zin alquidi da diidxan abi' ad goct rëbidi guial ad najtidi da bejnan. ⁹Lëjt guguaa ni gūnan con ree xbejn xindxab bén rëb ree naj reeman bén Israel xbejn Dios, abi' rusquieezi reeman. Guguaadi ni gūnan laa reeman, guidgazuxib reeman lojdi, gagbee tëë reeman xhienaag rënan lëjt. ¹⁰Abi' zi'c ma bazoobidi diidx gapidi pacens guial chinalidi da diidxan, ziangajc ganan lëjt chi guidxin dxej gui't guialzi loj guidib guidxliuj, zi'c tijb prueb par gra ree bénguidxliuj. ¹¹Nayob guialan loj guidxliuj stijb. Gol guzujdx'i'ch loj ni ma ragbeedi chitëë tia' ben ren ni rayalidi. ¹²Bén gūn gan loj dol, naj gudë lojman tijb luar zojbloj lën yadoo zojb xanyabaa lod naban da Dadan Dios, ni guibanman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbaman. ¹³Bén rën ree gucaagdiajg, gol bacaagdiajg ni rëb xSprijt Dios par ree da bejnan."

Diidx par ree bén Laodicea

¹⁴Yan bacaa ni guixhiaalil loj bén rniabee ree da bejnan luguiedx Laodicea. Bacaa: "Bén ni rüjn cumplid xtiidx, bén ni been gra ni rayal gūnman, bén naj diidxli, bén rniabeenë Dios diidx gocli chi gad guidxliuj gacchaaw, laaman na lojdi: ¹⁵Naj ragbee gra ni cayüjndi. Ad najtidi zi'c nijs nayaag o zi'c nijs laa. jBalzianclaa tiblayaa niajquidi zi'c nijs nayaag o zi'c nijs laa! ¹⁶Per lëjt najdi zi'c nijs nayool, ni'qui nadxa' ni'quidza nayaagt, dxei zi'c laa rabëë gajc ro' bejn nijs nayool guin, zian ma rënan gabëladxan lëjt. ¹⁷Lëjt rëb guial najdi benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi bënprob, bén zibëël, achet sirv lëjt, najdi bën lutia'p niz lon guial ad nabantidi xnejz. ¹⁸Zeel rnin lojdi, zi'c rzii bejn ganax or, zian gol been nagueijn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich dñ guiguenman naya, zian gol bayüjn xgab dñ guiguie'ch xguialxtudi abi' guiguiendi naya delant lon. Nè chi rzii bejn tijb rumed par guiaaloj bejn din guguaaman zagdxe, zian gol been nagueijn din gapidi da guial rignia'n din guguaadi zagdxe. ¹⁹Rdilnë'n abi' ruzuxnejzan gra ree bén rënan. Zeel gol bagu' luxdoo-di gol bayüjn tëë xgab xhienaag nabandi. ²⁰Gol gogbee guial naj cabedx lëjt, zi'c chi rniee tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbzi. Abi' bén guidxga' naj

ma nabannë'n laaman abi' laaman nabannëman naj.

²¹Bén gūn gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman. ²²Bén rën ree gucaagdiajg, gol bacaagdiajg ni na xSprijt Dios par ree da bejnan."

Rlies reeman xvalor Dios xanyabaa

4 Chi gulox bacan diidx guie ree, baguian niz ladia dxei baguian tijb port naxal xanyabaa. Abi' bén guneenë gajc naj diidx guia'xchej bén naj cha' zi'c trompejt, laaman na lon:

—Wë'p guie dñ gulün lüj ni gac ree chi ma gojc ree ni rnin lojl.

²Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdxe zi'c xi yagxhil tijb rey, lojn zojb tijb bejn. ³Abi' bén zojb loj yagxhil guin rulaaman bacha' zi'c ree guiaj zagdxe ni lasajc wayëjx, ni la laspe në cornalina. Abi' guijc yagxhil guin ca tijb guidguj ni rulaa bacha' zi'c guiaj zagdxe ni la esmeralda. ⁴Abi' gadëd ro' yagxhil guin baguian zagajlbitap ree yagxhil zagdxe abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman. ⁵Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. ⁶Baguia tëen delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaloj reeb. ⁷Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj. ⁸Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaaloj reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux Dadan Dios, lüj guial ca'l gra guialrniabee,

lüj guial najl Dios diidx guia'xchej në yan abi' gui'til.

⁹Beegaj chi rlies ree be guin xvalor bén ni zojb loj yagxhil guin, bén naban tiblayaa, beegaj ruza't reeb laaman zagdxe rudëëd reeb quixtëë lojman, ¹⁰guigajl-bitap ree bengol zojb yagaj, bazuxib reeman lojman, bén ni zojb loj yagxhil abi' nabanman tiblayaa, abi' ruzuxib reeman lojman rudxiib xcoron reeman niz lojman, rëbgaj reeman:

¹¹Dux Dad ree Dios, lüj rayal guiya'p respejt, diidxza'c në guialrniabee.

Din lüj beenchaaw gra ni yu'

abi' lüj rëb guial chu' gra ni yu',

abi' yu' reen.

Tijb gui'ch ni nadüüb con bén naj zi'c xi xiil Dios

5 Dxei baguian guial bén zojb loj yagxhil zagdxe ni naj zi'c xyagxhil tijb rey, ca'man tijb gui'ch yaa-

man ladbee. Gui'ch guin zi'c lojn zi'c xijchan ca lejtr abi' nadüüban, abi' naguiidan con gajdx se chitëe chu guixhial laan. ² Loj hor guin baguian tijb anjl bën gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

³ Per ni'qui xanyabaa, ni'qui loj guidxliuj, ni'qui lën li-uj ad bidxejlt bën ni rayal guixhial gui'ch guin, ni'qui par guguaaman ni ca loj gui'ch guin. ⁴ Abi' naj dád bi-nan chi baguian guial achut rdxelj guixhial loj gui'ch guin nê par guguaaman ni ca loj gui'ch guin. ⁵ Dxel na tijb ree bengol guin lon:

—Ad roonl, baguiaa nial ma yu' tijb bën ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman bën naj zi'c tijb beedx loj xdiaa Judá por guialrniabee ni rajpaman, laaman za loj xdiaa rey Davi.

⁶ Abi' chi baguian, dxel baguian guial galay lod za' yagxhil zagdx ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb bën naj zi'c xi xil Dios rguien xsen lod bidxeelguidxaman chi gütaman. Abi' yu' gajdx xcachaman con gajdx guaalojman, guigajdx guaalojman naj guigajdx xSprijt Dios bën rxhiaalaman guidib guidxliuj. ⁷ Bibig bën naj zi'c xiil guin cwa'man gui'ch guin ladxaa bën zojb loj yagxhil guin. ⁸ Chi cwa'man gui'ch guin, guidap ree be za' gajxh cwë' yagxhil guin nê gra guigajlbitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tõe reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. ⁹ Bengol guin ree rool reeman tijb cant cüb ni rëb:

Lüj rayal tia' gui'ch guin
abi' guixhialil se ni naguiidnën.
Din lüj güjtil
abi' con xrejnl ni guxhie'l gudijxil
por graloj bejn din gac reeman xbejn Dios,
achet güünan xhietëez diidx rniee reeman,
o xhie loj diaa, o xhie guiedx o xhie nacion zëed ree-man.

¹⁰ Beenl laa reeman rey
been tõe laa reeman bixhioz par dux Dad ree Dios,
abi' laa reeman nabee loj guidxliuj.

¹¹ Baguia tõe biguiejn tõe cha' zien ree anjl gadëd ro' yagxhil zagdx guin con guidap ree be guin nê ree bengol guin. Abi' benguixiujczi naj reeman por mil naj reeman. ¹² Abi' dád rejs rniee reeman rëb reeman:

Bën naj zi'c xi xil Dios, bën güt,
laaman rayal tia' guialrniabee,
laaman rayal gap guialnaza'c,
quiarguiejn, nê gojl,
respejt, guza't reeman laaman zagdx,
guilies tõe reeman xvaloraman.

¹³ Dxel biguiejnan cha' gra ree ni been Dios, zi'c ni yu' ree xanyabaa, loj guidxliuj nê ni yu' ree lën liuj nê ree ni yu' loj nijsdoo, rëb reen:

Bën zojb loj xyagxhil guialrniabee nê bën naj zi'c xi xilaman,

par laa reeman naj
respejt, diidxza'c, guialrniabee,
abi' guilies reeman xvalor reeman
zianczi nê par tiblayaa.

¹⁴ Chi gulox rëb reen zian, dxel guidap ree be za' yagaj rëb reeb:

—Amén.

Abi' guigajlbitap ree bengol za' yagaj bazuxib par gap reeman laaman respejt, bën ni naban zianczi nê par tiblayaa.

Guigajdx ree se

6 Dxel baguian biquied bën naj zi'c xi xil Dios se yaloj guin, abi' zi'c chi rbidxa' guziaaw zian biguiejnan gunee tijb ree be guin, rëbib:

—iGuda!

² Dxel baguian gulentie tijb way naquich, abi' bën dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi ziguieenman gan mazri.

³ Chi biquied bën naj zi'c xi xil Dios se barojp guin biguiejnan rëb be barojp guin:

—iGuda!

⁴ Dxel gulentie tijb way xnial, abi' bën dxiib laab ca'man tijb espad narooob nê guialrniabee par gustijla-man bejn ree loj guidxliuj din gugüjt lasa' reeman.

⁵ Chi biquied bën naj zi'c xi xil Dios se bayon, biguiejnan rëb be bayon guin:

—iGuda!

Dxel baguian gulentie tijb way ya's, abi' bën dxiib laab ca'man tijb xijglibr. ⁶ Abi' galay guidap ree be guin biguiejnan cha' tijb bën rëb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt nê vin.

⁷ Chi biquied bën naj zi'c xi xil Dios se badajp guin, biguiejnan rëb be badajp guin:

—iGuda!

⁸ Dxel baguian gulentie tijb way naguiëch, abi' bën dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree benguixliuj. Yu' reeman guiët por wadijl, o por guialrliaan, o por guialguijdx, o por ree be doxh yu' loj guidxliuj.

⁹ Chi biquied bën naj zi'c xi xil Dios se bagaay guin, baguian xan altar za' ree xsprijt ree bën bagüjt reeman guial bililadx reeman guzujdx'i'ch tõe reeman loj xtiidx Dios. ¹⁰ Abi' rbidxa' reeman rejs rëb reeman:

—Dios, Dad bën rniabee, lüj naj bën naya nali abi' rüjnl zi'c rayal, ¿za plact gaglaal par güün xguialgux-tisil con ree bën ni bagüjt dunujn loj guidxliuj din yaguijx reeman ni been reeman?

¹¹ Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güt reeman, bën ni cayüjn gajc ree sirv Dios.

¹² Chi baguian biquied bén naj zi'c xi xiil Dios se bax-o'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëëw gojcan naxnia zi'c rejn, ¹³ abi' ree bajl xanyabaa biajb reen loj guidxliuj zi'c rya-jb ree higo ni ya' loj yag higo chi rbi' bidoxh. ¹⁴ Dxel gu-nidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. ¹⁵ Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c Bén nado', në ree bén ad najt zi'c Bén nado', gra reeman baquie'chloj lèn guiajbiliaa në lèn ree yalaj. ¹⁶ Abi' rëb reeman loj ree guia' në loj ree yalaj:
—Gol biajb du guijcan, gol baquie'ch tää dunujn loj Bén zojb loj xyagxhil guialrniabee në loj xcasti Bén naj zi'c xi xiil Dios, ¹⁷ din ma bidxin dxej doxh ni gudëed reeman casti, abi', ¿chu zajc taan casti guin?

Tibgayuu tiuubitap mil ree Bén Israel

7 Chi gulox baguian ni guin ree, baguian tajp ree anjl za' reeman guidap xquin guidxliuj par gucwëëz reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag. ² Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, Bén ni ca' ree guialrniabee par güün reeman ni güün reeman con guidxliuj në con nijsdoo, ³ rëbaman loj reeman:
—Ad xhie güündi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman. ⁴ Dxel bigueijnan bël reeman cwa se guin lucwaj. Por gra ree Bén Israel, tibgayuutiubita mil reeman cwa se guin lucwaj. ⁵ Din chiptio'p mil ree Bén zëed loj xdiaa Judá cwa se guin, në chiptio'p mil ree Bén zëed loj xdiaa Rubén në chiptio'p mil ree Bén zëed loj xdiaa Gad. ⁶ Në chiptio'p mil ree Bén zëed loj xdiaa Aser, në chiptio'p mil ree Bén zëed loj xdiaa Neftalí, në chiptio'p mil ree Bén zëed loj xdiaa Manasés, ⁷ con chiptio'p mil ree Bén zëed loj xdiaa Simeón, chiptio'p mil ree Bén zëed loj xdiaa Leví, në chiptio'p mil ree Bén zëed loj xdiaa Isacar, ⁸ chiptio'p mil ree Bén zëed loj xdiaa Zabulón, chiptio'p mil ree Bén zëed loj xdiaa José, chiptio'p mil ree Bén zëed loj xdiaa Benjamín cwa se guin lucwaj reeman.

bénguixiuj najcw lajd naquich

⁹ Dxel baguian bénguixiuj ree, per bénguixiuj ree ni'qui chut zajc gulab laa reeman, Bén ni za ree gadxagayaa guiedx, gadxagayaa diaa, Bén rniee ree gadxagayaa diidx Bén za ree gra lad në gadxagayaa nacion. Za' reeman delant loj xyagxhil Bénrniabee në delant loj Bén naj zi'c xi xiilaman. Najcw reeman lajd naquich ca' tää reeman zijn. ¹⁰ Abi' rëb reeman rejs da't:
Dunujn raya'pan perdon por dux Dadan Dios Bén zojb loj xyagxhil guialrniabee në por Bén naj zi'c xi xiilaman.

¹¹ Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman re-spejt, ¹² rëb reeman:
¡Amén! guialrniabee, gojl, guialrajc, respejt, diidxa'c, guialrlies xvaloraman në quixtëë, naj reen par dux Dad ree Dios zianczi në par tiblayaa. Amén.

¹³ Loj hor zii tijb ree bengol guin gunabdiidx lon:
—¿Chu ree Bén ni najcw lajd naquich guin, ban tää ree Bénan?

¹⁴ Badxi'nan rën:

—Ad ragbeetan Dad, lüj ragbee.

Dxel naman lon:

—Laa reeman naj Bén guzagdiaj da't abi' naquich xab reeman guial ma naya reeman ma biquied xtol reeman con xrejn Bén naj zi'c xi xiil Dios. ¹⁵ Zeel za' reeman delant xi yagxhil Dios, abi' dxej guiaal cayüjn reeman sirv lod zojbaman. Abi' Bén zojb loj yagxhil guin ma za'man con laa reeman, abi' laaman gap laa reeman. ¹⁶ Ad yu'tri dxej guiliaan reeman, ad ze'c tää reeman nijs, ad zudxüü tää gubijdx laa reeman, ad zagnalaa tää reeman. ¹⁷ Din Bén naj zi'c xi xiil Dios Bén za' galay lod za' xi yagxhil Dios, laaman gap laa reeman zi'c tijb Bén rajp ree xiil abi' chinëman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs brii loj reeman chi biin reeman.

Guigajdx se

8 Chi biquied Bén naj zi'c xi xiil Dios se ni goc gajdx guin, bayajcdxe xanyabaa cost garol hor. ² Dxel baguian gajdx ree anjl za' reeman delant loj Dios, cwa' reeman gajdx trompejt. ³ Dxel bi't stijb anjl con tijb chaabacwi ni or, guzuliman delant lo altar guin abi' yu' Bén badëed zien yaal din cu'man goxyaal guin loj altar or ni za' delant loj yagxhil zagdx ni naj zi'c xyagxhil tijb rey, din tijbzi chë'pnë goxyaal guin xtiidx gra ree xbejn Dios, diidx ni rniee reeman chi rbejdx rniab reeman laaman. ⁴ Dxel diidx ladxaa anjl guin brii goxyaal guin con ree xtiidx ree xbejn Dios, diidx ni rniee reeman chi cabejdx canab reeman laaman, abi' wë'p reen niz loj Dios. ⁵ Dxel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' dád rejs guridxa' guziaaw, gojc naquie', wë'p nijs, abi' bi't xudoxh.

Trompejt ree

⁶ Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

⁷ Chi bacwejdx anjl yaloj guin trompejt ni ca'man, bi-ajb guiajyabaa loj guidxliuj no'chan bajl në rejn. Dxel cost gurol guidxliuj we'c con ree yag në ree gui'xh na-ga' yu' lojn.

⁸ Chi bacwejdx anjl barojp guin trompejt ni ca'man, dxei zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin. ⁹ Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

¹⁰ Chi bacwejdx anjl bayon guin trompejt ni ca'man, dxei biajb bajl xanyabaa ni naroob ni cacaguij zi'c chi rtiaguij guied, loj cost garol guiiw ni yu' në cost garol ree lod rajch nijs biajban. ¹¹ Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

¹² Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëew në cost garol ree bajl xanyabaa bicajy. Abi' guial bicajy reen, dxei cost garol dxei në guiaal ad basnit.

¹³ La'tgaj cuguian ni guin ree, bigueijnan zi'c chi rzuj tijb bisia xanyabaa. Dxei bigueijnan cha' tijb anjl rbixdi-ajman rëbaman:

—¡Prob, per prob, per probza ree bën ni yu' loj guidxliuj por zachoon trompejt ni ryaadx gucwejdx za choon ree anjl!

⁹ Chi bacwejdx anjl bagaay guin trompejt ni ca'man, dxei baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizë ni ad yu't lod rliox. ² Chi guxhialan ro' bizë guin tijb go'xh yo'xhchab brii lën bizëe guin zi'c chi ririi go'xh lën tijb horn naroob, xt bascajy go'xh guin gubijdx në bi. ³ Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'cgajc nixüb. ⁴ Per gunabee reeman laa reeb chitëe xhie güün reeb guixya' ree, ni'qui ree yag, ni'qui ree gui'xh naga'. Naabzi ree bën ni ad yu't ree xse Dios lucwaj. ⁵ Per ad par gugüjtt reeb bejn, naabzi par sagdiaj reeman gaay bëew. Abi' lod rudidxa' reeb riyajnan zi'c ryajn lod rudidxa' nixüb. ⁶ Lën ree dxejzii quii ree bejn guialgüjt, per ad zadxejlt reeman laan. Guiën reeman guiët reeman per ad zëjtt reeman.

⁷ Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn. ⁸ Abi' guidxguijc reeb naj zi'c guidxguijc béngunaa, guiáad dxiidlay reeb naj zi'c dxiidlay beedx. ⁹ Guidib luxdoo reeb nada'cwan zi'c guuib, abi' xhiil reeb rüjnan naquie' zi'c rajc naquie' chi ruxüünnë ree way carrejt loj wadijl. ¹⁰ Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëew. ¹¹ Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bën ruloox.

¹² Zian rliox guialzi yaloj, dxei gui't zatío'p guialzi.

¹³ Chi bacwejdx anjl baxo'p trompejt ni ca'man, dxei bigueijnan tijb cha' bejn briin galay ree cajch ni za' guidap xquin altar or ni za' delant loj Dios. ¹⁴ Cha' bën bigueijnan rëbaman loj anjl baxo'p bën ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

¹⁵ Zian bidxin or, bidxin dxei, bidxin bëew në ijz ni naj par laa guidap ree anjl guin din gugüjt reeman garol ree bénguidxliuj. ¹⁶ Abi' bigueijnan bël naj xsuldaad reeman bën dxiib ree way. Naj reeman tio'pgayuu millon. ¹⁷ Ze baguian way guin ree con ree bën dxiib laa reeb: Bën dxiib ree way guin, guidib luxdoo reeman nada'cw guuib culor xnia, ni sul në ni naguiëch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre. ¹⁸ Abi' garol ree bénguidxliuj güjt por bajl guin, go'xh guin në azufre guin ni ririi ro' reeb. ¹⁹ Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guijc bëel.

²⁰ Per los demasri ree bën ni ad güjtt por ree guialzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajt ruguiaa, ad rajt rigueijn ad rajc tëtë rza reeman. ²¹ Ad bacwëëz tëtë rugüjt reeman bejn ree, ad basa'n tëtë reeman guialbidxaa, ad basa'n tëtë reeman ni dxuudx ni rüjn reeman con bën ad najt lacheel reeman, ad basa'n tëtë reeman guialgubaan.

Tijb anjl ca' gui'ch

¹⁰ Dxei baguian stijb anjl bën gojl da't, zidguiajta-man xanyabaa lën tijb zaj abi' guijcaman dxiib tijb guidguj. Lojman naj zi'c gubijdx, abi' guia'man naj zi'c tio'p bajl ziool. ² Dxei ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. ³ Dxei guridxa'-man rejs da't zi'c rbidxa' beedx, chi guridxa'man guridxa' gajdx ree guziaaw. ⁴ Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi bigueijnan cha' tijb bën na lon diizd xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

⁵ Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, ⁶ abi' badëe xtiidxaman por bën naban tiblyaa, bën been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac.

⁷ Din chi gucwejdx anjl ni goc gajdx trompejt ni ca'man dxei ma bidxin dxei gac zi'c naj xixgab Dios, zi'c bagojman loj ree bën badëe xtiidx Dios loj ree bejn bën ni rüjn ree sirv lojman.

⁸ Dxei zatijb gaj gunee bën ni guneenë naj diizd xanyabaa, naman:

—Wej bica' librdoo ni zojbyal loj ladxaa anjl ni za' loj nijsdoo në loj guidxliuj.

⁹ Dxei wan lod za' anjl guin, rën lojman din gunee-man librdoo guin lon, dxei naman lon:

—Cwa'n gudawan. Ro'l guiatan nejxh zi'c dxijn, per lënl nala yaban.

¹⁰ Dxei cwa'n librdoo guin ladxaa anjl guin, abi' gudawan. Ro'n biguiajtan nejxh zi'c dxijn, per chi gulox

gudawanan nala biguijtan lënan. ¹¹ Dxel bagojn ree-man naj guial gusnuu gugojnan bejn ree ni na Dios gac con zien ree nacion, rey ree në ree guiedx, xhi-etëëz diidx rniee reeman.

Tio'p ree testiw

11 Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil bën cayajp ree Dios respejt lën yadoo guin. ² Per ad tia'beel lule' yadoo guin din lule' guin ma badëë Diosan loj ree bën ad najt ree bën Israel, laa reeman naj bën gusagdiaj ree bën Jerusalén loj choon ijz garol. ³ Abi' naj gaxhalan tio'p ree da bejnan din guza't ree-man naj. Grop reeman gacw lajd ya's, abi' laa reeman guinee da diidxan choon ijz garol.

⁴ Grop ree bën guin naj grop ree yag olivo në grop ree candeler ni za' loj dux Dad ree Dios bën rniabee loj guidxliuj. ⁵ Bal chu bën rën güünnë laa reeman xhienin, ro' reeman grii bajl din gugüjt reeman bën rdxe'ch ree laa reeman. Zian guiët ree bën rën güün laa reeman xhienin. ⁶ Grop ree bën guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guinee reeman da diidxan. Rajp tëë reeman guialrniabee par guchaa ree-man nijs gacan rejn, abi' zajc guiniab reeman din gui't graloj guialzi loj guidxliuj bëltëëz volt rën reeman.

⁷ Per chi ma bayaaloj tiamp ni guinee reeman da diidxan, dxel tijb monstuo, tijb be doxh grii lën bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman. ⁸ Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüjz, luguiedx ni naj yan zi'cgajc Sodoma në Egipto. ⁹ Dxel graloj ree bejn bën rniee ree gadxagayaa diidx, bën gralad ree, bën za graloj ree nacion zuguaa reeman gaa xcuerp ree bën guin lunejz choon dxej garol, per ad zatiëjbt reeman guiguie'ch ree bën guin. ¹⁰ Abi' ree bën naban loj guidxliuj dád yabaa reeman guial ma güjt ree bën guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bën guin laa reeman. ¹¹ Per chi ma bayaaloj choon dxej garol guin, yasban Dios bën guin ree dxel chixche reeman abi' gra ree bën guguaa dád guidxeb reeman.

¹² Dxel dád rejs biguien cha' tijb bën ni gunee xanyabaa, rëbaman loj grop ree bën guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bën rdxe'ch laa reeman. ¹³ Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiáad gra ree bën ad güjtt dád bidxeb reeman abi' gules reeman xvalor Dios bën yu' xanyabaa. ¹⁴ Zian rliox guialzi rarojp, dxel laa zëëd gajc guialzi ni rayon.

Trompejt ni goc gajdx

¹⁵ Chi bacwejdx anjl ni goc gajdx guin trompejt ni ca'-man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xguialrniabee guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

¹⁶ Guigajlbitap ree bengol zojb loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt, ¹⁷ rëb reeman:

Dux Dadan Dios, lüj rajp gra guialrniabee

abi' najl Dios yan në diizd gocli abi' gui'til.

Quixtëë lüj guial ma culüü xguialrniabee naroo bil ni rajpil

abi' ma guzulolj canabeel.

¹⁸ Bénguidxliuj ree bidxe'ch reeman,

per ma bidxin dxej gulüü xguialrdxe'chil.

Ma bidxin dxej güün xguialguxtisil con ree bengüt

par gudëël ni rayal tia' ree xbejnl

bën badëëd ree xtiidxil, në ree bën bililadx lüj.

Në ree bën rajp lüj respejt.

Ma bidxin dxej zi'c ree benzobloj në ree bën ad zojblojt tia' reeman ni rayal reeman,

dxel gunidlojl bën ruxhiin ree loj guidxliuj.

¹⁹ Chi gulox rëb reeman zian, bixal xyadoo Dios xanyabaa dxel biguien xcaj promisejs ni been Dios diizd gocli. Dxel guzulolj rë'p nijs, rajc naquie', rëëz guziaaw, bi't xudo'xh abi' dád zro' biajb guiajyabaa.

Tijb béngunaa në tijb dragon

12 Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi' nuzuj guia'man loj bëëw abi' guijcaman yu' coron ni gocchaw con chiptio'p bajl xanyabaa. ² Yu' xi'n béngunaa guin abi' rbixdiajman ragnaa lënman guial ma gal xi'nman. ³ Per gojc stijb sen xanyabaa. Balüüloj tijb dragon ro', tijb bedoxh najb culor xnia. Yu' gajdx guijquib, chii xcajchib yu' tëë tijb coron tijb gaj guijquib. ⁴ Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix. ⁵ Gojl xi'n béngunaa guin tijb xindo niguiaaw, abi' laax nabee loj guidxliuj con tijb var guiib. Dxel biquied reeman laax loj xniaax, bidxinx lod zojb Dios lod canabeeman. ⁶ Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudëëd reeman ni gawaman choon ijz garol.

⁷ Dxel guyu wadijl xanyabaa, anjl ni la Miguel con ree xi anjlaman gudijlnë reeman dragon guin con ree xi anjlib. ⁸ Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib. ⁹ Zianan zeel bazaal reeman dragon guin loj guidxliuj con ree xi anjlib. Dragon guin naj bëël gulal ni la xindxab në satanás xin rusquiee gra ree bénguidxliuj.

¹⁰ Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xguialrniabeeman chi nabeenëman Jesucrist, din ma biquied bën rbe'c xguialquia ree dux compniar ree, bën rdxinnë ree guialquia guin loj dux Dad ree Dios dxej guial. ¹¹ Abi' dux compniar ree been reeman gan por rejn ni guxhie' bën naj zi'c xi xiil Dios në por ni rëb reeman xhienaag rliladx reeman xtiidx Dios, ad bidxebt reeman majsi niëjt reeman. ¹² Zeel gol badxe' luxdoodi nix gra ree bën zojb xanyabaa per, ;probza lëjt bën zojb ree loj guidxliuj në ree be yu' loj nijsdoo! Din ma biguiajt xindxab lod zojbidi, dád rdxe'chix guial ragbeex sta'nz dxej raya'n par laax.

¹³ Chi baguiaa dragon guin guial ma biajbib guidxliuj, dxei briinalib béngunaa naj xniaa xindo guin. ¹⁴ Dxel badëë reeman tio'p xiil béngunaa guin zi'c xiil bisiaro' din gac suman loj bëël guin xt lod naj ganax yujbidx, lod gudëëd reeman ni gawaman choon ijz garol. ¹⁵ Abi' gulëë ro' dragon guin tijb guiiw nijs din chinën béngunaa guin. ¹⁶ Per bixal loj guidxliuj persi gu'n guibidx nijs gulëë ro' dragon guin. Zian been guidxliuj béngunaa guin yudar. ¹⁷ Dxel dád bidxe'ch dragon guin béngunaa guin, abi' zitiñëb sta'n ree bën ni za loj xdiaaman, bën ruzoob ree xtiidx Dios zinal tëë reeman xtiidx Jesucrist.

Tio'p ree bedoxh

13 Wej dragon guin bisub ro' nijsdoo. Abi' naj baguia guial brii tijb monstruo loj nijsdoo, tijb bedoxh be yu' gajdx guijc, chii xcajchib abi' loj tijb gaj cajch guin yu' tijb gaj coron, abi' loj guigajdx guiquib ca tijb diidx ni rnieeguijdx Dios. ² Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstruo guin xluarib lod rniabeeb abi' guialrniabeero' ca'b par nabeeb. ³ Tijb guijc monstruo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree bénguidxliuj badxaloj abi' binal reeman monstruo guin. ⁴ Dxel gojp da't reeman respekt dragon guin guial badëëdib guialrniabee loj monstruo guin gojp da't tëë reeman respekt monstruo guin, rëb reeman:

—¿Chu naj zi'c monstruo guin abi' chu zajc til con laab?

⁵ Monstruo guin gojcchaaw ro'b par guilies xvalor gajquib, abi' guinieeguijdxib Dios, gojpib guialrniabee par güünb zian loj choon ijz garol. ⁶ Abi' guneeguijdxib Dios, guneeb diidxmal ree por laaman, por xyadooman në por gra ree bën zojb xanyabaa. ⁷ Gojp monstruo guin permis par sub contr ree xbejn Dios abi' güünb laa reeman gan. Abi' gojpib guialrniabee par nabeeb graloj ree bejn, bën ni rniee ree gadxagayaa diidx, bën gra lad ree, gra ree nacion. ⁸ Gra ree bën ad cat laj loj xlibr guialnaban diizd chi gad guidxliuj gacchaaw, loj xlibr bën naj zi'c xi xiil Dios bën güt por ree bejn, gra reeman gap da't respekt monstruo

guin. ⁹ Bén rën ree gucaagdiajg, gol bacaagdiajg.

¹⁰ Bén naj che ladxguiib, cheman ladxguiib. Bén naj guiët con espad, con espad guiëtaman. Zeel bën naj ree xbejn Dios ad yadxaguidi ad gucwëëz tëë chililadxidi Dios.

¹¹ Dxel baguian stijb monstruo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. ¹² Abi' lasa'gajc guialrniabee ca' monstruo ni brii loj nijsdoo lasa'gajcan ca'b abi' por laab gojp da't ree bejn respekt monstruo ni brii loj nijsdoo, monstruo ni bayajc lod nadxeelguijdx ni rulüücü gugüjt laab.

¹³ Abi' monstruo ni brii loj guidxliuj në gajquib rüjn milagr narooob ree, xt rajc rniabeeb rguiajt bajl diizd xanyabaa xt loj guidxliuj delant loj ree bejn. ¹⁴ Zian rusquieeb bénguidxliuj ree por ree milagr ni rüjnb delant loj monstruo ni brii loj nijsdoo, abi' rniabeeb rüjn ree bénguidxliuj tijb xfigur monstruo ni brii loj nijsdoo, monstruo ni bidxeelguijdx con espad abi' gubajnb.

¹⁵ Abi' monstruo ni brii loj guidxliuj xt gojpib guialrniabee par gudëëdib guialnaban loj xfigur monstruo ni brii loj nijsdoo, par guiniee figur guin në par gugüjtib gra ree bën ni ad rajpt respekt figur guin. ¹⁶ Gunabee tëë monstruo ni brii loj guidxliuj gra ree bejn, zi'c ree bengol zi'c ree xindoo, benrijcw ree në ree bënprob, bën naj ree zi'c bën nado' në ree bën ad najt zi'c bën nado', din chu' sen yaa reeman ladbee o lucwaj reeman. ¹⁷ Abi' achut zajc sii o guto' ya bal id ca reeman sen guin, abi' sen guin naj laj monstruo guin o xinum-brib.

¹⁸ Guie ryaadx guialrignia'. Bén rajp guialrignia' cwëë xcwentaman con xnumbr monstruo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

Cant ni biil tibgayuu tiuubitap mil ree bejn

14 Baguia tëën guial za' bën naj zi'c xi xiil Dios guijc dajn ni la Sión. Bén naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bën naj zi'c xi xiil Dios në laj xDadaman. ² Abi' biguejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp. ³ Dxel rool reeman tijb cant cüb delant loj yagxhil lod zojb bën rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bën tibgayuu tiuubitap mil guin, laa reeman naj bën gulaa loj ree bénguidxliuj. ⁴ Abi' laa reeman naj ree xinguaaw ni ad bagaalt béngunaa, gojc reeman naya abi' zinal reeman bën naj zi'c xi xiil Dios bantëëz guin rejman. Laa reeman naj ree bën gulaa loj ree bénguidxliuj abi' zi'c guialnaza'c yaloj ni rinë bejn loj Dios zian naj reeman delant loj Dios në delant loj bën naj zi'c xi xiil Dios. ⁵ Ad goct basquiee reeman, nayadxuj reeman delant loj Dios.

Ruson ni badëë guiyon ree anjl

⁶ Dxel baguian tijb anjl rzujman xanyabaa con tijb ruson ni naj par tiblayaa par gugojnman gra ree bën naban loj guidxliuj, xhietëëz diidx rniee reeman, o xhietëëz loj diaa zëed reeman, o xhietëëz ciuda o nacion zëed reeman. ⁷ Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëed ree bejn cwent lojman. Gol gojp da't respekt bën been xanyabaa, guidxliuj në nijsdoo në lod rajch nijs.

⁸ Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooob guin gra ree bénguidxliuj guial güün reeman graloj ree nidxuudx, graloj ree dol ro'.

⁹ Dxel rejs da't gunee anjl bayon guin rëbaman:

—Bal chu gap da't monstruo guin respekt con xfigurib abi' tiëbaman tia xsenb lucwajman o yaaman, ¹⁰ bën zii yayal xcasti narooob Dios, zro' da't gudëë-daman laaman casti. Abi' sagdiajman loj bajl ni caye'c azufre delant loj ree xianjl Dios në delant loj bën naj zi'c xi xiil Dios. ¹¹ Ad yu' tëët dxej yayü' bajl guin. Ni'qui radxe ni'qui guiaal achet guialraziiladx par ree bën rajp da't respekt monstruo guin con xfigurib, o bën ca ree xsenb. ¹² Zeel bën naj ree xbejn Dios bën ruzoob ree xtiidxaman abi' rililadx reeman Jesucrist, ad rayalt yalenyä' reeman.

¹³ Biguiejn tēen cha' bën ni na lon diizd xanyabaa:

—Bacaa ni ganin lojl: “Diizd yan xiquilbaa ree bën rëjt con guialrililadx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman guialbenza'c reeman.”

Guialnaza'c ni runee guidxliuj

¹⁴ Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. ¹⁵ Dxel brij stijb anjl lën yadoo abi' rejs da't guneeaman bën ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

¹⁶ Abi' bën zojb loj zaj guin badëed xi hosaman loj guidxliuj abi' bato'paman guialnaza'c loj guidxliuj.

¹⁷ Dxel brij stijb anjl lën yadoo ni naj xanyabaa, ca' gajcaman tijb hoz ni nadoxh ro'. ¹⁸ Dxel niz loj altar brij stijb anjl bën rajp guialrniabee par bajl, abi' dád rejs guneeenëman bën ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

¹⁹ Dxel badëed anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios. ²⁰ Dxel xijch ciuda guin bixii ree uv

guin abi' lën lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

Bën naj ree xi anjl Dios con guigajdx ree guialzi

¹⁵ Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx guialzi. Guialzi guin ree naj gajdx ni chigra gac din con guialzi guin ree gusiaaloj Dios xcastiman.

² Baguia tēen zi'c nijsdoo, per najn zi'c tijb vidr xcutor bajl. Dxel lojn za' ree bën been ree gan loj monstruo, loj figur con loj xnumbrib, ca' reeman arp ni badëed Dios loj reeman. ³ Abi' cayool reeman xcant Moisejs xbejn Dios në xcant bën ni naj zi'c xi xiil Dios, rëb cant guin:

Narooob në ni diidxli radxaloj bejn

naj ree ni rüjnl, dux Dadan Dios Bën rajp gra guialrniabee.

Xnejz da't në zi'c rayal rüjnl,

luj guial rniabeel gra ree bénguidxliuj.

⁴ ¿Chu ad zadxebt luj?

¿Chu ad zuza'tt luj zagdx, dux Dadan Dios?

Tijbzi luj naj bën naya nali

abi' bénguidxliuj gui't gap da't reeman luj respekt guial ma balüül bejn ree guial xnejz rüjnl.

⁵ Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa. ⁶ Abi' lën yadoo guin brij gajdx ree anjl bën ca' ree gajdx ree guialzi, najcw reeman lajd naquich ni rdiin bacha', abi' naxii tijb cinch or luxdoo reeman. ⁷ Abi' tijb guidap ree be ni za' lod za' Dios, badëeb loj tijbgaj ree anjl guin ti-jb cojp or ni guidxa xcasti Dios bën naban guidib tiamp në par tiblayaa. ⁸ Abi' lën yadoo guin gudxan xgo'xh xbacha' Dios në xguialrniabeeman. Achut gojc niu lën yadoo guin xt chi ma gulox guigajdx ree guialzi ni zidnë ree anjl guin.

Cojp ni guidxa ree xcasti Dios

¹⁶ Dxel biguiejnan cha' bejn rejs da't guneeaman diizd lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

² Dxel wej anjl yaloj guin, bala'taman ni yu' loj xcojpaman loj guidxliuj. Abi' gra ree bën ni yu' xsen monstruo guin bën gop da't ree respekt xfigurib, brij guiadxyoodx lad reeman, ni rdoob da't.

³ Abi' anjl barojp guin bala'taman ni yu' loj xcojpaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

⁴ Anjl bayon guin bala'taman ni yu' loj xcojpaman loj ree guiw në lod rajch ree nijs abi' nijs guin ree bayajc reen rejn. ⁵ Abi' biguiejnan rëb anjl ni rniabee ree nijs guin:

—Xnejz naj ni cayüjnl në zi'c cayüjn xguialguxtilis, Dad Dios, luj naj bën naya nali, najl Dios yan në diizd gocli. ⁶ Din bénguidxliuj ree guixhie' reeman rejn

bagüjt reeman xbejn reel në ree bën badëed ree xti-idxil. Zeel ma badëedil rejn guië' reeman, abi' zian ray-al reeman.

⁷ Abi' niz loj altar biguiejnan cha' stijb bën rëb:

—Walican, Dad Dios bën rajp gra guialrniabee. Xnejz në zi'c rayal cayün xguialguxtisil.

⁸ Abi' anjl badajp guin bala't ni yu' loj xcojpaman loj gubijdx din guze'can bejn ree zi'c bajl. ⁹ Gra reeman we'c por xguialnalaa da't gubijdx guin. Per ni'qui zian ad bayünjt reeman xgab por xtol reeman, ad baza'tt reeman Dios zagdx guneeguijdxli reeman laaman, laaman guial najman bën rniabee ree guialzi guin.

¹⁰ Anjl багаау guin bala'taman ni yu' loj xcojpaman lod rbej monstruo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman. ¹¹ Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudëd reeman në por guidx ni gudxib lad reeman, guneeguijdx reeman Dios bën zojb xanyabaa.

¹² Anjl baxo'p guin bala't ni yu' loj xcojpaman loj guiwro' la Eufates abi' gubidx nijs loj guiw guin. Zian bixal nejd din tēd ree rey në zēd ree lad lod rliejn gubijdx. ¹³ Dxel baguian ro' dragon guin, con ro' monstruo guin në ro' bën rusquiee rēb rudëe xtiidx Dios loj ree bejn brii choon ree sprijt mal ni naj zi'c bidx. ¹⁴ Guiyon ree sprijt guin naj xsprijt xindxab, abi' rüjn reen milagrabi' rej reen lod za' gra ree rey loj guidxliuj persi rado'p reeman din til reeman con Dios bën rajp gra guialrniabee, dxej ni gui'taman guidguieenman gan loj gra reeman.

¹⁵ Rëb Jesucrist:

—Gol badxe'guijc guial dxejczy guialan zi'c chi ri't tijb xingubaan tijbzi golp. Xiquilbaa ree bën rbëz naj, bën za'sin ree chi guialan din chitëe yaya'nxtu reeman zi'c chi rniaaz bën za' zibëel.

¹⁶ Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

¹⁷ Abi' anjl bagajdx guin bala't ni yu' loj xcojpaman loj bi, abi' diidx lēn yadoo ni yu' xanyabaa niz lod za' xyagxhil bën rniabee, biguien rejs da't cha' bën rëb:

—Ma bayaaloj gojc ni rayal gac.

¹⁸ Abi' guzuloj rē'p nijs, rajc naquie', rbidxa' guziaaw dxe bi't xudoxh, tijb xudoxh ni ad goct wayi't diidx guzuloj yu' bejn loj guidxliuj, din xu guin naj ni mazczy ni doxh. ¹⁹ Abi' gula' ciuda naroob guin gojcan choon lala', dxe guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëe xcasti ro'man loj ciuda naroob guin. ²⁰ Abi' guni-jt ree gra yuj riga' loj nijsdoo në ree guia'. ²¹ Biajb tēe guiajyabaa guijc ree gra ree bēnguidxliuj, dxe tijbgaj ree guiaj yabaa guin na' reen cost tiuu quil. Abi' ree bejn guneeguijdx reeman Dios, por ree guialzi guin, guial dād ni doxh gojc chi biajb ree guiajyabaa guin.

Guialguxtis ni güün Dios con bēngunaa dxuudx

17 Abi' tijb guigajdx ree anjl guin bi'taman naman lon:

—Guda din gulün lüj casti ni rayal bēngunaa dxuudx ni zojb loj nijsro', ² laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian baza-alguiwaman bejn ree loj guidxliuj con ree ni ad rüjnt sirv ni rüjnman.

³ Abi' por xSprijt Dios binë anjl guin naj lod naj ganax yujbidx. Ni baguian tijb bēngunaa dxiibaman tijb monstruo xnia, abi' guidib ladib ca diidxguijdx par Dios, yu' gajdx guijquib con chii xcachib. ⁴ Abi' bēngunaa guin najcwaman lajd murad në ni xnia, najcchaawnën ganax or në ree guiaj zagdx në ree perl. Abi' ca'man tijb cojp or guidxa ree ni nabixhladx lojn në ree ni dxuudx ni rüjnman. ⁵ Abi' lucwajman ca tijb letrer ni achutczy rignia' ni rēn guiëban, rēb loj letrer guin: “Babilonia, ciuda naroob ni naj xniaa ree bēngunaa dxuudx në xniaa ree ni dxuudx ni rajc loj guidxliuj,” ⁶ Dxel gogbeen guial rzüdx bēngunaa guin con xrejn ree xbejn Dios, con xrejn ree bën ni güt guial gune reeman xtiidx Jesús. Abi' dād badxalon chi baguian zian.

⁷ Dxel na anjl guin lon:

—¿Chexc zeel dād radxaloj? Naj gusignia' lüj ni rēn guiëb bēngunaa ni baguiaal në monstruo ni dxiibaman, be ni yu' gajdx guijc con chii xcach. ⁸ Monstruo ni baguiaal, laab naj be guban gocli, per yan ad nabantrib. Per gulülojb lēn bizë ni ad yu't lod rliox dxeiri nidlojb tiblayaa. Abi' ree bën naban loj guidxliuj, bën ni ad cat ree laj loj xlibr guialnaban diidx gocli chi gad guidxliuj gacchaaw, laa reeman yadxaloj chi guguaa reeman monstruo ni guban gocli, be ad nabant yan per gui'tib.

⁹ Guie ryaadx quiarguejn. Guigajdx guijc monstruo guin rēn guiëban gajdx guia' lod zojb bēngunaa guin ¹⁰ rēn tēe guiëban gajdx ree rey. Gaay ree rey guin ma gudëed xguialrniabee, abi' bën baxo'p guin naj bën canabee yan. Dxeiri nabee bën bagajdx guin, per ad xchejt nabeeman. ¹¹ Abi' monstruo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxei yayalib lod rayalib casti par tiblayaa.

¹² Guidxii cajch ni baguiaal rēn guiëb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstruo guin. ¹³ Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstruo guin, ¹⁴ abi' til reeman con bën naj zi'c xiil Dios. Per güün bën naj zi'c xiil guin laa reeman gan din laaman naj Dad loj gra ree dad, naj tēeman rey loj gra ree rey. Abi' bën za' ree con bën naj zi'c xiil Dios, laa reeman naj bën bazoob xtiidx Dios, bën ma naj ree par laaman abi' diidxli zinal reeman xnejz Dios.

¹⁵ Na tēe anjl guin lon:

—Nijs ni baguiaal lod zojb bēngunaa dxuudx guin laan rēn guiëb graloj ree bën rniee graloj ree diidx, bën gra lad ree, bën zēd ree gra loj ree nacion. ¹⁶ Abi' monstruo guin con guidxii xcachib ni baguiaal, guidxe'ch reeman bēngunaa dxuudx guin, tio'nladx reeman laaman, gusa'n reeman zibëelaman, gaw reeman xbëelaman abi' guze'c reeman laaman. ¹⁷ Dios yazal-

adx loj guidxii ree rey guin quiarguejn din güün ree-man zi'c rënman. Yaya'n reeman diidx din yayü xguial-rniabee reeman loj monstuo guin, xt gac cumplid ni rëb Dios gac. ¹⁸ Abi' búngunaa ni baguiaa, laaman naj ciuda narooob ni rniabee ree rey yu' loj guidxliuj.

Biajb guiedx Babilonia

18 Chi gulox baguian ni guin ree, dxel baguian sti-jb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, ² abi' rnieeman rejs da't rëbaman:

—Ma biajb, ma biajb Babilonia ma naj ciuda narooob guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn. ³ Din zi'c chi rusüdx bejn stijb bejn, zian ma batiaalguiw ciudaro' guin gra ree búnguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bën rüjn negojs loj guidxliuj ma naj reeman rijcw por graczi ree ni dxuudx rajc ni.

⁴ Dxel bigueijnan cha' stijb bën gunee diidx xanyabaa rëbaman:

—Gol brii loj ciuda guin, da bejn reen, chitëe go'chidi loj ree dol ni rajc ni chitëe tédidi guialzi ni gac ree loj ciuda guin. ⁵ Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. ⁶ Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree.

⁷ Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bën rniabee, ad najtan bën bizëjb ad yu' tëët dxej chu'nayan.” ⁸ Zeel tijbzi dxej guidxaj lasa' ree guialzi par ciuda guin, zi'c guialgüjt, guialrunaya, guialrliian, dxel che'can con bajl. Din narooob xguialrniabee dux Dad ree Dios bën gudëed casti ciuda guin.

⁹ Abi' ree rey ni yu' loj guidxliuj, bën babaan ree guial been reeman ni dxuudx con ciuda guin, zoon reeman, naya sagdiaj reeman chi guguaa reeman go'xh ni caye'can. ¹⁰ Abi' zijt su reeman chi guguaa reeman casti ni cadëdan, dxel guiëb reeman:

—iProbza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

¹¹ Abi' ree bën rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman, ¹² zi'c or, plajt, guiaj zagdx ree, perl, lajd zagdx ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdx, bronce, guiib con marmol në marfil. ¹³ Ad zajc tëëtri guto' reeman canel në graloj ree ni ruree nejxh, ad zajc tri guto' reeman goxyaal, mirra, perfum, vin, sejt oliv, harin zagdx, tri-go, go'n, xiil, way, carrej, ad zajc tëëtri ree guto' reeman bejn ree. ¹⁴ Abi' guiëb reeman loj ciuda guin:

—iAd rajp tril guialnaza'c ni bayuladx da'til, tiblayaa ma baniitil zi'c gubanl con gra ree ni za'c ni gopil!

¹⁵ Gra ree bën been negojs, bën gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zuna reeman. ¹⁶ Abi' guiëb reeman:

—iProbza, probza ciuda narooob guin! Laan guial guzujchaawan con ree lajd zagdx, lajd culor murad con ni xnia, laan guial guzujchaawan con or, con perl në con guiaj zagdx ¹⁷ din, i tibrajtzi gunidloj gra ree guialnaza'c guin!

Gra ree bën zë lën barcw, zi'cgajc xcapitan ree barcw, gra ree mariner në los demazri ree bën rüjn dxiin lën barcw, guzudxe reeman zijt ¹⁸ chi baguaa reeman go'xh ni cayëc ciuda guin, abi' gurixdiaj reeman rëb reeman:

—iGoc guyu tijb ciuda lasa' ciuda ro' guie?

¹⁹ Abi' barooob yuj guijc reeman, roon reeman abi' guyunaya luxdoo reeman rëb reeman:

—iProbza!, probza ciuda narooob guin por xguialnaza'can gra ree bën been negojs bën rajp ree barcw gojc reeman rijcw, din tibrajtzi gunidlojn.

²⁰ Dxel biguien cha' bën na:

—Per lëjt bën zojb ree xanyabaa, lëjt najdi xi apóstoles Jesucrist, lëjt bën rudëd ree xtiidx Dios në los demazri ree bën naj xbejn Dios, gol babaan por ni caza-jc ciuda guin din zian cayüjn Dios xguialguxtisaman por ni beennë ciuda guin lëjt.

²¹ Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguaa Babilonia guin stijb. ²² Ad zaguien tri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguien tri loj ciuda guin. Achutri bejn güün dxiin ni, ni'qui xnaquie' mulin ad zaguien tri ni.

²³ Achetri guij che'c loj ciuda guin, achutri guxhliiaa. Gra ree bën been negojs loj ciuda guin ganax bën zojbloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

²⁴ Abi' loj ciuda guin bagüjt reeman bën badëed ree xtiidx Dios, në ree bën riladx Dios, abi' por ciuda guin bagüjt reeman los demasri ree bën ma güjt loj guidxliuj.

19 Chi gulox baguian bigueijn tëen zian, dxel dád rejs bigueijnan cha' zien da't ree bën canee xanyabaa rëb reeman:

iQuixtëe Dios! Por dux Dad ree Dios zëed perdon, respekt në guialrniabee,

² din laaman waliman abi' xnejz rüjn xguialguxtisaman,

ma badëedaman casti búngunaa dxuudx ni bazaal-guiiw

búnguidxliuj ree con ree xni malaman, ma been Dios guialguxtis con laaman persi baguijxaman ni bagüjtaman xbejnman.

³ Abi' bigueijnan rëb reeman stijb:

—¡Quixtëë Dios! Ad yu't dxej yayü' go'xh ni caye'c ciuda guin.

⁴ Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respekt, rëb reeman:

—¡Quixtëë Dios! ¡Diidxa'c guin ree naj par laaman!

⁵ Abi' niz lod za' yagxhil guin biguiejnan cha' bén rëb: Gradi zi'c bengol zi'c xindoo gol gules xvalor dux Dad ree Dios, lëjt rüjndi laaman sirv abi' rajpidi laaman respekt.

Xguialruxhliaa bén naj zi'c xi xiil Dios

⁶ Biguiejn tëën zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtëë Dios! Din ma canabee dux Dad ree Dios, bén ca' gra guialrniabee.

⁷ Yan yadxé' du luxdoo ree zagdxé, yabaa ree yales tëë ree xvaloraman.

Din ma bidxin dxej guxhliaa bén naj zi'c xi xiilaman abi' bén gac lacheelaman ma za'chaawaman.

⁸ Najcwaman lajd zagdxé, ni naquich, naya rulaa tëën bacha'.

Din lajd naquich guin rën guieban ni zagdxé ni been ree xbejn Dios.

⁹ Abi' na anjl guin lon:

—Bacaa: “Xiquilbaa ree bén naj gui't loj xguialruxhliaa bén naj zi'c xi xiil Dios.”

Na tëë anjl guin:

—Ni guie ree naj xtiidxli Dios.

¹⁰ Dxel bazuxiban loj anjl guin par ga'p da'tan laaman respekt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bén wali ree rüjncwent xtiidx Jesucrist. Gojp da't respekt Dios.

Din por Jesús zëëd ni rníee ree bén rudëëd xtiidx Dios.

Bén dxiib tijb way naquich

¹¹ Dxel baguian zobjyal xanyabaa baguia tëën tijb way naquich. Bén dxiib laab laman: Bén ruzoob xtiidxaman në bén wali, din xnejz rüjn xguialguxtisaman në xwadijlaman, ¹² guiallojman rulaan bacha' zi'c bajl abi' zien ree coron yu' guijcaman, tib lajtaman ca laj tijb bejn ni achut rignia', tijbzi laaman ragbee xhie rën guieban, ¹³ guidib rejnzi xabaman, abi' laman Xtiidx Dios.

¹⁴ Abi' ree xsuldadaman bén yu' xanyabaa zinal reeman laaman dxiib reeman way naquich, najcw reeman lajd zagdxé ni naquich ni naya tëë. ¹⁵ Ro'man ririi tijb espad ni nadoxh ro', con espad guin gudëëdaman casti benguixliuj, në con var guieb nabeeman laa reeman. Zi'c rë'p bejn guijc uv par guixiin, zian gudëëdaman loj reeman casti narooob ni zëëd por Dios Bén rajp gra guialrniabee. ¹⁶ Loj xcajpaman con cüdaman ca ree diidx ni rëb: “Rey Bén rniabee loj ree rey në Dad Bén rniabee loj ree dad.”

¹⁷ Dxel baguian tijb anjl za'liman loj gubijdx, dád rejs rbidxa'man, rbejdxaman gra ree be ni rzuj xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, ¹⁸ zi'c xbëël ree rey, xbëël ree capitan, xbëël ree Bén achut rüjn gan, zi'c xbëël ree way, xbëël ree Bén rbib laa reeb, xbëël gra ree bejn, zi'c xbëël ree Bén naj zi'c Bén nado' në xbëël ree Bén ad najt zi'c Bén nado', zi'c xi bëël ree bengol në ree xindoo.

¹⁹ Dxel baguian monstuo con ree rey yu' loj guidxliuj në ree xsuldad reeman, nadxag lasa' reeman par til reeman con Bén dxiib way naquich guin con ree xsuldadaman. ²⁰ Per laa reeman gunaaz reeman monstuo guin con Bén rusquiee rëb rudëë xtiidx Dios loj ree bejn, Bén rüjn milagr niz loj monstuo guin. Abi' por ree milagr guin basquieeman Bén guyu ree xsen monstuo guin gojp tëë reeman respekt xfigurib. Abi' monstuo guin con Bén rusquiee ni rëb rudëë xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. ²¹ Abi' los demazri ree xbejn monstuo guin güjt reeman con espad ni ririi ro' Bén dxiib way naquich guin, abi' gudaw ree be ni rzuj xanyabaa laa reeman, xt gudxa lën reeb gudaw ree xbëël reeman.

Ti mil ijz

20 Dxel baguian zidguiajt tijb anjl xanyabaa, ca'-man xguiibliaw bizë ni ad yu't lod rliox, ca' tëëman tijb cadén narooob. ² Abi' gunaazaman dragon, bëël gulal ni la xindxab në satanás, guxhiiman laab con cadén guin por timil ijz. ³ Dxel bazaalaman laab lën bizë ni ad yu't lod rliox abi' basiaawdxichaman bizë guin chitëë gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

⁴ Dxel baguian yagxhil zagdxé ree lasa' xyagxhil ree rey, lojn zobj ree Bén ni ma cwa' guialrniabee par güün reeman guialguxtis. Baguia tëën xsprijt ree Bén ni biru' yëjn guial gutie'ch reeman xtiidx Dios në gra ni ragbee reeman por Jesús. Laa reeman ad gojpt respekt monstuo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz. ⁵ Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz.

⁶ ¡Xiquilbaa ree Bén yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

⁷ Chi ma bayaaloj timil ijz guin, dxel yarii xindxab guin lod nayaawix ⁸ Par gusquieex bejn ree guidib guidxliuj. Gusquieex Gog në Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo.

⁹ Gra lad gui't reeman, guido'p reeman gadëd lod za' ree xbejn Dios në gadëd ro' guiedx lod rënman. Per laaman diizd xanyabaa guixhiaalaman bajl ni guze'c Bén guin ree xt yadëj reeman. ¹⁰ Abi' xindxab ni

basquiee laa reeman laax chu' loj bajl lod caye'c azufre, lod ma za' monstruo con bén rusquiee rëb rudëë xtiidx Dios loj ree bejn, lod ad yu't dxej yarii reeman lod sagdiaj tëë reeman dxej guiaal.

Yadëed ree bejn cwent loj Dios

¹¹ Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj në xanyabaa, gunidloj reen tiblayaa. ¹² Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stib libr ni la xlibr guialnaban. Dxel been Dios xguialgux-tisaman con ree bengüt guin zi'c ca loj ree libr guin xcwent ree ni been reeman. ¹³ Nijsdoo bayü xbungütan, abi' guialgüjt bayü xbungütan, abi' ree bengüt ni za' lod cabëz reeman guidxin dxej ni yadëed reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. ¹⁴ Dxel guialgüjt con lod guzu ree bengüt gulëjz reeman guidxin dxej yadëed reeman cwent loj Dios, grop reen bazaal reeman loj bajl, bajl guin naj guialgüjt barojp. ¹⁵ Abi' loj gajc bajl guin bayal ree bén ad cat laj loj xlibr guialnaban.

Xanyabaa cüb con guidxliuj cüb

21 Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt reen, ziangajc nijsdoo. ² Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhlaam con xin gac lacheelim. ³ Abi' dád rejs biguiejnan cha' bén gunee lod za' xyagxhil Dios, rëbaman: —Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. ⁴ Laaman gutiaa loj reeman nijs biin reeman, dxel achetri guialgüjt chu', guialroon, guialrunaya në guialzi, din gra ree ni guyu gocli ma gudëd reen.

⁵ Abi' bén zojb loj yagxhil guin, naman:

—Gra cayünan nicüb.

Na tëëman:

—Bacaa ree diidx guie, din laa reen naj diidxli ni rayal chililadx bejn.

⁶ Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diizd guia'xchej në par tiblayaa. Bén re'c nijs, naj yazaladx nijs lojman nijs ni ririi lod rajch nijs ni runee guialnaban.

⁷ Bén ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nan. ⁸ Per ree bén rdxeb sudxi'ch loj ni rliladx reeman naj, bén ad rliladx ree naj, bén ruladx ree güün ganax ni mal, bén rugüjt ree bejn, bén rüjn ree nidxu-udx con ree bén ad najt lacheel reeman, bén rüjn ree guialbidxaa, bén rën ree ni naladx reeman naj ree

Dios, në gra ree bén rusquiee, laa reeman rayal loj bajl lod caye'c azufre, bajl guin naj guialgüjt rarojp.

Jerusalén cüb

⁹ Dxel tijb guigajdx ree anjl bén ca' ree guigajdx ree cojp ni guidxa guigajdx ree guialzi bigra guin, bi'ta-man lod za'n, naman lon:

—Guda, din gulün lüj biinxdüb ni gac lacheel bén naj zi'c xi xiil Dios.

¹⁰ Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xci-uda narooob Dios zidguiajtan xi xanyabaa Dios. ¹¹ Ru-laan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdx ni la Jaspe, nayni zi'c tijb vidr. ¹² Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree bén Israel, tijb gaj lad port guin ca zi'c la tibcwaa gaj reeman. ¹³ Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur. ¹⁴ Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bén naj zi'c xi xiil Dios.

¹⁵ Anjl ni guneenë naj ca'man tijb var or din tia'beenëman ciuda guin con ree port guin con ze' guin.

¹⁶ Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'-man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. ¹⁷ Dxel cwa'-man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

¹⁸ Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni. ¹⁹ Xguiaj cimiant ze' guin najcchaawnën gadxagayaa ree guiaj zagdx. Guiaj yaloj guin najcchaawnën con guiaj ni la Jaspe, guiaj barojp guin najcchaawnën guiaj ni la zafiro, guiaj bayon guin najcchaawnën guiaj ni la ága-ta, guiaj badajp guin najcchaawnën guiaj ni la esmeralda, ²⁰ guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amata. ²¹ Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijb-gaj port. Abi' nejz narooob ni naa galay ciuda guin najn ganax or, zi'c tal naj tijb vidr ni rdëd biani grop xijch.

²² Ni'qui tijb yadoo ad baguiatan loj ciuda guin din dux Dad ree Dios bén ca' gra guialrniabee con bén naj zi'c xi xiilaman, laa reeman naj xyadoo ciuda guin.

²³ Abi' loj ciuda guin ad rüjnt naguiejn gusni gubijdx

ni'qui bëëw, din xbacha' Dios rusni ni abi' Bén naj zi'c xi xilaman laaman naj bajl ni. ²⁴ Bén zëed ree lod rent lod ren sa reeman loj bacha' guin, Bén ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin. ²⁵ Xport ciuda guin ad yu't dxej yaaw reen radxe, abi' ni ad zut guiaal. ²⁶ Gra xguialza'cdxoon con gra xguialzagdx ree Bén zëed lood rent lood ren, guidxin reen loj ciuda guin. ²⁷ Per ad yu't dxej chu' ni dxuudx loj ciuda guin, ni'qui ree Bén rüjn ni dxuudx ni'qui ree Bén rusquiee, Bén cazi ree laj loj xlibr guialnaban ni ca' Bén naj zi'c xi xil Dios, laaz reeman chu' loj ciuda guin.

22 Balüü tëë anjl guin lon tijb guiw naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con Bén naj zi'c xi xilaman, ² abi' zën galay loj nejz naroo ni naa galay ciuda guin. Galay nejz guin naa guiw guin, abi' grop lad guiw guin zojb yag ni runee guialnaban ni rtia chiptio'p loj ninejxh, gazobëëw ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. ³ Achetri ni mal chu' ni, abi' Dios con Bén naj zi'c xi xilaman cwe loj xi yagxhil reeman guiáad ree xbejn reeman gap da't laa reeman respekt. ⁴ Abi' ni guguaaloj reeman Dios, Bén ni ca ree lajman lucwaj. ⁵ Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

Ma zidyob gui't Jesucrist

⁶ Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios Bén razaladx diidx loj ree Bén rudëed xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. ⁷ Dad Jesucrist rëb guial nayob gui'taman.

¡Xiquilbaa ree Bén ridxga' ni ca loj libr guie ni rugojn ni gac!

⁸ Naj Waj, baguian biguiejn tëën ni guin ree. Abi' chi gulox baguian biguiejn tëën ni guin ree, dxel bazuxiban par ga'p da'tan respekt anjl ni balüü ree ni guin lon. ⁹ Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril Bén rudëed ree xtiidx Dios, në ree Bén ridxga' ree ni ca loj libr guie. Zeel Dios gojp da't respekt.

¹⁰ Na tëëman lon:

—Ad guquie'chil diidx ni zëed ree loj libr guie, diidx ni rugojn ree ni gac, din ma zidyob gac reen. ¹¹ Gol basa'n ree ben mal con xni mal reeman, abi' ree Bén naban nadxuudx zu naban reeman nadxuudx bal zian ruladx reeman. Per Bén rüjn ree zi'c rayal gusnuu güün reeman zi'c rayal abi' ree Bén naban zi'c rën Dios gusnuu guiban reeman zi'c rën Dios.

¹² Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman. ¹³ Naj naj zi'c lejtr A con lejtr Z, lejtr ni rzulojnë ni rlioxnë tëë alfabeto, din tijbzi naj rniabee diidx guialxchej në par tiblayaa.

¹⁴ Xiquilbaa ree Bén ni naj zi'c ree Bén ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee guialnaban.

¹⁵ Abi' xijch ciuda guin yaya'n ree benguijdx, Bén rüjn ree guialbidxaa, Bén rüjn ree ni dxuudx con ree Bén ad najt lacheel reeman, Bén rugüjt ree bejn, Bén ni rajp ree respekt ni naladx reeman naj dios, në ree Bén ruladx cwëëguijc ni rusquiee rniee tëë reeman diidx rusquiee ree. ¹⁶ —Naj Jesús ma guxhal da anjlan din gugojnman lëjt gra ree ni guie din guiëbidi laan loj gra ree Bén rililadx naj. Naj naj quijb xdiaa rey Davi, loj xdi-aaman zialan. Naj naj zi'c bajl nayni ni rliejn rsildoo.

¹⁷ XSprijt Dios con biinxdüb ni gac lacheel Bén naj zi'c xi xil Dios rëb reeman:

—Guda.

Abi' Bén riguijcn rniee reeman zian, rëb gajcaman:

—Guda.

Chutëëz Bén re'c nijs, gol guda, abi' Bén rën zajc guië'man nijs runee guialnaban lagajzi.

¹⁸ Gra ree Bén riguijcn ree diidx ni zëed loj libr guie ni gac, naj rni lojdi bal chu Bén gucaa guijc ni zëed loj libr guie, ziangajc zusro' Dios guialzi ni zëed loj libr guie par laaman. ¹⁹ Ziangajc bal chu chiquied xhie diidx guijc ree diidx ni zëed loj libr guie ni gac ziangajc chiquied Dios guijc ni rayalaman loj yag runee guialnaban ni ruza't libr guie ad zayu tëë'taman loj xciuda Dios ni ruza't libr guie.

²⁰ Bén ragbee guial diidxli naj gra ree ni guie, rëbaman:

—Walín, nayob guialan.

Zian gacan Dad Jesús, ¡Guda!

²¹ Dad Jesús güünle' gradi. Amén.